

INSTITVTIONVM
SACRARVM
PERIPATETICIS
INÆDIFICATARVM;

HOCEST,

Theologiæ, super fundamentis in
Peripateticâ Digbæanâ iactis,
extractæ,

PARS THEORICA.

Authore THOMA Anglo, è generosâ
ALBIORVM in Oriente Trinobantum
Profapiâ priundo.

TOMVS PRIMVS.

*Narrauerunt mihi iniqui fabulationes;
sed non vt lex tua Domine, Ps. 118.*



M. DC. LII.

8^o T. 18
Th






ADMODVM

REVERENDO PATRI

P.F.FRANC. DAVENPORTO,
vulgo à Stâ. Clarâ , Pro-
uinciæ Angliæ FF. Mino-
rum Exministro Prouin-
ciali , Olim apud Dua-
censes Lectore Theo-
logiæ Primario , Nunc
vero , Serenissimæ Regi-
næ Magnæ Britannia à
Sacris &c.

 *ABE (Doctissime pa-
ritèr & candidissime A-
mice) quem biennium te scribis
expectare Libellum. Sic nostri
ingenij paruitas fert ; exiguum
à y*

ingenti tempore fatum excludi-
mus, vel penitus nullum, si ad
tuum cōponatur Systema Doc-
tum (Iupiter) & laboriosum.
Quod ego, in exili meo miner-
uio, in penum consecraui Theo-
logicum, vnde vetera depro-
mam, vnde noua. Neque dissi-
mulo me suppar aliquid tuo ope-
ri cogitauisse. Sed tu per moder-
norum buccinas, per antiquo-
rum scholasticorum tubas, per
sanctorum tonitrua fama pala-
tia ipsa inter nubila condis.
Ego apud matina more modoque,
proximus terræ, parum se tol-
lentibus animis cerea cubilia,
non sine tenui rationis susurro,
floribus insternere molior. Quod-

cumque tamen est, tuam de eo
expecto sententiam; sed candi-
dam, sed quæ de veritate magis
sapiat quàm gratiâ; hoc est,
reipsâ amicam. Neque enim
mibi arrogo ut supremis infera-
tur tribunalibus tantillum opus.
Neque Lectorum quorumcum-
que sublimis despicio sensa. Sed
scio quòd chartis vulgaris à cen-
surâ perfugium non dii, non ho-
mines, non concessere columna.
Addo his, eos qui libros suos
sistunt ipsi Ecclesiæ, duo, à qui-
bus ipse alienus sum, professor
mibi videri. Videlicet & sua
esse quæ producunt, & sese
contra quoscumque eadem de-
fensuros, præter ipsa Ecclesiæ

capita. Ego contra quæ profero,
non assero, sed offero. Si quid
ratione subsistit, illud cupio,
non quia meum, sed quia veri-
tatis est, eiusdem cultioribus
commendatum. Vbi ratio va-
cillat, illic ego primus de gene-
rem non agnosco pullum. Quic-
quid in hoc libello non est proba-
tum, examini offertur; non à
me vindicatur. Satis est esse du-
bium, ut ego ei renunciem. Ni-
hil defendo, ad nullum contem-
do, nisi quatenus pro veritate
certamen est: fama securus,
quam optimam existimo, cum
charitate veritatis fulcitur. Sus-
cipe itaque opusculum, ut ab
amico ad te profectum, & ad

lydiam sacra vetustatis erudi-
tionem fortiter applicatum, cum
contracto remitte colore, ut syn-
ceritatem tuam ipso rubore tes-
setur. Sic te dignum egeris: Sic
tibi consecraueris

THOMAM EX ALBIIS



AD LECTOREM
CHRISTIANVM.

RATIO OPERIS.

Theologia, Dotum Ec-
clesiæ longè maxima,
quantò in sese præstantior est,
tantò & maiori scelere viola-
tur, & grauiori sanctitatis in-
commodo, post quàm inquina-
ta est, toleratur. Hæc est my-
steriorum interpretes, sacro-san-
ctæ à patribusque traditæ no-
bis fidei, (cui supercertare man-
datum accepimus) vindex &
protectrix. Per hanc, ipsum fi-
dei donum in populis per cha-
ritatem operatur. Hæc nos eru-
dit, in quam se seduxit semi-
tam, ambigua primo vultu sa-
crarum literarum sententia.

Hæc nos in lectione Sæctorum
& pugnantibus eorum sensibus
securus sistit; quos eorum se-
cretior perculit veritas; quos
fidelibus necessaria delectauit
allegoria, & humanis vsibus ac-
commodatior locutio. Eiusmo-
di cum sit hæc sacra facultas,
quid vlceris sæuius, quæ plaga
desperatior sanctæ Ecclesiæ ac-
cidere potest, quàm vt hæc su-
prema potestas, quæ ei quo-
dāmodo est suæ vires, sua mag-
na potentia sola, sub obscuri-
tate langueat, erroribus saucie-
tur, incertitudine dissoluta e-
neruetur? Neque tamen susti-
net hæc ætas, vt de demonstra-
tione vel infallibili decisione
inijciatur mentio; vt discipli-
na, & consequentiarum nexu
& propagine plexa vel intexta
cogitetur Theologia; vt alijs
nixa credatur fundamentis,

quàm vel fortuitâ vocularum
cercarum connexionem, vel præ-
stigiatrice quâdam (sub Philo-
sophiæ cognomento) in vtram-
que partem bombos sine men-
te & nugas effutiendi temeri-
tate. Quid ultrâ mali expecta-
re possumus? aut quousque fer-
rum & ignem prohibemus? Et
idolum desolationis in templo
adoramus? Si quid Christianæ
venæ adhuc in pectore tibi sa-
lit, erubescet turpitudinem ma-
tris tuæ, & pio rugitu ad reme-
dium conclama. Mihi quod-
cumque est hoc operis expres-
sit seuera indignatio, & libuit
tantæ spei primordijs & nasci-
turis magnorum ingeniorum
foetibus, per infamiam & bo-
nam famam, meo periculo, tuo
emolumento præludere. Sul-
cus quem ducō, deriuandis in
materiâ Theologicâ veritatis

& certitudinis riuulis seruitu-
rus speratur. Vbi desijt Philo-
sophia, illinc nascitur. A ne-
cessitate creandi hominis futu-
ri vniuersitatis finis, emicat
prima saliens; & per lapsum, &
reparationem currens, in mare
æiternitatis & diuinæ pro-
uidentiaæ abyssum, suo auctu
perditur, & quasi in principia
sui reuersa resoluitur. Habes,
enr & qualis natus sit Adamus:
in quam seruitutem lapsus:
quantâ ipsius *artoris* con-
cussione, ad redemptionem
agendum fuit: vnde in summâ
simplicitate oppositio: Impe-
rium & obsequium: patiens &
qui in eum agat: Quo foedere
summa sunt imis illigata: arti-
fex artefacto, creaturæ crea-
trix vita: Quid Deus homo:
Quo sublato signo, Ecclesiam
ad salutem vocauit: Quibus

mysterijs vocatos iniriauit : Cui
tutelæ adolescentem Ecclesiæ
pubem commendauerit : Quo
successu maturescat, & effrac-
to naturæ & mortalitatis ergas-
tulo, in æternitatem sit trans-
ferenda : Conuersusque ad
Deum à quo exiuit Deus, quo-
modo acceptam potestatem ei
à quo accepit restituat; cuncta
bonitate saturata in indefecti-
bilitate continens & stabiliens
Ens. Vide quo nauigaturus sis
alueo; ad quàm excelsa prouo-
ceris; quanto malo in similibus
erretur; quàm perniciosa sit te-
meritas; quàm non tam futile,
quàm execrabile sit in huius-
modi post factam veritatis
spem & propositionem, vanis
& mendacibus nugis famelicas
mentes pascere. Memento ita-
que te hominem natum verita-
tis capacem; diuino munere in

familiari tibi idiomate propo-
sita hæc omnia vt ea intellige-
res, & ijs fruereris. Qui absque
demonstratione hoc sperat, se-
se, & te deludere molitur. Ad
ipsam itaque esse conandum.
Hoc vbique spectandum, vt
certa secernas à dubijs. His
laborem, illis fidem te debere
intelligas. Hanc, operis quod
vides intentum credas, & am-
plexeris. Herculeum esse la-
borem hunc & partum, ar-
guunt immissi ipsis cunis à
scientiarum nouercâ sui an-
gues, prætexta elidendi apo-
logia. Aiunt itaque Theolo-
giam non pati demonstratio-
nem. Reponimus *id est in d. n. p. a.* Vr-
gēt fidei oblcuritatem, & inac-
cessas rationi latebras diuinita-
tis. Referimus, nobis non satis
liquere ad quid colliment. Si
enim non potuisse rationem ad

mysteria citra reuelationem
conscendere, vltro accedimus:
Sin neque post reuelationem
illius ope non posse ipsi rationi
satisfieri, difficulter hoc à no-
bis impetrent, nisi probaue-
rint. Verum etiam hîc suspec-
tus est ambiguitatis confli-
ctus. Neque enim ipsa deita-
tis lux per vllam reuelatio-
nem (sepositâ quam claram vi-
sionem appellamus) dispici va-
let, neque vllum mysterium
quod eam inuoluit penitus in-
dagari potest rationis & obscu-
ræ reuelationis connixu. Sed
hæc non impediunt, quin qua-
lis de Deo, talis etiam de ipsis
mysterijs demonstratio produ-
ci valeat.

A libertatis cauo sibilat po-
sterior anguis, ea quæ libero
Dei arbitrio referenda sunt, de-
monstrationis non esse obno-

xia conatibus suggerens. Sed
à tenebricosa ignorantia antro
nascitur hæc obiectio : verè e-
nim de libertate humanâ diffi-
cilis est cognitio : Sed non quâ
libertatis nobilitatem, sed quâ
defectibilitatis & vitij incom-
moda vestitur. Quatenus enim
libertas est, certis & clavis ve-
stigijs incedit, inerrantique
passu à sapiente vestigari nata
est Quatenus autem phantaf-
matum & appetitus & spiritu-
um vanitati & mobilitati, & in-
certissimis ictibus casûs obuiam
exponitur, eatenus non nisi ab
eo qui fortuitam causarum col-
lectionem intelligat, etiam ip-
sa comprehendi potest. Cùm
itaque tanta vilitas non sine
blasphemiâ cogitari in Deo
possit, ipsius decreta libera
manifestissimè demonstratio-
nis accrescunt obiecto. De

quocumque itaque per demon-
strationem cōstare potest, me-
lius esse operi diuino, vt ipsum,
quàm ipsius oppositum in re-
bus existat, de eo demonstrati-
uè constat factum esse. Et qui-
dem à propriâ causâ, si imme-
diatè à Deo pendeat ; post-
quàm hoc demonstratum est,
quod Deus fecit illud omni-
modis esse facturæ ipsi opti-
mum.

Eugè modò, aude expectare
etiam in Theologiâ intellectus
tui saturitatem ; quære in eâ
certitudinem ; & disciplinæ &
demonstrationiseuidentiâ ; &
quod his omnibus maius est,
mentis pacem, & tramitem ad
vitam apertum & placidum,
quæ est beatitudo vera, quam in
hâc vitâ sperare contingit. Ne
te deuient laruæ & *μοιρολύκεια*
offundentium caliginem om-

nibus rebus. Scito Deum naturæ esse authorem, hanc per supernaturalia perficere & eleuare, non disparatam quandam rerum seriem nobis impluere. Ratio, nobis natura est; rationis perfectio, est demonstratio: Hanc itaque à Deo non desperes. Eâdem labyrintho consenescebat Philosophia. Facem tibi ostendit DIGBAEVS. Si ex eâ cessit desperatio, aude amplius. Ipsius te vestigia etiam ad Theologiæ arcem deducunt. Plantata est in naturâ Theologiâ; Fides in humano nobis idiomate tradita est. Quid celsius in Theologiâ disputatur quàm Pater, Filius, Generatio, Spiratio, Natura, Persona, Conuersio, Peccatum, Bonitas, Fœlicitas, & Miseria? Sed hæc omnia ante Christum à naturâ & ratione edocti eramus. Atta-

men si hæc lucida nobis ma-
neant, obsecuri nihil relinquetur.
Quid itaque trepidas, & Dig-
bæanos ausus tremebundus a-
uersaris? si falsa sunt quæ discis,
ipsa te ratio dedocebit: si vera,
ipse te successus lætūm prouo-
cabit: si incerta, num quic-
quam quærendo perdis? Dex-
tro proinde pede, calcatam
alienis operis viam, gratus in-
sisce,



INDEX
LIBRORVM
ET LECTIIONVM

quæ in hoc primo tomo
continentur.

LIBER PRIMVS.

De necessitate aduentus Christi.

LECTIO I. Quod primus
homo creatus sit in chari-
tate. pag. 1.

Lect. II. Quod primus homo
creatus sit in iustitia origi-
nali. pag. 7.

Lect. III. Quod primus homo
incurrerit peccatum origi-
nale. pag. 14.

Lect. IV. De Natura & effectis
peccati originalis. pag. 22.

Lect. V. Quid sit peccatum
proprie dictum, seu actuale.
pag. 28. ē ij

- Lect. VI. De diuisione peccati
actualis in peccatum mortale
& veniale. pag. 37.
- Lect. VII. De pluribus alijs di-
uisionibus Peccati. pag. 44.
- Lect. VIII. De rationibus natu-
re, & supernaturalitatis. p. 50.
- Lect. IX. De comparatione su-
pernaturalitatis & Gratię. p. 57
- Lect. X. De Gratia sanctifican-
te, & virtutibus supernatura-
libus. pag. 64.
- Lect. XI. De ijs quę dicuntur
per se bona, vel mala. p. 71.
- Lect. XII. De connexionē vir-
tutum & oppositione vitiorū
ad Charitatem. pag. 78.
- Lect. XIII. De iustificatiōe; &
ipſius, seu habituū superna-
turaliū productione. pag. 86.
- Lect. XIV. De rationibus Me-
riti & Demeriti. pag. 96.
- Lect. XV. De necessitate Gra-
tię auxiliatricis. pag. 104.

Lect. XVI. De necessitate ad-
uentus Christi, & gratiæ per
ipsum datæ. pag. 118.

LIBER SECVNDVS.

De Mystério sanctissima

Trinitatis.

Lect. I. Esse in Deo vnitatem,
& pluralitatem, sine repug-
nantia. pag. 131.

Lect. II. Quod pluralitas quæ
est in Deo, sit Personarum.
pag. 140.

Lect. III. De Comparatione
essentiæ & Personæ. pag. 151.

Lect. IV. Quod sint in Deo
duæ Personæ, quæ sint Pa-
ter & Filius. pag. 161.

Lect. V. De illa diuinis tertiam
Personam, quæ non sit Filius.
pag. 174.

Lect. VI. De Relationibus,
processionibus, earumque
principijs pag. 190.

Lect. VII. De prioritate & cir-

cum in sessione personarum
diuinarum. pag. 196.

Lect VIII, De usu nominum in
hoc mysterio. pag. 112.

LIBER TERTIVS.

*De Mysterio Sacrosanctæ
Incarnationis.*

Lect. I Quod in Christo sit vni-
ca existentia, nempe Diuina.
pag. 221.

Lect. II. Quod solus Christus
existat existentia diuinâ : &
habeat duas naturas in vno
supposito. pag. 229.

Lect III. In quo consistat vnio
Hypostatica? pag. 241.

Lect IV. De usu vocum circa
personam Christi. pag. 247.

Lect V. Christum & secundum
animâ, & secundum corpus esse
perfectissimum. pag. 254.

Lect VI. De Actione Incarna-
tionis. pag. 264.

Lect VII. De Patre & Matre

Christi in generatione tem-
porariâ. pag. 271.

Lect. VIII. De scientiâ Christi
ut Hominis. pag. 280.

Lect. IX. De visione beatificâ,
& virtutibus Christi Domini.
pag. 290.

Lect. X. De sanctitate seu im-
peccabilitate Christi. p. 301.

Lect. XI. De Libertate Christi
Domini. pag. 308.

Lect. XII. De speciali qualitate
actionum Christi Domini.
pag. 314.

LIBER QVARTVS.

De Admirando Legis Gratiæ

Sacrificio.

Lect. I. Quod vnicum, & quod-
nam sit Legis gratiæ sacrifi-
cium. pag. 331.

Lect. II. In quo consistat & ma-
terialiter, & formaliter ratio
huius sacrificij. pag. 339.

Lect. III. De significatione vo-

cum, *Corpus, Sanguis, meum.*

pag. 353.

Lect. IV. Quid sit esse conco-
mitanter sub sacris specie-
bus?

pag. 363.

Lect. V. Quomodo Acciden-
tia panis & vini maneant cum
corpore Christi.

pag. 371.

Lect. VI. De modo quo corpus
Christi se habet ad sacras
species.

pag. 386.

Lect. VII. De ipsa actione tran-
substantiatiuâ.

pag. 399.

Lect. VIII. De quibusdam con-
sequentibus ad existentiam
Christi sub speciebus p. 416.

Lect. IX. Quid sit quod Fideles
Missæ nomine intelligant.

pag. 424.

INSTITVT



INSTITVTIONVM
SACRARVM
PERIPATETICIS
inædificatarum

LIBER PRIMVS.

De necessitate aduentus
Christi.

LECTIO I.

*Quod primus Homo creatus sit in
Charitate.*



Vm ex Philosophiâ no-
tum sit, mundum non
propter sese esse factum,
sed propter aliquid æter-
num (animas puta rationales, quæ
ex hominibus emergunt) conse-
quens est, in creatione mundi, huma-
nam etiam naturam esse creatam.

A

Porro neque hominem, prout in hac vitâ degit, propter semetipsum, seu propter ipsam hanc vitam, creatum esse, eâdem consequentiâ notum est; cum hac vita neque perpetua sit, & in motu consistat sicut ipse mundus.

Quare cum homo non propter aliud, sed propter sese creatus sit; neque ordinabilis sit ad aliud, quàm ad suam perfectionem: sit, summam ipsius perfectionem, non in hac vitâ quærendam esse: sed in Animâ separatâ: & hanc vitam non ad aliud primariò esse ordinatam, quàm vt animæ iam abstractæ optimè sit.

Rursus, cum animæ essentia in eo quòd sit cognoscitiua consistat, perfectio ipsius est cognitio. Quoniam itaque omnis anima separata, cuncta existentia citra Deum clarè cognoscat (etiamsi nunquam ex utero matris effundatur) non potest vita homini propter hanc cognitionem esse data.

Præterea, cum quò plus de rebus creatis cognoscit anima, eò magis clarè cognoscit Deum esse summè

dignum intelligi ; & iam separata, ex omnibus creaturis, & quantum ipsi possibile est, fertur ad cognoscendum Deum ; fit, omni animæ separata, ex ipso ductu naturæ, esse ingens desiderium videndi Deum.

Uterius, cum aliquæ animæ post separationem sint misera, ex eo quod desiderant aliquid quod non habent, patet, cætera objecta, præter Deum, non cogere animam ad sui amorem. Dei autem intelligibilitas cum sit æqualis suæ essentia & virtuti intellectiua, ex necessitate excedit totam capacitatem intellectiuam animæ ; & per consequens, etiam satiat, & trahit animam quanta quanta est.

Ex his conficitur, vel nullum esse bonum adæquatum animæ ; vel Deum clarè visum, esse illud bonum. Cum itaque natura & Dei essentia (in quâ primò consistunt ideæ, & rationes creaturarum) non possint esse suspectæ de defectu in naturâ humanâ, quæ est præcipua portio naturæ ; palam est hominem ad Deum clarè videndum esse conditum.

Dices, nisi visio Dei sit possibilis,

4 INSTITVT. SACRARVM.

totum hunc discursum labascere: hoc autem neque esse probatum, neque fortè probari posse; cùm nulla accidentia habeamus, per quæ possit conuinci. Respondetur, quod quoniam esse aliquid ordinatum ad aliquam perfectionem, & non esse vim quæ possit ei talem perfectionem tribuere, inferret defectum in prouidentia diuinâ: eo ipso quod patet naturam humanam ordinatam esse ad visionem Dei, probatum est illam esse possibilem.

Dices, sufficere homini esse beatum vt hominem, hoc est imperfectè; & non esse necesse illum perfectam beatitudinem consequi. Respondetur, esse beatum vt hominem, significare habere illam beatitudinem, cuius capax est, & ad quam institutus est ex ordine naturæ: hanc autem esse visionem claram Dei, deductum est; & minor non sufficit, vt naturæ sit rectè consultum.

Cùm verò clarum sit, essentiam Dei aded creatorum & creabilium rationes excedere, vt infinita sit distantia; pariter clarum est, ex eorum

LIBER I. LECTIO I.

5

majori vel minori cognitione, non acquiri aptitudinem majorem vel minorem ad cognitionem Dei, quantum est ex parte objectorum : quare cum in animâ separatâ non sint nisi cognitio & affectio ; fit dispositionem, ad quam acquirendam nobis vita data est, consistere in eâ affectione quæ necessaria est, ad visionem claram Dei obtinendam.

Rursus, cum major & vehementior affectus potentiùs animam trahat quàm minor ; palam est animam non conuerti ad Deum tanquam ad vltimum finem, sicut oportet, id est, tanquam illum ad quem cætera omnia referat ; si quicquam amet vel independenter à Deo, vel taliter vt appetitus illius sit vehementior, quàm amor in Deum.

Sed & natura sic comparata est nobis, vt non valeat vnum propter aliud amare, nisi ipsum aliud quoquo modo priùs amet. Sed neque plurium per se amatorum vnum iuxta aliud moderari, nisi ipsum aliud plus amet ; vnde fit, vt, si homo quicquam solum vel primum amat,

6 INSTITVT. SACRARVM.

necesse sit illud per se & tanquam vltimatum finem, secundùm quod tunc dispositus est, diligat.

Patet itaque hominem primò creatum, si quicquam amabile per se ante Deum conspexisset & admauisset, illud pro vltimo fine tantisper habiturum fuisse, donec Deum esse summum bonum didicisset; &, quod sequitur, erraturum fuisse à rectâ vitæ semitâ, & directione in vltimum finem; & hoc ex vi creationis suæ.

Quare, cùm in operibus diuinis (prout ab ipso specialiter procedunt) nullus error, nedum adeò immanis, cogitari possit : sic creatus est homo, vt primum quod sensu perciperet, & in quod affectum dirigeret, esset Deus; & cætera omnia quasi ab ipso donata, & per consequens vt quæ affectum in Deum augerent, agnosceret & acceptaret.

Cùm itaque ille amor qui Deum propter sese tanquam primum & summum amabile amplexatur, vocetur charitas; palam est, primum hominem, qui Adamus indigitatur,

charitate, in ipsâ primâ suâ creatione, imbutum fuisse: siquidem ipsam creationem non intelligimus perfectam, nisi quatenus hominem in actuali sui gubernatione (quod per finis amorem fit) constituat, quasi in puncto initiatiuo sui motûs & vitæ.

LECTIO II.

Quòd primus homo creatus sit in iustitiâ Originali.

EX dictis vlteriùs habetur, quòd quia Adamus secundùm animam, quasi ex vi creationis, habiturus erat hunc affectum, vt Deum summè amaret, cætera verò subordinatè ad ipsum; & vita ei danda erat, vt hic affectus in eo cresceret; corpus autem propter animam fiat; tale ei corpus, & fabricari debuisset, & fabricatum esse, quale ad hunc ordinem affectus conseruandum & augendum, aptum natum foret.

Cùm itaque passio (hoc est motus appetitûs sensitiui, seu cordis, vio-

§ INSTITVT. SACRARVM.

lentus & impediens operationem cerebri) sit causa actionis præter rationem ; necessum est eam dispositionem cordis quæ non impediat , sed magis adiuuet naturalem cerebri motum , esse illam quæ Adamo tribuenda erat , & per consequens tributa fuit ; quæ scilicet à singulis objectis secundùm naturam bonis vel malis moueri faceret cor proportionatè ad necessitatem Adami.

Cùmque rursus peccatum ex errore sit ; & error ex præcipitantiâ ; & præcipitatio ex passione ; palam est (durante hâc dispositione cordis in Adamo) non potuisse in eo peccatum contingere ex vi carnis ; neque potuisse ipsum ex vi suæ carnis tentari.

Palam igitur est, Adamum temperantem & fortem fuisse ; cùm neque bona , neque mala secundùm naturam , eum diuerterent ab actione secundùm rationem. Sed & iustum ; cùm bona fortunæ , nisi ex opinione falsâ , non quærantur nisi propter bona , vel mala secundùm naturam. Tandem etiam prudentem ; cùm ni-

LIBER. I. LECTIO II. 9

hil concupiscibile posset electionem rectam in eo præuenire.

Rursus , cum exercitatio & vita (secundùm rationem acta) confirmet & augeat subjectionem corporis ad rationem , & animam ; ipsamque animam ad perfectionem perducatur ; poterat Adamus ad quemlibet gradum virtutis , & eminentiæ animæ supra corpus , adjuuante ipsâ carne , cum delectatione peruenire , modò ne tempus & valetudo ei deesset.

Adami autem corpus, quoniam ex elementis communibus ipsi & cæteris circumstantibus corporibus formatum erat, & in medio eorum constitutum ; neque vitari poterat , nisi per mixtionem alicuius extremi ; consequens est cuicumque vitio ipsius , per aliud extremum remedium adhiberi potuisse, nisi vel scientia deforet , vel non congruo tempore adhiberetur.

Cùmque Adam non propter aliud , sed propter sese , & reliqua propter ipsum creata sint : quæ autem propter sese fiunt , ex intentione facientis sunt perpetua ; sequitur,

Deum media ad finem sufficiētia nōn fecisse, nisi illam scientiam in Adamo fecisset, quæ necessaria erat ad hoc, vt remedia sibi conuenientia ad perpetuitatem adhibere posset; & per consequens datam fuisse illi immortalitatem, quā posset non mori.

Quoniam itaque finis vitæ humanæ est pertingere ad beatitudinem, hoc est, ad visionem claram Dei: data est Adamo possibilitas viuendi iucundè, donec per exercitationem virtutum humanarum, ad eum statum animam suam perduxisset, vt mereretur eam recipere; & ex vi ipsius, ipsum corpus in aliam qualitatem transmutaretur: quæ quoniam adeò diuersa ab hâc elementari esset, etiam ipsam loco separari conueniens foret; & sic in aliam partem mundi transplantaretur.

Porro cum finis iste promissus non datus foret, sperabilis erat, & speratus Adamo; nondum possessus. Spem itaque habebat Adamus, sicut & charitatem: quæ, cū cognitionē rerum non visarum (quas fidem nuncupamus) præsupponant, etiam fidem, &

quod sequitur, virtutes Theologicas
vniuersas æquè ac Morales habuit.

Cùmque ex his, & dispositione
cordis ijsdem promptissimè ancil-
lante, necessum sit, eum aptum na-
tum fuisse ad operationes siue intelle-
ctûs speculatiui, siue practici, & etiam
voluntatis quæ subseruiunt his virtu-
tibus, & ad quas à Spiritu sancto per
harum virtutum impulsum mouetur
homo; fit, ipsum facilè fuisse mobi-
lem à Spiritu sancto; hoc est, dona
Spiritus sancti vniuersa possedisse.

Præterea, cùm sicut intellectus per
vnum actum demonstrationis de ve-
ritate aliquâ adeò conuincitur, vt
nullum dubium de ipsâ habeat; sed
constâter in illa permaneat: sic etiam
voluntas circa aliquid in quo nullam
difficultatem sentit, vnico actu nata
sit constantiam acquirere; in Ada-
mo verò nulla fuit difficultas circa
materiam virtutum, & donorum
prædictorum: Euidens est illum eas
constanter operari naturam esse; &
omnium non solum actus, sed etiam
habitus possedisse.

Cùm itaque sanctum dicimus il-

lum, qui sancitus, id est, stabiliter Deo consecratus, seu constans est in seruitute Dei; seruitus autem Dei principaliter consistit in charitate, & consequenter in virtutibus & donis ab illâ dependentibus; constantia verò, seu habere habitum illarum, est esse sancitum & confirmatum in ijs; palam est Adamum sanctitatem habuisse.

Similiter cùm amicitia, sit benevolentia quædam inter redamantes; pateat autem & Deum amauisse Adamum, cui tanta bona, non propter aliud, sed propter semetipsum dedit; & Adamum redamauisse Deum per charitatem; fit, Adamum fuisse amicum Deo. Et quoniam, contra quem Deus nihil querelæ habet, dicitur iustus seu innocens; contra verò amicum amicus non habet querelam; patet Adamum habuisse statum innocentiae & iustitiæ.

Tandem, cùm actus humani, siue intellectûs, siue voluntatis, & ortum habeant ex dispositione corporeâ membrorum, phantasmatum, & spirituum; & per ipsam exercitationem

relinquant in corpore aliquam novam, & sibi propriam dispositionem; sed & in Adamo peculiarem radicem corpoream habuerint ex ipsâ creatione ipsi inditam; in generatione verò dispositio peculiaris parentum nata sit transfundi in prolem; sit, posteros Adæ ex ipsâ vi generationis, & æqualitatem passionum, seu cordis, & cerebri, & inclinationes ad virtutes fuisse accepturos.

Quapropter palam est infantes naturaliter & sine ullâ repugantiâ acturos & passuros fuisse, quæ pro ratione ætatis agenda vel patienda forent secundum naturam; & accedente ætate & instructione, curâque parentum, in primo rationis ictu, ad Deum futuros fuisse conuerti, eumque super & ante omnia fuisse adamaturos, connaturaliter ex vi dispositionis per generationem acceptæ; & per consequens, parentum iustitiam in eos fuisse propagandam; hoc est, fuisse originalem,

LECTIO III.

*Quod primus homo incurrerit
peccatum originale.*

CVm itaque posterì Adæ in virtute & beatitudine prosequendâ difficultatem magnam experiamur; euidens est, non esse propagatam in nos eam iustitiam: Et cum in nobis causa huius defectus esse non possit, in ipso Adamo & parentibus fuit: Et quod sequitur, immutata in ijs ante generationem fuit hæc dispositio. Quod cum per errorem non potuerit contingere (cum Deus scientiam sufficientem dederit) necessum est per peccatum, hoc est, quòd à ratione agnitâ defecerint, contigisse.

Quare, cum corpus ijs tale formatum fuerit, vt ex vi objectorum materialium, neque motus appetitûs debito violentior, neque opinio falsa creari potuerit; clarum est objectum aliquod spirituale immixtum

LIBER I. LECTIO III. 15

esse, vt homo ad peccatum pertraheretur. Et hoc, non ex vi alicuius hominis, puta vxoris; cùm enim ipsius corpus, ex corpore Adami, formatum fuerit, ex necessitate eandem dispositionem habuit: quare necesse est hanc immutationem, à mente alterius naturæ, principium traxisse.

Hæc verò mens, si naturaliter corpori conjuncta foret; vel corpus ex nostris Elementis compositum haberet, vel ex aliis. Si posterius, loco separata & à nostrâ conuersatione aliena fuisset, vt ratio & experientia docent; sin prius, æquè cum Adamo finis orbis terrarum fuisset; atque adeò duo fines & Domini rerum fuissent. Fuit itaque mens abstracta; quæ quia non possit præter naturam hominis membra & spiritus mouere, ex necessitate per alloquium, primos parentes corripit. Talem autem mentem diabolum appellamus. A diabolo itaque peccati primi, & malorum sequentium, origo incepit.

Corruptio verò per alloquium, deceptio est. Sapientes autem & per-

fecti in scientiâ non sunt obnoxij deceptioni. Quare Euam seduxit diabolus, non Adamum. Ea verò, quoniam quasi in disciplinam tradita erat Adamo; & discennes, & sentientes sese indigere scientiâ, ipsius tanquam connaturalissimæ perfectionis magnum desiderium habent; ex necessitate ad illam super omnia bona temporalia afficiebatur.

Quoniam verò iustitia Adami constantiam habebat ex æquabilitate corporis; & hæc, in eo quòd situm esset cor ipsius in medio extremorum; medio autem, & defectus & excessus sunt oppositi, sed magis defectus: diabolo perueniendum erat ad euertendam iustitiam, corrumpendo æquabilitatem corporis; & hoc per excessum, quia facilius erat; vtpotè qui minùs repugnaret naturæ.

Igitur Diabolus affinxit fructui (cuius vis erat nimium alere corpus humanum, & per consequens accendere illud in venerem) opinionem creandæ scientiæ; vt cupiditas scientiæ addita dulcori fructus (cuius

iustitia maxima est in pubertate iuuenibus, magis verò puellis) daret vim corrumpendi in eâ timoris Dei; quod & successit.

Neque mirum si fœmina accensa in venerem, cucurrit ad maritum, voluptatem, seu quod illa tum adhuc sentiebat, bonitatem fructus, testatura, & eidem communicatura: aut si ille nouâ specie fœminæ, oculis, ore, & totius corporis floridiori habitu ab esu fructûs concepto, blanditiis, & quæ in simili ardore abundant, victus, & quasi sensu emotus, ipse quoque de fructu comederit, & in similem ardorem inciderit, permotus ab amabilissimo objecto corporeo à mente eleuato.

Neque dubium esse potest, quin si parentes in eâ corruptione corporis prolem generauerint, similem corporeæ dispositionis inæqualitatem in eam fuerint traducturi. Et quoniam ipsa anima rationalis, est forma corporis; & per consequens ex necessitate apta, & proportionata corpori; necesse erit eam infundi talem, qualis nata est simili corpore uti;

quare etiam ipsa ex generatione habebit distorsionem aliquam, & ineptitudinem ad opera rationis, proportionatè ad corpus.

Hæc distorsio quia nascitur ex actu conuersionis ad creaturam, necesse est ipsammet esse inclinationem similem; & per consequens esse dispositionem quamdam habitua-lem ad actum peccati; & habere oppositionem cum charitate; ac demùm esse quasi habitum peccati. Habent itaque omnes homines ab Adamo per generationem propagati, ipsâ nasciturâ seu naturâ peccatum habituale & priuationem charitatis.

Obiicies, quod si anima infunditur omnino proportionata corpori, futuros amentes, & furiosos, etiam quoad animam aliquos.

Respondetur, amentiam, & furorem, vel significare omnimodam priuationem rationis per defectum in ipsa substantia cerebri; & sic, qui ex ipsa conceptione talis foret, non esset homo: vel tantummodo defectum in membris circumstantibus; & talis debilitas ablatis circumstan-

riis (vt in animâ separatâ) jam non est, sed præterit cum corpore.

Obijcies rursûs , si foret talis distortio in naturâ , pertineret ad indiuiduationem animæ; cùm omnia accidentia , quæ concurrunt ad primam productionem , signent ipsam indiuiduationem. Quare, manente animâ, non posset auferri.

Respondetur ; imperfectiones naturales non omnes pertinere ad indiuiduationem , sed eas tantummodo quæ pertinent ad primam actionem, id est, ad modum cognoscendi; cæteras posse per mutationes aduenientes tolli, & esse qualitates animæ, non substantiam : & huiusmodi esse quæ circa particularia volita afficiunt hominem, etsi in prima generatione procreentur.

Ex dictis liquet, nihil opus esse ponere voluntates omnium posterorum, in voluntate Adami, ad assignandam rationem peccati originalis; maximè cùm nullum appareat vestigium, neque in sacrâ scripturâ, neque in traditione Hebræorum, aliqujus talis conuentionis vel pacti in-

ter Adamum & Deum facti ; & sit contra expressam declarationem Dei , quòd vnus non punietur pro alio.

Et prætereà , secundùm naturam voluntas prolis non est in parente ; cùm causa causæ non sit causa causati ; nisi quatenus & quando facit causam causare. Pater autem facit filium posse velle , non autem actu velle quatenus pater est. Quòd autem parens interdum obliget posterios , est ex eo quod ponit seu facit eis conditiones in quibus melius est ijs taliter operari , & hoc est esse causam volendi ijs. Neque facit hoc tanquam pater , sed tanquam negotium eorum gerens. Ad hæc neque ex more humano satis tractum est. Filij enim parentum culpâ non perdunt nisi illa , ad quæ non aliter ius habent , quàm per parentes. Vt ergo filij Adæ culpam , & culpæ pænam contrahant ex voluntate particulari Adæ , non est secundùm iura humana. Neque interest occidi filios aliquando propter culpam parentum ; hoc enim est malum quidem illis fieri ,

sed non eos puniri: sicut si pater suâ culpâ necatur, fit malum filiis, sed non pœna.

Adde quod reuerà, Deus esset causa peccati originalis. Cùm enim voluntas posterorum non sit ex naturâ rei in Adamo, non potest aliter esse in Adamo, nisi quia Deus, in cuius potestate sunt omnium voluntates, vult & constituit eas in voluntate Adami; & ex hac constitutione, peccatum Adæ est peccatum ipsorum: palam est itaque ex solâ Dei voluntate peccatum Adæ esse peccatum filiorum. Item claret non habiturum veram rationem peccati, sed tantummodò esse peccatum per imputationem; quia Deus imputat τὸ nasci à peccatore, illis in peccatum: cùm cætera peccata, & virtutes iis oppositæ, & specialiter iustitia originalis, constituta fuisset in positivis perfectionibus, vel imperfectionibus animæ: quare tantundem de peccato originali credendum est.

Sed & peccatum originale distinguitur, quasi aliud peccati genus, à peccato actuali; in hac autem

II INSTITVT. SACRARVM.

explicatione, foret peccatū actuale; (quale est vel omissio, vel cū negligentia imputatur pro actu) idcirco enim ponit hæc sententia, omnium voluntates in voluntate Adami, vt volitio Adami, sit volitio eorum; sed volitio est actus; &, si est peruersa, actuale peccatum.

Tandem peccatum originale censetur causa omnium aliorum peccatorum, & damnationis totius generis humani. Dicere verò peccata cætera ab hoc peccato oriri, absque ullâ causâ secundâ, quæ ad peccatum pertrahat, purè ex eo quòd Deus subtrahat gratiam ex causâ imputatiua; neque naturæ leges, neque benignitatem diuinam, satis propugnat.

LECTIO IV.

*De natura & effectis peccati
originalis.*

VLterius ex dictis accipitur, in quo consistat ratio originalis peccati; puta in conuersione finali ad

creaturam, prout dicit auersionem seu priuationem conuersionis ad Deum ex corporis inæqualitate ortam; sicut & iustitia originalis dicebat conuersionem ad Deum constantem, ex æquabilitate carnis ortam.

Vnde, prout est peccatum, est principaliter in voluntate; quia sicut peccatum in sua prima significatione, significat actuale; sic habitus peccati significat dispositionem potentiam ad talem actum: sed quia eadem accidentia, quæ constituunt naturam, faciant eam aptam operationi; hæc dispositio, quatenus pertinet ad constitutionem naturæ, potest dici esse primariò in natura; etsi ratio cur dicatur naturalis, est quia, vel naturâ, id est, generatione, accipitur; vel quia, communis est omnibus, & non ex proprietate singularium ab vno habeatur & non ab alio. Est autem habitus, sicut habitus solùm nominat constantem dispositionem sese habendi secundum vel fecus naturam; vel ad operationem meliorem vel seuiorem.

Quare concupiscentia non est peccatum originale propriè; sed causa dispositiua, & alio modo effectus ipsius; cùm potentia materiales, neque possint conuerti, neque auerti à Deo formaliter. Dicitur tamen peccatum magis esse in carne, quia quomodò est in eâ, non est prorsus auferibilis; cùm ex anima tollatur: vnde dicitur bonum non habitare in carne.

Patet etiam, cur cùm plura peccata parentum videantur suas impressiones in sobolem transferre, solum tamen peccatum Adæ dicatur in posteros traduci: quia scilicet priuatio originalis iustitiæ, ex vi peccati Adæ, facta est: vnde aliæ causæ accessoriæ non possunt illam facere: quare tota peccati ratio ab Adamo est; etsi quantitas conuersionis ad creaturam augeatur, etiam ex alijs peccatis. Prætereà sicut proles non semper, neque necessariò, est similis patri; sed interdum auo vel patruo; sic neque peccata eorum ex necessitate participat sicut Adami. Consequens est peccatum originale

in singulis, & vnum, & æquale esse; inæquabilitas enim rationis, communis est per differentias; sicut vnus color, magis color est alio, per maiorem, vel minorem abundantiam luminis, quæ facit alium rubeum, alium flauum &c. Quare cùm peccatum originale consistat in præcisâ priuatione Iustitiæ, quæ erat in Adamo, & nondum erat determinata ad quemquam posterorum; neque plura in vno, neque inæqualia in diuersis Adæ posteris, erunt.

Et hoc quoque sequitur; peccatum originale transferri in omnes homines, qui naturali modo ex Adamo propagantur, hoc est, mediante infecto semine: Imò, si ex Euâ solâ peccatrice sic nascerentur, cùm agens naturale, secundùm subjectam materiam operetur, semen Adami mixtum feminibus corruptis Euæ, non poterat facere prolem omnino liberam peccato.

Aliter tamen euenirêt, si miraculosè quis ex carne, vel Adæ, vel Euæ, post peccatum ipsorum formaretur. Cùm enim formans, dispositiones,

non ex lege naturæ, sed ex proposito suæ voluntatis, introduceret; posset (abstrahendo à legibus prudentiæ, & bonitatis) facere prolem, cui anima, ex exigentiâ materiei, foret, vel recta, vel propensa in amorem creaturæ. Non tamen in eo casu, propriè esset peccatum originale; quia priuatio diceretur dumtaxat respectu communis naturæ, non ratione communis originis ex Adamo.

Euidens quoque est, quòd cùm peccatum originale sit conuersio ad creatum objectum, tanquam ad vltimum finem; eo ipso faciat tale objectum sine modo, hoc est, intemperanter, amari; & per consequens, per fruitionem & prosecutionem talis boni, homo discedit à medio temperamento quod est naturale homini, versùs illud extremum, in quo situm est objectum, id est, versùs non hominem. Quare peccatum originale est primus gradus & inclinatio ad mortem. Et quia morbus non est nisi inchoatio quædam mortis, etiam ad morbos priùs deducit.

Et quia bona temporalia eiusmodi sint (maximè corporalia) vt eadem non possint haberi à pluribus, necesse est, cùm intemperanter appetuntur à pluribus, (præsertim tanquam vltimus finis, cuius nullus est modus) & omnes satiari non possint, sequi dolores & dissidia; & ex dissidijs, vulnera & cædes, & mortes violentas : palam est itaque etiam hæc mala, ex peccato originali, in humanum genus deriuari.

Ex quibus necessum quoque fit, irrationabiles affectus circa plura, oriri ex irrationabili affectu, circa vnum quodlibet, quod amatur tanquam vltimus finis : vnde ex originali peccato necessum est omnia alia peccata, & passionēs, quibus laborat genus humanum, secundum diuersas hominum constitutiones, esse introductas.

Tandem, quia quò affectus est vehementior circa alios fines, qui non sunt per se fines humanæ naturæ, tantò remissiorem esse necesse est, circa proprium finem, & perfectionem quâ adaptatur suo fini; perfe-

ctio autem per se hominis est scientia; palam est incuriam scientiæ, & per consequens ignorantiam, etiam ex peccato originali, in vitam humanam esse introductam. Atque adeò ignorantiam, in intellectu; malitiam, in voluntate; infirmitatem, in irascibili; & concupiscentiam, in concupiscibili; à peccato originali esse causata.

LECTIO V.

*Quid sit peccatum propriè dictum,
sen Actuale.*

VLteriùs, quia vita est primum principium quo animal sese mouet ad conseruationem sui; anima autem per amorem vltimi finis mouet sese ad omnes actiones suas; fit animâ, quæ non habet amorem illius finis, qui secundùm naturam illi est vltimus, non posse mouere sese ad aliquam actionem, conformiter ad naturam suam; & per consequens non habere vitam. Quare peccatum origina-

le est peccatum mortale, seu potius ipsa mors animæ; & contra naturam homini; & noxium ipsi tum quoad corpus, tum quoad animam.

Iterum, quoniam actio hominis multiplex est, quâ peruenit ad vltimum finem; & vna actio magis propinqua vel efficax ad obtinendam illam dispositionem animi, quæ requiritur ad assecutionem vltimi finis, (ea est charitas) fit, vnam actionem esse meliorem alterâ, & vnam virtutem, maiorem aliâ; eam scilicet, quæ actionis melioris est: & dispositionem quæ corrumpit potiorrem actionem, esse deteriorem; & quod sequitur, vnum peccatum aut vitium esse deterius alio.

Quia vero virtutes sunt dispositiones animæ ad eundem finem, propterea necesse est, eas esse omnes concordēs, & compossibiles in eâdem animâ; imò & connexionem habere, & trahere sese inuicem, & causare se in subiecto; tum ex propriis naturis, tum ex communi imperio charitatis, & vltimi finis. Sic prudentia, & causat reliquas, & ab ipsis

causatur; Iustitia temperantiam, & fortitudinem excitat, & ab illis defenditur; & reliquæ similiter sese mutuò augent, & defendunt.

Quia verò vitia ab omnibus delectabilibus, hominem circumstantibus, temerè causantur ex singulorum ingenio, & non cum ordine ad aliquem communem finem; & comparantur vt extrema ad hominis naturam; extrema autem sunt magis opposita inter sese, quàm cum medio: fit, vitia aliqua esse impossibilia inter sese, & pleraque non habere connexionem ad inuicem.

Ex his deducitur, rationem peccati, quatenus peccatum est, consistere in priuatione illius dispositionis, quæ deberet esse in animâ affectâ, vel operante circa particulare objectum, quâ conformaretur, mediante comparatione, ad hoc objectum, ad vltimum finem; & hæc priuatio, si sit in actu primo, dicitur vitium; si in actu secundo, peccatum.

Palam est itaque, malitiam peccati esse tantam formaliter, quanta est bonitas oppositæ virtutis; causaliter

verò, quanta est bonitas finis vltimi, quo nos priuat. Est itaque causaliter infinita; vel simpliciter, si Deus in sese consideretur; vel certè in genere, si consideretur Dei bonitas, vt nobis per visionem est communicabilis: Cùm enim peccatum tollat visionem penitus, tollit illam quanta quanta potest esse, hoc est, maiorem & maiorem sine fine.

Dices, malitiam peccati consistere in eo, quòd sit contra præceptum diuinum; & propterea esse simpliciter infinitam. Quia quòd celsior est persona quæ contemnitur, eò grauior est offensa: non obedire verò imperio cum ratione mandantis, est contemnere ipsum. Cùm itaque dignitas Personæ diuinæ, sit infinita, etiam peccatum omne erit infinitæ malitiæ.

Responderetur, quòd cùm omnis regula à superiore præscripta, cum additione pænæ, & præmij, sit manifestè obligatiua sub tali pænâ: Omnis autem actio moralis habeat conjunctum præmium, si rectè fiat; pænâ verò, si secus: Clarum est om-

nam regulam à Deo de morali actione traditam, esse præceptum; & per consequens, omne peccatum, esse contra præceptum Dei.

Finis autem præcepti, maximè divini, est, vt benè sit ijs quibus præcipitur. Cùm autem vnum ex bonis humanis, sit obedientia; interdum, præceptum datur ad virtutem obedientiæ in subdito excolendam; & tunc violare tale præceptum, est peccatum speciale inobedientiæ; & est contra dignitatem, & auctoritatem imperantis; & sumit gravitatem suam ex dignitate imperantis, & eminentiâ ipsius supra subditum.

Sed plerumque præceptum est de bono aliquo alio; & auctoritas imperantis non vltius implicatur, quàm vt constet subdito, hoc esse melius; & subditus tùm non contemnit auctoritatem imperantis, sed bonitatem actionis quam reijcit, etsi credat eam meliorem; & talis inobedientia, est solùm materialis; & non habet aliquam gravitatem ex auctoritate imperantis. Quare ratio peccati in communi non trahit

grauitatem suam ex dignitate præcipientis.

Alioqui omnia peccata forent paria. Cum enim auctoritas Dei præcipientis, infinitè excedat omnem comparationem damnorum creatorum, quæ sunt in diuersis peccatis; palam est, differentiam horum absorberi in communi ratione; & per consequens, nullam esse imparitatem; finitum enim additum infinito, cum nullam proportionem habeat, non potest facere maius.

Sed neque pessimi homines, quales sunt infideles, quia Deum, & Dei mandata ignorant, omnino peccarent; impossibile enim est, ut contemnant mandatum, quod nesciunt existere, etsi hæc ignorantia sit culpabilis. Neque obstat quòd sciant esse contra rationem: cum enim ratio sit bonum creatum, præuaricari contra illam, est infinitè minus, & prorsus alterius rationis: unde peccatum diceretur æquiucòcè de peccatis Christianorum, & Paganorum.

Quin, & minimum peccatum plus mali in se haberet, quam maxi-

ma beatitudo hominis afferret bonū; quare malè instituta foret natura humana, in quā simpliciter malum præualeret bono. Quod etiam est impossibile; cū malum non sit nisi priuatio boni. Vnde vt sit infinitum, debet esse priuatio boni infiniti: cuiusmodi boni natura creata non est capax.

Neque inobedientia esset speciale peccatum; neque obedientia per consequens specialis virtus, si omne peccatum grauitatem inobedientiae haberet, ex proprio motiui obedientiae violato, secundū communem rationem peccati. Neque blasphemia, & alia peccata specialiter opposita Deo, haberent malitiam maiorem cæteris peccatis, ex eo quod sint contra Deum.

Sed & in exemplis humanis res non sic geritur; iudex enim in communibus criminibus furti, homicidij, adulterij &c; non premit reum quod contempserit Regem: neque Rex præiudicium personale sibi factum interpretatur: neque interest rei publicæ vt magistratus doleat, sed

ut curam habeat, & vindictam minimâ cum passione, inferat, & commodissimam.

Adijce, quod cum naturæ humanæ conueniat gubernare semetipsam, hoc est, ex causis notis procedere ad suas actiones; contra naturam hominis foret vniuersaliter cogi ad suas actiones, ex auctoritate præcisè imperante, non æstimatedis obsectorum, & actionum meritis, & dignitate; sicut accidit, quando ex vi auctoritatis actio suscipitur.

Ex Dei quoque parte, cum ipse nihil faciat, vel præcipiat sui causâ, sed tantum propter bonum creaturæ; sed neque lædi possit quouis modo per inobedientiam creaturæ; palam est; nullam esse rationem, quare grauius foret peccatum ex eo, quod præceptum contra illud latum sit ab ipso; cum ex parte ipsius tantum habeat vim instructionis, quid bono, vel malo ipsius creaturæ ab eâ agatur.

Adde, quod inter homines ratio cur obliget præceptum, est, quia homo, cum non possit per potentiam facere fieri ab alio, quod tamen ab

illo fieri gubernationi suæ conuenit; habet voluntatem absolutam, vt fiat ab alio: Deus autem cū sit omnipotens, nullam voluntatem absolutam potest habere inefficacem, siue cui resisti possit; & per consequens, quæ sic hominem obliget, vt possit violari.

Ex quibus intelligitur, quid significet, quod solet dici, grauitatem peccati consistere in eo, quòd sit offensa Dei: cū enim non sit in Deo formalis voluntas imperandi, longè minùs est in eo tristitia, vel ira propter violationem præcepti (quæ in homine perfecto, & sapiente, non possunt poni) sed dicitur offensus, quatenus est in dispositione faciendi nobis magna, & vera mala, quales sunt pænæ inferni; & est in hâc dispositione, quatenus nos sumus in statu, ex quo sequitur, ex ordine iustitiæ ipsius, nos illa incursumos; hoc est, in statu peccati; & sic peccando, facimus illum offensum.

LECTIO VI.

De diuisione Peccati actualis in peccatum mortale & veniale.

Constituto peccati rationem regulæ, non præcepto, esse oppositam; consequio tenetur, quod cum artis, vel regulæ plura sunt membra, sic inter sese ordinata, vt non ex defectu contra quodcunque membrum, sequatur nullitas in toto artificio, sed tantummodò minùs perfectum sit opus; fiat etiam in vitâ humanâ non ex quocunque peccato perdi beatitudinem ex vi talis peccati; & per consequens, tale peccatum non esse mortale; ac proinde, dari aliquod peccatum veniale.

Et quoniam beatitudo in hâc vitâ ex vi charitatis habetur; sequitur, si dentur aliqua peccata quæ non auferant charitatem, seu aliqua peccata quæ non habeant oppositionem cum ipsâ; talia esse venialia: quæ

verò auferunt ex naturâ suâ charitatem, esse mortifera ; & secundum quod peccata aliqua habent, vel non habent hunc effectum, ex ijs quæ per se seu plerumque illa comitantur, sic dici mortalia, seu venialia, ex genere suo.

Cùmque euidens sit, ratiocinationem humanam, breuem & debilem esse ; neque posse sese extendere cum curâ ad actiones quaslibet, sed tantum ad præcipuas quasdam ; patet, reliquas inter homines quodammodo leues & non considerabiles esse : & per consequens, defectum in similibus leuem esse : peccata itaque in similibus actionibus, comparatis ad beatitudinis prosecutionem, erunt ex genere suo venialia ; vt quæ progressum ad beatitudinem inconsiderabiliter tantum lædant.

Et quoniam aliquæ actiones, quæ versantur circa materiam ex naturâ suâ considerabilem, propter paruitatem materiæ fiunt inconsiderabiles, quia tam exigua materia non est considerabilis ; sequitur, peccatum in similibus actionibus ef-

te inconsiderabile, & non mortiferum.

Rursus, cùm malitia peccati sita sit in inordinatione quam infert animæ; anima autem (cùm sit potentia ad intellectionem) maximè deordinetur per resolutionem falsam vi rationis factam; sequitur, peccatum quò magis deliberatum, eò grauius esse. Quare cùm deliberatio circa rem grauem possit esse interdum minima, & quasi amentia proxima; continget, actum ex genere suo mortiferum, non facere grauem inordinationem in animâ, neque esse mortiferum.

E diuerso, cùm contingat aliquos homines magni æstimare ea, quæ plerumque negliguntur; potest contingere vt peccatum in actione, quæ ex genere suo est leuis, in tali homine faciat magnam inordinationem animæ, respectu vltimi finis; & sic sit per accidens peccatum mortale.

Euidens proinde est, distinctionem peccati mortalis à veniali, non accipi secundùm eam connexionem obsectorum cum objecto charitatis,

quæ est ex ipsâ rerum naturâ ; sed ex eâ, quæ est in intellectu seu cognitione humanâ. Sic enim faciunt deordinationem in ipsâ animâ.

Alioqui enim, cùm omnes res creatæ comparentur ad beatitudinem, tantummodo vt pura media ; nullum esset peccatum, ex genere suo, vel ex objecto, mortale. Quidlibet enim externum, ex naturâ rei vel haberi vel perdi potest, absque eo quod beatitas propterea perdatur.

Et è diuerso, nullum peccatum foret nisi mortale. Cùm enim sicut omnis opinio falsa, reuera repugnet primo principio, *quod idem non possit simul esse & non esse*; sic etiam omnis volitio mala, repugnat volitioni beatitudinis; cùm includat aliquam affectionem, quæ non sit integrè causata ex amore beatitudinis. Omne itaque peccatum ex vi objecti foret mortale.

Vnde patet quòd in creaturâ quæ nihil faceret nisi ex perfectâ cognitione, & comparatione immediatâ ad vltimum finem, non potest esse peccatum veniale; quia cùm nullus defectus

LIBER I. LECTIO VI. 41

defectus sit considerationis, nihil illi est inconsiderabile : & quia perfectè, & vltimum finem, & bonitatem medij, iuxta vires suæ naturæ æstimat ; ex necessitate, in omni peccato præponit bonum creatum vltimo fini.

Dices, quòd si eligatur medium, per quod obtineri potest vltimus finis ; etsi meliùs obtineri possit per aliud ; eligens non auertitur ab vltimo fine : quare, etsi hoc faciat eligens ex plenâ cognitione, non propterea peccabit mortaliter ; alioquin, etiam faciens peccatum veniale ex plenâ deliberatione, eo ipso peccaret mortaliter.

Respondetur, quòd non externus actus ex sese, sed quatenus facit internam impressionem malam, vel procedit ex eâ ; facit peccatum, seu habet rationem peccati ; necesse autem est, internam impressionem, in eo qui habet perfectam cognitionem, esse talem, vt per peccatum elector medij deterioris, afficiatur ad aliquid vltimò, præter id, quod secundum naturam est vltimus finis.

cùm vitiosa electio procedat ex amore alicuius, cuius possessio non solum non petitur propter vltimum finem, sed etiam ex parte diminuit illum: non itaque Deus, sed compositum ex Deo & illo alio amato, est respectu talis agentis vltimus finis.

Neque sequitur in statu in quo sumus, peccantem venialiter ex plenâ scientiâ, propterea peccare mortaliter: cùm enim ipsum esse peccatum veniale, sit inconsiderabile in vitâ nostrâ; sit, quòd etiam si actio sit considerata, esse peccatum veniale; non est considerata, esse aliquid considerabile; & per consequens, neque facta considerabilis, vel peccatum mortale.

His tamén non obstantibus, non potest fieri peccatum veniale, vt quantumlibet bonum sequatur. Vel enim in compositione cum tali bono acquirendo, adhuc manet contra rationem illud agere, vel non: si hoc; ergo jam non est peccatum illud agere, sed magnum bonum: si prius; palam est, quòd quoniam ra-

LIBER I. LECTIO VI. 43

tio dicat non esse agendum, non possit agi. Præterea, si verè est peccatum veniale, læditur per illud consecutio vltimi finis. Cùm itaque, secundùm rectam rationem, omnis actio nostra ex amore, & solo amore, vltimi finis debeat procedere; clarum est, non debere fieri.

Similiter, inducens alium ad peccatum, siue veniale, siue mortale; non peccat grauius, quoad speciem malitiæ, quàm si peccatum tale committeret. Quia, cùm grauitas peccati consistat in deordinatione quam infert affectui; clarumque sit, inducentem ad peccatum, non intendere majus malum proximo, quàm in sese susciperet, tale peccatum perpetrando; clarum quoque est, speciem deordinationis, esse eandem in peccante, & inducente ad peccatum.

Neque officit, quòd majus damnum inferat proximo, quàm si illum occidisset. Inordinatio enim animæ, non sequitur naturam damni, prout in sese est; sed prout in apprehensione nostrâ est; palam autem est,

inducentem, non adeò horrere (ex
vfitata generis humani, & quasi con-
naturali apprehensione) malum
peccati, quàm malum mortis; &
per consequens, maiorem futuram
inordinationem, si occidere eum
vellet, vel induceret ad homicidium,
quàm cum inducit ad leuius pecca-
tum.

LECTIO VII.

*De pluribus alijs diuisionibus
Peccati.*

VLteriùs, ex dictis accipitur, di-
uisionem peccati in mortale &
veniale; non esse generis, in spe-
cies; sed vocis, in plura significata
subordinata; siue analogi, in analogo-
gata, vt loquuntur; cùm peccatum
veniale verè non fit contra regulam
sed sub regulâ: peccatum vero dicitur
actio contra regulam facta; & tale
est peccatum mortale.

Vnde neque peccatum veniale est
verè offensa Dei. Cùm enim maxi-

mum donum Dei, sit beatitudo & charitas, seu ordo ad eam; quæque non dantur homini propter alios, sed propter se; clarum est, Deum esse amicum, & non offensum, his quibus ea dona communicat. Cùm itaque, peccatum veniale non auferat charitatem; non verè facit offensum Deum.

Euidens quoque est, diuisionem peccati in actuale & originale, esse analogi in analogata. Cùm enim peccatum (cùm sit defectus à regulâ) nominet actionem; in actuali autem peccato, sit vera actio ipsius in quo est peccatum; in originali verò, solû habitus, id est, vel causa actionis peccaminosæ, vel effectus; (vtrouque enim modo, ratio peccati in eo reperitur) palam est, peccatum originale non in eâdem significatione appellari peccatum, quo peccatum actuale; sed in posteriori.

Diuisio quoque in peccatum interius & exterius, similiter analogæ est. Cùm enim homo capax sit beatitudinis, solummodo secundùm animam; etiam duntaxat in illâ, est

vera, & per se, siue dispositio & ordo ad illam, siue inordinatio. In actibus verò externis, siue membrorum, siue appetitus, est impressio quædam & ordo, qualis corpus est capax habendæ; quam, euidens est non posse esse spiritualement & propriam; quapropter, neque ratio deordinationis in eâ, vniuoca est.

Habetur quoque ex dictis, peccatum esse maximum malorum quæ homini possunt accidere; non solum causaliter, ex eo quòd impediatur maximum bonum; sed etiam formaliter, quatenus est deordinatio supremæ portionis; & hoc, in actu secundo. Ex quo etiam fit, quòd sit causa grauissimorum malorum, etiam in hac vitâ: inordinatio enim agentis fortioris, necessariò facit effectuum maiorem deordinationem.

Neque obstat quòd pœna peccati, sit maius malum ipso peccato: alioqui non foret digna pœna. Cùm enim pœna sit dolorificum inuito applicatum, & dolor consequens; patet, dolorificum inuito impressum, nondum habere rationem mali, nisi in

actu primo ; dolorem verò consequentem, saltem in futurâ vitâ, ipsummet esse peccaminosum. Mâlum itaque quod est pœna vnius peccati, est aliud peccatum ; & sic, semper peccatum est maximum malum.

Pœnæ verò huius vitæ, sunt motus cordis malo partim cedentis, partim resistentis : vnde si cor non omnino resistat, fit stupor, & non dolor : Sin verò omninò resistat, sic quoque nulla est pœna, cum cor incongruè non moueatur, neque animus sentiat malè habere. Quòd autem cor non totaliter resistat, ex peccato originali habetur ; & est ex genere peccati ; & excusatur, sicut motus indeliberati propter vim causarum impellentium, & infirmitatem carnis.

Habetur consequenter peccatum non esse maius malum, quàm virtus opposita sit bonum ; cum virtus opposita habeat causare illos effectus, per quorum priuationem peccatum habet rationem mali. Cum itaque odium causetur ex amore oppositis, effectus autem minor, sit suâ causâ,

præsertim æquiucâ ; minus odibile erit peccatum , quàm virtus amabilis. Quare etiam , virtus erit maius bonum , quàm peccatum sit malum ; & conuersio ad Deum potior , quàm auersio sit deterior.

Neque obstat , quòd interdum vitium oppositum auertit à maiori bono , quàm sit illud ad quod virtus conuertit : sicut infidelitas auertit à Deo , vt est obiectum spei & charitatis ; ad quod , fides non conuertit. Huiusmodi enim auersio , habet se se materialiter & per accidens ad speciem , & ad eam rationem quæ constituit peccatum ; quapropter & grauitas etiam consequens , accidentaria est.

Inter peccata itaque ; quæ sunt per se auersiuæ , sunt grauiora ijs quæ sunt principaliter conuersiuæ : & inter ea quæ sunt consequenter auersiuæ , quæ sunt auersiuæ à maiori bono , vel magis ab æquali bono , sunt grauiora. Et hinc est , quòd spiritualia sunt grauiora carnalibus ; quia sunt magis amabilia bona spiritualia , quàm corporalia. Rursus , quæ auertunt

tuht à Deo , sunt grauiora quàm quæ auertunt à proximo.

Porro , peccatorum analogicè dictorum , veniale , grauius est originali , formaliter ; cùm veniale sit inordinatio in actu secundo ; originale verò , tantùm in actu primo , seu in habitu : nemo autem punitur pro habitu , nisi in actum exeat ; & actus , potior sit potentiâ , in suo genere. Neque priuat charitate , nisi in eo statu quo actus haberi non potest ; cùm primus actus rationis , vel conuertat ad Deum , vel mortaliter auertat. Causaliter tamen grauius est originale ; cùm sit , ex naturâ suâ , causa mortalis peccati , & damnationis , nisi auferatur.

Peccatum verò exterius , ipsum quidem , ex proprijs rationibus , leuius est , interiori : interius tamẽ , grauius est propter exterius ; non solum propter extensionem in aliam materiam ; sed etiam quia ipsa præsentia objecti , & exercitium , per se loquendo , confirmat animum & affectum in tali deordinatione ; sicut locutio , vel scriptio , facit animum at-

50 INSTITVT. SACRARVM.
tentio-rem ad objectum de quo lo-
quimur vel scribimus, quàm faciat
sola interna cogitatio.

LECTIO VIII.

*De rationibus Natura & su-
pernaturalitatis.*

VLteriùs, conficitur ex dictis de
peccato Adami, quòd quo-
niam per ipsum vitiata est æquabili-
tas cordis in ipso, & posteris eius;
agentia verò quæ nata sunt certum
effectum facere in subiecto certo
modo disposito, nata sint facere
aliud in subiecto aliter disposito;
consequens esse, quæcumque obje-
cta naturalia nata erant facere im-
pressionem iustam in corde Adami
æquabiliter disposito, iam post
lapsum, nata esse facere impressio-
nem vel excedentem iustam, vel de-
ficientem ab eâ.

Sequitur, quòd sicut dicimus, la-
pidi naturale esse ferri deorsum,
igni sursum; non quia habeant in-
trinsecas inclinationes ad ea loca;

LIBER. I. LECTIO VIII. 51

sed quia ex vi circumstantium causarum, quas naturam appellamus, sic videmus, plerumque, & constanter ferri; sic dicendum sit homini æquè naturale esse peccare, quàm ægritudinem vel mortem pati; quia natura, id est, objecta & causæ circumstantes, constanter peccatum in eo procurant; quicquid sit de intrinsecâ inclinatione.

Infertur, quòd si Deus aliquo modo immutat naturam, id est, causas circumstantes, ut iam impellant hominem ad virtutem, & non ad peccatum; quoniam talis immutatio non est naturalis, & tamen est secundum naturam; ex necessitate esse supernaturalem; & effecta quæ in ipso homine fiunt ex tali immutatione, esse supernaturalia.

Clarum itaque est, rationem naturalis, non consistere in eo quòd aliquid sit debitum naturæ. Cum enim natura (si accipiatur pro substantiâ hominis) nata sit secundum diuersas circumstantias, diuersas qualitates & actus habere; nihil definitè potest ei deberi; sed in vnis

circumstantijs vnum, in alijs aliud: sicut semini, secundum quod in diuersis terris plantatur, accidit diuersas plantas accidentaliter, vel interdum substantialiter, germinare; & Adamo aliud ante lapsum, aliud post lapsum, congruebat.

Sed & quid magis debitum potest esse homini, quàm consecutio vltimi finis; si proportio ad substantiam ipsius spectetur; cum ad, & propter, illum creatus sit; sicut cultellus fit ad secandum, & rota ad voluendum, Quare & visio Dei, & omnia necessaria ad illam, forent maximè naturalia, quæ tamen maximè supernaturalia censentur.

Et è diuerso, mors, & ægritudo, & peccata, & vitia (cum sint opposita naturæ; & per consequens minimè debita illi ex consideratione substantiæ illius) deberent esse supernaturalia, cum vincant & superent naturam, & non sint debita: quæ tamen, esse naturalia, in eo sensu quo natura supernaturali opponitur, omnes apprehendunt.

Rursus, cum nomen debiti, inclu-

LIBER. I. LECTIO VIII. 53

dat aliquem esse debitorem; significabit aliquam obligationem in Deo ad tribuenda illa quæ dicuntur naturalia. Quod dupliciter absurdum est; quia neque obligatio in Deo potest esse; & quia, omne pactum cum naturâ, vel impossibile est, vel fictitium.

Si autem illud dicatur debitum naturæ, quod cum pertineat ad perfectionem, potest de eâ, vel in eâ, fieri; sic rursus, omnia supernaturalia, erunt illi naturalia; &, vno verbo, quicquid Deus potest in eâ, vel de eâ. Quare evidens est, in hac explicatione sumi naturale, pro eo quod est connaturale, vel secundum naturam; & non, prout opponitur supernaturali.

Similiter evidens est, non rectè explicari supernaturale esse, ad quod natura nullum omnino respectum habeat. Nam & necessariò respectum habet ad omnia quæ nata sunt illam perficere; qualia maximè sunt supernaturalia: & cum omnis unitas compositionis formalis, sit per rationem actus & potentiæ; palam

34 INSTITVT. SACRAMVM.
est, id non posse esse actum & perfecti-
onem naturæ, ad quam natura
non habeat rationem potentiæ; seu
non possit esse illud: & per conse-
quens, nihil supernaturale (si hæc
explicatio teneatur) posse adijci
naturæ.

Longè minus, ratio supernatura-
litate potest fundari in Deo. Inpri-
mis enim, ipse non est ens superna-
turale, neque sibi, neque creaturis;
cum tota earum natura, maximè in-
trinsecè, & fundamentaliter, ab eo
dependeat; & non possit esse sine
ipso; & per consequens, si aliquid
potest ab ijs exigi, hoc primum
est, vt sit Deus à quo esse possint, &
sint.

Neque potest distingui in Deo ra-
tio vna quâ sit auctor naturæ; & alia,
quâ supernaturalium. Cum enim
existentia sit propriissimum nomen
Dei; existentia erit maximè super-
naturalis ratio: & cum essentia diuina
infinîtè superet quamcumq; creatu-
ram; essentialis ipsius ratio non po-
test specialiter participari; sed om-
nis participatio, respectu ipsius, est

LIBER. I. LECTIO VIII. 55

æqualis; Et prius definiendum est, quid sit esse supernaturale, siue in quo supernaturalitas fundata sit, quàm possit poni ratio aliqua esse supernaturalis in Deo. Sed & cùm Dei essentia sit vna simplicissima formalitas, à quâ omnia procedunt; frustra quæritur in eo distinctio formalitatum, à quâ procedat distinctio in creaturis exemplariter: cùm è contra, distinctionis ratio, vtpote imperfectionis, à creaturis traducatur ad Deum.

Rursus tandem, qui consideraue-
rit sanctos Patres & Doctores, qui su-
pernaturalium & naturalium dono-
rum doctrinam tradiderunt, respe-
xisse ad ea quæ viderent à Deo pecu-
liariter instituta pro electis; & ea
quæ in omnibus hominibus commu-
niter inuenirentur; & non ad Meta-
physicas considerationes, ad quas
non sine multo studio peruenitur:
Clarè intelliget, eos non ex naturæ
ratione in aëre considerata, vel ex
ignotâ quâdam ratione in Deo; sed
ex ijs quæ diximus, quæque obuia
sunt omnibus Christianis pruden-

rioribus, hanc distinctionem traxisse.

Ex quibus sequitur, non esse ponendum quendam statum naturæ humanæ, medium inter naturam integram & naturam lapsam, qui sit quasi proprius naturæ status secundum se: quia talis consideratio, est omnino indefinita; & non habet aliqua accidentia, sibi propria; neque, secundum talem considerationem, definiri potest, quid sit naturale, quid secus; sed ex causis circumstantibus, quæ integrant statum mundi in quo degimus.

Vnde, quoniam natura nobis dicitur, hic præsens status causarum secundum quas regitur nostra vita; simpliciter affirmandum est, statum naturæ integræ fuisse supernaturalem; etsi dona illa fuerunt connaturalia illi statui creationis, acceptæ secundum regulas prudentiæ & bonitatis diuinæ, semper optimum operantis; postquam sic credimus esse creatum hominem.

Quod tamen non impedit, quin aliter creari potuerit homo, comparando naturam hominis ad solam

vim creatiuam Dei, & abstrahendo ab illis considerationibus, quæ eam determinant ad faciendum quod est optimum. Quod est, simpliciter potuisse creari aliter; cùm ratio potentia, abstrahat ab illis circumstantijs quibus reducitur ad actum.

LECTIO IX.

*De comparatione supernaturalitatis
& Gratiæ.*

EX ratione supernaturalitatis assignatâ, facile est videre rationem ipsius sese extendere fermè ad totam latitudinem entis; tam ad corporea, quàm ad spiritualia; ad bona & mala; ad entia & non entia. Necessè enim est, priuationes supernaturalium, esse supernaturales. Sic, mors & pœnæ inflictæ diuinitùs, sunt supernaturales; & peccata, maximè quæ supponunt fidem, vt blasphemia, & certi sacrorum abusus.

Non tamen potest, propriè loquendo, esse substantia aliqua super-

naturalis. Cùm enim sit natura quædam; & non accadat alteri; non potest à causis circūstantibus, neque dari, neque negari. Sed hoc de substantiâ perfectâ, non de omni substantiali prædicato, intelligendum est. Parti enim, vel ei quod se habet tanquam pars, dari possibile est.

Si verò quærat, an substantia creabilis sit, cui connaturalis sit visio Dei; sic ex supra dictis constare potest, non posse creari aliquam intellectualem, cui non sit secundum naturam videre Deum: sin addatur, ex proprijs viribus; vel intelligitur, non à Deo datis; & ridicula erit quæstio; vel supponitur, certas circūstantias ei debitas esse, contra ea quæ supra dicta sunt. Sed & si quæ forent debita, certè forent quæ illam ad finem vltimum perducere valerent.

Patet rursus ex communi ratione supernaturalitatis, non requiri elevationem aliquam intrinsecam, à parte operantis actum supernaturalem; sed dumtaxat extrinsecam ordinationem ad aliquod obiectum, quæ

ex viribus naturæ haberi non poterat. Vt, quoniam Lazarus non potuit suscitari naturaliter; supra naturam, erat ordinatio, quâ Iudei cum Magdalenâ sunt perducti ad illud spectandum; absque eo quòd aliqua intrinseca eleuatio supernaturalis, ijs adhibita fuerit.

At si ponenda est actio excedens vires agentis, ab eo fluere; ponenda quoque est intrinseca mutatio, vel constans, vel per modum motionis. Vt, si ab imperito Musices fluat melodia; vel mouetur potentia ipsius immediatè ab extrinseco agente; vel qualitas ei impressa est, quâ factus sit potens canere. Quia, sicut, idem manens idem, non est aliud; sic, neque est, vnde aliud possit esse, quàm ex ipso natum est esse: & sicut extrinseca voluntas Dei, absque intrinsecâ mutatione, non facit vt sit aliud; sic neque vt possit aliud, vel agat quod non possit.

Non tamen ponenda est motio præuia, vel eleuatio, ad hoc vt possit à Deo recipere impressionem supernaturalem; quia eadem ratione re-

quireretur ad hanc eleuationem, alia prior; & sic in infinitum foret processus. Deinde, clarum est, posset tale quid fieri ex illo, non esse aliud, quàm ipsum esse quod est: cum, *ex illo*, dicat illud ipsum esse potentiam passiuam effectus.

Quæres, an talis potentia sit dicenda naturalis, an supernaturalis? Respondetur esse supernaturalem, ex eo quod effectus est talis. Neque refert, quod sit ipsa natura rei, & accipiat cum ipsâ naturâ à causis naturalibus; quia causæ effectum naturalium, prout distinguuntur à supernaturalibus, comparantur ad subiectum, vt sui ordinis, seu coinstitutum in hoc ordine mundi, *id est*, naturæ: & ipsum in hoc sensu non dicitur naturale, nisi vt comparatum ad eas. Sed causæ supernaturales supponunt naturales, vt in quibus fundantur: neque subiectum comparatur ad eas, nisi suppositis naturalibus. Vnde hæc potentia fundatur in naturâ; & præsupponit illam; sed non accipitur nisi ex positione causarum supernaturalium. Quibus suppositis, quod erat

LIBER I. LECTIO IX. 61

tantum natura, iam est potentia supernaturalis; hoc est, coordinata causis supernaturalibus.

Uterius ex dictis habetur, dona supernaturalia, cum non habeantur ex virtute causarum naturalium, haberi ex speciali favore Dei, non communi omnibus, quatenus participant naturam; & (cum fauor specialis vocetur *gratia*) haberi ex gratia. Quare cum fauor Dei, seu beneuolentia ipsius, sit ipse Deus; gratia hoc modo dicta, est causa extrinseca donorum supernaturalium; & eorum effectorum, quæ ex ijs sequuntur; nempe, ipsemet Deus.

Quia verò consuetum est vocare effecta, nomine suarum causarum; etiam ipsa bona supernaturalia, merito dicuntur gratia. Quæ, quoniam dantur ad perducendum hominem ad beatitudinem (ad quam consequendam, impotens redditus est per lapsum Adami) alia, necessaria sunt singulis ad eum finem perducendis; alia verò, ijs solis qui idonei sunt alijs perducendis. Et hæ, quia non faciunt habentes meliores, dicuntur

Gratia gratis data; quasi, nihil vltra habentes gratiæ, quàm quòd sint gratuita: ceteræ verò, gratiæ cum addito, quòd suo modo faciant subiectum gratum Deo, vel sanctum.

Quapropter, hæc imprimis differentia inter rationem supernaturalitatis, & gratiæ apparet; quòd nomen supernaturalitatis, extendit se æquè ad bona & mala; verbi gratiâ, ad penas inferni, & quædam peccata specialia quæ includunt fidem, vt periuria quædam & blasphemie; nomen autem gratiæ, dumtaxat ad bona; cùm ex beneuolentiâ specialis Dei, quatenus talis, nil nisi bonum proficiscatur.

Rursus, ratio supernaturalitatis, cùm sit mera contrapositio contra processum à causis naturalibus, potest reperiri in actione, etiam quatenus procedit ab homine, saltem eleuato. Ratio vero gratiæ, quia intrinsecè includit respectum ad Deum donantem, reperitur in actione hominis, præcisè quâtenus originem habet à Deo; non autem ab ipso homine: & propterea, quatenus aliquid

LIBER I. LECTIO IX. 63

est ex gratiâ, non est ex merito, vel aliâ causâ præter Deum; neque ex iustitiâ Dei, quia hæc supponit causam extrinsecam Deo.

Tandem, clarum est hominem, à quo procedit effectus aliquis supernaturalis, posse esse & dici causam principalem talis effectus, prout est supernaturalis: quatenus autem idem effectus habet rationem gratiæ, sic tantum esse causam instrumentalem. Cum enim supernaturale accipitur respectu aliarum causarum creatarum, si homo habet aliquam qualitatem quam illæ nequeant tribuere, verbi gratiâ, scientiam supernaturalem, poterit agere ut causa principalis, v. g. docere aliquam conclusionem æquè principaliter atque aliam naturalem. Cum verò gratia nominet effectum ut procedentem à Deo, homo non potest esse aliud quam instrumentum gratiæ; cum nominet effectum, prout non à nobis.

LECTIO X.

*De Gratiâ sanctificante, & virtutibus
supernaturalibus.*

GRatia, cùm ad hoc nos perducat, quatenus sanctificans est, vt rectè dispositi simus ad vltimum finem consequendum : hoc autem formaliter præstet charitas : palam est, gratiarum quæ ad sanctificationem nostram spectant, potissimam esse charitatem. Alias proinde, vel esse ante hanc, vel eam subsequi ; & ad dispositiones, vel effecta, reduci. Euidens quoque est, charitate hominem fieri consortem naturæ diuinæ : siue, quia charitas est semen, & propriè dispositio, ad visionem beatificam ; per quam verè reddimur participes ipsius Deitatis per vniōnem ad illam : siue, quia cùm prima & quasi specificans actio cuiuslibet cognoscitiui, sit primus amor ; per charitatem verò, primus amor noster, est circa idem obiectum cir-

ca quod est primus amor Dei; merito censemur, naturæ ipsius consortium habere per charitatem.

Superflua ergo est qualitas, quæ sit quasi essentia & radix charitatis, & cæterorum donorum supernaturalium. Charitati enim, talis radix non est necessaria: cum, etsi non naturale, tamen secundum naturam sit, amare Deum tanquam ultimum finem. Et alioqui, hæc explicatio est purè Logica; & nihil includens particulare, ex quo quæ sit qualitatis natura intelligi possit.

Sed neque in naturâ, est fundamentum aliquod analogiæ huius in supernaturalia transferendæ; cum proprietates, & accidentia, in naturâ, non sint aliud quàm determinationes & modificationes ipsius substantiæ cuius sunt; vel certè, denominationes sequentes comparationem substantiæ ad alia quæ circumstant eam.

Neque potentia actiua, potest distincta esse à substantiâ, seu subiecto, cuius est. Cum enim vnumquodque agat quatenus est actu; non est aliud;

esse potentiam actiuam, quàm esse multum actu: sic, vir est actiuus similis sui, præ puero; & minimus ignis, non est vltimus, sed aliquantus. Cum itaque substantiæ, & primo actui, competat esse magis actu; etiam illi competit esse actiuum.

Rursus, si foret aliqua radix supernaturalium dispositionum; deberet esse naturæ cuiusdam supernaturalis, id est, diuinæ. Quare, cum primum nomen Dei, sit *Esse*, vel *existentia subsistens*; etiam hæc radix, vel existentia deberet esse, vel vis aliqua suscipiendi existentiam quatenus propria est Dei; hoc est, existentia subsistentis; & sic, foret substantia, & non qualitas.

Obijcies, quòd cum virtus sit dispositio perfecti, id est, dispositi secundum suam naturam; necessum est intelligi ante virtutem, rationem naturæ secundum quam disponat virtus; sic itaque, cum charitas sit virtus, necesse est præintelligi aliam naturam, respectu cuius recta sit dispositio; cum itaque sit virtus supernaturalis, naturam supra naturam præsupponit.

Respondetur, quòd cùm eadem res, intelligi possit primò imperfecta, postmodum perfecta ; non necesse est, quod præsupponitur virtuti esse distinctum ab eâ , aliter quàm inclusum ab includente, sicut neque vir distinguitur à puero, neque calor vehementius à modico, nisi vt amplius de eodem : sic quoque actus voluntatis nō aliter distinguitur ab actu intellectus perfectio. Potest itaq; dici, quòd charitas præsupponit intellectum rectum, sed de bilem ; sicut reuerà supponit fidem, quæ dicitur *substantia rerum sperandarum* ; id est, hominis quatenus ad supernaturalia eleuati.

Sed & charitas, rectè dicitur esse dispositio secundum naturam hominis. Non enim ex eo quòd est supra naturam, propterea non est secundum illam, seu connaturalis : imò, cùm sit dispositio ipsius ad finem propter quem creata est, necessariò est secundum illā ; sicut dispositio cultri ad secandum, non potest non esse secundum naturā cultri ; sicut etiam fides, non potest non esse secundum principia intellectus ; alioqui, non

68 INSTITVT. SACRARVM.
foret virtus intellectualis.

Ex quo accipitur , non dari aliquam charitatem naturalem ; seu, quòd homo, ex puris viribus naturæ, possit diligere Deum, super omnia. Palam enim est, quòd sic diligere Deum, est diligere illum propter se, & per consequens vt vltimum finem; hoc est, quantum amabilis. Clarum quoque est, Deum habiturum dupliciter rationem vltimi finis, respectu hominis; siue, distinguendas esse in Deo rationes duas, seu bonitates finales, hoc est assequibiles; secundùm vnā quarum, sit finis naturæ; secundùm alteram, finis supernaturalium motionum. Quod est ponere duas rationes Deitatis.

Præterea, si Deus dupliciter habeat rationem finis, respectu hominis; vel, vna ratio subordinatur alteri, vel non: si subordinatur; eo ipso non est vltimi finis ratio; sed quodammodo habet rationem mediæ, & amor ipsius, est modificabilis secundùm illum alterum cui subordinatur. Si non subordinatur, erit natus absolute trahere voluntatem humanam;

& per cōsequens, erit vera Beatitudo.

Sed & Intelligentiæ, & animæ separatæ, quæ habent plenitudinem cognitionis Dei, vt est author naturæ; non possent tantum bonum posthabere alteri bono; ac per consequens, perfectè illi inhærerent, & verè beatæ forent, & nulla earum posset esse misera. Et si forent, non culpâ suâ, sed merito & bonitate suâ; quia totis viribus concupiscerent visionem Dei, quam non obtinerent; & hoc, ex voluntariâ negatione Dei, cum ipsæ optimè forent dispositæ. Adde quòd si duplex est charitas, duplex est assequendum pro fine vltimo; duplexque assecutio Dei. Sed sola clara visio est assecutio Dei. Non itaque duplex est charitas.

Protinus clarum est, charitatem ex naturâ suâ inductiuam esse omnium virtutum quæ morales appellantur. Cùm enim sit amor vltimi finis; patet, omnes, & singulas actiones, quæ ex intuitu boni & vltimi finis aguntur: ex vi ipsius fieri; & tales fieri, qualiter ad consecutionem vltimi finis oportet, seu optimè

natae sunt fieri. Quare cum disponi rectè ad vltimum finem, sit rectè disponi secundum naturam; seu, esse virtute affectum; clarum est, nos ex charitate fieri secundum omnes actiones nostras, & quod sequitur, simpliciter, virtuosos secundum omnes virtutes.

Ad hæc sequitur, non esse alias virtutes naturales, quàm has, quæ vocantur, & sunt, supernaturales: si enim sunt, cum ex necessitate sint subordinatae vltimo fini, ab eo regulantur: vel itaque eodem prorsus modo, quo hæc in iisdem circumstantiis; vel diuerso. Si eodem, cum actio & motiua sint eadem, ex necessitate virtutes sunt eadem: si diuerso; cum finis, & circumstantia ponantur eadem; Idem finis, manens idem, ponetur se habere diuersimodè ad prorsus eadem.

Tenetur itaque, virtutes, quæ absque charitate exercentur, & appellantur virtutes; non esse verè tales; sed participationes quasdam virtutum: cum non sint simpliciter disponētes hominem secundum naturā, sed secundum ali-

quam partem naturæ ; seu bonum quod non est simpliciter bonum hominis , sed bonum Reipublicæ , vel alius finis particularis : neque dicendas esse morales , quæ regulent actionem vt actionem ; id est , quatenus hominis ; sed quatenus talis hominis ; id est , ciuis , vel militis , &c.

LECTIO XI.

*De ijs quæ dicuntur perse bona,
vel mala.*

O Bjicies , virtutes morales , esse per sese bonas & conformes naturæ , quatenus rationalis est ; & habere ex & in seipsis decorem & pulchritudinem quamdam , propter quam mereantur à naturâ rationali appeti & exerceri. Quare erunt veræ virtutes , etiam si independenter à charitate exerceantur , saltem modo non contra illam exerceantur ; quod etiam est impossibile : non enim aliquo modo illi opponuntur.

Respondetur, quod cum anima spiritualis sit verè forma corporis, & pars hominis; etiam quatenus aliquod bonum amat homo, patet bonum ad eam dupliciter comparari: aliud enim natum est facere sui amorem immediatè, siue sine aliquo discursu medio; aliud verò operatur in illam, ostendendo sese bonum mediante aliquo discursu.

Et euidentius est, quicquid facit sensationem conuenientem corpori, facere etiam amorem sui immediatè cum, facere sensationem, sit facere cognitionem; & facere sensationem congruentem, sit facere cognitionem boni, siue congruentis sibi appliciti. Qualis sensatio, vel est amor, vel ex ipsâ fabricâ corporis, amor (id est, motus cordis circa tale bonum) eam sequitur; si illum velimus amorem nominare.

Cùmque palam sit, nihil in hac vitâ afficere animam, nisi mediante corpore & sensu; sit, nihil posse suum amorem immediatè facere, nisi faciat congruam sensationem. Cum enim congrua sensatio, ad hoc data

LIBER I. LECTIO XI. 73

fit, vt operatio sit delectabilis; & per consequens, & fortis & frequens; corpus autem propter animum factum sit, & conforme ei; necesse est ipsum sic esse fabricatum, vt faciat animæ proficuas operationes, magis fortes & frequentes, quàm eas quæ sibi proficiuæ sunt. Quare necesse etiam est, vt congruam sensationem faciant earum objecta.

Sunt igitur quædam, siue res, siue actiones, quæ habent conformitatem ad hominem, vel secundum animam, vel secundum corpus; & dicuntur bona per se; id est, habentia vim mouendi amorem, absque ope alterius. Sed quoniam cum hoc consistit, quod possint esse impossibilia cum alio, quod habeat vim magis mouendi; possunt hæc reijci. Habent itaque hæc bona, indifferentiam quandam suæ bonitati admixtam; & per consequens, non sunt absolute actû bona; sed quodammodo in potentiâ.

Pater proinde, decorem illum virtutum moralium, de quo in argumento est sermo; cum non sit aliud

quàm communis quædam conformitas ad naturam rationalem, quæ possit stare cum difformitate simpliciter; tantummodo esse umbram boni; & non veram bonitatem; etsi habeant quendam gradum & accessum, & quasi participationem, conformitatis ad rationem.

Hoc interea conclusum est, & bona corporis, & hæc simulacra virtutum, esse dicenda in potentiâ per se bona; id est, conformia naturæ in abstracto; & nata facere amorem ex se: & magis illas virtutum imitationes; quia conformitas illarum ad hominem, est secundum portionem nobiliores, & secundum quam magis est homo; quare & ipsa conformitas, seu bonitas, est major.

Immo, ipsa delectatio non minus est per se bona; cum clarum sit, eam irritare naturam ad repetendam actionem. Quare & corporalis est sectanda propter ipsum bonum corporis; & ea quæ sequitur talem actionem spirituales, etiam magis quàm ipsamet actio spiritualis; quia disponit & adiuvat ad virtutem veram,

atque ad simulacrum. Quare cum clarum sit; delectationem facere amorem sui; in eodem sensu, quo ipsa bona dicuntur bona, etiam voluptas bona erit.

Huiusmodi tamen bona, qualitercunque dicta, comparatione ad beatitudinem non sunt bona; siue quia infinitè superantur; siue quia habent puram rationem mediorum, respectu beatitudinis; & solius ipsius gratiæ, sunt ultimè diligenda.

Accipiendo modò vocem *boni per se*, pro bono quod vitari non possit; hoc est, non possit esse quin sit bonum; sic, quoniam homo natus est ad visionem Dei, sicut culter ad fecandum, patet visionem Dei necessariò esse taliter bonum. Deinde, charitatem perfectam. Illa enim, eum sit optima dispositio, non potest esse impossibilis cum majori se, vel aliquo faciente meliorem dispositionem.

Rursus, tale bonum est virtus actualis; ist est, actio cum virtute facta. Quia enim eadem actio non reuertitur bis, neque potest esse in alijs.

76 INSTITVT. SACRARVM.
circumstantijs quàm in quibus fit;
conficitur, talem actionem nun-
quam posse vitiosam euadere.

E contrà, mala per se, quæ in nul-
lâ circumstantiâ possunt rectè fieri;
sunt, auersio à Deo vt vltimo fine;
conuersio ad creaturam vt vltimum
finem; & si quæ actiones sunt ita cum
his connexæ, vt non possint fieri, ni-
si ab his, vt causis, procedant. Et
tandem, omnis peccatio actualis.
Hæc enim, cùm ordinem ad vlti-
mum finem peruertant, nullo modo
sunt meliorabilia.

Ex quibus conficitur, omne quod
prohibetur à Deo, esse prohibitum
quia malum; & è contrà, omne quod
ab ipso mandatur, esse præceptum
quia bonum. Cùm enim Deus faciat
hominem propter semetipsum, sed
propter finem qui aptissimus est ipsi,
& sit pura ratio; non habet aliam
rationem imperandi quicquam, nisi
ex eo quod sit idoneum ad perdu-
cendum hominem ad hunc finem;
neque prohibendi nisi contraria. Sed
hæc, sunt eo ipso bona; illa, mala.
Quare, bonitas & malitia actionum,

LIBER. I. LECTIO XI. 77

est causa imperij vel prohibitionis
diuinæ, prout creata quædam actio-
nes sunt.

Neque hoc impedit, quin plura
possint dici mala, quia prohibita.
Nos enim vocamus mala, quæ ap-
parent nobis, esse contraria bono
humano; hoc est; quæ de propinquo
nocumentum inferunt; quæ verò
malitiam longè positam habent, eo-
rum malitiam non dispicimus, &
proinde indifferentia arbitramur.
Quæ tamen, secundum providen-
tiam quâ regimur à Deo, sunt mala;
& idcirco prohibita. Nos verò,
mala putamus, quia prohibita: &
ea tantùm prohibita, quia mala;
quorum malitia, in propatulo est.

Vnde inferitur, præcepta ceremo-
nialia, iudicialia, & quæcumque alia
antiquæ legis; verè fuisse de rebus
idoneis, non solùm illi populo, pro-
ut ille populus specialis erat; sed
multò magis, prout erat seminarium
generis humani, mediante quo Deus
naturam humanam præparabat ad
legem gratiæ; in qua, humana na-
tura futura erat in illâ perfectione;

78 INSTITVT. SACRARVM.
cuius capax est in hâc vitâ; quâ veniente, cessabant esse sic bona.

LECTIO XII.

De connexione virtutum, & oppositione vitiorum ad charitatem.

QVandoquidem verò boni & mali ratio in actionibus nostris, ab habitudine ad vltimum finem accipitur; patet omnium virtutum rationem, à charitate accipi, vt in eo consistat species cuiusque virtutis, vt sit talis dispositio animæ circa tale objectum, qualis à charitate nata est fieri; seu qualis conuenit charitati alendæ & propagandæ. Est itaque charitas, regula aliarum virtutum, determinans eis speciem; quod est esse formam extrinsecam reliquarum virtutum.

Rursus, quoniam homo, à bonitate finis, mouetur ad exequenda media; cæterarum autem virtutum actiones comparantur ad charitatem, tanquam executiones medio-

rum ad amorem finis; euidens iterum est, quod charitas est principiū, quo homo sese mouet ad & secundum reliquas virtutes. Quare est quodammodo vita earum; & illæ, sine charitate, mortuæ.

Sed & quia virtus est vltimum potentia; id est, actio potentia, optimè seu perfectè se gerentis; & distinguitur contra alias dispositiones rectas, sed imperfectas, vt vir contra puerum; patet, fidem & spem, citra charitatem non esse virtutes; cum sint iudicia imperfecta, quæque non possint facere subjectum operari secundum naturam suam & ipsarum, etsi ad suos actus aliquo modo reducantur. Et idem est de quibuslibet alijs dispositionibus præuijs ad charitatem.

Dispositiones verò quæ ex vfu virtutum moralium manent ablata charitate; cum non possint esse formaliter habilitates ad operationes quatenus ex charitate procedunt; (tales enim non possent manere post charitatem, neque operari sine ipsâ, neque non includere ipsam),

palam est, esse duntaxat dispositiones ad illum materiale ordinem, quem charitas introducebat; qui, cum in alijs circumstantijs non sit natus poni à charitate; patet has dispositiones ex naturâ suâ posse operari non rectum; & per consequens, non esse virtutes; etsi supernaturales sint, utpote specificationem recipientes à charitate.

Ex his fit; quòd, si quis ex amore æterni boni, vitæ suæ rationes instituit, semel omnes eius partes ex intentione beatitudinis ordinans; omnes actiones ipsius, ad conseruationem talis ordinis, vel ex vi ipsius postmodum factæ, ex vi charitatis referantur in Deum; hoc est, absolute tota vita, & omnes actiones minimæ ipsius; etsi nihil cogitet de beatitudine, sed tantum de vitâ secundum partem aliquam illius ordinis agendâ: cum hoc fiat in vi ordinis; & ordo, in vi charitatis. Quare, tota vita ipsius ex charitate ducitur.

Quinimo, qui partem aliquam vitæ ad acquirendam beatitudinem

LIBER. I. LECTIO XII. 81

collocat, reliquam ad bona temporalia propter ipsa; sed sic, ut aduertat ne sic afficiatur, ut ea præferat æternæ vitæ; etiam singulas actiones suas ex vi charitatis dirigit ad Deum; quatenus singulæ saltem negativè modificantur à charitate, cauente ne quid contra regulam fiat: ut totum carmen à proficiâ, vel elocutio à grammaticâ, regulatur; etsi de regulis non cogitemus, modò aduigilemus ne in ipso opere quid peccetur.

Constat ex dictis, neque habitum neque actum peccati mortalis, posse consistere cum actu vel habitu charitatis; aut è contra. Cum enim amor vltimi finis, sit æquiualeus vniuersali propositioni; scilicet quod nihil amandum sit, nisi referibiliter ad illum; patet, duos amores duorum vltimorum bonorum, non posse simul consistere in animâ; cum amor vnius, non sit referibilis ad amorem alterius.

Petes, cur duo aliqua non possint integrare vltimum finem, ut homo constituat rationem vltimi finis in

82. INSTITVT. SACRARVM.

coniunctione vtriusque? Respondetur, hoc posse contingere; immo vtriusque singula amentur vltimatè propter se. Sed, si aliquod horum sit illud quod verè est finis naturæ; patet, illud non amari sicut tanto bono congruit; & per consequens, non esse sufficientem talem amorem ad illud consequendum, iuxta inclinationem naturæ; neque esse charitatem, talem amorem. Vnde fit, talem amorem plurium, non esse respectu illorum, talem, qualis debetur connaturaliter vltimo fini.

Habetur hinc, quæ peccata sint ex genere suo mortalia. Ea videlicet, quæ sunt affectus illorum objectorum, in quibus prosequendis, homines nati sunt totam vitam suam collocare; & secundum quæ, status hominum distinguuntur. Patet enim hæc nata esse facere amorem sui per totam vitam; seu tanquam vltimi finis: sic videmus alios potentiam, gloriam, famam, honorem spectare, quorum omnium vitia, ad superbiam spectant; alios, quietem & voluptates sectari, & Luxuriâ, Gulâ, Ace-

diâque peccare ; alios , opibus cumulandis studere ; quos auaros dicimus.

Palam quoque est, eum qui ingentem æstimationem de aliquo bono habet ; eo ipso , credere dignum , ut omnes eandem æstimationem de illo habeant. Si itaque tale bonum sit ultimus finis , cupit ut omnes illud pro ultimo fine habeant. Clarum est itaque , ex vi charitatis , vnumquemque cupere , ut proximi habeant charitatem ; & per consequens , amare proximum sicut semetipsum ; seu , velle illud maximum ei bonum quod sibi met vult.

Consequo hæret, ut non velit, vel inferre illi aliquod malum , vel auferre ab illo bonum, quo fiat ut auertatur ab ingenti hoc bono quod illi optat , nisi fortè sibi met ad consequendam beatitudinem ultimam hoc conducat. Patet itaque , iram quâ malum præter necessitatem inferitur ; & inuidentiam , quâ bonum à proximo citra rationem tollitur , ex genere suo , repugnare charitati ; atque adeo , septem peccata ca-

84 INSTITVT. SACRARVM.
pitalia ex genere suo esse mortalia.

Constans proinde est, hominem tunc esse in peccato mortali, & ex-
eidisse charitate, cum sic affectus
animâ est erga aliquod bonum sibi,
aut malum proximi, vt illud habere
vel facere velit, etiamsi credat se
nunquam ad beatitudinem peruen-
turum, si habeat vel agat tale quid;
vel certè negligat an sit peruen-
turus necne, modò animo suo obsequatur
in tali re vel actione.

Clarum quoque est, peccata ve-
nialia non duntaxat non repugnare
charitati; sed etiam dum sunt, à
charitate referri in Deum, etsi non
quatenus peccata & defectus. Cum
enim actio peccati venialis, habeat
ex vi charitatis eam modificatio-
nem, vt non sit contra regulam, (si-
cut de actionibus humanis dictum
est) & accipere talem modificatio-
nem, sit suo modo esse à charitate,
& charitas sit ordo ad Deum; patet,
peccata etiam venialia ipsa ad Deum
ordinari.

Tantundem verum est, de reliquis
peccatorum mortaliū & venia-

LIBER. I. LECTIO. XII. 83

lium, & de concupiscentia, & alijs
imperfectiōibus quibusque dispo-
nentibus ad peccatum. Hæc enim
omnia, quatenus impediuntur à pro-
rumpendo in peccata mortalia, vel
secundum aliquam bonitatem par-
tialē diriguntur ad bonam actio-
nem; eatenus regulantur & dispo-
nuntur à charitate, & fiunt nobis
media ad vitam æternam conse-
quendam.

Non tamen necesse est, affectus
peccatorum mortalium, habere ean-
dem vim in actiones humanas versùs
malum. Cùm enim plerùmque, non
nisi hic & nunc, sit desiderium boni
concupiti; non fit ex eo alias actio-
nes, quàm eas quæ specialiter ordi-
nantur ad finem consequendum,
pendere ex tali affectu; neque per ip-
sum ordinari ad obiectum ipsius. Si
quis tamen integram vitam ad ali-
quod bonum creatum ordinet; ple-
ræque actiones ipsius, ex vitalis or-
dinationis, sunt peccata mortalia.

LECTIO XIII.

De Iustificatione: & ipsius, seu habituum supernaturalium, production.

ELicitur ex dictis, quod Charitas, quoniam est impossibilis cum peccato, & excludit illud formaliter, (quia est formaliter ei opposita) sit etiam remissio peccatorum. Cum itaque sit etiam forma omnium virtutum, per quas homo cuncta ea facit quæ debet, & sibi, & vniuersis eum circumstantibus; conficitur, iustitiam hominis formaliter in charitate sitam esse, & non intrinsecâ aliquâ acceptione Dei, vel alio actu ipsius, charitatem quasi ex pacto comitante.

Cum enim Deus, hominem, propter ipsum hominem, condiderit; hic ipsius finis est, vt homini quàm optimè sit; hoc est, vt homo ipse optimus sit, seu perfectissimus. Sed palam est, perfectionem hominis non in extrinsecis, sed in intrinsecâ habi-

LIBER I. LECTIO XIII. 87

tudine ipsius ad naturam & summum bonum suum, esse constitutam. Ibi itaque quærenda est ratio iustitiæ.

Rursus, vel Deus placatur, vel diligit, vel offenditur, per actus nostros, ad placitum; & tunc, Iustitia nostra posset æquè consistere in genuflexione externâ, vel lotionem aliquâ, aut aliâ indifferente actione, æquè atque in nostris actibus ex sese bonis: sed & indignum Deo est, acceptare rem vel actionem pro eo quod non est. Vel necessario; & sic dicendum erit, creaturam aliquam, esse sufficiens motivum ad voluntatem Dei trahendam ad amorem vel odium; quod ipso aspectu absurdum est.

Sed & quæcumque connexio sit; saltem (in sententiâ illâ) essentia, & formalis ratio iustitiæ, consistit in extrinsecâ denominatione ab actibus divinis: & per consequens, homo fit peccator vel innocens, per meram imputationem peccati & iustitiæ; non autem per suos actus; nisi fortè quasi per conditiones, ad

peccatum & iustitiam. Neque præmium & pœnam accipit homo propter hoc quod agit, aut est; sed quia Deus imputat hanc actionem ad præmium, & illam ad pœnam.

Neque facile est intelligere, quales sint hi actus in Deo; amare, & odisse. Si enim sint volitio præmij & pœnæ, sunt actus iustitiæ; & non amoris, vel odij. Præter hæc autem, nullus effectus procedit ex ijs. Quare, erunt actus quidam imperfecti, & multibres; quales sunt in concupiscibili nostro, priusquam sit efficax ad operandum. Neque erunt simplex conformitas, vel difformitas, ad iustum, & peccatorem. Sic enim, ipsa essentia, & non voluntas, diceretur amare vel odisse: & iustitia nostra completa foret sine ijs.

Tandem, hic modus Philosophandi, aufert omnem vltiorem progressum; cum non possimus aliquo modo reddere causam, cur hoc placeat, illud displiceat Deo; vel deducere consequentiam, aliud placitum ex eo quod hoc placeat; cum hæc dependeant ex naturâ abscondi-

voluntatis diuinæ, vel ex arbitria ipsius electione; cuius causas inuestigare nequeamus. Quare, hæc est via ignorantia, & non secundum naturam homini. Quare, neque ex Deo homini data.

Cum verò charitas, sit habitualis, & actualis; actus autem, principalior; nihil ambigui esse potest, quin iustificatio, magis reluceat, & sit nobilior, in actu quàm in habitu. Quod non impedit, quin, si quis iustitiam velit significare qualitatem animæ permanentem, non ex vi vocis, sed ex usu Doctorum; sic, dicenda sit sola charitas habitualis, constituere formaliter iustitiam.

Constat verò, charitatem habitua-
lem, plerumque, & ex naturâ rei, per
actus in nobis produci, eodem mo-
do, quo de habitibus naturalibus, &
experientia & Philosophia testantur.
Cum enim, eandem experientiam
habeamus in supernaturalibus, quàm
in naturalibus; (cum, culturam ani-
mæ similem, & frequentationem
actuum, præcipiant Magistri spirita-
les, quàm scholarum, vel athletici)

eâdem profectò violentiâ agimur ad credendum, habitus per ipsos actus effici in supernaturalibus, quàm in naturalibus.

Sed & habitum non esse aliud quàm ipsum actum debiliùs manentem, omnino constat, ex eo quòd impressio facta in subiectum, absque aliquo contrario destruyente, interire non potest: quia est modus ipsius subiecti: & quòd alio modo imbui, requirit nouam actionem. Permanet itaque actus, donec à contrario destruat. In animâ verò, non est alia contrarietas, quàm contradictio- nis. Donec itaque retractetur, ex necessitate semper manet actus; & dicitur habitus.

Obijcies, esse contra manifestam experientiam, quòd actus maneant. Palam enim est, quòd non video, nisi dum obiectum actu oppositum est oculis; non audio, nisi dum sonat, & sic in reliquis sensibus. Sic in phantasiâ, & in ipso intellectu, clarum est, cogitantes de vno non cogitare de alio: quod tamen deberent, si actus post impressionem reman-
rent.

Respondetur, manifestum esse, post actum intellectus vel phantasiae, potentiam manere in actu illius obiecti quod cognouit. Experientia enim docet, eam posse iterum cognoscere quando vult; quod ante primam cognitionem non potuit. Quod est verum, loquendo de potentijs interioribus: exteriores enim, non sunt cognoscentes; sed instrumenta, per quæ sit cognitio; sicut per perspicilia, & tubos acousticos, impressio obiecti augetur & confirmatur. Manet itaque impressio; id est, actus substantia, quatenus ens, & non tantum motio, est. Vnde cum in animâ non possit esse motus, ibi adæquatè manet impressio; id est actus.

Quod autem non appareat manere, est quia anima in corpore non agit ex sese; sed præcisè quatenus mouetur à corpore, seu per corpus; & per consequens, non facit sensum sui, nisi in effectu corporeo. Ex hinc fit, vt cum rursus agimus, sentiamus actum faciliorem, vel fortiolem, vel directum & modificatum ab animâ,

ratione prioris actus ; quod arguit impressionem manere. Sed modum ipsius impressionis , in sese , videre non possumus ; & ideo credimus, ipsum actu non mansisse.

Rursus igitur, cum supernaturalitas sit quoddam in adificatio, seu superstructio, in naturâ nostrâ facta ; & habitus supernaturales, in potentias naturales introducantur : vnumquodque autem, natum sit recipi per modum recipientis : prorsus præter rationem est, non ijs attribuerè vim & modum generationis connaturalibus potentijs, in quibus, & per quas, generari debent.

Sed & assignare hanc actionem Deo, ex ipsius parte inconueniens est : cum Philosophia doceat, actionem propriam ipsius, esse infundere existentiam ; & non præcipere actiones secundarum causarum, à quibus actus & habitus procedunt. Præterquam quod, imperiti artificis est instrumenta tam inepta facere, necesse semper sit sese miscere ad adinuandâ peculiaria eorum opera.

Adde, quod in oppositâ sententia

tiā, quæ docet naturam non dispo-
nere ad supernaturalia opera; nulla
erit determinatio in causis secundis
ad actionem primæ causæ. Vnde,
ordo causarum redditur luxatus;
dum non ponitur causa passiva de-
terminata ad actum causæ actiue;
& per consequens, agens, non se-
cundum naturam rerum, sed arbi-
trariè & sponte operatur.

Sed & collusio quædam videtur,
vt causæ secundæ videantur operari;
dato verò signo, causa prima sese
immisceat: maximè, cum nulla ne-
cessitas sit; cum supernaturalitatis
ratio hoc non requirat; immo, op-
positum; cum supernaturale non di-
cat contra naturam, sed secundum
naturam; vt proinde natura debeat
suam partem habere.

Quid quod necesse sit, si tales ha-
bitus immediate infunderentur, ali-
quam esse experientiam quâ possent
dignosci in effectibus. Cum enim
maximè efficaces & adiutrices fo-
rent operationum nostrarum, pate-
ret in effectibus, esse maiorem vim
in actibus nostris, quàm soleat esse

in pari exercitatione actionum naturalium; maximè, cùm hi authores ponant habitus quosdam naturales, subseruientes his supernaturalibus, & facilitatem dantes ad eos actus, quos amissâ charitate putant nos exercere: quod etiam ipsum nouum inconueniens est: duplicatam quoque efficaciam deberemus experi-ri, cum supernaturales etiam ad- sunt.

Ex quibus satis clarum est, non esse habitus supernaturales suis pri- mis actibus prærequisitos; neque esse per modum potentiarum; sed om- nino sicut habitus naturales; nisi quòd circa alia objecta versentur; & discurrendum esse prorsus de ijs, ad modum quo philosophamur de na- turalibus, obseruatis specialibus dif- ferentijs. Hoc tamen non vetat eos dici per se infusos, quasi specialiter à Deo fluentes; modò, nè immediate, & exclusis causis secundis, ponan- tur in nobis fieri.

Patet itaque, quid sit habitus cha- ritalis. Puta, impressio quædam seu habitudo animæ, consurgens ex

pluribus actibus amoris Dei; quorum vnus, verbi gratiâ, sit propter beneficia eius; alius, propter bonitatem moralem; alius propter bonitatem naturalem; qui omnes, vnam facilitatem dant animæ amandi Deum. Non quòd hæ singulæ maneant in animâ; sed vna ex omnibus: singulis posterioribus actibus sic immutantibus priorem dispositionem, vt posterior sit virtualiter & prima, & quæ futura fuisset ex posteriori actu, si prima non infuisset.

Patet consequenter non esse numerum determinatum habituum supernaturalium, vel naturalium, secundum infimas rationes; etsi in certa genera colligi possint. Cum enim nullus actus possit esse omnino similis alteri; habituum verò ratio, ex actuum ratione pendeat; possibile est, tot habitus virtutum distinguere, quod sunt actus. Sed quia humana consideratio brevis est; propterea non descendunt magistri, nisi ad certas communes rationes; & ijs, habitus diuersificant, quod ad instructionem commodum sit.

LECTIO XIV..

De rationibus Meriti, & Demeriti.

HInc est, quòd solet dici, habitus non generari per vnum actum: Cùm enim habitum determinant per certam materiam & obiectum; quod diuersitatem in sese habet; & per consequens, plures difficultates superandas, quarum vnica vnico actu facilitatur: necesse est, promptitudinem ad operandum vniuersim circatalem materiam, non nisi post plures actus reperiri; quare & habitum volunt per plures actus acquiri; quamuis per singulos actus aliquam difficultatem tolli, vel certe facilitatem poni, non diffiteantur.

Quando verò, difficultas notabilis, in vnico puncto consistit; tunc, ipsa experientia docet, habitum vno actu acquiri. Sic, demonstratione vnica, tollitur incredibilitas obiecti, quod videbatur absurdum: sic etiam vna resolutio viri prudentis circa agibile

agibile bene consideratum, continuat actionem usque ad terminum. Quare, cum charitas consistat in tali electione Dei pro ultimo fine; unico actu, generatur habitus charitatis, & enervatur omnium peccatorum violentia.

Sub quo accipitur, charitatis habitum per singulos actus consequentes augeri. Cum enim singuli, (ut dictum est) mancant, & faciant unam impressionem communem precontinentem omnes; necesse est, illam valentiorum esse ex singulis, & per consequens, singulos actus ad eius fortitudinem & radicationem contribuere. Ex omnibus itaque, siue secundum sese remissioribus, siue aequalibus, augetur semper charitatis vis, in homine habente charitatem.

Cumque anima vnica sit, & indiuisibilis; & per consequens, si dispositiones aliquo modo contrariæ sine illa, necesse sit actionem animæ, non ex vna sola illarum, sed ex vna quasi temperatâ per aliam, quatenus ex vi spiritualis animæ progre-

ditur, nasci; conficitur, quòd si anima plures dispositiones amorum rerum temporalium habet, ex eo minùs disposita est ad amorem Dei; & per consequens, habitus charitatis minùs potens in eâ; & per consequens, per peccata venialia diminuitur habitus charitatis; vt etiam experientia testatur.

Porro, cùm ex actibus charitatis, sequantur habitus; ex habitu, visio beatifica: rursus, ex charitate sequantur actiones omnium aliarum virtutum; ex ijs, laus & gaudium de benefactis, & fructus seu præmia, quæ ex benefactis agentis consequuntur, & pendent: Hæc autem sunt quæ habent rationem mercedis respectu actionum nostrarum: patet, omnem fructum qui consequitur ex operibus Christiani, vt Christiani, ex charitate radicem & causam suam trahere.

Cùm itaque doceamur, hæc bene operantibus dari à Deo; & ex tali apprehensione moueamur, ad bene operandum; & nihil iustius & dignius esse possit, quàm congruos ef-

factus ex suis causis nasci ; palam est, nos per charitatem ex condigno mereri hæc omnia à Deo ; cùm meritum non sit aliud , quàm operatio ad quam ex promisso potentis nobis dare quod volumus, consequitur tale bonum nobis tribui.

Ex quo patet, meritum quod appellari solet *de congruo* , (& collocatur in eo , quòd congruens sit vt Deus, disponenti sese, seu facienti quod in se est , faciat quod ex parte ipsius deest) non habere rationem meriti ; cùm nullum promissum, nulla expectatio , nulla obligatio vnius ad alium , intercedat. Immo, ipsum fundamentum non satis subsistit. Deus enim non agit ex contemplatione vnius particularis , vt agat , quod illi secundum priuatam dispositionem congruit ; sed totius vniuersi ; seu , quod positis omnibus circumstantijs est melius. Sed & cùm Deus non possit non facere congruum ; secundum naturalem operationem , daretur gratia : quod pertinet ad Hæresim Pelagianam.

Clarum quoque euadit, peccatum esse demeritum, seu pœnæ meritum, æquè atque charitas est meritum præmij. Nam & peccans mortaliter, habet constantiam quandam ex vi sui actus, per quam adhæret eidem obiecto : vnde patet, habitum peccandi relictum esse. Deinde, cùm mala peccantem consequantur ; tum in ipsâ animâ, vt metus, dolores, &c. tum in externis, quæ ad ipsummet, vel alios spectant ; & hæc omnia, comminatione diuinâ sint prædicta peccatoribus ; palam est, eos hæc omnia mereri ; & per consequens, peccatum esse demeritum.

Patet item, maculam peccati, non esse purè priuationem denominatam à causâ positiuâ ; sed esse positiuam habitudinem animæ, ad obiectum irrationabile ; & verum habitum excludentem ex naturâ suâ charitatem ; quique tollatur, & ponatur, vnico actu, sicut charitas, cùm sit eiusdem generis resolutionis grauis & constantis. Sed potius, fæditatem, quàm maculam, esse dicendam. Macula enim, nitidum,

LIBER. I. LECTIO XIV. 101

ex aliquâ tantùm parte, violat; sed peccatum mortale, totam animam sedat, etsi vnicum sit.

Adde, quòd si macula consisteret in peccato præterito; cùm denominatio nihil sit in re ipsâ; ratio peccati habitualis, consisteret in actu auersionis diuinæ; & macula non foret realis, sed imputatiua; & incideretur in omnia inconuenientia quæ congesta sunt in peccato, quatenus mala minùs quàm bona sunt referribilia in Deum.

Consequens est, reatum pœnæ manere post ablatam culpam: tum, quatenus non omnis inordinatio in interioribus, aufertur ex resolutione quæ restituit charitatem; tum, quatenus ex externo actu datum est principium mali in alijs, quod sit causa malj & doloris. Illa tamen pœna, quæ ex inexistentiâ peccati in animâ, consecutura erat peccantem; non amplius est euentura: & per consequens, reatus ipsius non manet post reatum culpæ.

Vnde intelligitur quid sit satisfactio pro peccato. Quando enim,

omne nocumentum quod ipsi homini per peccatum euenit, reparatum est; & tanta tristitia de malis alienis ex peccato natis, quanta ad curam eorum tollendorum & cauendi similis in futurum lapsus ex naturâ rei sufficit, impensa fuerit; homo satisfacit. Cùm enim rationaliter homo non possit amplius ad destructionem peccati, & effectuum ipsius; palam est, nihil superesse quod agat; & per consequens, nihil deest; quod est, satisfacisse.

Manifestum quoque est, libertatem agendi, esse de ratione meriti & demeriti. Cùm enim hæc nomina, primò sint vsurpata in actionibus humanis; & vis eorum dependeat ex ratione; (verbi gratiâ, ex pacto & promissione) fit euident, actionem meriti esse actionem agentis ex cognitione proportionis mediij ad finem; in quo, consistit ratio libertatis. Quare, mereri & demereri, propriè loquendo, non possunt esse nisi actiones agentium liberorum.

Sed hoc non obstat, quin eadem

bona vel mala possint accidere etiam agentibus non agentibus liberè. Sicut videmus infantes, & canes, virgis vel flagellis erudiri ad rectè agendum; etsi vim liberorum agentium in ijs non agnoscamus. Cessante itaque ratione meriti & præmij, vel demeriti & pœnæ; eadem bona & mala actiones comitantur, vel per modum disciplinæ, vel per modum causæ & effectus, vel alio titulo.

Tandem concluditur, quomodo reuiuiscant, & bona opera per restitutionem gratiæ, & mala per relapsum in peccatum. Cum enim necesse sit, vtraque dispositionem quandam relinquere in animâ: & cum anima, vel de malo in bonum, vel de bono in malum, proficit; semper, mutatio modificatur ex dispositione quæ est in subiecto: conficitur, & peccatum post gratiam grauius euenire, ex modificatione subiecti per priora peccata; & charitatem superuenientem esse potio- rem, ex eo quod dispositio subiecti per priora bona opera, erat facilior ad conuersionem. Omnia itaque præce-

dentia, sunt in virtute, in nouiter factâ dispositione animæ; & per consequens, reuiuiscunt per illam,

LECTIQ XV.

De necessitate gratiæ Auxiliatricis.

EX explicatis colligi potest, quòd, cum Adamus in lapsu dilexerit uxorem magis quàm Deum; & post lapsum, tum vxor præsens, tum alia objecta naturalia circumstantia, plus potestatis in ipsum habuerint, quàm ante lapsum; sed & cuncta hæc, post lapsum inclinabant eum ad semetipsa, propter imbecillitatem & defectum resistentiæ in ipso: impossibile fuit, illum reuerti ad amorem Dei super omnia, ex vi naturæ & circumstantium; sed necesse, eum magis & magis semper elongari.

Longè minùs, ad originalem Iustitiam sese reducere poterat. Quæ, cum certam mixtionem elementorum, vel humorum, ex parte cordis, requireret: neque fructus aliquis.

(cùm omnes necessariò à verâ mediâ
temperaturâ hominis abessent) illud
temperamentum continere posset;
sed & per mutationem tempestatum
anni multùm deteriorati essent fœ-
tus terræ, & ab accessione ad huma-
nam temperiem magis remoti; nul-
lus supererat modus, eam restituen-
di in debitum & priorem statum.

Cùm autem infantes nati etiam
ipsi ex necessitate longum tempus
viuerent subditi agentibus naturali-
bus, priusquam ad vsum rationis
peruenirent; clarum est, indebitam
temperiem, & subiectionem ad cir-
cunstantium obiectorum ictus, lon-
gè magis in ijs ex necessitate con-
firmari & radicari; & per conse-
quens, eos difficilioresemper eua-
dere, siue ad æquabilem passionum
motum, siue ad charitatem acqui-
rendam.

Quin & quò magis multiplican-
tur homines mali, eò magis necesse
est deteriores euadere; cùm nihil
æquè alliciat hominem, quàm alius
homo; singuli autem corruptionem
suam, & ipsi fortiter retineant, &

probare alijs conentur. Vnde si vnus homo non posset sese ad charitatem perducere, longè magis impossibile erat totum aliquem populum, vel ipsum genus humanum, ad eandem ex naturæ viribus reduci.

Quare, cum seruum dicamus illum qui vinculis vel vi exterâ prohibetur ab agendo quod secundum suam inclinationem est, & qui necessitatur ad agendum quod est secundum inclinationem cogentis; patet & singulos homines, & totum genus humanum, in seruitutem peccati, atque adeo Diaboli, (qui peccati author est) esse deditos: cum non possint agere quod ex naturali inclinatione eis inditum est, & coguntur agere quod ex inclinatione diaboli, eos ad hæc inducentis, est.

Sequitur & Adamo, & magis successoribus, necessarium fuisse principium aliquod extrinsecum, à quo excitarentur, & ad opera secundum naturam agenda mouerentur. Cum enim homo in hâc vitâ nihil agat secundum animam, nisi iuxta quod mouetur ex motione corporis sui; &

omnia mouentia corpus, erant talia,
 ut per impulsu suum eos remoue-
 rent & non adiunxerent ad operan-
 dum secundum naturam; planè per-
 spicuum est, extrinsecum principium
 eis ad bonam actionem fuisse neces-
 sarium.

Neque minùs clarè conspicitur,
 omnia eorum opera, quibus vel di-
 ligeant, quidpiam creatum tan-
 quam finem seu bonum per se, vel
 alia propter huiusmodi fines crea-
 tos; fuisse peccata mortalia. Cùm
 enim amor finis, in ijs non fuerit
 regulatus ab ultimo fine vero; ne-
 cessariò, vel fuit per modum ultimi
 finis, vel regulatus ab alio qui dile-
 ctus est per modum ultimi finis. Pa-
 tet autem utroque modo (sicut &
 dilectionem medijs propter finem
 creatum ultimum) actionem eua-
 dere peccatum mortale.

Specialiter verò, actus qui appa-
 rent virtuosì, necesse est fuisse vitio-
 sos. Tum quia speciositas ipsorum,
 non est amabilis tanquam ultimus
 finis; tum quia reuera non sunt facti
 secundum naturam. Cùm enim,

temperantia v. g. aut fortitudo illa
 apparens, moderaretur actionem
 secundum bonum aliquod creatum
 acquirendum, tanquam vltimum fi-
 nem: & alia sit proportio actionis
 ad idem bonum, tanquam ad vlti-
 mum finem; & alia, tanquam ad fi-
 nem ab alio regulatum: & hac quae
 de proportio, sit secundum naturam
 illa alia, contra naturam, necessum est
 tales actus fuisse quoad speciem vicio-
 sos, & contra ipsam naturam. Adde
 (si libet) quod, cum sine fide, ne-
 que Deum aliquid specialiter impera-
 uisse, neque semetipsum dilectionis
 premium proposuisse, sciri possit
 impossibile fuerit, ex vi naturae, prop-
 ter verum vltimum finem quae-
 ram operari; sed necesse fuerit
 omnia propter creatos fines operari.
 Neque officit, quod Deus, virtutes
 eorum compensauisse, aliquando
 dicatur. Cum enim nulla actio sit
 tam mala, quin aliquid boni in se
 habeat; non est mirum, si compen-
 satio temporalium bonorum, reddi-
 ta sit operibus minus defectuosis.
 Sed, ex ipso premio, intelligi potest,

LIBER I. LECTIO XV. 109

virtutes non fuisse veras : cum præmia sint talia ; & ex actionibus non vere virtuosis sequantur.

Fit itaque, statum Adami, in iustitiâ, fuisse talem, ut non posset malè agere, nisi motus esset à principio extrinseco ; & quatenus motus ab illo : post lapsum verò, ut non possit quicquam benè agere, nisi quatenus mouetur à principio extrinseco agente & mouente ipsum, ordine quodam, & vi superiore; etsi mediante virtute causarum naturalium. Vnde conficitur, illam propositionem, *Non esse in Ethnicis veras virtutes*, non esse dumtaxat celeberrimam Sanctorum sententiam, sed esse rationem cur omnes indigeant gloriâ Dei ; & necessitatem aduentus Christi, & totius legis Christianæ, in eâ niti. Quare, etsi opposita sententia, sub æquivocatione vocis *virtutis*, secundariò sumptæ, possit cum veritate defendi ; tamen, Christiani pæctoris est, pro phrafi Sanctorum, tanquam proanis depugnare; metu grauis damni; ex inordinatâ locutione, Christianam doctrinam consecuturi.

THO. INSTITVT. SACRARVM.

Sed & hoc perspicere licet, impotentiam ad benè agendum, quæ est in genere humano, non esse sitam in defectu aliquo voluntatis humanæ quatenus potètia est; sed vel ex accidentē incongruo, qualis est deuiatio, quæ per propaginem trahitur, & postea per consuetudinem malè agendi augetur; vel in naturâ creatorum objectorum circumstantium, comparatorum ad inferiorem animæ partem, id est, appetitum sensitium vitiatum per propagationem à primo parente.

Dilucet igitur, si de vi intrinsecæ naturæ voluntatis humanæ quæstio sit, veras esse has propositiones: Homo potest viuere secundum naturam: credere: amare Deum super omnia: resistere tentationibus: & non peccare. Et adeo veras, quàm verum est Grammaticum, aut Metricum posse facere orationem congruam, aut carmen legitimum; statuarium statuam; naupegum nauem, &c.

Si autem quæstio sit de exercitio, & peruentione ad actum in actu; sic,

LIBER I. LECTIO XV. III

ueras esse has alias : Homo non potest viuere secundum naturam : credere: amare Deum: resistere tentationi: non peccare. Sicut hæ sunt veræ: statuarius sine ære, naupegus sine ligamento, non possunt facere statuam, vel nauem; neque Grammaticus, vel Metricus, dum dormiunt possunt facere orationem vel carmen. Vtraque autem significatio vocum est legitima & vsitata; & vna pronuntiat de potentiâ Physicâ; altera de potentiâ Logicâ.

Ex his deducimur ad videndum, quòd si Deus ponatur, externa & interna circumstantia, speciali amore regere; poterit, per actionem illorum in hominem, ei persuadere, vel eum inducere ad amandum Deum, & similes virtutes; eodem modo, quo natura ipsum ad peccandum impellit. Quod si faciât, palam est tales actus ex gratiâ Dei procedere, & esse supernaturales.

Euidens quoque est, hominem ad hos actus, duobus modis perduciposse. Interdum, per suam prouidentiam & consultationem; vt ipse præ-

uelit agere quod agit: aliquando verò; absque eo quod præuideat; sed quasi ab ipso causarum impulsu perducatur, absque operâ suâ. Et hos quidem, solent doctores dicere, fieri in nobis, sine nobis; illos verò, & in nobis, & à nobis factos loquuntur.

Quoniam autem voluntas integra est quoad suam naturam, vt dictum est: & de natura ipsius est, posse alteri ex pluribus facere: semper autem, vel certè plerumque, in vtroque genere, per discursum & collationem proceditur; etsi non semper aduertatur: fit, voluntatem, ex vi suâ physicâ, posse aliud agere quàm illud bonum ad quod dirigitur à Deo; quod est, posse non consentire gratiæ Dei; & cum consentit, liberè consentire; etsi non possit euenire, vt non consentiat: quod pertinet ad potentiam, seu possibilitatem Logicam, ipsius actus.

Ex quibus sit euident, gratiam illam quam Sancti requirunt ad bene operandum, consistere partim in eâ prouidentia quâ Deus causas extrinsecas homini sic attemperat, vt sint aptæ

aptæ ad eos actus in eo creandos, quibus charitatem & salutem æternam acquirat : magis verò, in intrinsecâ gubernatione phantasmatum & spirituum ; circa quæ, homo per suam consultationem parum aut nihil efficere potest ; & per quæ, immediate producuntur illi actus & habitus, qui hominem ad vitam æternam disponunt.

Dices; ex eo quod voluntas sit indivisibilis, & indivisibiliter sese determinans post inspectionem omnium propositorum, præcisè ex eo quod libertas sit natura ipsius; fieri, necessariam esse infusionem, alicuius qualitatis supernaturalis quâ fortificetur ad bonum eligendum ; & ut hæc infusio sit in ipsam substantiam voluntatis : siue hæc infusio sit per modum transeuntis, seu motus, seu intentionaliter, siue permanenter & realiter, & siue sit talis ut voluntas maneat absolute determinata, siue tantum fortificata ad actionem quæ ab eâ procedit.

Respondetur, ex dictis manere clarum, nullam talem infusionem esse

necessariam. (Sicut & supra ostensum est esse in vniuersali impossibile) Est enim voluntas, cætera par, alijs agentibus in hoc solo prælata, quod, ad vnum ex pluribus sibi ab intellectu propositis faciendum, per euidenter discursum, bonitatem maiorem in altero membrorum prodentem (quando perfectè gubernatur,) determinetur: quæ determinatio, quia fit per euidentiā quod bonum agendum sit connexum cum præuolitis & affectibus iam in eā existentibus, dicitur ab ipsāmet voluntate fieri.

Cæterum ipsa suppositio facta de naturā voluntatis, præter ea inconuenientia quæ in Philosophiā obijci solent, quibus conuincitur speculatiue esse fatua; vt quæ consistat in contradictione ad prima principia: (*puta quod non possit esse effectus sine causa quod nihil procedat ab indifferente ut indifferens est: quod idem indiuisibiliter non agat in semetipsum, &c.*) & quod destruat totam rationem virtutis & vitij; id est, fundamenta scientiæ moralis; & adhuc vim persuadendi & dissuadendi; id est negotiationis

LIBER. I. LECTIO XV. 115

& conuerſationis humanæ radicem: (vnde ante diffidia ſcholæſtica, quæ nihil abſurdi intactum reliquerunt, à nullo, quod ſciam, graui authore expoſita vel commemorata fuit.) Eſt præterea in Theologiâ, ſpurciſſimorum errorum & hæreſeon camarina; quantumuis ipſa videatur purè Philoſophica. Tantum eſt, in principijs negligenter agere.

Cùm enim Manichæi, vt cauſam mali ſtatuerent, commenti ſint principium quoddam malorum, ſeu primum malum, ne Deum facerent cauſam mali; hæc ſuppoſitio, ob eandem rationem ponit actum volūtatis procedere à voluntate quâdantenus, quâ non procedit à Deo; & per conſequens, ſtatuit primum quoddam principium præter Deum. In hoc autem, Manicheiſmo deterior eſt; quòd non ſola mala, ſed virtutem, & optima quæque, huic principio aſſignat.

Rurſus, cùm Pelagiani vt acceptionem perſonarum, & voluntariam ſeu irrationabilem electionem à Deo reiicerent; commenti ſint, in ſingulis Perſonis diſpoſitionem quâ-

dam naturalem, ex cuius merito vel demerito gratia illi daretur, vel negaretur: Hæc suppositio similiter ponit vim determinandi sese in voluntate, à se, & non à Deo, quâ, quatenus non à Deo, acceptat gratiam Dei; & sese discernit à non acceptantibus, digna est laude, quasi ex se; & per consequens, gratiâ; & vel concomitanter se habet ad Deum, vel etiam eum præuenit; in quibus consistit virtus hæresis Pelagianæ.

Hoc autem peius habet errore Pelagianorum, quòd Pelagiani iustam vim illi gratiæ quam agnoscebant, in voluntatem mittebant. Hæc autem positio, asserendo, positâ quicumque gratiâ, adhuc voluntatem manere intrinsecè æquè indifferentem, quàm ante gratiam; & quacumque persuasiones, non esse nisi propositiones, & conditiones; non verò inflexiones & inclinationes; omnino eneruat omnem vim gratiæ. Et quantum hæc conditionum doctrina est aliena à Philosophiâ; tantum eam applicare gratiæ, est perniciosum in Theologiâ.

Rursus, sicut Stoici (conuicti sophismate veritatis determinatæ propositionum de futuro) ponebant omnia esse quia sunt; & abstulerunt hoc modo, rationem causæ & effectus; & fatalitatem quandam ineuitabilem introduxerunt: sic hæc suppositio, vt imaginariam libertatem tueatur, asserit actus voluntatis, ex voluntate sequi; non ex aliquo quod sit in voluntate; sed ex vi contradictionis, quâ necesse sit, voluntatem, positis circumstantiis, velle aut non velle, & per consequens, ponit stoicam fatalitatem in actibus voluntatis; quæ ex omnibus erroribus imaginabilibus, est maximè opposita libertati.

Et ex hoc oritur alius error; vt non solum, possibilitatem creaturarum faciat independentem à Deo; & Deum, quoad scientiam simplicis intelligentiæ, dependentem & posteriorem illi, tanquam obiecto suo; adeò vt etiam relationem essentialem, seu vt vocant transcendentalem in Deo ad creaturas ponat: sed etiam, futuritionem, non solum conditionalem, sed etiam absolutam, rerum, præsuppo-

ni ad actum visionis intuitiue, quæ sit ipsa existentia Dei; & per consequens, à futuritione creatorum, ipsum Dei esse pendere, non possit effugere; ad quam impietatem, nemo (quod sciam) Philosophicus Paganus deuolutus est.

Denique, vbicumque contingit Theologiam, eam inquinat, & inextricabilibus difficultatibus confundit; vt ipsimet propugnatores, plerumque confitentur.

LECTIO XVI.

De necessitate aduentus Christi; & gratia per ipsum data.

AT enim, cum impotentia hæc ad beatitudinem acquirendam, ex necessitate consistat in impropor-
tione inter actiuum & passiuum, siue obiectum & potentiam, seu animam; palam est, duos tantummodo esse modos, quibus reparari possit originarium hoc infortunium; puta, vel ex parte potentie, vt illa aliquo

modo eleuetur; vel ex parte obiecti, vt illud accommodetur modo potentia.

Cùm itaque potentia spiritualis voluntatis, sit tantummodo extrinsecè laxa; scilicet quoad corpus, vel saltem principaliter; & si qua est laxatio animæ, mediante impressione corporea sit tollenda: conficitur, quòd neque defectus est principaliter ex parte animæ; neque inutatio quæ fieret ex parte ipsius, esset secundum ordinem causarum naturalium; sed potius immutatio quædam naturæ, in aliud naturæ genus: neque homo, suis actibus, & progressionem naturæ, sed nouâ quadam creatione, euaderet capax sui proprii, & connaturalis boni.

Consideranti verò, creata in Deo esse secundum eandem colligationem quam inter sese habent; & hanc connexionem, non esse aliam, quàm quòd ratio inerrans dicet, eorum rationibus sic aptissimè satisfieri: sit perspicuum, nihil, nisi naturalissimè, à Deo procedere posse; & alienissimum quidpiam esse à diuinæ proui-

dentia vijs & legibus, naturam aliquam quasi saltu, & sine gradatione necessitante, de vno genere in aliud transferri: & quod sequitur, reparationem naturæ humanæ, per voluntarias, & non à naturâ appetitas infusiones, peragi non debere.

Porro, examine in miseriam nostram facto; comperimus, beatitatem, ad quam nati sumus, esse difficile nobis, vt qualis sit, apprehendamus & æstimemus; vt credamus eam futuram; denique, vt amemus eam, quia non inuenimus consuetas rationes amoris fundandi. Rursus, esse longè positam; & non perpetuò nos prouocare, sicut obiecta alia. Et tandem, reliqua, opinione circumstantium nos hominum (quorum auctoritati obnoxij plerumque sumus) fulta esse; hanc paradoxam prorsus nobis aduenire.

Quapropter, si ex obiecti parte mutatio facienda sit, necesse erit Deum (qui est beatitudo nostra) descendere ad naturam corporis, vt sit apprehensibilis; ad causas eas quæ amorem in nobis creât; vt sit amans,
&

& socius; faciat & patiat pro nobis; & similia; quæ connaturaliter amorem in nobis generant: ut sit aliquo modo corporaliter præsens inter nos, & corporaliter accessibilis: & ita disponi res humanas, ut plerique qui nos circumstant, huius beatitudinis æstimationem profiteantur: & tandem, ut sit irrefragabilis persuasio de veritate doctrinæ quâ erudimur; & per consequens, author sit veritatis non dubitabilis; cuiusmodi solus Deus est.

Et quoniam huiusmodi conditiones non nisi in hominem cadere possunt (neque enim aliud corpus ad nos pelliciendos, & conuersandum inter nos, ad docendos nos, ad charitatis nomina, ut amici, fratris &c: ad patiendum pro nobis, ad instituendam rem quandam quasi publicam sectatorum veræ Beatitudinis, idoneum est) patet est, vel genus humanum ad interitum iturum esse, vel Deum deuenire hominem ex suæ bonitatis necessitate coactum iri.

Posito verò, Deum hominem fieri, æquè facile est humano generi ad

Beatitatem studia sua conuertere, quàm ad quemlibet vnum finium quos pro vltimis sibi solent diligere homines; & contingeret tot homines in ijs locis vbi fidem susceperunt, ad pietatem sese applicare, quot proportionaliter ad honores, verbi gratiâ, vel voluptates sese addicunt. Palam itaque est (posito Deum fieri hominem, & ijs, quæ eo posito nata sunt fieri) naturam, vt naturam, reparatam esse, id est, in statu idoneo ad Beatitudinem acquirendam, esse collocatam.

Quapropter, cùm & totum quod dictum est, & quod ex illo sequitur, (hoc est, doctrina, & institutiones quæcumque; & specialiter, congregationis hominum hanc doctrinam profitentium) sint supra naturam; necesse est, etiam regimen particulare personarum ex his pendens esse supernaturale. Quod cùm contineat, & extrinsecam dispositionem fidei, motiuorum charitatis; & intrinsecam dispositionem phantasie, & cordis, & animæ; ex quibus fit, hunc hominem credere & amare actu: patet,

LIBER. I. LECTIO XVI. 123

omnes actus particularis hominis in ordine ad Beatitudinem factos, supernaturales esse; & ex gratiâ, & supernaturali prouidentiâ Dei, tum extrinsecè tum intrinsecè, prouenire.

Dices, non videri conclusum, quòd impossibile sit aliquem vnum actum, ex solis communibus principijs, non potuisse prouenire omnino eundem alicui supernaturali: quare non ex necessitate ad singulos actus requiritur gratia.

Respondetur, quicquid sit de possibili, si Deus hunc ordinem non instituisset; euidens est, hoc ordine posito, eum actum ex speciali prouidentiâ prouenire. Præterea, cum talis actus in suppositione factâ, esset à casu; non foret ex vi naturæ; (hæ enim sunt causæ disparatæ) quòd autem Philosophi casum, Christiani nominamus prouidentiam. Quare, cum supra naturam foret talis actus ex vi sui finis, etiam sic, ex supernaturali prouidentiâ, id est, speciali, foret.

Euidens præterea est, quòd sicut culter, per motum perpetuum à sculp-

tore acceptum, facit statuam, ab ipso
eo quod separatim à sculptore consi-
deratus, habeat in sese vim faciendi
statuam; sic, non necessum est ani-
mam in sese consideratam, vnquam
habere potentiam faciendi actum su-
pernaturalem; quem tamen, ductu
& regimine Dei explicato, actu agit.

Quibus si addatur, actus nostros,
interiores præsertim, ex tot phanta-
sia & spirituum circa cor ignotis no-
bis motibus; & rursus, ex tot exte-
rioribus accidentibus, quæ à nobis
nec præcaueri neque prævideri pos-
sunt, pendere; & nulla esse principia
nobis data, per quæ hos gubernare
possimus: fit manifestum, nos, sepo-
sitâ actuali motione diuinâ, nun-
quam esse sufficienter intrinsecè po-
tentes ad exercendum actu quemli-
bet actum supernaturalem; & per
consequens, nullam esse gratiam quæ
possit vocari sufficiens; id est, quæ do-
net nobis posse operari, nisi cum actu
operamur.

Quia verò Iustitia originalis in
Adamo gubernabat hos motus inte-
riores, & impediebat ne accidentia

exteriora quidpiam turbarent inanimâ; ipse, potentiam habebat in actu primo ad singulares actus perficiendos, & per consequens, gratiam sufficientem. Sed non talem quæ minor esset gratiâ efficaci nostrâ; sed quæ maior (simpliciter loquendo) esset, quia fallibilis seu perdibilis erat, ex illâ parte defectuosa foret.

Ex his intelligitur, quod gratia Adami, comparatur ad gratiam quæ datur in naturâ lapsâ, sicut sanitas comparatur ad baculum infirmi, quo utitur ad ambulandum. Cum hæc tamen differentiâ, quod infirmus est dominus baculi, & dirigit & utitur eo: gratia autem seu providentia diuina, est domina hominis, & facit hominem consentire sibi, & uti se prout Deo libuerit; gubernando & dirigendo, non necessitando libertatem, neque determinando eam sic præuiè, ut determinatio sit actu posita, ante motum voluntatis; sed sic ordinando præuia agentia in voluntatem, ut ex eorum impressionibus sequatur voluntatem ipsi imbutam, facere in sese determinationem illam,

quam Deus sibi proposuit ab eâ esse faciendam : manente semper potestate ad faciendum oppositam , quamdiu manet indeterminatio : & indeterminatione non ablatâ , nisi ab ipsâ voluntate imbutâ impressio- nibus : quæ iam sunt ipsa , & partes eius. Ex quibus fit clarum , determi- nationem ad bonum in Adamo prin- cipaliter attribuendam esse volunta- ri ; videlicet , imbutæ iustitia origi- nali ; quâ positâ , non deerat nisi ge- neralis præmotio Dei ad faciendum Adamum constanter operari bonum : & propterea , actio principaliter erat Adami ; cum non soleamus specialem actionem adiudicare causæ commu- ni. Post lapsum autem Adami , quia necesse est Deo , ex massâ causarum naturalium , seligere certas ; & dispo- sitione prouidentia suæ , eas sic ordinare , siue eleuare vt efficiât dispositiones in homine superiores , & quodammodo repugnantes vniuersali ordini natu- ræ ; & cum ipse homo nullam habeat partem in hac eleuatione causarum : iam , actio hominis meritò principa- liter tribuitur Deo , & gratia ipsius ,

namquam speciali causæ determinationis nostræ; quæ sic fit per nos, & à nobis, vt species ipsius non fuerit prius in aliquo habitu vel virtute nostrâ, quàm in ipso actu: fuerit tamen in prædefinitione diuinâ; & idcirco, gratiæ Dei recte tribuatur.

Ex his denique facilè intelligitur, gratiam quæ ad aliquibus vocatur sufficiens, & datur operanti in ipsâ operatione, seu ad operandum actu, prorsus imaginariam esse. In primis enim, tollit vim liberi arbitrij; si enim homo non habet virtutem ad benè & malè agendum, ex ipso libero arbitrio; iam non est liberum arbitrium: si autem habet, ad quid ponitur infusio specialis gratiæ, ad hoc vt dicatur posse benè agere?

Sed & contra naturam peccati est, vt addi debeat quicquam naturæ, ad hoc vt homo possit peccare. Cum enim peccatum sit contra naturam; & defectus ab illâ; patet, ex ipsâ naturæ vi, satis esse in homine vt ab eâ defici possit, & peccari: alioqui, non à naturâ, sed à gratiâ deficere.

tur; & peccatum, non contra naturam, sed contra gratiam duntaxat, foret.

Quid quòd, cùm gratia hæc non detur nisi in ipso actu; non datur nisi ad hunc actum particularem: datur autem ex volitione speciali Dei; non autem, vt actus fiat bonus, cùm sciat Deus ex naturâ gratiæ, & circumstantiarum, non habiturum effectum; ergo, vel propter nullum finem, vel quia alioquin homo innocens foret, & non posset peccare. Propter peccatum itaque & damnationem, hæc quæ vocatur gratia, homini datur. Non itaque gratia est, sed iniuria, cùm melius foret homini illam non habere.

Denique, hæc doctrina inconsequens est, tum ad rationem peccati in naturâ purâ; in quâ, nulla posset esse huiusmodi gratia; tum, ad rationem actionis moraliter virtuosæ, in naturâ lapsâ, sine auxilio gratiæ. Cum enim ponant virtutem ad bene faciendum, in ipsâ naturâ lapsâ, quomodo potest negari vis ad malè agendum? & tamen, vtramque doctri-

nam constanter amplectantur iidem
authores.

Qui verò, hanc gratiam sufficien-
tem collocant in oblatione auxilio-
rum à Deo factâ, quæ nihil ponat in
ipsâ creaturâ; longius à veritate de-
uiant; cum, præter supradicta in-
conuenientia, incurrant alia; puta,
quòd creatura nihilo sufficientior sit,
cum in nullo sit mutata; sed neque
de his auxilijs quicquam sciat: quòd
Deus absolute offerat ei, quem no-
uit non acceptaturum: quòd illa
conditionalis explicari non possit, si
*creatura velit sese determinare ad hanc
partem, dabo auxilium*; cum auxi-
lium necessarium sit ad determina-
tionem; & determinatione positâ,
nil opus sit auxilio.

Denique, cum gratia quæ à san-
ctis requiritur ad operationes nostras,
sit gratia in actu secundo, siue cuius
ratio sit reducere in exercitium po-
tentiam actiuam quæ est in nobis;
palam rursus sit, quòd vox ipsa *suf-
ficientia*, significet actum primum, &
includat rationem potentia: nihil
clarius est, quàm in sensu huius quæ-

stionis, nomen gratiæ repugnare cum ratione sufficientiæ; neque posse dici aliquam gratiam esse sufficientem, prout hîc de eâ quæritur.

Et hæc inconuenientia sunt particularia huic positioni. Præter quæ hæc sententia incurrit alia communia cum alijs sententijs; vt, quod Deus præuideat, seu præsupponat, determinationem futuram voluntatis creatæ, antequam habeat actum intrinsecum offerendi auxilia: Quod habeat actus voluntatis conditionatos, vbi nouit conditionem non futuram; & à fortiori, actus diuersos intrinsecos circa creatâ, ex quibus nihil sequitur in ipsâ creaturâ.



INSTITVTIONVM SACRARVM

PERIPATETICIS
inædificatarum.

LIBER SECVNDVS.

De mysterio Sanctissimæ
Trinitatis.

LECTIO I.

*Esse in Deo unitatem, & pluralita-
tem, sine repugnantia.*



Concluso Deum ex ne-
cessitate suæ exuberantis
Bonitatis hominem fieri;
vlteriùs attendendum est,
quòd cum Deus cognoscat semerip-
sum; & posito definito; ponenda

quoque sit in eo definitio ; (cognoscere autem sit *esse aliud vt aliud*, & cognosci *esse in alio vt aliud*) plane confectum est, Deum esse in Deo vt alium in alio ; & per consequens, alietatem verè & realiter, & tanquam prædicatum de Deo, & non solum vt modum prædicandi, siue quatenus est in intellectu nostro in Deo reperiiri.

Attamen cum cognitum (non obstante quod sit in cognoscente) remaneat aliud, id est, idem quod erat, cum omnibus proprietatibus suis illud constituentibus & distinguantibus ; sit, nihil esse in cognito, quod non sit in cognoscente ; immò cum cognitio specificetur à cognito, nihil esse in cognito, quod non sit essenziale cognoscèti, vt cognoscenti ; (maximè verò cum ipsum cognitum est cognoscens ; quia cognitio est de seipso) clarum est essentiam Dei tum cognoscentis tum cogniti, non obstante alietate, esse eandem ; cum nihil possit esse in Deo vt cognito, quod non sit specificatum & essenziale cognoscenti.

neque quicquam in cognoscente ,
quod non sit cognitum.

Quinimo cùm natura cognitionis
sit, vt aliud quod est cognitum , ex
vi cognitionis , sit in cognoscente,
seu sit ipsum cognoscens, seu, vt fa-
ciat cognoscentem esse cognitum ,
si prius non erat ipsum cognitum ;
patet Deum vt cognoscentem sese,
esse ex vi ipsius cognitionis eundem
sibi, nouâ quâdam & speciali iden-
tificatione , præter illam quæ est
ex omnimoda simplicitate suâ ; at-
quo adeo (si dici potest) magis v-
num & simplicem, non obstante
alietate quæ in ipso sit.

Cùm verò relatio non sit aliud ,
quàm ipsa res comparata ad correla-
tum, seu quid res est si comparetur
ad aliud ; in Deo autem nihil inue-
niatur nisi substantia ipsius ; palam
est non posse esse nisi substantialem,
seu in substantiâ fundatam, hanc re-
lationem alietatis. Alietas autem
in substantiâ, non identitatem dicit,
& per consequens, pluralitatem : ne-
cessarium proinde est pluralitatem
in Deo ponere.

Obijcies, substantialem vnitatem & pluralitatē prorsus repugnare primis naturæ principijs. Fiat enim argumentum : Deus cognoscens est hic Deus, & Deus cognitus est hic Deus : ergo Deus cognoscens est Deus cognitus. Consequentia est bona in syllogismo dicto expositorio, cum singularis propositio æquiualeat vniuersali : hic Deus autem est terminus singularis, & reddit reliquos singulares.

Respondetur, secundum terminos positos syllogismum esse bonum & concludentem; mutatis autem paululum (vt oportet) apparere ipsius imbecillitatem; vt si dicatur, Deus vt cognoscēs est hic Deus; & Deus vt cognitus est hic Deus : ergo Deus vt cognoscens, est Deus vt cognitus : clarè patet inconsequentia & fallacia. Termini autem qui assumuntur in hâc materiâ, tales sunt, vt includant reduplicationem in vi suâ; quæ cum latet, fallit arguentes, & facit videri euidenciam vbi nulla est.

Dices. Si non sit alia pluralitas in Deo, erit purè rationis: namque sicut verum est, Deus vt cognoscens non

est Deus vt cognitus; sic verum quoque est, Deus vt misericors, non est Deus vt iustus; & tamen non propterea Deus vt iustus distinguitur plus quàm solâ ratione à Deo vt misericorde: quare hæc solutio non satisfacit difficultati.

Respondetur: aliud est quærere in quo fallat syllogismus propositus; & aliud, quæ sit causa quæ faciat eum fallere. Et ad syllogismum quidem rectè responsum est: verè enim non animaduersio quòd lateat reduplicatio, fallit arguentes; quæ in altero syllogismo aperta est. Radix autem diuersa est, nam in syllogismo de misericordiâ & iustitiâ, radix fallendi est qualitas ex vi solius rationis (id est, ex eo quòd prædicata sint in mente nostrâ) refusâ in obiectum: non enim nomen misericordix exprimit quod sit distincta à iustitiâ, vel è contrâ; sed dumtaxat actus quo cognoscimus misericordiam, est distinctus ab actu quo cognoscimus iustitiam. In priori verò est qualitas obiecti, quæ est in mente nostrâ, ex propriâ natura obiecti in mentem.

nostram refusâ : cum enim dicimus, cognitum esse in cognoscente ve aliud ; intendimus , explicare ipsum modum & proprietatem cognitionis, quæ cognoscitur à nobis, quam habet in sese & extra nos , & hanc transferre in Deum & predicare de eo : quæ est alietas declarata ; & propterea non rationis , sed realis est distinctio.

Replicabilis ; vel realiter est vna substantia, vel plures. Et ne sit æquiuocatio in voce *realiter*, intelligitur ex parte rei, cessante omni operatione intellectus nostri ; seu omnino abstrahendo à conceptibus nostris : quare illic valebit vis contradictionis, etiam si in conceptibus nostris, ex vi reduplicationis, possit eludi vis consequentia.

Respondetur, hanc replicam videri supponere, quod in obiectis (& specialiter in Deo) sint quædam formalitates correspondentes actibus nostris ; & quædam æqualitate eos verificantes ; quæ in hac materiâ est periculosa roditas. Quare dicimus abstrahendo à nostris conceptibus , esse Deum vnâ simplicitatem simplicissimam , quæ neque sit Deus, neque ens,

LIBER II. LECTIO I. 137

ens, neque aliud formaliter quod nos cogitare possimus; sed nostras cogitationes eam inadæquatè repræsentare; non quasi accipientes aliquod vnum ex pluribus quæ ibi actu sint, sed accipiendo participationes quasdam inferiores eo quod ipse est, & dissimiliores quàm salua vel pediculus est respectu hominis.

Est itaque Deus vna simplicissima entitas & formalitas; sed cuius natura sit, vt sicut explicatur per esse, bonum, æternum, ens &c: sic etiam ex necessitate explicari debeat, per conceptiones intelligentis & intellecti; & per consequens per esse alium in alio: & sic aietas tam verè dicitur de Deo, quàm bonitas & iustitia; & hoc ex vi obiecti; non quidem abstrahendo à nostris conceptibus, sed ex vi quam obiectum habet in nostrum intellectum, vt imprimat talem sui similitudinem, & faciat nos affirmare Deum habere aietatem, sicut habet bonitatem; id est, esse quod rectè representetur per conceptus his vocibus respondentes; & non ex vi intellectus, deformantis impressionem obiecti.

Replicabis, vt dicta sint verissima, necessarium tamen esse, vt etiam locutiones humanae sint consequentes ad inuicem, etiam cum de Deo agimus; & non includant contradictionem; alioqui nulla regula supererit veritatis in consequentijs circa Deum. Non itaque dicendum est verè in Deo substantias esse plures, & esse vnicam; quod tamen ex dictis videtur necessariò consequi, in dictis nostris, etsi non in re; & quantumuis fortassis in terminis consuevis, eludi aliquo modo possit.

Respondetur, quod cum nihil sit in Deo nisi substantia quæ possit fundare vel vnitatem vel pluralitatem, necesse est vtramque dici de substantiâ. Sed angustia locutionis ad consuetam obiecta accommodatæ, hic improprietatem patitur; non enim dicendum est rigorosè esse substantiam vnâ & substantias plures (sicut habet consuetudo linguæ), sed eandem substantiam esse vnâ, & rursus substantiam esse plures; vt significetur esse non solum substantiam vnâ, sed etiam substantiali-

ter vnam; & esse substantiam plures, sed non substantialiter plures, sed duntaxat relatiuè.

Cùm enim ratio entis per singula predicamenta varietur, necessum est rationem vnitatis quoque secundùm eadem variari; & posse esse vnum substantialiter, quod est plura secundùm aliud genus; vt hastâ & gladio armatus, est plura in genere habitus; ambulans & loquens in genere actionis, etsi in genere substantiæ vnus sit tantum: è contra, duo metalla vel liquores mixti, sunt plura substantialiter, vnum quantitatiuè. Sic itaque Deus est vnus substantialiter, plures relatiuè; propter oppositionem relationum pluralitatem inferentium.

Ex quibus clarè constare potest, nullam prorsus contradictionem in vnitatem & multiplicitate in diuinis ponendâ incurri; cùm neque Logicæ neque Physicæ repugnet; sed vtriusque exemplis parietur. Quare qui dicunt insolubilem esse hanc difficultatem, vel principia naturæ fallere in diuinis seu ente infinito, & similia, manifestè produnt fidem Catholi-

140 INSTITVT. SACRAM.
 cam Paganis; non satisfaciunt, sed
 cedunt; & in virtute dicunt verum
 esse contrarium vero, & fidem ra-
 tioni. Quare & Scholâ Theologorum
 omnino reiijciendi sunt: præstat
 enim tacere, quàm Deo & naturæ
 calumniam inferre.

LECTIO II.

*Quòd pluralitas quæ est in Deo, sit
Personarum.*

EX dictis elicitur, esse in Deo ali-
 quid commune, & aliquid parti-
 culare. Cùm enim & pluralitas sit in
 Deo ex vi relationum, & vnitas ex vi
 substantiæ; sed neque relatio possit
 esse aliud à substantiâ; sit, substan-
 tiam communem esse; seu esse ean-
 dem in omnibus ijs, quæ ex vi rela-
 tionum sunt plura; & per conse-
 quens, quæ distinguuntur inuicem,
 includere aliquid commune.

Verumtamen cùm communitas
 duplex sit; alla rationis seu vniuersa-
 litatis; cùm in intellectu solo est vni-
 tas rei, quæ dicitur communis (quod

LIBER II. LECTIO II. 141

accidit in speciebus & indiuiduis
 prout in materialibus reperiuntur);
 alia accidentium & subiecti; sicut
 Statuario & Musico commune est
 esse Polycletum: relatio verò ad sub-
 stantiam hoc posteriori modo com-
 paretur; fit communitatem & parti-
 cularitatem hâc magis viâ in diuinis
 esse accipiendas.

Præterea, cum Persona sit ad natu-
 ram intellectualem, quod prima sub-
 stantia, vel suppositum ad naturâ sub-
 stantialem in communi; particularia
 verò in Deo penes relationes distin-
 cta sint idem cum ipsâ substantiâ;
 non possunt non esse plura indiuidua
 naturæ intellectualis, hoc est, Perso-
 næ. Clarum itaque fit, in diuinis esse
 plures Personas.

Neque obstat, quod inter nos, ra-
 tio Personæ vel indiuidui, accipitur,
 penes eam particularitatem, cuius
 communitas est tantummodo ratio-
 nis. Hæc enim per accidens est ad
 rationem indiuidui vel Personæ; cu-
 ius ratio completur in hoc, quod sit
 per se subiectum existentia; vt patet
 in Intelligentijs, quæ cum nihil ha-

beant commune in suâ specie, non dubitantur esse indiuidua naturæ intellectualis, & Personæ: & hoc significat potissimum nomen, quod est esse primam substantiam.

Ex his rursus claret, quare cognitio sui, non constituat plures personas in Intelligentiâ, vel animâ separatæ quæ atque in Deo: propterea scilicet, quod relatio cognitionis creatæ, non fundatur in substantiâ, sed in accidente; & per consequens, non facit oppositionem nisi accidentalem; quæque possit a desse & abesse: cum cognitio diuina sit ipsa essentia diuina; & consequenter faciat distinctionem substantiæ ad substantiam, modo explicato.

Adde, quod essentia Angeli vel Animæ, non ordinatur primario, & quasi specificatiuè, ad hoc vt cognoscat se; sed vt cognoscat plenitudinem entis, & particulariter Deum; vnde non est aliqua relatio ex parte obiecti, ad cognosci à se; & per consequens, nequa ratio vlla distinctionis personalis: in diuinis autem quia essentiale est cognoscere, etiam ef-

sentiale est cognosci ; & ordinatur
 objectum ad cognitionem, æque at-
 que cognitio ad obiectum ; & est ex
 vtrâque parte relatio realis.

Dices, quod si nomen personæ, sig-
 nificat esse per se subiectum exi-
 stentiæ, erit nomen absolutum ; &
 per consequens relationes non con-
 stituent rationem Personæ ; quare
 neque erunt plures Personæ, sed vni-
 ca in diuinis ; absoluta enim non
 multiplicantur per relationes ; vel
 certè dicentur quatuor Personæ, vna
 absoluta, & tres relatiuæ.

Respondetur, indiuiduationem ad
 quam refertur nomen Personæ tan-
 quam particulare ad vniuersale, ha-
 bere in re duo quasi munera ; alte-
 rum, vt de communi faciat parti-
 culare : alterum vt compleat ratio-
 nem entis in hoc quòd sit subiectum
 existentiae. Vnde nomen personæ
 natum est secundum vtrâque hæc
 munera transferri in Deum.

Cùm itaque euident sit, Deum vt
 ipsum esse, habere ex ipsâ essentiâ suâ
 existere ; non est dubium, quin se-
 cundum posterius munus, transferri

possit hoc nomen, ad significandum Deum secundum absoluta & essentialia. Et sic patet tum in lege naturæ, tum in lege scriptâ, tum a Philosophis, Deum tanquam Personam vnâ absolutam agnitum & veneratum esse. Immo etiam fortassis à nobis, quoties eum Deum sine additione relatiuâ nominamus.

Cùmque rursus clarum sit, relationes in Deo habere vim quam diximus particularisandi communia Dei; etiam euident est, secundum secundam significationem transferri posse in Deum; & sic tot esse Personas, quot relationum oppositio cogit confiteri. Sed hæ Personæ non faciunt numerum cum Personâ absolutâ; tum quia non condistinguuntur ei; tum quia vim subsistendi accipiunt à ratione absolutâ Personæ, quæ eam constituit; & tandem, quia significationes duæ sunt, & vox æquiuoca secundum singula manera transfertur.

Adde, quod cum hæ relationes sint peculiare naturæ cognoscenti seu rationali, habent peculiariùs in se

sele dignitatem illam, quâ differt persona à supposito. Quare absolutum illud, magis videtur secundum formalem sui rationem, constituere suppositum, quam Personam. Quia tamen usurpantes agnoscebant Deum esse cognoscentem, non potest ei negari ratio Personæ, extra comparisonem ad relatiuas.

Replicabis, constare ex Philosophiâ, omnia indiuidua substantialia essentialiter differre, etiam in materialibus; & quod sequitur, nullam esse specificam rationem ab indiuiduatione complendam; & per consequens, non esse aliquam vim particularisandi in ratione indiuiduali vel Personæ, secundum quam nomen Personæ possit transferri in Deum.

Respondetur, quicquid sit de rei veritate, palam est homines entia omnia non dispicere usque ad ultimas differentias, sed ad certas duntaxat collectiones reducere, & omnia quæ sunt sub vnâ collectione, æstimare tanquam vnius naturæ; & differentias magis particulares, pro acci-

146 INSTITVT. SACRARVM.
dentalibus & materialibus habere.
Vnde cùm nomina imponantur ex
eo quod apparet hominibus ; appa-
reant autem hominibus hæc duo mu-
nia indiuiduationis ; clarum est , no-
men indiuidui , vel Personæ , has
duas significationes habere posse ; &
secundum vtramlibet ad diuina tra-
duci posse.

Patet ex dictis , quomodo nomen
Personæ , etsi sit absolutum , tamen
significet relationem. Cùm enim re-
latio in diuinis habeat vim particula-
risandi sub naturâ , quæ vis in creatis
solet esse absoluta ; id est , cùm idem
accidens competat relatiuo & abso-
luto , appellatur relatio nomine ab-
soluto , quatenus huius accidentis
particeps est. Non quòd particulari-
fare sit accidens relationi diuinæ ,
sed quòd relationi in communi , &
diuinæ quatenus relatio est accadat.

Ex quo rursus constat , relationem
esse idem quod Personam ; eam con-
stituere , & distinguere ; & abstractis
relationibus , non manere Personas
neque hypostases. Quia scilicet ratio
Personæ formaliter significat vim

particularisandi; quę vis exercetur à relationibus. Vnde relatio est forma constituens Personam; ipsum verò nomen Personę, quodammodo intentionale & Logicum est.

Dices, non rectè definiri Suppositum vel Personam esse indiuiduum; cum anima rationalis, saltem separata, sit indiuidua, non tamen suppositum. Quare addendum esse quod sit incommunicabile. Respondetur, animam rationalem tantum deficere à ratione indiuidui naturę rationalis, quantum à ratione suppositi: Si enim separata non est suppositum, hoc propterea est, quia natura humana non est completa sine corpore; & per consequens, ipsa manet indiuiduum non naturę, sed partis naturę rationalis.

Incommunicabilitas autem non debet addi; quia vel significat incommunicabile alteri supposito; & tunc definitum ponitur in definitione, & est contra ipsum mysterium hoc, in quo, cum singulę Personę ex suâ proprietate habeant esse in reliquis, non potest negari vna Persona esse

communicabilis alteri. Vel alteri parti, vel naturæ; & sic manifestè falsum est; cùm actiones & passionessint suppositorum; & per consequens earum termini, & quicquid aduenire potest rei, specialiter & propriè aduenit supposito, & accipit esse à supposito; & cum vnitas sit duorum, vtrumque vtriq; communicatur & vnitur; nisi fortè velimus ludere in rigore vocis *communicari*.

Ex hac explicatione Personę, fit liquidum, superfluam esse illam entitatem, quam recentiores magni æstimant ad explicandum hoc mysterium & naturam Personę, eamque subsistentiam & Personalitatem appellant. Sed ipsimet fatentur, nullum esse eius in naturâ vestigium, sed esse colligendam ex solis fidei mysterijs: quorum sensus cum sit ignotus, & propositus Theologis explicandus, & difficilior naturâ; patet hos Theologos minùs ignota per magis ignota inuestigare, & explicare conatos.

Sed & confundit quę de Personę ratione naturaliter nota sunt, positio huius entitatis; nulla enim vlteriùs

ratio suppetit, cur actiones & passion-
 nes sint suppositorum; cur quicquid
 non est in naturâ, pertineat ad per-
 sonam, & similia; quæ & inter Theo-
 logos recepta sunt, & si Persona non
 distinguatur ab indiuiduo nature ra-
 tionalis, facillimè intelliguntur; cum
 verò ad hanc entitatem comparan-
 tur, prorsus tenebrescit omnis eorum
 connexio & consequentia.

Rursus, inexplicabilis est ratio hu-
 ius entitatis; & nihil ferè affertur,
 nisi quòd sit terminus vel comple-
 mentum substantiæ: esse verò termi-
 num, non significat aliud, quàm non
 ulterius sese porrigere; quod palam
 omnibus est pura negatio, & non
 potest esse quidditas entitatis specia-
 lis, neque distincta ob ente termi-
 nato; cum non significet aliud, quàm
 tale ens non esse plus de ente seu
 magis ens: quod pertinet ad intrin-
 secam differentiam cuiusvis entis.
 Complementi verò nomen, est æque
 vniuersale atque nomen imperfecti,
 ad quod refertur, & cuius imperfe-
 ctionis natura explicanda est, vt scia-
 mus quid significetur nomine com-
 plementi.

Quid , quod ipsis suorum parentum dictis contraria est hęc positio, qui ponunt ante hanc entitatem rem, cui deest habere existentiam ; & per consequens , esse perfectam in existentis, siue entis ratione; & cùm esse ens, sit esse substantiam, esse perfectam in ratione substantiæ ; & postmodum inducunt complementum substantiale, & perfectitatem quamdam existendi , quæ compleant in ratione entis & substantiæ.

Adijce quod non soluit questionem Theologicam ; non enim hanc entitatem ponendo , satisfat Ethnicis vel hereticis ; sed irridendi fidem anasa offertur ; quasi quæ nihil nisi nebulam vocum inexplicabilium contineat , & reipsâ rationis sit egena & vacua. Non enim magis intelligit aliquis quomodo plures personæ sint vnius naturæ ; sed duntaxat quam habuit de Personâ aliqualem cognitionem , ipsa ab illo tollitur , nihilo vlteriùs explicato.

Quin magis ipsa mysterij fides destruitur. Cùm enim edocti simus plures Personas eiusdem naturæ credere,

LIBER II. LECTIO. III. 151

si Personę & naturę nomen sic acci-
piantur, sicut in naturâ solent accipi,
vnus est articulus fidei : sin verò in-
ueniendus est nouus sensus harum
vorum, articulus erit alius. Qui ita-
quē dicunt significare nouas entita-
tes, quarum natura nusquam conscia
est, manifestē nouam nobis fidem, &
non illam quę hactenus Ecclesię no-
ta est, effingunt & proponunt.

LECTIO III.

*De comparatione Essentia & Persona
in diuinis.*

EX supradecaratis infertur, no-
men Essentię in diuinis duplici-
ter accipi. Ex eo enim quod intelli-
gimus aliquid in diuinis cōmune, &
aliquid particulare ; seu plures Per-
sonas vnus Essentię, patet quod no-
men Essentię restringimus ad certa
předicata ; cum tamen prius hac cog-
nitione, nomen essentię omnia pře-
dicata comprehenderet, & quodlibet
předicatum diceretur essentialē.

N iii j

Ex quo fit, quod si in Philosophico sensu nomen essentię accipimus; & sicut dicimus beatos clarè videre essentiam Dei; sic quoque dicendum erit, omnes Personas diuinas esse de essentiâ Dei; sic enim essentia significat illam simplicissimam formalitatem, quę verificat omnes conceptiones nostras quę de Deo verę sunt; & hoc etiam modo, & Iudei & Philosophi de Deo loqui nati sunt; & quicquid non est de essentiali ratione Dei, hoc modo non est in Deo.

In posteriori verò acceptione nominis Essentię vel nature, equè clarum est, Personas non esse de essentiâ Dei; cùm essentia Dei dicat Deum quatenus abstrahit à condiuissis Personis; cùm hæc sit intentio vtentium voce. Quo non obstante, est in Essentiâ (etiam in hâc significatione) vnde Personę sint in Deo, siue vnde non possint non esse: sed non insunt sub nomine essentię, quia datâ operâ ab ijs abstrahitur.

Petes, quomodo cùm cognoscere & cognosci sint de ratione essentia in hâc posteriori acceptione, non sint

etiam Personæ de eâdem ; cùm non sint aliud quàm cognoscere & cognosci ? Respondetur propriè loquendo, cognosci & cognoscere non esse de essentiâ Dei , prout abstrahit à Personis ; sed illam in hoc sensu terminari in conceptibus existentia, subsistentis, & similibus, quæ non sunt relatiuæ. Quia tamen cognoscere & cognosci sunt communia omnibus Personis, videntur pertinere ad essentiam vt abstrahit : quod tamen non sic est, quia hæc communitas non est abstractiua ; sed ex hoc quòd singularia vnius Personæ, sunt in aliâ Personâ, quia ipsa Persona cuius singularia sunt, etiam in illâ est.

Patet ex opposito, essentiam in posteriori acceptione, esse de ratione singularum Personarum, sicut commune est de ratione particularis. In priori verò acceptione cùm sit quodammodo collectio essentia & Personarum, clarum est non posse esse de ratione vnius Personæ ; nisi fortè indirectè & obliquè ; sicut Persona opposita est in suâ oppositâ : qui modus non pertinet ad præsentem inquisitionem.

Claret vlteriùs , quòd quoniam ratio Personæ diuinæ ; prout dicitur de pluribus in Deo analogicè, subsumitur sub ratione Personæ ; Persona autem indiuiduum est ; ita prædicanda sit ratio Personæ diuinæ de pluribus Personis diuinis , sicut indiuiduum substantiæ (quod solum est propriè indiuiduum) de omnibus & singulis indiuiduis substantialibus.

In ratione verò indiuidui sic vniuersaliter sumpti, reperiuntur duæ rationes, puta ratio entis vel substantiæ, & ratio, indiuiduationis : cum enim indiuiduum substantiæ sit primò illud, quod habet, vel natum est habere existentiam ; clarum est quòd dicitur *ens* in priori & potiori significatione, quàm genus vel species dicantur substantia ; & propterea dicitur prima, vel primò substantia. Ratio itaque entis communissima est illa, quæ metaphysicè loquendo constituit indiuiduum : vnde & omnia indiuidua complent rationem generis summi,

Ratio verò indiuiduationis clarè

pertinet ad secundas intentiones: non enim sonat indiuiduum, sed indiuisibile; sicut & diuiduum significat quod potest diuidi; clarè itaque dicitur per oppositionem ad genera & species, quæ secundùm rationem sunt diuisibilia in inferiora. Sonat itaque nomen indiuidui, quod non est diuisibile secundùm rationem; sicut & singulare (quod tantumdem valet), sonat oppositionem ad vniuersale; quod cùm sit rationis, relatio quoque rationis est nomen singularis.

Ratio proinde Personæ diuinæ, prout de pluribus dicitur, quoad hanc partem, est etiam nomen secundæ intentionis; & dicitur de pluribus per modum quinti prædicabilis, & non trahit secum compositionem aliquam generis vel differentiæ, quæ habeat fundamentum in ipsâ naturâ diuinâ; & sic omnino sine aliquo inconuenienti prædicatur communiter de pluribus.

Rationi verò entis quod in personis creatis reperitur, (hoc est prædicatorum particularisantium, quæ

Petreitatis vel Bucephalitatis vocibus comprehenduntur) correspondet in diuinis ratio relationis diuinæ : quare sic prædicabitur Persona diuina de pluribus Personis, sicut relatio diuina de pluribus relationibus. Relationum quoque diuinarum quomodocumque oppositarum, eandem esse realiter rationem fundandi, puta essentiam diuinam communem, ex supra dictis patet.

At relatio non addit quicquam supra rationem fundandi, sed eam duntaxat diuersificat, vt patet resoluenti relationem aliquam; sicut parietem esse similem parieti, significat quidem hunc & illum parietem esse albos: sed ex parte huius parietis, non ponit nisi suam rationem fundandi, seu suam albedinem; quæ sit similitudo, præcisè ex eo quod sit in intellectu comparante: adeo vt dicere duos parietes esse albos, & dicere hunc similem illi quoad materiale dictum, sint omnino eadem.

Sic autem sunt plura dicta forma-

liter, vt non sit plus in vno dicto quam in alio, sed aliud: vt enim albedo sit similitudo, non habet ex vi intellectus comparantis, sed ex vi suâ in intellectu comparante; vt intellectus comparans sit causa mutationis, sed nihil mutati; sicut phiala in quam infunditur aqua, est causa mutationis figuræ in aquâ, sed nihil in mutato; sed est ipsam naturam aque esse huius figure, posito hoc eam continente. Sic itaque albedo accipit notionem albedinis, vel similitudinis, ab actu absoluto, vel comparatione, absque eo quod natura actus ingrediatur prædicatum relationis.

Hec sic sese habere constat, non ex eo solùm quod in duobus dictis omnimoda inueniatur equalitas; & quod non possit intelligi vnum esse, & non esse alterum; verum etiam quia alioquin omnes relationes essent opera rationis, & non rerum affectiones extra mentem; quod est contra communem sensum generis humani, & disciplinarum relationes plerumque contemplantium.

Quare non est aliquis conceptus

relationis additus conceptui fundamenti modificatus seu mutatus : neque quicquam intelligi potest in relatione , nisi quod includat ipsum conceptum rationis fundandi ; non magis quàm in bicubito , vel in calore vt duo , si quantitatem vel calorem auferas , poteris quicquam intelligere. Neque si aliter foret , posset relatio vnicâ definitione definiri , seu esse verè vna ratio ; cum vnum & plura non possint simul consistere.

Ex quibus apertè concluditur , rationem relationis diuinæ , non esse communem vniuersaliter , seu per modum generis vel speciei pluribus relationibus diuinis : si enim non potest accipi ratio aliqua relationis , non præacceptâ ratione fundandi ; clarum est , non posse quicquam esse commune relationibus , nisi ponatur etiam commune rationi fundandi , quæ est quodammodo ratio immediatè superior illis. Cum itaque ratio fundandi sit eadem , neque possit habere aliquid commune , neque relationibus aliquid erit commune.

Vnde si quis contendat rationem *Ad*, esse communem his relationibus, replicandum est, non rationem *Ad* in communi esse genericam particularibus relationibus, sed diuidi eas secundum particularia genera; rationem vero *Ad*, præcisè & separatim à ratione fundandi, esse rationem extrinsecam, à subiecto seu comparatione sumptam, atque adeo prædicatum rationis, quale etiam in diuinis esse commune, nulum est inconueniens.

Quare neque ratio Personæ, etiam quoad hanc partem significationis, habebit aliquam vniuersalitatem; non magis, quàm si quis contendere eidem viæ de vertice montis ad vallem ferenti, dari aliquam notionem viæ communem, ad viam sursum, & viam deorsum, propter reales proprietates diuersas; scilicet quod vna sit accliuus, altera decliuus; vna facilis, altera difficilis.

Ex quibus tandem euidentius est, rationem Personæ diuinæ, non esse communem pluribus, per modum indiuidui vagi; siue illud explicas

per notam *aliquis*, vel per notam *quidam*. Verè enim aliquis homo est pars termini omnis homo; & per consequens, veram vniuersalitatem, euitandam in diuinis, includit. Neque obstat, quod Persona magis ad rem naturæ, quàm ad naturam significandam imponitur; per hoc enim & à significatione *aliquis homo* recedit, quæ non repugnat cum indeterminatione, sed illam includit obiectiuè, & recidit in rationem entis in communi.

Terminus autem; *Quidam homo*, nominat certum hominem obiectiuè, sed ignotum; neque vniuersalitatem includit materialiter, sicut *aliquis homo*; & propterea magis propriè significat indiuiduum vagè: sed etiam nihil habet commune nisi vocem; sicut Petrus, cùm applicatur pluribus singularibus. Vnde in iure ponitur determinatum nomen, vt Titius, vel Sempronius, loco huius, *Quidam*. Quare clarum est, hoc modo nihil inconuenientis esse, vt nomen Personæ sit commune; si vsus nominis hoc ferat.

LECTIO IV.

*Quod sint in Deo due Persona, quae sint
Pater & Filius.*

Post hæc considerantibus cognitionem esse ad hoc, ut cognitum sit aliquid cognoscentis; manifestè apparet, cognitionem per essentiam suam, seu per hoc ipsum quod est esse cognitionem, esse ipsius cogniti, & ab eo habere ipsam suam rationem formalem; æque atque arte factum ab operatione, ad quam perficiendam factum est. Cum itaque imago addat supra rationem similitudinis, quod sit à suo simili, patet cognitionem habere & rationem similitudinis, & imaginis.

Cumque similitudo dicat unitatem secundum formam in diuersis suppositis; cognitio verò diuina ex vi sui habeat formam (id est, essentiam & naturam ipsammet cogniti) habere in distinctâ Personâ; & hoc ex vi huius, quod sit essentialiter à cognito;

euidens fit , quod persona cognoscens , seu cognitio , habeat ex vi suae essentiae seu rationis personalis, id est, quatenus est cognitio , esse in similitudinem personae cognitae, secundum ipsam naturam & essentiam ipsius, quae est communis vtriusque, & specificans cognitionem.

Quare cum cognitio sit principium mouendi se ei in quo est ; & per consequens , cognoscens sit viuens ; cognitionis verò seu cognoscentis natura in diuinis sit natura cogniti ; sit personam quae est cognitio esse viuens à viuento in similitudine naturae. Et cum cognitio faciat cognitum esse in cognoscente , clarum est cognitum , quod est principium ipsius , esse principium coniunctum. Cognitio itaque in diuinis , est Persona viuens à viuento, vt principio coniuncto , existens in similitudine naturae ipsius ; hoc est Filius ; & per consequens , Persona correlata Pater ; eruntque in diuinis Pater & Filius.

Dices, obiectum esse ens , & non ordinari ad cognitionem ; & per

consequens, non habere relationem; neque rationem Patris posse in eo fundari. Respondetur, obiectum ut obiectum, esse indifferens ad hoc ut agat naturaliter in potentiam cognoscitivam, vel per accidens; sed quando ipsa natura cognoscentis est per se obiectum suae potentiae cognoscitivae, necessum est tam ordinari obiectum ad cognitionem, quam cognitionem ad obiectum; et si non aequaliter; quia cognitio essentialiter est ab obiecto, sed obiectum tantummodo naturaliter est actuum in suam potentiam; maximè, cum ipsum cognoscere est finis & beatitudo cognoscentis; sicut accidit in Deo.

Quoniam vero verbum sonat quod verum, seu in quo verum, quasi verum; id est, locutio in quo veritas est; quod apud logicos propositio, vel enuntiatio, vel assensus dicitur: (unde & verbum, quae est pars orationis, quodammodo enuntiatio est, cum includat praedicatum & copulam.) Sicut autem ens, sic & propositio & cognitio completur per

esse; essentia vero Dei est ipsum esse; palam est, hanc cognitionem Dei, atque adeo omnem, esse Verbum; id est, perfectam cognitionem seu enunciationem veram.

Cumque, ut diximus, essentia huius Verbi, sit esse ab objecto; Objectum vero habeat rationem Patris, & Verbum rationem Filij; consequens est, Filium esse Verbum sui Patris; & esse nomen personale. Sed quamuis sit etiam cognitio de creaturis, non propterea est Verbum creaturarum, vel dicit respectum ad creaturas; quia est alterius ordinis; & non est bonum cognoscentis, cognoscere creaturas ultra quam quomodo sunt in essentia ipsius; & propterea non coordinatur cum hoc objecto, neque habet relationem respectu illius. Et par aut similis ratio est, de quocumque attributo, vel alia ratione in Deo, quod non habet rationem principalis cogniti: Personæ enim secundæ relatio à nullo horum specificatur.

Dices, Verbum videri idem sonare quod dictionem; dictio autem ad

dicentem refertur; quare & relatio Verbi, erit ad dicentem potius quàm ad objectum. Respondetur Verbum dici tum de verbo interiori, quod est propriè cognitio; tum de Verbo exteriori, quod est manifestatio cognitionis. Et hoc posteriori modo est idem quod dictio, & habet relationem ad dicentem, à cuius auctoritate pendet veritas eius quatenus est manifestatio. Et, si vox secundum hanc significationem dicatur de Deo, significabit actionem creatam; & habebit relationem tum ad Deum dicentem, tum ad creaturam dictam; & relatio vel denominatio Dei, erit ex tempore, & rationis; qualis est Domini vel creatoris. Prout autem est nomen personale Dei, transferatur secundum priorem significationem, non posteriorem.

Infertur, non bene explicari generationem Verbi, per actionem procedentem à Patre, ex vi naturæ diuinæ in eo existentis, antecedenter secundum rationem ad intellectum. In primis enim, cum neque in naturâ distinguatur essentia seu natura,

ab accidentibus, tanquam entitas ab entitatibus, sed tanquam ens à determinationibus sui, adeo vt ipsa accidentia modificent ipsam generationem, palam est, longè inconuenientiùs trahi ad diuina hanc distinctionem.

Sed & si foret talis distinctio in creaturis, eodem certè iure distingui deberet in Deo potentia aliqua generatiua posterior naturâ diuinâ, & prior intellectu, per cuius virtutem procederet Filius; cùm substantia creata non operentur nisi mediantebus accidentibus; & huiusmodi accidentia, qualia sint in Deo, & spiritualibus creaturis, explicari & ostendi deberent; quorum non est aliquod vestigium.

Sed & specialiter Deo repugnat, poni in ipso aliquid extra essentiam ipsius; cùm enim existere sit essenziale ipsi; & existentia nihil possit superuenire; vel dicendum est, intellectum & voluntatem non esse ipsum Deum; vel esse ipsi essentielles. Quod enim Personales sint extra essentiam, est ex arbitrariâ sumptione huius nominis essentia, propria-

dicatis absolutis, abstrahendo ab ijs.
Tandem hæc sententia in eo peccat,
quod rationes Patris & Filij, & ge-
nerationis, immediatè à materiali-
bus transferet ad Deum; & non me-
diantibus alijs rationibus spirituali-
bus, puta Verbi, cognitionis & c.
Cum tamen constet, imperfectio-
nem materie, & motus, non nisi
mediantibus spiritalibus notionibus,
in Deum transferri; secundùm scita
communia Theologorum.

Non minùs constat, non posse ge-
nerationem poni in quâdam actione
intellectus distinctâ ab intellectu,ne,
cuius propria ratio sit dicere. In pri-
mis enim nulla talis spiritalis actio
reperitur in nobis; sed tantùm cor-
porea, puta, vel prolatio verborû ex-
teriorum; vel ordinatio phantasma-
tum in cerebro, ad huiusmodi verba
proferenda: ex quibus non sunt in
Deum transferendæ notiones, sal-
tem immediatè; neque est ille sensus
Theologorum.

Sed neque explicabile est quidpiam
proprium & peculiare intellectui, in
quo hæc dictio excedat enuntiatio-

nem, seu assensum, vt sit peculiaris actus intellectus: nam dicere hunc actum intrinsecè dicere ordinem ad suam causam, quiddam transcendens est. Apparet itaque totum hoc non esse nisi commentum ad explicandum mysterium, & absque impugnatione debere reijci, sicut absque probatione introducitur.

Verum neque possunt multiplicari cognitiones in Deo, vt alia sit quâ Pater & Filius cognoscant communiter, alia quâ Pater solus cognoscat, & cognoscendo generet, quâ sit actus proprius & notionalis. Consequenter enim debet tertia cognitio poni in Filio, quâ sit generatus; cum ratio scientiæ sit magis appropriata ipsi quàm Patri; & non possit esse communis, cum secundum illam distinguendæ sint Personæ.

Sed & est contra principia communitalis: cum enim commune id dicamus, quod est in pluribus; si cognitio alia est communis, alia particularis, communis est in particulari; & si est in particulari, particularis non distinguitur ab eâ; non itaque sunt
duz.

duz, sed vna. Adde quod necesse est, ut sint plures particulares, ad hoc ut sit vna cōmunis, alia particularis; respectu enim vnius particularis, non dicitur commune; sed neque commune potest dici, nisi respectu particularis.

Adde quod si cōmunis cognitio est cognitio absque vllâ relatione, etiam particularis cognitio, absque relatiuō erit perfectè cognitio; & per consequens, aliquod absolutum erit particulare; & nusquam regula & modus, cur vnum absolutum sit particulare, aliud non: & violatum Theologorum axioma, quo omnem distinctionem in relatiuis ponunt. Vel certè ponenda est relatio aliqua, de ratione cognitionis particularis quatenus cognitio est, & non esse eandem rationem cognitionis in duabus illis.

Tandem non potest explicari ratio generationis in diuinis; per translationem à processione enunciationis ab ipso cognoscente: nam ordo cognitionis ad cognoscentem, est ordo inexistentiæ, & vnitatis, & non processionis. Cum enim cognitio sit esse cognitum in cognoscente, seu

esse quasi partem , vel membrum ,
vel instrumentum cognoscentis , seu
facultatem ipsius ; patet ordinem ip-
sius ad cognoscentem , dicere vnio-
nem & identitatem ; neque posse dis-
tinctionem inde educi ; quæ tamen
ex generatione oritur.

Sed & reuerâ , cognitio non ori-
rur à cognoscente in genere causæ
efficientis ; nisi fortè per accidens ; ut
cùm obiectum iam prius est aliquid
cognoscentis. Et etiam tunc , obiec-
tum est cognoscens per accidens , &
in potentiâ. Vnde tunc procedit cog-
nitio à cognoscente quatenus non-
dum perfectò ; id est , quatenus parti-
cipante de aliâ naturâ , puta obiecti ;
non autem quatenus perfectò in ra-
tione cognoscitiui ; cùm tamen pro-
cessio diuina sit à perfectò non im-
perfectò.

Neque obstat , quod habens habi-
tum vtatur , & cognoscat quando
vult ; hoc enim est perfectio cognos-
centis quatenus est imperfectus in
cognoscendo , & non quatenus est
cognoscitiuus. Vnde videmus perfec-
ta cognoscentia semper in actu esse ;

sicut & rationabile est, quandoquidem actus secundus est potior primo, & refertur ad eum tanquam ad potentiam, praesertim cum immanens est.

Ad hæc, non potest intelligi talis translatio, nisi ratio causæ efficientis & effectus transferantur in Deum: cum tamen ratio effectus sit æquæ imperfectionis, quàm materialitas & motus: & tamen consideranti quid possit transferri ex comparatione efficientis & effectus, quod faciat oppositionem, non occurrit aliud, quàm Filium accipere esse à Patre, sicut effectus ab efficiente accipit. Neque refert adijceri, *quasi*, vel *ablatâ imperfectione*: non enim, *quasi*, nihil explicat; & ipsum accipere esse hoc modo est imperfectio.

Rursus cum Deo commune sit, habere esse ex vi ipsius essendi rationis, nihil potest transferri in Deum, quod sit contrarium huic rationi: sed accipere Filium à Patre ut ab efficiente, est oppositum huic quod est habere ex vi ipsius rationis essendi; quia hoc dicit habere ex eo

quod est , & alterum dicit habere ab extrinseco ; non itaque potest explicari processio Filij in genere causæ efficientis.

Dices , filios inter nos non procedere à patribus ; nisi in causæ efficientis genere. Respondetur hoc falsum esse ; docet enim Aristoteles, causam efficientem coincidere cum formâ. Vnde procedere à causâ efficiente sine imperfectione , est procedere præcisè ab eo vt formâ. Sed & in definitione generationis, ponitur vt sit in similitudinem naturæ ; simile autem ad simile refertur per communitatem formæ : vnde hæc communitas formæ est principalis in generatione.

Dices rursus , in omni cognitione nostrâ procedere aliquid ab intellectu efficienter. Respondetur falsam esse vniuersaliter hanc propositionem. Nam neque prima cognitio vnquam procedit efficienter ab intellectu ; neque posterior est à notitiâ aliquâ quæ sit in intellectu effectiuè (nisi in discursu) ; alioquin enim habitus non concurrir nisi dispositiuè in genere causæ materialis.

LIBER II. LECTIO IV. 173

Tandem obijcies, quòd non possit intelligi quòd cognitio sit actus vitalis; nisi procedat ab intellectu in qua recipitur. Responderetur hunc modum vitalitatis esse commentitium; tum ex eo quòd ponit idem indiuisibile agere in seipsum; & esse in actu & potentiâ; tum quia supponit entitates quasdam fictitias, quæ sint entia, & non substantiæ; contra primam notionem substantiæ.

Rursus, cùm viuentibus competat sese mouere ad agendum; & in hoc sint duo; alterum, quòd agant citra motum ab extrinseco; alterum quòd moueantur intrinsecè; quorum hoc sit imperfectionis, illud perfectionis: obijcientes illud quod est imperfectionis accipiunt pro ratione vitæ; cùm vita consistat in perfectione, siue in illo altero, quod est habere principium agendi in se; vnde Deus qui omnino motum non potest habere in se, perfectissimè habet in sese vitam.

Præterea decipiuntur in eo, quòd putant viuere esse actum secundum, & debere in actu secundo inueniri

174 INSTITVT. SACRARVM.
intrinsecè rationem vitalitatis : Vi-
uere enim est esse viuentis ; & vita
ipsius , anima vel substantia ipsius.
Actiones autem vitæ , vel vitales , di-
cuntur tales , quia sunt propriæ vi-
uentium , vel sequentes ex vitâ. Et sic
patet ambulationem , locutionem , &
similes actiones , haberi actiones vitæ.

Ex quibus patet , cognitionem esse
actionem vitalem ex duabus causis ;
quia videlicet & est propria viuentis ;
& quia est ei principium agendi , vn-
de per illam habet ex eâ parte non
indigere motore ad agendum : Non
autem ex illo quod sit ab eodem in
eodem ; quod in plerisque actibus
vitalibus , neque apparet quidem ; in
ijs autem in quibus putatur esse , ne-
que est , neque est possibile esse.

LECTIO V.

*Dari in diuinis tertiam Personam,
que non sit Filius.*

PROgrediendo inuenimus , quòd,
quoniam in naturis intellectu-

bus creatis reperimus, cognoscens, postquam vi obiecti accepit esse ipsum obiectum intellectuali modo, suo postmodum motu ferri ad obiectum, ut iungatur obiecto secundum modum obiecti; & hunc motum ipsius appellamus volitionem, (& constat etiam ad Deum transferri volitionem) fieri etiam in Deo reperiri aliquid correspondens huic motui, vel magis termino ipsius, hoc est, coniunctioni ad obiectum.

Et cum bonum ut bonum (quod est obiectum volitionis) non minus sit in rebus, id est, extra cognoscens ut cognoscens est, quam ens quod cognoscitur; & quod coniungitur, ut tale, supponat non esse coniunctum, seu idem, id est, esse aliud; patet quod etiam hic respectus sit ad aliud ut aliud, seu ad aliud cognitum esse aliud; & sit evidens, alietatem & distinctionem debere esse æquè realem inter cognoscentem ut sic motum, & obiectum ad quod mouetur, atque inter Patrem & Filium: & quod sequitur (quoniam hoc bonum non est nisi Deus) in Deo reperiri Personam

quæ sit amor, æquè ac quæ sit intellectio.

Perpendenti verò quòd bonum Dei non sit bonum consequendum, sed bonum quod sit in esse & de facto in Deo; apparet quòd non potest esse aliud in quod fertur amor quàm bonum Dei, seu quod benè sit Deo. Et cum bonitas consistat in relatione, non potest esse benè Deo, nisi vel ratione, vel secundùm relationem. Cum itaque perfectio naturæ rationalis consistat in veritate, seu in hoc quòd obiectum sit in eâ; bonitas quæ est obiectum amoris diuini, consistet in hoc quod Deus sit in Deo, hoc est, quòd sit Pater & Filius.

Quare cum amor diuinus tendat formaliter in hoc quòd Filius sit à Patre, quod est Patrem esse in Filio, seu Deum cognosci à se, relatio amoris erit formaliter in Patrem & Filium secundùm ipsas relationes. Quandoquidem itaque de ratione relationis sit alietas & distinctio, manebit tertia Persona distincta tum à Patre tum à Filio, per formalem suum respectum ad eos, secundùm proprietatem.

res seu speciales relationes eorum.

Dices, hic saltem negari non posse, esse virtualem causalitatem efficientis; cum finis & bonum semper agant per causam efficientem. Neque distingueretur Spiritus sanctus à Filio, nisi procederet ab ipso; ut est sapientior sententia Theologorum; & per quam victi cesserunt Græci; quæque propterea, quòd sit fundamentum Ecclesiæ, debet esse salva & intemerata.

Respondetur duas esse causalitates finis; priorem quidem circa efficientem; posteriorem verò circa mediā, & assecutionem finis mediante efficiente; & hanc quidem includere virtutem efficientis moti ab ipsâ, sed non ab hâc fieri translationem ad divinā; in quibus ut diximus bonum est obtentum, & non obtinendum; ad quod requiritur mediatio & virtus efficientis.

Causalitatem autem finis circa ipsum efficientem, quâ facit efficientem efficere, clarum est non posse esse virtutem ipsius efficientis, cum præueniat eam; & per consequens,

ex hâc processione magis accipitur argumentum contra translationem causæ efficientis in Deum ; cum translatio facienda sit ex priori & nobiliori ratione, & non ex posteriori & viliori.

Distinguitur autem causalitas finalis, vt determinans efficientem, à formali seu ideali, quâ objectum determinat intellectum, quod formalis supponat, saltem permissiuè, subiectum suum vt indeterminatū & indifferens ad plura, vel quodlibet pluriū : Finalis verò, cum consistat in ratione boni, supponit proportionem actualem aliquam inter objectum & amans; & per consequens, actum aliquem & proprietatem, sed non vltimam; & quasi supponit quidditatem, & dat existentiam; & in intellectualibus, supponit hæc causalitas cognitionem; & incipit vbi cognitio desinit.

Et huic euidentiæ cesserunt Græci; *quod amor non fertur nisi ad cognitum*; & hæc est sustinenda; sicut etiam quod in diuinis sine relatione non est distinctio. Quod autem sine proces-

fione non fit relatio, vel oppositio; probandum est, non supponendum: etsi enim materialiter sit verum, non tamen ex vi terminorum. Tertia itaque Persona non distinguitur ex vi originationis, sed ex tendentiâ, quam habet ex propriâ relatione, in bonum ut bonum; cui accidit ut originem ab eo habeat.

Et ex dictis conficitur, tertiam Personam nihil habere simile Filiationi. Cum enim diuina entitas sit in sese simplicissima, nihil in eâ secundum materiale entitatem ponendum est; sed secundum formales rationes; & secundum has accipitur, quod Tertia Persona non procedit in similitudinem; cum non accipiat naturam alterius; sed fertur ad illam seu vnitur illi. Rursus, non habet relationem quæ sit formaliter originis; cum amans feratur ad amatum quasi extra se; cognoscens autem recipiat cognitum intra se. Et tamen in his duobus, tota ratio Filiationis vertitur.

Dices, Filium dicere quidem similitudinem, sed naturalem; cogni-

tionem verò tantum habere intentionalem : vnde non propter eam, Verbum erit magis Filius, quàm amor; imo amor videtur magis habere similitudinem naturalem. Respondetur, similitudinem naturalem & intentionalem, non distingui tanquam duo genera similitudinum, sed tanquam imperfectum à perfecto; similitudines enim in sensibus externis & internis sunt naturales, sed imperfectæ; similiter sunt imagines tum figuratæ, tum coloribus expressæ & statux. Vnde in Deum non potest trāferri talis distinctio, sed omnis similitudo in Deo sicut est perfectæ, sic etiam est naturalis.

Vnde patet quòd ratio Filij excellentius reperitur in secundâ Personâ, quàm in creatis; tum quia ratio similitudinis est perfectior; nam in creatis non reperitur similitudo sine dissimilitudine secundum ipsam formam, (alioquin enim forma foret eadem) sed in diuinis natura est eadem, solâ relatione distincta, non dissimilis. Tum quia in naturâ, motus formaliter fit ad suppositum, cui accidit esse simile; in diuinis autem

ipsa ratio similitudinis constituit suppositum, quod est terminus processionis. Naturalis autem similitudo, quæ est in tertiâ Personâ, cum sit duntaxat materialis, non conferet ad rationem Filiationis.

Ex dictis habetur, Patrem & Filium constituere vnum principium tertiæ Personæ. Quia enim amor supponit cognitionem amati intrinsecè, (cum non sit nisi iudicium perfectum de bono amato) clarum est, neque bonum solum, neque cognitionem solam, esse sufficiens principium ex quo sequatur amor; & per consequens, vtrumque concurrere ad rationem principij intrinsecè & per se.

Ex quo sequitur, Patri & Filio non esse communem aliquam vim producendi tertiam Personam, quæ sit vniucè in singulis, & secundum quam non distinguantur ab inuicem; sed hanc virtutem requirere ipsas proprietates eorum. Et certè si foret talis vis, foret absoluta; alioqui non foret cõmunis duobus; & si absoluta, iam tribus, & ipsi tertiæ foret com-

munis. Concurrent itaque tanquam partes heterogeneæ vnius causæ; & non velut partes accidentales eiusdem; quoniam nihil potest esse per accidens in æternis.

Petes, quare non possit esse relatio communis Patri & Filio; quæ tamen propter oppositionem cum spiritu sancto, non sit ei participata. Respondetur: quia si hæc relatio intelligatur in essentiâ diuinâ prius relationibus constituentibus Patrem & Filium, non poterit repugnare spiritui sancto: si verò posterius, non poterit non accipere diuersitatem ab eo quòd adueniat pluribus Personis.

Non etiam æqualiter concurrent; patet enim vim motiuam, quæ est in bono cognito, esse totam in ratione boni; rationem verò cognitionis, non esse nisi coniunctionem huius virtutis ad mouendum: quare alio modo dicitur tertia Persona procedere à Patre, & alio modo à Filio: & quasi directè & principaliter à Patre, & à Filio non nisi concomitanter, seu tanquam à modo causæ. Vnde non

mitum si Christus Dominus, & aliqui Patrum, disertè dicant, eum procedere à Patre, sine mentione Filij

Vnde intelligitur, quòd sit magis expressiua locutio dicere, quòd procedit à Patre per Filium; quàm quòd procedit à Patre & Filio. Cùm enim *per* quasi viam & medium denoter, impossibile est procedere per Filium, & non à Filio; quia omnis pars viæ, respectu termini, habet rationem termini à quo & principij. Vnde *ly per*, explicat & esse à, & à non primo principio.

Præterea, *ly per*, explicat quòd Patris virtus operatur per Filium; non solum quia Patris virtus est in Filio; vel etiam quòd Pater per virtutem communicatam Filio facit ipsum operari; sed etiam quòd virtus propria Filij, non sit nisi virtus quædam materialiter sese habens ad effectum; sicut intellectus sese habet materialiter ad voluntatem; & magis collateraliter prærequisita ad effectum, quàm causa directæ, & quasi vniuoca; & magis retinens de instrumentali quàm de principali.

Sequitur ex dictis, non distingui tertiam Personam à Patre & Filio, ex vi processioneis. Cùm enim quæ distinguuntur secundùm relationem, distinguantur propter oppositionem; oppositio autem relatiui est ad correlatiuum; amor autem non ad principium, sed ad obiectum refertur; patet distinctionem tertiæ Personæ à Patre & Filio, debere esse quatenus Pater & Filius sunt obiectum amoris; & non quatenus sunt principium ipsius: sunt autem obiectum, quatenus præcisè constituunt rationem boni.

Vnde rursus patet, quòd, cùm bonum vt bonum sit in rebus, & bonum vt cognitum sit in intellectu; volitio autem non fertur introrsus ad subjectum suum, sed ad ea quæ sunt foris; ea verò quæ intus sunt, prout talia, sunt principium amoris qui intus est: bonum vt cognitum non potest esse terminus contra quem distinguitur amor; etsi non possit non esse principium. Et Pater & Filius sunt correlatiuum spiritus sancti, prout integrant rationem boni præcisè,

præcisè, & non rationem boni cogniti.

Similiter cùm in diuinis nihil possit accipi nisi secundùm rationes formales; cùm omnia sint vna simplicissima entitas materialiter; videmus autem τὸ fieri velle, esse adeo materiale respectu volitionis, quàm fieri hominem respectu hominis: patet non posse magis formaliter volitionem constitui vel distingui per respectum ad causantem amorem, quàm hominem per facientem eum.

Adde, quòd cùm ratio Filij consistat in esse à Patre; si tertiæ Personæ ratio constitueretur ex parte in eodem, Filius & tertia Persona non distinguerentur à se inuicem, nisi inadquatè. Quod idem dicendum foret de Patre & Filio, si relationem producentis Spiritum sanctum haberent vniuocè communem. Ipsa ergo propria & singularitates constituentia, non essent propria.

Obijcies, non posse esse relationes oppositas in Deo, nisi fundatas in actione; neque actionem nisi quæ sit processio; quare necesse est relatio-

Q

nes, distingui secundum processiones; actio enim sine passione comparatur solum ad terminum; terminus autem procedit ab agente. Reliquae autem relationes fundantur in communitate naturae, ut aequalitas, similitudo &c: & non consistunt cum unitate fundamenti, nisi praesupposita distinctione suppositorum, quae deberet per eas constitui.

Respondetur oppositionem relationum in diuinis, non posse accipi secundum actionem, neque processionem prout actio est; quia agens sonat causam efficientem; & causa efficiens sonat prioritatem, quam possit intelligi esse, absque eo quod effectus sit; quod in diuinis repugnat. Rursus, ponendo efficientiam, ponitur Deus quasi in fieri; quod repugnat ei, cui esse competit ex eo quod est: & tandem si ponatur processio in genere causae efficientis, non potest non poni virtualiter ratio effectus, id est, imperfectio.

Neque obstat quod nomen Patris & Filij causam efficientem sonant: haec enim voces transferuntur in Deum,

mediantibus notionibus objecti & cognitionis; quæ non dicuntur ex necessitate causam efficientem. Sed & explicatum est, quomodo ex vi alienationis sit oppositio, & quod processio sit in genere causæ formalis.

Dicendum itaque, relationes esse tertij generis, quæ fundantur in unitate aliquâ, mediante tamen derivatione, non causalitatis efficientis (nisi per accidens) sed formalis; quatenus objectum est mensura, seu terminus secundum quæ accipitur natura ab eo deriuati. In cognitione quidem, ab ipso objecto; in volitione verò, ex vi ipsius volentis sese conjungentis ad volitum; sic, ut natura objecti & mensuratorum, sit quodammodo partim eadem, partim diuersa.

Dices, quod cum ratio finis vel boni tantum metaphoricè causet; nihil impedit tertiam Personam procedere ab objecto, tanquam à fine; sicut secunda procedit ab objecto, tanquam à formâ; & sic vtraque processio erit causa distinctionis vniformiter; & concordior erit speculatio circa Personas.

Respondetur, finem esse maximum caufarum; & minùs debere poni caufalitatem finalem, quàm efficientem; cùm efficiens sit propior effectui quàm finalis: sed & esse propter aliud est maioris imperfectionis, quàm esse ab alio; & arguit inferiorem naturam. Et multum errant qui putant caufalitatem ipsius esse metaphoricam; sic enim identificata est caufalitati efficientis, vt sit quasi potior pars ipsius. Sed neque debet esse concors speculatio processionum diuinarum, sed primò diuersa; alioqui ratio aliqua communis posset reperiri in ijs.

Ex dictis intelligitur, quare vita, & viuificare, specialiter dicuntur de tertiâ Personâ: cùm enim proprium viuentis sit esse actiuum ex sese; caufa autem agendi subordinatae sint forma, efficiens & finis, (efficiens enim mouetur à fine, & mouet per formam) fit, summum gradum agentis ex sese, esse in eo qui cognoscit rationem finis; maximè si ipse sit suae actionis vltimus finis. Cùm itaque tertia Persona sit complexio &

vnio ad finem, patet naturam vitæ diuinæ, in eâ esse consummatam & perfectam.

Vtteriùs, cùm apud nos actio sit motus localis; & omnis motus localis cum impetu & velocitate fiat; & imperus non sine aëre reperiatur, & propterea omnia animalia plus minùs respirant; aërem autem spiritum appellemus; fit, vt vita, quæ est principium agendi ijs quæ ex sese agunt, videatur in aëre consistere; vnde & spirare, pro viuere dicimus, & expirare, pro mori.

Cùm itaque tertia Persona in Deo specialiter sit vita, meritò dicitur spiritus; & aduenit in fideles per modum spiritus, id est, venti. Dicitur itaque spiritus, non quia spiratur à Patre & Filio; sed quia spirat, sicut & ventus dicitur spirare. Et propterea etiam dicitur Sanctus, quia spirando sanctificat nos; non quia in sese sit magis sanctus quàm Pater & Filius, quibus non additur hoc epitheton.

LECTIO VI.

*De Relationibus , Processionibus,
earumque Principijs.*

EX supra dictis colligitur , duas eduntaxat esse in Deo oppositiones relatiuas. Cùm enim accipiantur relationes ex eo quod Deus , per notionem naturæ intellectualis , accipiatur tanquam aliud à se ; & inter duos terminos , tantùm considerari possit quid sequatur ex eo quod vnus terminus sit ad alterum , & rursus ex eo quod alter terminus est ad priorem ; patet non posse nisi duas coniugationes relatiuorum in Deo apprehendi.

Idem habetur ex eo quod in naturâ rationali (ex quâ trahitur translatio ad Deum) duæ sunt tantummodo potentiaë vniuersales , intellectus , qui intelligit omnia , & voluntas , quæ prosequitur omnia. Vnde cùm natura diuina sit quodammodo natura vniuersalis entis , ex intellectualis

naturæ ratione , duæ tantum erunt
conuerſiones ipſius ad ſeipſum , ex
quibus fundari poſſint relationum
oppositarum coniugationes.

Non tamen propterea ſunt in Deo
quatuor relationes , ſed tres tantum-
modo. Cum enim bonum ut bo-
num , ſit correlatiuum amoris ; & ut
bonum , non dicat niſi conueniens
ei , ſiue eius appetitui cui bonum eſt ,
(hæc enim idem ſunt) & eſſe pro-
priè bonum alicui , non intelligatur
ſine diſtinctione inter illud quod eſt
bonum , & illud cui eſt bonum ; pa-
ret bonum Deo non poſſe intelligi
ſine diſtinctione Patris à Filio. Et
quoniam per relationem Filij, Pater
eſt in eo , & Deus formaliter conue-
nit Deo ; palam eſt ipſas relationes
Patris & Filij, formaliter conſtituere
rationem boni ; & per conſequens ,
complexè eſſe correlatiuas amoris ;
neque eſſe quartam relationem.

Sed neque poteſt poni talis relatio ;
quia vel erit in Perſonis Patris , &
Filij , vel in naturâ. Si in Perſonis ;
ſequitur , quod quoniam Perſonæ
realiter inter ſeſe diſtinguuntur ,

hæc relatio ex necessitate erit duplex; identificabitur enim singulis quatenus distinctis. Sin dicatur pertinere ad naturam, non poterit non etiam esse communis Spiritui sancto.

Adde, quòd talis relatio adueniet Personis iam constitutis per suas proprias relationes; quare cum & Pater & Filius constituentur per relationes, per quas inter sese opponuntur, & Spiritus sanctus etiam per relationem per quam illis opponitur; hæc relatio erit alterius rationis quàm reliquæ tres; & oppositio duarum Personarum ad tertiam, erit quodammodo accidentalis, & alterius rationis à reliquis, quæ sunt substantiales Personis vt Personis.

Sed & inter rationem Dei, & rationes Patris & Filij, erit ratio quædam media communis; quæ ratio, cum ex necessitate sit essentialis, Deus respectu eorum, habebit quodammodo rationem genericam, & respectu Spiritus sancti, quasi specificam & immediatam: vnde non eodem modo referentur ad rationem diuinitatis. Sed & Pater &
Filius

naturæ rationalis, competit nasci à ratione; & non ex proprijs amoris vt amoris; quæ consistunt in tendentiâ iam existentis ad aliud existens.

Consequenter apparet, quid sint actus quos vocant nationales. Cum enim passiuui actus sint formaliter ipsæ processiones; & actiuui à passiuuis non distinguantur nisi per cōnotationem termini; sit hos actus esse in Deo ipsas relationes cum suis connotationibus; vt dictum est de processio- nibus.

Eodem modo dicendum est de potentijs ad actus notionales; quòd quoniam virtus causæ est in effectus; & actus notionales intelliguntur quasi effectus; palam est virtutem causæ in ijs esse. Ipsi itaque actus, quatenus intelligi potest quædam virtus in ijs, abstrahendo ab actu secundo, eatenus vocantur potentia, vel potius virtutes actiuæ.

Ex quibus patet, nihil esse necesse fingere relationes quasdam transcendentales; quibus hi actus & potentia distinguantur; nam & Philosophia oppositæ sunt, quæ non

agnoscit alias relationes quàm prædicamentales; & magis Theologia, cùm non possint intelligi sine verâ ratione potentiaë actiuaë vel passiuæ; & si relationes sunt reales, ex necessitate oppositionem & distinctionem realem secum trahunt.

LECTIO VII.

De prioritate & Circuminfessione Personarum diuinarum.

EX quibus pariter fit euident, nullam esse prioritatem in Deo, siue Personarum, vel relationum, siue potentiarum, vel inter sese, vel ad actus notionales, per modum præexistentiaë, sed tantummodo per modum abstractionis. Cùm enim omnia hæc sint ipsæ relationes intrinsecæ, & quasi pro basi vel subiecto, palam est non posse magis vnâ præexistere alteri, quàm ipsæ relationes possint intelligi præexistere sibi metipsis.

Ex quo consequenter patet, idem significare esse Patrem, & generare; & per consequens in genere causæ

Filius erunt tantum inadæquate differentes inter sese; sicut prius de Spiritu sancto & Filio conclusum est.

Si autem tantum tres relationes facientes distinctionem realem in Deo reperiuntur, statim perspicuum est, neque plures tribus Personis esse posse; cum distinctio in diuinis non possit esse, nisi ubi distinctio est de ratione alicuius prædicati diuini; neque possit esse de ratione alicuius prædicati absoluti in Deo; quoniam absoluta sunt æqualia rationi ipsius entis; & in ratione entis, nullam possunt habere oppositionem.

Ex quo protinus dilucet, duas tantummodo processiones esse in Deo. Cum enim processio actionem sonet; actiones autem sint suppositorum; supposita autem sint tantum tria; neque possint omnia procedere, cum terminus à quo ex vi vocis supponatur processionem, maximè cum ipsæ processiones sunt connexæ, & quasi subordinatæ; fit duas tantum Personas procedere, & duas solas esse posse in diuinis processiones.

Tantundem conuincitur ex pro-

R

cessionibus quæ sunt in naturis rationalibus apud nos; quæ tantum sunt duæ, intellecttionis ab obiecto extrinseco; & volitionis à cognitione intrinsecâ. Vnde etiam patet, quod ex vi processions, Spiritus sanctus foret idem Filio; sicut volitio est in eodem subiecto cum cognitione ex quâ procedit; tantum abest vt ex processione distinguatur.

Intelligitur quoque ex dictis, quatenus processio trāsferri potest ad diuina: patet enim ex vi vocis significare motum ad terminum ei præuium: sed quoniam motus est actus entis in potentiâ quatenus in potentiâ, id est, quasi graduatio quædam actus futuri in potentiâ; imperfectum autem continetur in perfecto; in Deo autem non potest cogitari aliquod fieri, sed duntaxat actu esse; fit processionem significare in diuinis actu esse à principio. Est itaque ipsa relatio connotans principium.

Patet itaque in ratione Filij & Imaginis, formaliter includi processionem; non autem in ratione amoris: amor enim, ex hoc quod sit actus

notatione, adeo ut prioritas sit ipsa qualitas, vel proprietas ipsius relationis. Sicut autem prioritas secundum locum vel secundum dignitatem nullatenus infert prioritatem in essendo, sic neque prioritas originis, quæ dicit ordinem habendi esse, non verò accipiendi illud. Et sic dicendum est Filium habere esse, non verò accipere à Patre, prout accipere distinguitur ab habere.

Ex quo patet, voces posterioritatis & principiati in diuinis, habere veras proprietates sibi correspondentes; ordo enim nihil aliud est, quàm prioritas & posterioritas, neque potest intelligi sine illis, sicut neque principij ratio sine ratione principiati. Quare si ponitur ordo & principium, ponenda sunt & correlatiua. Quoniam autem difficilis fortassis est intellectus, & facilis casus in malum sensum, non absque ratione abstinēt Sancti aliqui ab his vocibus.

Ex resolutione positâ de prioritate, accipitur Filium & Spiritum sanctum procedere per intellectionem & amorem omnium quæ intelliguntur

& amantur à Deo. Cùm enim non possit poni ex parte obiecti instans, in quo intelligatur Pater intelligere vnum, & non alia; clarum quoque est, non intelligi processionem ex vno, & non omnibus: & tantundem est de processione per volitionem.

Dices, magis necessarium esse in Deo generationem Filij, quàm productionem mundi: Potest itaque intelligi generatio Filij, & non productio mundi. Respondetur, quod productio mundi est quid creatum, & prius illâ potest intelligi generatio Filij; sed eâdem necessitate in Deo existit determinatio de futuritione mundi, atque generatio. Imò si talis determinatio ponatur de essentiâ Dei, cùm essentialia sint secundum rationem priora personalibus, eo modo prior reputaretur.

Replicabis, necessariò intelligi Deum in sese existentem prius naturâ, quàm mundum esse futurum; sed positâ volitione creandi mundum, intelligitur mundus futurus esse: prius itaque intelligitur Deus existens, id est Filius natus, quàm

formalis utrumque esse verum: est Pater, quia generat; & generat, quia est Pater: non autem valere in genere causæ efficientis, quasi Pater sit prior generatione.

Neque minùs patet prioritatem originis quâ Pater prior est Filio, & uterque Spiritui sancto, non consistere in eo quòd Pater potest intelligi esse, nondum intellecto esse Filium; quod est impossibile; cùm esse Patrem, non sit aliud, quàm habere Filium; & terminus relationis sit ipsum correlatiuum; & axioma ferat relationes esse simul & re & ratione. Quare non est in hoc genere tanta prioritas, quanta inter naturam & relationem, vel alia solâ ratione distincta.

Quod intelligendum est de Patre respectu Filij; hos enim habere prioritatem rationis ad Spiritum sanctum, quam vocant consequentiæ subsistendi, sicut plura alia ratione distincta, nihil inconuenit; cum relationes eorum non formaliter includant rationem boni dum ad sese referuntur, sed consequenter & in complexione

198 INSTITVT. SACRARVM.
vtriusque, quomodo sunt terminus
amoris.

Sed vt prioritas hæc teneat sese à
parte obiecti, vt qualitas seu prædi-
catum obiecti, (sicut intelligunt qui
ponunt instãtia originis) omnino im-
possibile est; poneretur siquidem in
Deo vera posterioritas in essendo;
cùm ponantur duo instantia habentia
vim suam ex vi naturæ diuinæ.
Sed & ratio effectus non potest eludi,
cùm ponatur Filius esse, quia Pater
est; non formaliter, sed cum conse-
quentiâ vnus ex altero, id est, effec-
tiuè.

Et quod deterrimum est, ponere-
tur quoddam reale fieri in Deo; quod
cùm sit via ad esse, & imperfecta par-
ticipatio ipsius esse, ponendus est Fi-
lius secundùm illam rationem fieri,
nondum existens, & secundùm
quoddam esse imperfectum: quæ
omnino repugnant enti ex se, quod
est purè quia est.

Prioritas itaque originis non con-
sistit in alio, quàm quòd relatio vel
includit connotationem principij à
quo, vel concipitur affectû tali con-

Verumenimvero cū per circuminfectionem (sic enim appellant Theologi hanc mutuam inexistētiā Personarum) fiat , vt vna Persona sit quodammodo pars alterius , (sicut in animali singula membra videntur esse particularia animalia , quæ integrant magnum animal ex omnibus consistens) ex necessitate sequitur actiones singulorum esse actiones omnium ; (nisi quatenus oppositio impedit) sicut operatio brachij vel oculi , est operatio animalis ; immò & baculi , etsi non sit pars , sed tantū instrumentum coniunctum per accidens.

Ex quo rursus sequitur , quòd omnis actus Personarum , præter eos qui dicuntur notionales , sunt communes omnibus. Quare Pater & Spiritus Sanctus per cognitionem Filij cognoscunt & creant omnia creata , cognoscunt quoque semetipsos : Similiter Pater & Filius per amorem Spiritus Sancti amant semetipsos , & creaturas : quia relatio cognitionis vel amoris ad creaturas non est notionalis , sicut neque cognitionis nisi res-

pectu Patris , vel amoris nisi respectu Patris & Filij coniunctim.

Dices, quòd cùm Filium cognoscere Patrem , sit generari ; & Spiritum Sanctum amare Patrem & Filium, sit esse Spiritum Sanctum ; si Pater & Spiritus Sanctus cognitione Filij cognoscunt Patrem , generantur : & si Pater & Filius amore Spiritus Sancti amant semetipsos , sunt Spiritus Sanctus. Neque enim possunt tolli relationes , ex notionibus cognitionis & amoris ; alioquin aliud foret requisitum ad constitutionem Personarum.

Respondetur directè oppositum intentioni arguentis sequi. Si enim Pater cognosceret sese cognitione quæ non foret persona distincta , eo ipso generaretur : quia ex vi relationis cognitionis ad cognitum , conciperet distinctionem à semetipso. Posito autem quòd scientia ipsius, sit suppositum distinctum à Patre, tunc clarum est relationem cognitionis non afficere Patrem, nisi per modum substantiæ distinctæ , & per consequens non inferre, sed supponere distinctionem in alio supposito.

LIBER II. LECTIO VII. 201

Deus volens efficere mundum. Respondetur Deum velle efficere mundum, non esse aliquam relationem in Deo ad mundum, sed quo modo aliqua est, est in mundo ad Deum: unde mundus non est formaliter futurus ex solâ hâc volitione, sed ex eo quòd mundus habeat denominationem ab hâc volitione; quæ cum sit extra Deum, quo modo est, posterior est Deo: sed ipsa volitio est ipsa Dei essentia, & per consequens non posterior tribus Personis.

Præterea cum nihil sit in Filio, quod non accepit à Patre; & tantumdem est de Spiritu Sancto; si ponatur autem non procedere ex cognitione alicuius, non accipit eam cognitionem à Patre; clarum est, dicendum esse Filium ignorare illud cuius cognitionem non accepit à Patre; & non esse imaginem Patris quoad hoc, quod ponitur esse in Patre; & habere aliquid citra generationem. Neque talis scientia per terminos relatiuos exprimi posset, neque esset aliquid sapientiæ vt genitæ, & non omnia communicata

essent. Neque si quid faciendum est, posset Pater dici facere hoc per filium.

Habetur tandem ex dictis vnitas harum trium Personarum formalis, id est, ex vi relationum. Cùm enim per cognitionem, cognitum sit aliquid cognoscentis, & cognoscens ponatur in specie & essentiâ cogniti, clarum est, & Patrem in Filio, & Filium in Patre formaliter, ex vi suarum relationum esse. Similiter cùm relatio Spiritus Sancti sit vnionis ad rem amaram; palam est, & Patrem & Filium esse in Spiritu Sancto, & eum in illis ex vi talis vnionis, inter conformia.

Ex quo habetur ratio illius phrasidis, quâ dicuntur Personæ procedentes singulæ esse Deus de Deo: quæ significat & vnitatem communis naturæ, & deriuationem naturæ in Personas distinctas, sine præiudicio vnitatis naturæ; vnde cùm *ly de* significet & vnitatem quasi materiei, & distinctionem, est ex dictionibus minimè improprijs quæ diuinis applicari possunt.

Spiritus Sancti verbum quasi enunciantis, vel potius in eo, quàm eius. Quælibet autem alia prioritas, sicut non impedit hanc vnionem sic neque impedit Spiritum Sanctum intelligere verbo, non quasi à quo sit verbum, quod proprium est Patris, sed vt qui ab in existente verbo quasi informatus efficiat conformia ipsi.

Ex his accipitur prædicatorum communium appropriatorum duos esse ordines, vnum eorum quæ per translationem accommodantur ex corporeis, v. g. species, lumen &c; alium eorum quæ traducta sunt ex naturâ rationali; & sunt ex sese propria; sed fiunt communia per circuminfectionem Personarum, quæ sunt illa quæ pertinent ad esse, cognoscere, & velle; quæ propterea appropriantur, quia facta sunt communia, cum radicem in proprijs habent.

Dices: si ea quæ pertinent ad esse, sunt propria Patris; ea quæ scientiæ, Filij; & ea quæ voluntatis, Spiritus Sancti; nihil remanet commune tribus, nisi per circuminfectionem: & per consequens non datur aliqua ra-

tio Deitatis & essentiae, in qua habent identificationem tres Personae. Respondetur ea quae spectant ad esse, posse considerari & in se, & ut facientia cognitionem Dei veram : primo modo, quia nihil relatiui includunt, sunt communia, & pertinent ad essentiam prout abstrahit à Personis; prout autem suis ipsorum quidditatibus verificant cognitionem, quae est Filius, sic pertinent ad Personam Patris. Quia autem cognitio & Amor non possunt abstrahi à relationibus, idcirco ex necessitate sunt propria. Quod intelligendum est de cognitione & Amore primarij obiecti. Relatio enim ad reliqua cum non faciat oppositionem ad intrinsecum, est communis.

Replicabis dictum suprà cognitionem & amorem non posse pertinere ad essentiam prout abstrahit à personis, quia scilicet includunt intrinsecè relationes ad sua obiecta. Neque responderi potest hoc esse verum tantummodo respectu primariorum obiectorum : cum Pater per Filium creet mundum, & Spiritu Sancto

Dices, cognitionem diuinam, & amorem diuinum, ex necessitate includere relationes subsistentes, & per consequens Personalitates. Respondetur, concedendo relationes & Personalitates in nominibus cognitionis & amoris includi; sed negando has relationes referre omnes in quibus sunt, sed solum suppositum sibi immediatū, seu per relationes constitutum: Vnde fit proprias esse has propositiones, Pater & Filius amant Spiritu Sancto, Pater & Spiritus Sanctus intelligunt verbo, Filius & Spiritus Sanctus existunt existentia. Patris vel à Patre; & quidem easdem quæ forent si Personarum nomina supprimerentur; sed non propterea inferri posse Patrem esse Filium &c, sed Filium esse in Patre &c. Sicut ex eo quod homo dicitur ense ferire, non dicitur ensis, sed habens ensen.

Obijcies, si Spiritus Sanctus intelligat verbo, Filium esse verbum Spiritus Sancti. Cum enim verbum sit enunciatio, & enunciatio sit enunciantis, & Spiritus Sanctus sit enuncians, verbum erit verbum Spiritus

Sancti. Respondetur, relationem verbi (prout transfertur in diuina) esse illam quæ est ad obiectum, non eam quæ est ad enunciantem: quæ est relatio vnionis, non distinctionis. Proprietas autem Spiritus Sancti in ratione obiecti, non est ipsum obiectum, sed aliquid eius. Neque potest tantumdem de Patre dici. Cum enim cognitio per se feratur ad formalitatem illam, in qua omnia Dei prædicata virtualiter insunt, relatio quæ sequitur seu est *ipsum esse cognitum*, est relatio Patris; & per consequens, Pater non est cognitum virtualiter præhabitu, sed ratio cogniti ad cætera per Patrem deriuatur.

Verum adhuc manet difficultas, quomodo cum Spiritus Sanctus sit posterior verbo, verbum possit esse ipse cognitio, & quasi verbum. Respondetur, quod sicut supradictum est, relatio verbi ad enunciantem, est relatio quædam vnitatis. Unde cum Spiritus Sanctus sit Amor, id est, coniunctio quædam sui ad amatum; euidenter est, ex eo quod verbum est amatum, est in hoc sensu

tionaliter, neque Spiritus Sanctus amor Dei possent dici, si esset alia sapientia, in eodem sensu, & alius amor. Neque dici posset Pater non creare nisi per Filium; cùm aliam scientiam creatiuam haberet; & cùm sapientia in hoc sensu deberet poni communis, distingueretur in Filio à propriâ scientiâ Filij. Et similia congeri possunt quæ supra attulimus: ex quibus apparet dicendum non esse alium amorem vel intellectionem in diuinis, præter Filium & Spiritum Sanctum, qui per circuminflectionem sunt in Patre, & sese inuicem.

Obijcies, per dicta tolli ipsum mysterium Trinitatis; nam nullum est mysterium quod Deus nouerit & amet semetipsum: in quo, secundum hanc explicationem, collocatur tota ratio mysterij: Rursus totum mysterium naturali consequentiâ deducitur, & perinde non est mysterium. Respondetur mysterij vim in eo collocatam, quòd cognoscere se constituat oppositas Personas, quæ sint Pater & Filius &c: quod longè

aliud est quàm Deum cognoscere se, licet ex eo deducatur. Necessè autem est, quæ sunt in Deo, naturali consequentiâ ad se inuicem sequi; cùm sint connexa & identificata: sed has consequentias patere humano generi, non sine reuelatione contingit; & propterea mysterium dicitur, & est.

LECTIO VIII.

De usu nominum in hoc mysterio.

EX dictis reddi potest ratio vsus nominum circa hoc mysterium. In primis enim nomina concreta, clarum est supponere pro personâ; cùm nomen concretum, ex naturâ suâ, confundat omnia quæ sunt in significato, præter formam explicatam. Vnde non potest sumi pro formâ solâ; & per consequens, semper accipitur pro supposito; putà, cùm habet vicem subjecti; non enim nunc de prædicatis agitur.

Quare cùm dicimus Deus creat,

Sancto diligat & sanctificet electos. Quare etiam ratio ad creaturas est Personalis. Responderetur cognitionem & Amorem, prout præcisè ad creaturas referuntur, non ponere in Deo aliquam relationem realem, & per consequens non uniuocè & in eodem sensu dici cognitionem & Amorem, cum cognitione & amore sui ipsius. Neque refert de allatis locutionibus. Pater enim per filium creat, & per Spiritum sanctificat, quatenus scientia essentiae est scientia cæterorum, & amor sui amor electorum: etsi vis relationis non transeat ultra suppositum, & sic sit in alio sensu (licet eadem scientia) scientia cæterorum, quam primarij obiecti.

Deducitur hanc propositionem, Pater est sapiens sapientiâ genitâ, non esse propriam; cum esse sapientem non sonet relationem, sed qualitatem permanentem Personæ in quâ est; sapientia enim licet pro materiali significet scientiam, tamen eam significat quatenus hominem in quo est reddit actionis peritum. Significat itaque magis effectum quemdam

scientiæ in subiecto, quam ordinem ad obiectum; & propterea de communibus prædicatis est. Sed magis attribuitur Filio propter connexionem cum scientiâ. Sed cognoscere vel amare non tantum verbo, vel Spiritu Sancto, sed etiam non nisi verbo vel Spiritu Sancto, locutiones sunt, vt in hac materiâ, propriissima. Cum non possit poni cognitio verbi vel amor Spiritus Sancti esse inæquatus Patri, & esse plus cognitionis vel amoris in Patre quàm in illis. Nihil enim cognoscitur à Deo quod non in essentia, id est, in Patre cognoscitur, & propterea cognitio creaturarum est relatiua, non quia est creaturarum, sed quia est Patris. Deum enim cognoscere creaturam (si definiatur) est Deum cognoscere sese vt præhabentem creaturam. Et si cognitio transferatur ad Deum respectu creaturarum, non habebit veram rationem cognitionis; vt supra dictum est. Et cum proportionem ad hanc de amore loquendum est.

Sed neque Filius sapientia Dei no-

LIBER II. LECTIO VIII. 215

Si quæ verò nomina essentialia prædicantur de pluribus Personis, non potest ijs addi terminus pluralis : Cùm enim prædicatum non includat subiectum in sese, necesse est terminum numeralem numerare formam ; quare si dicatur Pater & Filius sunt duo omnipotentes ; significabit habere duas omnipotentias ; Ly enim *duo*, non potest multiplicare Personas, cùm personæ se teneant à parte subiecti : absolute itaque dicendum est esse vnicum omnipotentem.

Adde, quòd nomina adiectiua significant formam accidentaliter inesse subiecto ; & sic non rectè applicantur ad diuina, vbi omnia sunt essentialia : vnde hæc propositio, Deus est omnipotens, est quidditatiua, sicut, Homo est animal ; & duo omnipotentes significabunt duos substantialiter omnipotentes.

Vnde patet etiam quòd terminus *solus*, rectè addatur prædicato essentiali, cùm de vnâ Personâ dicitur. Cùm enim non dicatur de subiecto, non excludit plura subiecta ab illo

prædicato; sed excludit pluralitatem à prædicato : sic Pater dicitur solus immortalitatem habens : Filius solus altissimus. Sensus itaque est, Deum seu immortalem & altissimum esse vnicum, & Patrem vel Filium esse illum. Si autem significaret Patrem esse solam Personam Deitatis, esset falsa.

Neque obstat dictis, quòd substantiæ ex sese habeant singularitatem & pluralitatem; formæ verò & accidentia à subiectis. Hoc enim nihil efficit, nisi termini numerales applicentur subiectis : vt si dicatur, Pater & Filius sunt duo ; vel, hi duo sunt immortales. Sin ponatur post copulam, necesse est vt numeret quod ibi est. Præterea, si hæc non sic sese haberent, assignandum esset aliquod signum in vocibus cur in Symbolo Athanasij accipiantur substantiuè potius quàm adiectiuè, & in alijs adiectiuè potius quàm substantiuè, ne regula Ecclesiastica prorsus confundatur.

Petes, pro quo supponant prædicata essentialia, cùm dicuntur cum qualificatione

LIBER II. LECTIO VIII. 113

vel est omnipotens &c: vel sumitur
pro personâ absolutâ; sicut Iudæi &
Philosophi intelligebant; vel pro
Personâ Patris, inter Christianos.
Cum enim esse sit primò, & non ab
alio, in Patre; etiam actio speciali
quâdam quasi authoritate procedit
ab eo: Vnde fit, nomina essentialia
quasi antonomasticè supponere pro
ipso; vt patet ex vsu Ecclesiæ, quæ
cum incepit orationem per essentialia,
concludit sic, *Per Dominum nostrum*
&c: quod declarat Patrem intellectum
esse per nomen essentialia.

Ex quo patet, has propositiones,
Deus genuit se Deum, vel Deum
qui est Deus Pater; et similes, omnes
esse falsas. Cum enim Deus supponat
pro Personâ Patris, etiam, relatiua
referat Personam. Sed hæc,
Deus genuit alium Deum, non est
tam falsa, quàm periculosa & vitanda;
cum possit, immò naturaliter significet
alium, qui etiam sit Deus. Sed quoniam
in creatis, non inuenitur alietas cum
identitate fundamenti, idcirco videtur
sonare alietatem naturæ; & vitanda est.

Rursus , nomina abstracta non possunt supponere pro Personis: cum enim Persona includat , seu confundat plures notiones ex modo significandi ; abstractum autem ita determinet vnâ , vt ex modo significandi excludat quascumque alias ; euidentis est nomen abstractum, non posse cum proprietate sermonis , supponere pro personâ. Vnde patet hanc propositionem , essentia est res generans , in rigore esse falsam : cum *res* confundat plura, quæ nomine essentia non continentur.

Ex quibus rursus patet, similes propositiones , Deus est Deitas &c: non esse ex vi significandi , sed ex necessitate loquentium veras ; qui aliter simplicitatem Dei explicare non poterant contra proteruos : & eodem modo quolibet similes propositiones posse verificari ; vt essentiam generare , Paternitatem spirare , si necessitas cogat ; immo & Patrem esse Filium : Sensus enim erit, ens quod est Pater , esse item Filium ; essentiam esse eandem Patri qui generat, &c.

lificatione unitatis de pluribus: & ,
 an in masculino, an neutro genere,
 sint efferenda: verbi gratia, an dicen-
 dum, Pater & Filius sunt vnus exis-
 tens; an vnum existens. Responde-
 tur, supponere pro supposito absolu-
 to; & posse efferri & rectius in mascu-
 lino in rigore; quia vnitas ponitur
 quasi qualitas; prædicatum enim est
 vnum personaliter: sed quia etiam
 neutrum genus nihil includit repug-
 nans Personalitati, etiam rectè ef-
 fertur in neutro genere; atque adeò
 secundum genus prædicati cui con-
 jungitur. Et quia relatiua differen-
 tia habent quidpiam magis conue-
 niens dignitati Personæ, ex eo ca-
 pite genus masculinum iudicatur ijs
 magis proprium.

Conficitur ex dictis, quòd si ali-
 quod prædicatum de Deo, non dicat
 aliquam determinatam formam, tali
 prædicato possit adiungi & signum
 numerale, & signum unitatis. Tales
 autem sunt *Res, Aliquid, Quod est*.
 Possunt itaque dici & esse tres res in
 Deo, & esse unicam: seu has tres esse

vnam: esse tria *aliqua*, vel tria *que
sunt*, & vnicum *aliquid*, vel *quod est*.
Cum enim non explicent hi termini
quicquam, eadem est ratio de illis
ac de nomine suppositi, vel Personæ,
de quibus tantundem declaratum
est.

Petes, quomodo possibile sit ali-
quid esse tres res & vnam rem; cum
vnitas & pluralitas includant in sese
oppositionem; & per consequens,
contradictionē. Respondetur, quod
oppositio vel cōtradictio non potest
esse, vbi non est forma vel quidditas.
Res autem non explicat aliquam for-
mam; neque valet amplius quàm *quic-
quid sit*; quod commune potest esse
positiuus & negatiuis, vt minimū qui-
buslibet positiuis, Proinde rem esse
vnam, potest in vno sensu quodlibet
dici, & res esse plures in alio, sine vllā
oppositionē, sicut supra est expli-
catum.

E diuerso, non potest in Deo po-
ni pluralitas entium, nisi in sensu
æquiuoco, pro pluralitate rationum
eiusdem entis; cum ens nomet

LIBER II. LECTIO VIII. 219

existentiam vel capacitatem existendi. Multo minùs plures existentia vel essentia. Neque interest addi *relatiuas*. Vel enim hæc additio tollit esse verè existentias, vel non: si non, existentia vt communis vtriusque erit absoluta, & aliquid absolutum plurificatum. Si tollit, iam non ponuntur plures existentia; & sola æquiuocatio committitur.

Præterea, relatio cùm non habeat ex sese aliquam essentiam, neque rationem entis potest habere, nisi ex ratione fundandi: quare cùm ratio fundandi sit vnica, necesse est rationem entis esse vnicam, & non tres. Sed & si haberent rationem entis vniuocè, plus foret de ente in duobus vel tribus, quàm in vno; ac proinde perfectiores essent tres Personæ, quàm vna.

Sed & quid impedit dicere tres æternitates relatiuas, si sint tres existentia? Sed & totidem omnipotentias, & quæcumque alia prædicata absoluta? & tandem cùm nihil aliud sit Deitas, quàm hæc prædicata,

220 INSTITVT. SACRARVM.

consequens erit esse tres Deitates
relatiuas, & tres Deos relatiuos:
sicut enim vnum prædicatum po-
sitium additâ qualificatione rela-
tium multiplicatur; sic quodlibet
aliud potest.





INSTITVTIONVM SACRARVM

PERIPATETICIS
inædificatarum,

LIBER TERTIVS.

De mysterio Sacrosanctæ
Incarnationis.

LECTIO I.

*Quod in Christo sit unica existen-
tia, nempe Divina.*

IRRÒ si Deus homo factus
est, est utique quòd est fa-
ctus. Est itaque homo. Et
si Deus est homo, etiam ho-
mo est Deus. Et si Deus homo, &
homo Deus; certè ille homo est idem

T iij

quod Deus; & Deus idem quod ille homo. Vnum itaque ens erit Deus & homo. Et cùm ens sit quod habet existentiam, vnum ens erit quod habet vnā existentiam. Dei itaque & illius hominis, vnica erit existentia. Sed si vnica est existentia Christi Domini, neque Deus mutabilis est, vt suam non habeat, vel possit existere per alienam existentiam; Christi Domini existentia est ipsamet Dei; & humana natura per eam existet: neque habebit talem, qualis cæteris humanis naturis ex ordine causarum naturalium competit.

Obijcies, quòd cùm existentia diuina sit ens subsistens & in sese completum, non potest esse forma alterius entis, neque effundi super illud vt communicet illi effectum suum formalem. Quare cùm causa formalis nō possit suppleri; non poterit natura humana existere per existentia Dei. Adde, quòd Deus non potest venire in compositionem alterius rei; quare neque Christi quasi pars erit.

Respondetur, quòd in formā quālibet potest considerari quod est

perfectiōis, & quod est imperfectiōis; communicare autem alteri suam virtutem, est perfectiōis; quod autem indigeat comparte est imperfectiōis: effusio autem formæ supra subjectum; quæ commemoratur in argumento; est ex indigentia compartis: significat enim formam quasi non habentem proprios terminos, eos à subjecto accipere. Quare cum existentia diuina habeat quod est perfectiōis, poterit communicare rationem existendi humanæ naturæ, absque eo quod effundatur supra illam.

Quod verò dicitur Deus non venire in compositionem alterius entis; significat nullam esse imperfectiōem in Deo, per quam indigeat comparte; neque vllum esse in illo ordinem ad aliud quodlibet ens; & tandem si aliud ens assumatur ab ipso, desinere esse ens ex sese, & deuenire aliquid Dei; ita vt ens resultans sit semper Deus, & non aliquid tertium. Sicut cum in arborem vnus naturæ surculus insititius adoptatur, non desinit totum esse arbor quæ prius fuit;

vel si adnascatur sextus alicui digitus, non propterea totum definit esse homo qui prius.

Ex quibus est euidentius, ex parte humanitatis Christi reperiri quandam defectum, seu potentialitatis rationem. Cum enim vnitas sit indiuisio, & quod constituit aliquid diuidat illud à cæteris; vbi plura sunt constitutiua, non potest reperiri ratio vnitatis; oportet itaque ad hoc vt vnum sit ex pluribus, alterum eorum constitutiui, alterum constitutibilis rationem habere. Quare cum ratio essendi se teneat ex parte Dei, ratio nati esse, seu potentialitatis ad existendum, erit ex parte humanitatis.

Neque hæc potentialitas est actualis tantummodo, quasi humanitas nata foret habere aliam existentiam, sed hanc acceperit ex vi causarum accidentalium; verum habitualis, & intrinseca humanitatem constituentibus. Cum enim compositum debeat esse vnum in facto esse ex vi suarum partium, si partes non forent appropriatæ sibi inuicem, vnitas ex

ipsa non resultaret; neque totum ex se se vnum foret.

Adde quòd cùm causa non agant nisi in humanitatem, si illam non appropriarent, non essent efficaces ad effectum producendum, quia mediante solâ humanitate vim habent in ipsum totum. Præterquam quòd communis influxus Dei, quo omnibus rebus infundit existentias creatas, creatam existentiam humanitati infunderet, si foret capax & determinata ad illam.

Dices, materiam primam ex se se esse capacem cuiuslibet ex infinitis formis; & tamen ex vi causarum, introduci vnam certam, non obstante hac indifferentiâ. Respondetur indifferentiam materiei esse quandò secundùm se se consideratur; prout autem materia consideratur hac & nunc, eandem esse determinatam ad hanc vnicam formam; adeò ut ex materiâ, prout est in priori instanti naturæ, non possit nisi hæc vna forma educi.

Obijcies rursus, impossibile esse aliquam creaturam habere ordinem &

proportionem ad existentiam diuinam, propter infinitam distantiam; & si quæ haberet talem ordinem, certè non posse esse in eadem specie cum aliâ naturâ creatâ; cum ordo ad existentiam sit essentialis & primariæ cuiuslibet enti; & per consequens, saltem tantam differentiam quanta est inter existentiam subsistentem & inhærentem, ex necessitate facere, vel genericam distinctionem.

Respondetur, verum quidem esse creatam naturam non habere proportionem cum existentia diuinâ; sed neque hæc requiritur; sed oportet vt habeat aliquid in se excedens proportionem ad existentia cuiuslibet creatæ possibilem rationem; & hoc posito, cum non sit alia existentia ei propria, si causæ ad eam determinant, existentia diuinæ supplemento existet talis res: sicut anima rationalis creatur, ex eo quòd causæ secundæ determinant ad formam earundem vim productricem excedentem.

Sed non propterea non erit rationalis talis creatura; seu non habebit

conuenientiam cum alijs creaturis in ratione communi, quæ secundum nostrum vsum & considerationem est specifica illis, seu primò essentialis. Quia hic excessus quem posuimus, competit illi ex aliquo accidente concurrente ad rationem indiuidualem seu inferiorem; vnde cum ratio communis salua sit, non erit ex eo ponenda differentia generica inter Christum & reliquos homines. Adde quòd ordo animæ non sit positiuè ad existentiam quatenus est diuina; sed tantummodo ad existendum aliquo particulari modo, qui non sit existentia creatæ proprius.

Neque refert quòd ratio existentia sit illa, quâ distinguuntur substantia. Distinctio enim substantiarum secundum perfectionem & imperfectionem, accipitur ex amplitudine quâ existentiam recipiunt. Hæc autem appropriatio humanitatis non est maior capacitas existentia, neque fit Christus per illam nobilior angelo; sed est particularitas quæpiam, quæ quasi magis detorquet à creatâ, quàm applicat ad subsistentem.

Dices, rationem formalem existentia subsistentis esse differentem à ratione formali existentia inhaerentis, neque vniuocè conuenire : quare Christus non in eodem sensu erit existens, in quo ceteri homines. Immo cum existentia det esse hominem, non erit vniuocè homo. Respondetur concedendo assumptum, & primum consequens; scilicet quod existentia Christi non dicatur vniuocè cum existentijs ceterorum hominum, sed negando posteriorem consequentiam, quia denominatio hominis sumitur ab animâ, non ab existentia.

Accipitur consequenter, naturam humanam in Christo, non habere appetitum vel capacitatem ad aliam existentiam; & per consequens, non esse in statu violento: Immo neque futuram, si haberet potentiam ad aliam existentiam; cum potentia illa foret indifferens; & æquè actuata per diuinam quàm per humanam.

Dices rursus: cum existentia diuina sit supernaturalis respectu animæ humanæ, non potest ex parte animæ,

vel humanitatis, esse aliqua exigen-
tia vel determinatio ad existentiam
divinam. Respondetur, rationem
supernaturalitatis, in sensu in quo
sumitur ab arguente, nullam esse:
& si foret, non fore possibilem incar-
nationem. Dicitur itaque supernatu-
ralis, ex eo quod non sint in serie
causarum secundarum, sufficientes
causae ad eam efficiendam: quod non
impedit quod minus Deus talem exi-
gentiam & determinationem possit
per alias causas in naturâ humanâ
ponere; qualiter esse necessariam
dictum est.

LECTIO II.

*Quod solus Christus existat, existentia
divinâ; & habeat duas naturas
in uno supposito.*

Vterius conficitur, quod quo-
niam existentia hominis Dei,
est ipsa existentia subsistens; Chris-
tus per prius subsistit secundum ani-
mam, quam secundum corpus, aut

totam humanitatem : Cùm enim existentia, ex eo quòd subsistens, intelligatur non effundere se super subiectum ; necesse est subiectum quasi erigi & applicari ad existentiam ; quod autem erigitur ad aliquid, primò attingit illud secundum partem sui altissimam ; quæ in homine est mens vel anima. Pater itaque existentiam diuinam per prius communicari menti ; & mediante ipsâ, corpori & toti.

Præterea, cùm videamus naturæ progressum ad hoc conari, vt existentia (quæ in nobis primò est totius) fiat in morte solius animæ ; palam est secundum intentionem naturæ, existentiam esse prius animæ, quàm corporis. Cùm itaque existentia diuina sit plenitudo existentie, necesse est quæ capacissimum est subiectum sese communicare ; & per consequens cùm anima sit capacior existentie, quàm ipsum totum, illam primò reddere existentem. Adde quòd ipsi dispensationi & ministerio Christi, qui doctor & exemplum venturus erat, conueniebat, & per-

fectum esse secundum animam, & infirmum esse corpore: & per consequens, habere effectum existentiae plenius in animâ, quam in corpore; & per consequens, etiam per prius.

Dices, existentiam competere omnibus corporibus ratione formarum; non itaque hoc est aliquid speciale in Christo. Respondetur, formam quidem esse rationem omnibus corporibus cur existentia sit in ijs; sed primum subiectum ut quod, seu sufficiens, esse ipsum totum in reliquis substantijs corporeis præter hominem; sic ut non sit aliud sufficiens quam ipsum totum; in homine verò animam sic esse sufficiens, ut usque ad mortem sit secundarium; in morte demum fieri primum; sed in Christo ab ipsâ conceptione fuisse primum.

Ex his agnoscimus cæteros homines à perfectione naturæ esse inuersos; & (quasi arbores) os ad terram, unde natiuitatem & alimentum hauriunt, habere inuersum: solum Christum esse rectum; & non habere animam conuersam ad terram, sed erectam

ad Deum. Et quoniam hoc competit ei prauè ad existentiam, hoc ipsum pertinere ad indiuiduationem ipsius. Habet itaque Christus indiuidualem hanc proprietatem à cæteris omnibus differentem, & longè superiorem: vnde secundùm ipsam humanitatem, non est adeò minoratus ab Angelis, quàm cæteri homines.

Et quoniam hæc proprietas contingit ipsi ex eo quòd erigitur ad existentiam subsistentem; palam est, nullam existentiam creabilem, natam esse reddere Christum Dominum existentem connaturaliter, ad indiuidualem hanc proprietatem ipsius. In quo consistit necessitatio illa, quæ necessitat existentiam diuinā ad actuationem seu assumptionem sui.

Clarum proinde est, cæterorum indiuiduorum naturæ humanæ nullum posse assumi ad existentiam diuinam; cùm talem proprietatem necessitatem non habeant; & Christum esse generis humani exemplum & ideam. Et quoniam vnicum potest esse in vno genere exemplum & regula, (si enim plura forent, ex eo quòd

quod differrent, nullum eorum haberet rationem exempli) evidens fit, nullum aliud individuum possibile in humano genere, esse assumptibile ad consortium diuinæ existentie.

Adde quod cum hæc arrectio ad Deum, sit ex detorsione animæ ad corporalia (quæ est in cæteris) quasi emendatâ; in spiritibus verò nulla possit esse similis detorsio ex vi naturæ; (cum nulla sit compositio naturarum, quasi contrariarum) efficitur existentias Angelicas suis essentijs esse semper pares & conformes; & per consequens, naturam Angelicam non esse à Deo assumptibilem, Sed neque inferiorem & merè corporalem; tum ex eadem ratione; tum ex eo quod nihil est in corporeâ creaturâ, quod erigi possit immediatè versus Deum, seu aliter quàm mediante spiritu aliquo creato, ad quem immediatè dirigatur.

Ex dictis vterius accipitur, esse in Christo duas naturas; diuinam & humanam. Cum enim ratio existentie sit extra naturam creatam, & quasi accidentalis illi; palam est,

naturam humanam non fieri aliam, seu non immutari quoad rationem naturæ, per coniunctionem ad existentiam. E diuerso autem cùm existentia sit de ratione naturæ diuinæ, immò principalis, vel totalis quodammodo ipsius ratio, (ex eo quod esse sit maximè proprium nomen Dei) palam est naturam quoque diuinam in Christo reperiri.

Consequens est, has duas naturas in vnum suppositum conspirare. Cùm enim in quolibet ente seu composito, non reperiatur nisi natura, & habens naturam, seu suppositum, siue vt vocant res naturæ; palam est, quodcumque enti inest, & non pertinet ad naturam, pertinere ad suppositum. Has itaque, quæ in eodem ente sunt, & aliquo modo vnum sunt, & non sunt vnum in naturâ, hoc est, non sunt partes eiusdem definitionis, esse vnum supposito, hoc est, pertinere ad diuersas definitiones seu notiones eiusdem suppositi vel rei; sicut verbi gratiâ esse Policlerum & musicum, vel statuarium, sunt diuersæ notiones eiusdem rei.

Ex quo intelligas, sequiùs & præter Logicam explicari mysterium hoc ab ijs, qui putant esse vnum naturâ, vel supposito, non significare aliud, quàm vnionem factam esse immediatè inter naturam & naturam, vel inter naturam & notionem quandam, quam vocant supposititalitatem. Præterquam enim quòd clarè non intelligunt terminos quibus vtuntur, discedunt prorsus à sensu sanctæ Ecclesiæ in hoc mysterio, qui est, duas naturas sibi immediatè vnitas esse; & sic constituere vnum suppositum, remanentibus naturarum proprietatibus, non obstante vnione.

Clarum quoque est, fingentes entitatem, cuius ratio sit esse supposititalitatem; hîc æquè ac in mysterio Trinitatis prodere fidem Christianam; & de omnibus alijs magis loqui quàm de hoc mysterio. Quoniam enim nullum est talis entitatis in naturâ vestigium, sit homines nunquam imposuisse nomen suppositi, ad significandam talem entitatem. Cum itaque Ecclesia neque didicerit, neque tradiderit hoc mysterium nisi

per nomina ab auditoribus intelligibilia, patet traduentes nomen ad æquiuoca, non de hoc mysterio loqui, neque declarare vel defendere mysterium, sed confiteri secundum consuetas nominum significationes, esse inintelligibile & irreconciliabile cum ratione.

Patet quoque ex dictis, quare natura humana in Christo non sit suppositum; quia scilicet neque est rationalis naturæ indiuidua substantia. Cum enim indiuidua, seu prima substantia, significet subiectum per se existentia; seu cui debetur propria existentia; humanitas autem Christi ex indiuiduatione suâ habeat, non posse habere aliam existentiam quam diuinam; hoc est, existentiam alterius naturæ, & cui sustentandæ per modum compartis ipsa sit impar, sit euident, eam nullo modo esse primam substantiam seu personam.

Obijcies, unitatem in personâ esse veram unitatem substantialem; sed vera vnitas non consistit cum pluralitate actuali partium: verè itaque non erunt in Christo due naturæ ac-

ru. Respondetur naturam prout distinguitur contra suppositum siue personam, sonare incompletionem: unde duas naturas esse, non significat duo entia esse; sed duas partes unius entis. Quare sufficit vt duæ naturæ sint, quo modo partes naturæ sunt esse: partes autem dicuntur in quas resoluitur totum vel ex quibus componitur totum. Vnde suum esse actuale non habent, nisi vel ante compositionem, vel post resolutionem: durante autem composito, sufficit vt operationes & proprietates earum sint actu distinctæ & diuise. Quod dictum esto in communi, non enim plus requiritur ad hoc vt partes dicantur esse in toto. Sed aduertendum est, aliquas partes nullam habere substantiam extra totum; & hæc speciali modo dicuntur esse actu dum sunt in toto: quia cum nusquam naturæ sint esse magis actu simpliciter sunt, & actu sunt cum sunt in toto; non comparatè ad totum, quasi habentes terminos suos in toto; sed comparatè ad hoc quod sunt extra totum; vbi sunt magis in

potentiâ. Sic dicuntur duo puncta terminantia esse actu in lineâ, cum continuatiua sint dumtaxat in potentiâ: sic sex superficies sunt in cubo actu, infinitæ in potentiâ; in spherâ verò est vnica superficies actu. Et quæ sunt hoc modo in actu, definitiones eorum aliquo modo prædicantur formaliter de toto, & æquè propriè atque rationes Metaphysicæ communes. Et in hoc sensu in homine dicitur esse anima & corpus, & in Christo Domino duæ naturæ: non quod singulæ habeant suos terminos, cum natura humana terminetur in diuinam; sed quod terminatio ad aliud, non tollat proprietatem substantialem naturæ humanæ esse in Christo.

Replicabis, in tali compositione neutrum partium verè esse, sed tertium quidpiam ex vtrâque: Quare in Christo neque Deus foret, neque homo, sed quiddam tertium. Respondetur, cum partes sunt quodammodo æquales & imperfectæ, sic contingere; sed cum altera pars est perfecta, & adæquatum subiectum exis-

rentiæ ex sese, tum illam partem manere; sicut cum surculus arbori inseritur, vel digitus homini adnascitur. Reliqua verò pars non manet actu hoc quod extra compositionem, cum habeat aliquam terminationem ex vi compositionis, & aliam ex eo quod separata est; sed hæc varietas non tollit quin in compositione sit humanitas, & seruet proprietatem naturæ suæ.

Applicando verò hanc doctrinam nostro subjecto, cum humanitas quælibet in compositione cum existentia creatâ sit verè vna cum suâ existentia, necessum est, ex conjunctione trahere etiam quoad propria certam modificationem à qualitate existentia, quam proinde cum aliâ existentia non haberet, & per consequens extra compositionem. Similiter itaque humanitas Christi eiusmodi modificationem trahet ab existentia diuinâ, quam extra compositionem non retineret: sed hæc modificatio non trahit ipsam extra speciem naturæ humanæ.

Dices, non posse negari quin post

Incarnationem Deus sit homo, quod non fuit ante; sed neque dubitari potest, quin humanitas sit intimè coniuncta Deo, cum verè Deus sit homo. Non potest itaque negari quin Deus sit intrinsecè & intimè mutatus. Respondetur nullum esse inconueniens concedere Deum mutatum esse extrinsecè, siue per additionem alicuius quod nullatenus pertinet ad naturam ipsius; & talis est humanitas Christi, quæ non tollit dispositionem aliquam naturalem Dei.

Neque refert quòd sit coniuncta intimè Deo, & in eo tanquam in supposito: Patet enim creata, quoniam genere & differentia continentur, & sibi inuicem opponuntur, non posse vnā aliquā differentiam habere, sine exclusionē reliquarum. Vnde si aliquid eis addatur, necessario perdunt terminationem quam habebant; sicut triangulum, ut fiat quadratum, perdit esse formaliter trigonum; & propterea per additionem semper mutantur: Deus autem per puram additionem non mutatur, quia nihil ei decedit.

LECTIO III.

In quo consistat Vnio Hypostatica.

EX dictis inferitur, non esse necessariam entitatem specialem, cuius ratio sit esse vnionem hypostaticam, ad explicandum hoc mysterium: Cùm enim euident sit, ex parte humanitatis esse negationem seu priuationem actualitatis, quæ dicitur existentia; sit non esse actum aliquem excludentem existentiam; & quod sequitur, non esse diuisionem seu qualitatem diuisiuam contra existentiam: In his autem quæ habent rationem partium ad inuicem, vnitas est, non esse diuifas, seu esse indiuifas. Non itaque requiritur alia entitas ad faciendas eas vnum.

Præterea, cùm entitas, quæ dicitur vnio, ponatur ad facienda non vna, formaliter seu per exhibitionem sui vnum, palam est vnionem esse idem, quod talem vnitatem, puta vnitatem compositionis: Sed confessum est

vnitatem non distingui ab ente quod dicitur vnum. Impossibilis itaque est specialis entitas, cuius ratio sit facere vnum.

Adijce, quòd cùm partes secundùm hanc positionem sint ex sese plures, & non perdant suam constitutionem per quam fiunt plures, per additionem entitatis quæ dicitur vnio; non minùs remanent plura post compositionem, quàm ante. Immo, cùm ponatur vnio esse tertia entitas, ipsa habet suos terminos, per quos numerum cum cæteris faciat: quare loco vnus, facta sunt tria entia.

Ad hæc, vel hæc entitas eodem modo afficit diuinitatem quo humanitatem; & tunc per illam mutatus erit Deus, æquè atque humanitas: vel afficit Deum duntaxat per extrinsecam denominationē. Sed cùm Deus & homo sint verè & propriè vna res, de quâ verum sit esse eandem sibi, prorsus impossibile est, vt per extrinsecam denominationem hoc valeat contingere vel explicari.

Neque obstat quod dicant vnionem esse alligationem vel intimam

coniunctionē vnus partis ad aliam; euidens enim est, quòd coniunctio quæ requiritur in præfenti est coniunctio in genere substantiæ, cuius effectus sit vt vnum partium in concreto dicatur de altero, seu sit idem ipsi, & per consequens totum ipsum, etsi compositum, tamen sit verè & rigorosè vnum, & non cumulus quidam seu acervus distinctorum entium.

Ex quibus patet, hoc modo explicantes mysterium, reipsâ ponere tria entia; hoc est, tria supposita, vel etiam quatuor in Christo Domino, puta diuinitatem, vnionem, animam, & materiam; & fortassis etiam quintum, quod sit vnio animæ ad corpus: Cùm enim singula horum habeant proprias existentias, (quod est esse substantias & supposita) quantumvis strenuè negent se tot supposita in Christo ponere, re tamen ipsâ inscientes faciunt.

Infertur vlteriùs, vnionem quæ sit relatio, esse duntaxat rationis, non verò realem; Cùm enim relationes habeant inter sese oppositionem, non possunt esse nisi inter entia, seu sup-

nem incarnationis erat necessarium. Palam quoque est, partes non fuisse assumptas separatas; si enim anima vnita fuisset existentia diuinæ in separatione, ex vi talis vnionis corpus non extitisset. Corpus verò separatū non potuit suscipi, quia neque materia sola est capax existentia; neque cum aliā formā quā humanā susceptibilis; quare neque corpus humanum susceptum fuisset ex vi talis susceptionis, cū non potuerit suscipi ex vi animæ.

Tandem concluditur terminos vnionis, prout est relatio rationis, ex parte Dei esse naturam diuinam quatenus est existentia; ex parte verò humanitatis esse primariò ipsam mentem, secundariò corpus, adquatè totam humanitatem; & hanc quidem principaliter, proximè animam, tertio corpus.

LECTIO IV.

*De usu vocum circa Personam
Christi.*

EX haftenus expositis constare poterit, qui sint proprii modi loquendi de personâ Christi, quique ex necessitate admittendi vel reiijciendi : In primis enim cûm evidens sit esse compositionem in Christo ; & eam esse in personâ : & tamen eam non esse necessariam ad habendam existentiam ; fit hanc propositionem, *Persona Christi est composita*, esse materialiter vel accidentaliter veram ; formaliter autem falsam.

Rursum, cûm dicitur Christus esse diuinitas & humanitas ; vel, deitas, anima, & corpus ; sensus quidem loquentium est verus ; cûm non aliud velint dicere, quàm hæc inesse eo modo quo partes natæ sunt esse in toto. Sola itaque diuinitas quæ non immutatur per compositionem actu

248 INSTITVT. SACRARVM.
ineſt, & habet totius rationem; cæ-
tera per modum partium : non ta-
men diuinitas dicitur compoſita, ſed
Deus; neque ipſe formaliter, ſed
materialiter & accidentaliter, vt
dictum eſt de Perſonâ.

Quod verò dicitur ex tribus natu-
ris vel ſubſtantijs conſtare vel com-
poni Chriſtus; intelligendum eſt ſy-
necdochicè, pro hoc quod eſt ex
partibus naturarum vel ſubſtantia-
rum, quantum ad corpus & ani-
mam (vt ex ſeſe patet.) Quoad di-
uinitatem enim ipſa rectè dicitur
natura vel ſubſtantia. Similiter pro-
nunciandum eſt cùm dicitur Chriſ-
tus eſſe plura; eſſe hoc & illud; eſſe
aliud & aliud; vel certè hæc eſſe in
Chriſto. Cùm enim conſtet, in eo
quod eſt verè vnum non poſſe eſſe
veram pluralitatem, conſtat item has
omnes propoſitiones eſſe falſas in ri-
gore. Quo non obſtante, neceſſariò
ſunt uſurpandæ, præſertim apud vul-
gus, propterea quod veritas & incon-
fuſio naturarum aliter ei explicari
non poſſit; præſertim contra peri-
naces myſterium apud vulgus diſſi-
nantes.

Consequentèr, etsi Christus habeat duas vitas, humanam & diuinam; non propterea dicendus est duo viuentia; neque si duæ humanitates coniungerentur Personæ diuinæ, forent duo homines: cum enim viuens & homo sint concreta, terminus numeralis non est verus, nisi concretum multiplicetur; concretum verò est ens seu prima substantia, seu per se subiectum existentia. Vnde cum hoc sempervnicum foret, vnum viuens, & vnus homo diceretur.

Obijcies regulam Logicorum, quod substantiæ multiplicantur secundùm formas: sed & vñm Theologorum, docentium in Deo non reperiri plura, sed plures tantùm; quia natura seu forma est vnica, licet Personæ sint plures. Non itaque negandum est in Christo esse plura viuentia, etsi vnus sit viuens in genere masculino.

Respondetur, regulam Logicorum fundari in eo, quod in creatis, ex quibus ipsi regulam formauerunt, vnicuique formæ substantiali compe-

rit propria existentia; & sic ipsa sup-
posita multiplicantur per formas
substantiales. In diuinis verò, quod
facit ens aut substantiam primam
formaliter, itidem vnicum est, ipsa
scilicet existentia diuina; cui quo-
dammmodo accidentales sunt pro-
prietates distinguentes Personas: Et
hinc est, quòd in genere neutro non
dicuntur plura, neque entia; sed in
masculino tantum; quia proprietates
ad dignitatem videntur pertinere, &
propriè ad personam.

Ex his rursus clarum est, prædica-
ta propria vnus naturæ posse attri-
bui alteri naturæ sub nomine concre-
to, non autem abstracto; quoniam
re verà non attribuitur nisi Personæ.
Sic itaque Deus dicitur nasci, mori,
pati, crucifigi, &c: Et homo condi-
disse cælum & terram, esse æternus.
Non tamen dicendum est, diuinita-
tem esse passam, natam, &c, nisi for-
tè ex necessitate ad explicandum di-
uinitatem & Deum esse indiuisibili-
ter eadem; vt supra dictum est in si-
mili. Longè minùs humanitatem
creauisse Angelos, esse ab æterno, &c:

quoniam non subest eadem indiuisibilitas, quæ nos cogat ad similes locutiones.

Neque minùs patet inter propositiones de subiecto concreto, hanc esse differentiam; quòd cùm diuina de homine prædicantur, propositiones sunt essentielles, seu in quid: cùm verò humana de Deo prædicantur, sunt de quinto prædicabili, & accidentales; quantumvis prædicatum fit quid, & substantia, in sese consideratum. Euidens enim est suppositum, ratione cuius verificantur, esse essentialiter Deum, per accidens verò, & ex tempore, hominem. Huic itaque questioni, Quid est Iesus? respondendum est, Deus, non verò homo.

Neque propterea sequitur, Christum non dici hominem vniuocè cum cæteris hominibus: vniuocatio enim consistit in eo, quòd definitio vocis sit eadem in pluribus; sic autem contingit hominem significare animal rationale, tum in Christo, tum in Petro. Quod autem esse animal rationale competat ei primariò vel secundariò, seu det illi primum esse,

252 INSTITVT. SACRARVM.
vel secundarium , non pertinet ad
vniuocationem.

Ex quibus protinus patet differ-
rentia inter has propositiones, Chri-
stus est Deus humanatus , seu potius
humanus ; & , Christus est homo do-
minicus, diuinus, deifer &c. Priorēs
enim sunt manifestè veræ , quia Deo
accidentale est esse hominem ; &
ideo benè per vocem adiectiuam
explicatur. Posteriores verò sunt fal-
sæ , quia homini , qui est Christus,
essentiale est esse Deum ; & per con-
sequens, male explicatur nomine ad-
iectiuo , quod significat conjunctio-
nem per accidens.

Sequitur ex his nullum nomen
propriū humanitatis posse de Chri-
sto dici simpliciter , hoc est sine re-
duplicatione seu restrictione , præ-
ter illa quæ talem reduplicationem
in vi suâ afferunt : vnde hæ proposi-
tiones, Christus est creatura, incepit
esse, est mortalis , est subiectus Deo,
minor Patre , Filius adoptiuus, ser-
uus &c ; absolutè sunt propositiones
falsæ , nisi addatur quatenus homo,
aut aliquis similis terminus , qui de-

terminet & restringat propositionem.

Veruntamen quoniam sicut crispus, cæcus, claudus, in ipsâ suâ significatione includunt secundum capillos, oculos, tibias ; sic propria hominis includunt respectu sapientium vim reduplicationis *In quantum homo* ; efficitur , has propositiones , ubi non est periculum subuersionis infirmorum , neque suspicio erroris in personâ loquente , posse simpliciter usurpari ; sed propter huiusmodi occasionem esse sæpe vitandas.

Consequenter, non propriè dicitur Christus ens actu quatenus homo ; quia neque existentia est humana, neque humanitas sufficiens subiectum existentiae per se : quare neque dici potest hoc aliquid, quod tantumdem sonat ; quia tamen aliquo modo habet existentiam , dicendus est quatenus homo esse aliquid ; quia vox *aliquid*, confundit potius significationem, quàm explicat vel rem, vel modum rei. Ens autem, propter æquiocationem inter ens simpliciter & ens entis, non æquè fæliciter de

Christo vt homine prædicatur; sed explicandum foret esse ens entis.

Tandem Christus quatenus homo, non est Persona; quia etsi in termino homo, includatur Persona; tamen hoc materialiter & confusè includitur: reduplicatio autem non nisi circa determinatum aliquid versatur. Præterea, si quatenus homo esset Persona, etiam quatenus homo foret Deus, & confunderentur naturæ, saltem quoad explicationem & vltimum loquendi. Similiter neque quatenus Deus vel Persona, potest dici Persona humana; quia esse hominem non dat illi esse personam; quia humanitas non est sufficiens subjectum suæ existentie.

LECTIO V.

*Christum & secundum animam,
& secundum corpus, esse
perfectissimum.*

PRogrediendo protinus occurrit, quòd quoniam animæ Christi

competit propius quàm corpori, & immediatè existere per existentiam diuinam; consequens est, ipsam non factam esse secundùm necessitatem materiæ, seu qualem corpori ex serie secundarum causarum generato habere conueniebat; sed qualem electio diuina iudicabat suo fini aptissimam.

Cùm itaque ex parte bonitatis diuinæ nulla possit esse limitatio, quin semper optimum agat; sed neque ex parte finis, puta salutis generis humani, possit fingi cur optimus homo non sit aptissimus ad talem effectum producendum; palam est animam Christi animarum in specie humanâ possibilium, esse perfectissimam, & quasi Ideam vel exemplum.

Dices, in ijs quæ sunt in materiâ; nihil esse optimum; cùm diuisibilitas quantitatis & ipsius multiplicabilitas vtraque sit sine termino. Præterea, Ideas esse res imaginarias: sic enim videmus eos qui deformant ideas boni Regis, Oratoris, Ducis perfecti, & similium, ea postulare quæ nunquam in aliquo homine

fuerunt , vel secundùm naturalium
causarum seriem existere possunt.

Respondetur contrà accidere, for-
mas quidem rerum in materiâ exis-
tentium , omnes esse indiuisibiles ;
vt patet in figuris , numeris , & alijs
speciebus quantitatis : & quanquam
causæ materiales non valeant ex se-
metipsis designatam formam intro-
ducere , sed duntaxat fortuitam ali-
quam propinquam ; hoc tamen non
excedit virtutem angelicam , nedum
diuinam.

Præterea , Ideæ quas homines ima-
ginantur , nunquam sunt iustæ ; ex
eo quòd homines non sunt capaces
descendendi ad omnes particularita-
tes subjecti considerati ; & plerum-
que ad maiorem illustrationem ope-
ris , magis excedunt quàm deficiunt ;
& inde est quòd requirunt conditio-
nes prorsus impossibiles. Quod si
quisquam perfectè sciens pingeret
Ideam vel Regis , vel Oratoris , &c ;
propiùs ad naturæ vires accederet ;
sed vbi natura deficit , nihil obstat
quin superior aliqua vis possit iustam
indiuisibiliter mensuram tribuere.

Pro-

Protinus dilucet, corpus quoque Christi (postquam aptum sine dubio animæ effici debet) etiam ipsum perfectissimum esse; & in indiuisibili consistere; cum vnicum possit esse optimum, & quælibet differentia aliam proportionem efficeret; & quoniam corpus animæ necessarium est propter scientiam & operationes eam consequentes, quæ à sensibus proficiscuntur; sit corpus Christi perfectissimum esse, quod in genere sensitiui seu animalis effici possit.

Dices, cum vnica sit anima humana possibilis, quæ nata sit habere existentiam in prima sui creatione independentem à corpore; & vnicum corpus ei aptissimum; ponique possint alia corpora imperfectiora tali corpore in quolibet minori & minori semper gradu; iisque corporibus necesse sit animas aliquas esse proportionatas; sequetur animas ex necessitate corporis introductas esse, quantumlibet proximas animæ Christi; & per consequens, non esse magnam excellentiam Christi supra eas.

Respondetur, quod sicut in ele-

mentis, sic in cæteris substantijs, necessum est euenire, vt substantiæ non sint sibi immediatæ secundum omnem diuisibilitatem quantitatis; sed sit aliqua latitudo competens cuilibet substantiæ; & per consequens non qualibet mutatio ab indiuisibili optimo corpore, faciet aptitudinem ad aliam animam; & in hoc particulari necessum est esse insuperabilem latitudinem; cum anima Christi trahatur adeo excellentem modum sibi proprium; sed & inter eas dispositiones quæ possunt consistere cum hac animâ, causæ corporis Christi ex necessitate electuræ sunt potiorem, scilicet eam quæ indiuisibiliter optima est; quia sola illa primæ constitutioni idonea est.

Petes, cur non possit fingi animæ sine contradictione implicatâ, esse plures animas humanas ita excedentes vim corporis, vt ipsæ sint prius naturâ capaces existentia quam composita; & tamen habeant entitates; creatas: vnde fiet accessus proximè ad animam Christi, & dignitas ipsius (exclusâ diuinitate)

non erit infinite superior ceteris hominibus. Respondetur, quod si ponatur existentia creata, id est, non subsistens, esse ex naturâ rei primò unius subjecti, non potest eadem intelligi deriuari ad aliud, quod non sit inclusam in primo: essentialiter enim fertur & dicitur seu habet specificationem respectu primi subjecti, & est modus ipsius, & comprehensa ab ipso, & terminata ab ipso, & terminis ipsius. Vnde sicut accidens unius subjecti non potest esse accidens alterius, sic neque existentia. Neque par est de existentia diuinâ; quæ cum sit subsistens, non accipit terminos à subjecto.

Dices, existentiam pueri extendere se ad substantiam viri. Præterea, cur non potest æque extendere se existentia creata, quam potest sese retrahere; sicut videmus contingere, cum in morte hominis existentia quæ fuit totius, sit existentia solius animæ. Respondetur, quod existentia composita, non requirit materiam propter se, sed quia est terminus formæ; & propterea non potest esse in for-

ma solâ, quia non est terminata, neque definibilis sine materiâ. Quare posito formam accipere terminos proprios, vt contingit in separatione animæ à corpore, iam existentia inuenit subjectum suum in solâ animâ, cum eandem inexistenti rationem cum alijs terminis inueniat. Neque tamen propterea Anima separata fit ens completum; propterea quod modus operandi ipsius, & per consequens essendi, est imperfectus; vt suo loco explicandum manet. Extensio verò existentiae pueri ad existentiam viri, cum tantummodo sit ad maiorem quantitatem, id est, mensuram seu modum substantiæ, & in definitione nihil mutatum inueniat, non est extensio ad subjectum nouum; & sic non pertinet ad hunc locum.

Ex quibus vlteriùs conficitur, Christum fuisse perfectissimum hominem secundum corpus in ratione animalis; Adamum verò perfectissimum hominem secundum corpus in genere vegetabilis: cum hic ad propagandum genus humanum secundum cor-

pus, ille ad sapientiam propagandam protoplastus fuerit. Et quoniam anima ex Deo, corpus de terrâ est; Adamus de terrâ terrenus; Christus ex cælo cælestis esse meritò agnoscitur & dicitur.

Et quoniam anima est forma animalis; animal autem instrumentum ad operationem applicabile; patet ad corpus animalis, & ad informationem animæ, pertinere cunetas partes quæ quoque modo perficiunt rationem talis instrumenti, ex intentione naturæ, quousque manent connectæ quantitatiuè cum ipso trunco animalis. Quæcumque autem pertinent ad animam, per consequens etiam pertinent ad vnionem cum Deo, & eius existentia existunt, quantum existunt.

Vnde efficitur, sanguinem & reliquos humores, non solum in quantitate necessariâ, sed integrè existere existentia diuinâ; sed & excrementitios humores, si reiecti sint non propter intemperiem, sed propter abundantiam; immo si etiam propter intemperiem, quæ non sit destructiua

naturæ, sed composibilis, antequam reijcerentur extitisse existentiam diuinam. A fortiori capillos, ungues, & si quæ aliæ sunt partes ex sese proficua, & solâ exuberantiâ incommoda, ad eandem existentiam pertinebunt.

Sed quoniam corpus quidem propter semetipsum suscipitur; quia pars est hominis, qui est terminus assumptionis principaliter intentus, & ipsius existentia immediatum subiectum in facto esse, etsi in fieri anima sit naturâ prior; huiusmodi autem tantum suscipiuntur quatenus aliquid corporis sunt, aut accidentia & determinationes corporis, & non per se subiecta existentia; sit huiusmodi partes (& tantundem est de brachio, vel crure, si decisum à Christo viuentem fuisset) per puram separationem perdituras fuisse existentiam diuinam: integrum verò corpus seu compagem eorum membrorum in quâ saluatur ratio corporis humani, non nisi per talem destructionem, quæ rationem corporis humani tollat.

Petēs, qualis sit prioritas quæ existentia diuina prius afficit mentem

Christi quàm corpus, siue totam humanitatem? Et rursus, totum corpus quàm partes ipsius? Cùm enim constet non esse actualem aliquã distinctionem, non videtur posse intercedere prioritatem naturæ inter eandem & semetipsam. Si autem dicatur esse prioritas rationis, vnde est quòd habeat reales effectus, quales supra descripsimus? Respondetur, quòd cùm ea quæ componuntur inter sese, sic sint vnum actu, vt sint plura in potentiâ, sit vt qualitas eorundem, dum sunt actu vnum, possit considerari in ordine ad hoc quòd possunt esse per diuisionem; & sic inueniatur quòd eadem res, prout est in potentiâ vnum, sit dignior vel immediatior quàm secundum quod est in potentiâ aliud: vnde secundum hunc ordinem, qui de facto est tantum rationis, accidentibus causis vel diuidentibus vel comparatis ad rem in potentiâ, reales effectus diuersi nati sunt sequi. Est itaque hic ordo actualitatis tantummodo rationis, sed fundata sic in naturâ obiecti, vt possit dici virtute vel potentiâ realis.

LECTIO VI.

De actione Incarnationis.

EX hoc porrò quodd anima intel-
ligitur aliquo modo præexistens
corpori, consequitur actionem per
quam Christus accipit esse, incipere
ab animâ, & continuari ad corpus;
& hoc in ipso ordine executionis, ut
fieri corporis sit consequens saltem
ordine naturæ, modo explicato, ad
fieri animæ. Et quoniam anima est
naturaliter forma, neque potest con-
naturaliter propterea accipere pri-
mum esse extra corpus; consequens
est, existente realiter animâ, eo ipso
corpus quoque habere esse. Quare
cùm actio circa animam sit instantane-
a, tota actio circa Christum erit in-
stantanea, & corpus Christi non suc-
cessiuè præparatum, sed indiuisibili-
ter factum.

Posito è diuerso corpus esse præ-
paratum prius tempore ante ani-
mam; vel tota præparatio facta erit
ante

LIBER III. LECTIO VI. 265

ante infusionem animæ, sicut in alijs corporibus; vel pars aliqua diuisibilis defuerit: Si hoc, ergo saltem aliqua successio facta est, vel suppleta potius in instanti; & æquè benè tota ponetur suppleta in instanti: Si prius, cùm corpus aptum factum fuerit animæ; Deus determinatus fuerit dare esse ex vi causarum secundarum; & non iam anima præintelligetur ante corpus, sed totum primò habere esse; & in viâ executionis, à corpore itum esse ad animam.

Ex hoc rursus conficitur, actionem hanc quoad vim effectricem, in solum Deum esse refundendam, sine ministerio cuiuslibet creaturæ corporalis vel spiritualis: Cùm enim mutare localiter in instanti, vel rarefacere ad certum gradum in instanti, excedat vim Angelicam; palam est corpus Christi, si in instanti formatum est, à solo Deo esse profectum.

Et è diuerso, si ponatur in tempore formatum esse; eo ipso Angelicis operis hoc actum esse; cùm Deus non nisi influendo esse, quæ actio instantanea est, operari natus sit: ex quo se-

quitur Angelum aliquem suppleuisse ministerium Patriscarnalis erga Christum; & per consequens, non incongruè dici posse Christi Patrem secundum generationem carnalem.

Quid, quod si creaturæ alicuius ministerium adhiberi debuerat, nullius magis quàm sanctissimæ Matris; & per consequens illa debuisset concurrere quomodo solent matres ad conceptionem infantis; puta per resolutionem seminis; quæ cum naturaliter non fiat sine delectatione, etiam delectatio adhibenda erat; cum hæc sine peccato esse possit; quæ tamen minùs congruunt summæ illi integritati quam de illâ proficetur Ecclesia.

Sed & ipse consensus Sanctæ Virginis, arguit instantaneam fuisse operationem: Cum enim verborum vis sit in significatione; significatio autem indiuisibiliter sit in ipsis verbis; causatio ex vi verborum, est instantanea, modò effectus natus sit esse in instanti, id est, sit permanens: quare cum Christus sit ens permanens, secutus erit instantaneè con-

scilicet Virginis virtute diuinâ.

Et ipsa quoque verba hoc videntur indicare ; dicente beatâ , neque *faciam*, neque *facias*, sed *fias*; indicans neque suo ministerio , neque Angelicâ naturâ patrandum esse mysterium , quod Angelus nunciare venerat, sed diuino , seu virtute superuenientis Spiritus Sancti ; quod est secundum verbum Angeli fieri , quod in ipsâ non ab ipsâ fiebat.

Ex hoc rursus infertur , actionem hanc non esse mediam inter terminum à quo & ad quem ; sed per modum creationis , etsi creatio non sit, cum sit ex materiâ præsuppositâ, puta ex sanguinibus Virginis: vnde maxime propria propositio in hac materiâ, incipiendo à naturâ humanâ seu pertinentibus ad illam tanquam à subiecto, est sanguinem virgineum factum esse Deum ; etsi etiam ista sit defectuosa, ex eo quod sanguis virgineus non sit propriè ens actu, sed pars entis : vnde fortasse rigorosiùs beata Virgo quoad sanguines facta est Deus.

Hæc autem , Deus factus est homo, vel, homo factus est Deus ; vtraque

sic intelligenda est, vt significant factum esse vt Deus sit homo, vel homo Deus. Nam Deus quidem etsi præexistat, non tamen est qui possit fieri, id est, esse subiectum factionis: Homo autem non præfuit, vt posset esse aliud quàm terminus. Neutra itaque rigorosa, sed minùs impropria, homo factus est Deus, si homo non supponat pro hoc indiuiduo, sed pro naturâ humanâ secundùm se.

Sed neque rectè dicitur, homo factus est, sed factum est vt homo sit; cùm homo pro supposito accipiatur, quod non est factum neque incepit esse, quod est consequens ad fieri. Quod autem dicitur, Deus est incarnatus, vel humanatus, eodem modo intelligendum est, quomodo esse factum hominem.

Petes, qualis sit hæc actio? Respondetur esse specialem, quæ habeat à conuersione habere materiâ communem; à creatione verò, non habere subiectum nisi denominationis, hoc est, terminum, non subiectum. Quod intelligendum est de actione quasi Physicâ: si enim moralis actio

consideretur, sic consensus matris est vera successiua actio; iuxta quod canit Ecclesia, *Verbo concepit Filium.*

Pater vlteriùs, hanc actionem, respectu matris, esse generationem, id est, processionem viuentis à viuente, &c, tantummodo in facto esse, non autem in fieri; cùm exhibitio sanguinum per quam & propter quam dicitur mater, sit instantanea, & primo instanti in facto esse, & nunquam in fieri.

Dices, ergo non est vniuocè mater cum cæteris matribus; maximè cùm Physici doceant in matribus æquè atque in patribus esse semen; & per consequens vim effectiuam, secundum quod conuenit semini: quare si talis actio negetur sanctissimæ virgini, non erit mater neque hominis, neque Dei.

Respondetur reperiri in mulieribus humorem quendam seu sanguinem album, & similem semini virili, sed quòd non sit semen, sed naturæ proximè dissimilis semini: cùm enim seminis ratio consistat in eo quòd sit prolificum, & constet fœminas cùm

habeant & locum & materiam aptam, tamen non esse ex sese prolificas; pariter constat dictum humorem non esse semen, sed sanguinem purissimum, & cetero sanguine magis excoctum; quique citra resolutionem exhibitus est à beatissimâ virgine in generatione Christi.

Attribuere autem aliam actionem ipsi efficientem, est attribuere illi monstrositatem defectuosam, qualis reperitur in imperfectis creaturis, & exulat à genere humano, & perfectis animalibus, propter perfectionem ipsorum, quæ requirit instrumenta magis distincta & particularia, quàm naturæ imperfectiores. Metaphysicæ autem actiones, quas aliqui comminiscuntur, cum non fuerint notæ imponentibus nomen Patris & Matris, non pertinent ad explicationem huius mysterij, & propositum nostrum.

LECTIO VII.

De Patre & Matre Christi in generatione temporaria.

Nihilo tamen minùs clarum est, Beatam Virginem Dei Matrem esse, non tantùm materialiter, quatenus Deus quoad humanitatem assumptam ab ipsâ materialiter procedit; verùm etiam formaliter, quatenus humanitatem existere existentia diuinâ in genere causæ materialis ab ipsâ procedit: Cùm enim existentiam afficere humanitatem, ex eo sit, quòd humanitas non est capax alterius existentia, & hoc ex determinationibus materiæ procedat, palam est quòd à Matre originem trahit.

Dices, tales dispositiones in materiâ non procedere à Matre, quæ præcisè subijcit materiam, sed ab efficiente: vt autem causa causæ sit causa causati, requiri vt faciat facere, quòd hîc non occurrit. Respondetur, causam materialem non posse aliter fa-

cere, quàm sustentando dispositiones: Cum itaque Mater sit causa passiva, sufficit ad rationē Matris, quod materia ab ipsa exhibita, sustentet dispositiones quæ determinant actu ad formam.

Si autem Mater Christi est formaliter Mater Dei; à fortiori causa illa quæ hanc necessitatem inducit effectiuè, & vicem carnalis Patris supplet, eo nomine Pater Dei erit in eadem ratione; cum ipse formalius longè existentiam diuinam introducat in humanitatem: quare Christus quoad temporalem generationem erit Deus à Deo.

Quid, quòd actio hæc est per modum creationis; creatio verò incipit ab existentia; vnde primus quasi effectus huius actionis erit super ipsa existentia diuinâ, quasi quædam expressio fœcunditatis ipsius, & extensio ad subjectum alienum. Quare hæc actio videtur primitus circa ipsam essentiam diuinam; & per consequens, talis vt nulli creaturæ possit competere.

Ex his infertur Christum, etiam

secundum generationem temporariam, esse Deum de Deo; & hoc quoad interna; & per consequens Personam in qua fit unio naturarum, neque esse Personam absolutam, neque esse Patrem, sed unam earum quæ habent esse à Patre, & sunt Deus de Deo.

Obijcies, hanc operationem esse temporariam & externam; & per consequens procedere indifferenter ab omnibus, vel quâlibet Personâ: Non posse proinde ex hoc capite desumi differentiam aliquam Personarum; neque vel hoc argui, quod non sit communis Persona quæ carnem assumpsit.

Respondetur effectum partim esse temporarium, partim æternum; quatenus enim dicit extensionem existentia diuinæ, quæ est quædam quasi proprietas existentia diuinæ (qualis est determinatio intellectus vel volitionis diuinæ ad objectum contingens) ex necessitate est æterna, sicut determinaciones intellectus & voluntatis; & habet effectum in tempore, sicut etiam illa. Unde

cùm ab alio sit, ex eâ potest concludi Personam incarnatam esse Deum à Deo, seu Personam procedentem.

Ex his iterum concluditur, Personam in quâ sit vnio, esse Personam Filij: cùm enim subjectum cui existentia communicanda est, sit mens indigens existentia, id est, imperfecta & perfectibilis; existentia autem seu essentia diuina prout determinata & particularisata ad cognitionem, id est, perfectionem mentis, sit verbum seu Filius; patet per se & proprium actum talis subjecti esse Deum vt Filium; & quod sequitur, formalem vnionis terminum esse secundam Personam.

Eâdem operâ conficitur, neque Patrem, neque Spiritum Sanctum, neque Personam absolutam, posse assumere creaturam aliquam in sui communionem: Cùm enim ex necessitate creaturæ sit quòd existat existentia diuinâ; talis autem necessitas non contingat, nisi vbi partes ex quibus componitur creatura, sunt quodammodo oppositæ, & sic inuersæ, vt naturalis existentia eis non possit

competere : hoc autem non nisi homini, & quidem secundum mentem competat; palam est non nisi verbi diuini necessitatem creaturæ posse competere, & quod sequitur, solum verbum diuinum posse incarnari, & immediatè vniri creaturæ.

Obijcies, quòd cum diuinitas sit simplicissima, & vnio hæc realis, & non secundum rationem; impossibile esse, vt vnio fiat ad vnā Personam, & non ad omnes. Respondetur, vtcumque sit simplex deitas, tamen eminentiam habet super vniuersas creaturas: vnde si vna creatura applicetur, non communicabitur ei effectus nisi proportionatus ipsi; sic itaque adiuncta menti, non faciet nisi mentem existere. Quod considerans ratio, de eā loquitur, vel vocem accommodat secundum mensuram effectus, & dicit vnita est quatenus nata facere mentem existere; & excludit ex suis conceptibus reliquas eminentias. Et hoc est vniri secundum Personam Filij, & non aliam.

Ex his quoque clarescit, actionem incarnationis specialem respectum

habere ad Patrem vt à quo. Cum enim extēſio exiſtentiaē ſit prima pars acti; hæc autem hebeat̃ur à Patre; Pater autem à Filio, & per conſequens ab effectu, ſit realiter diſtinctus; pater inter effectum & Patrem eſſe realem relationem; & per conſequens, rationem cauſæ & effectus eſſe perfectiorem, quàm vbi eſt identitas (vt cum Filio) vel certè à quo ſpecialiter non procedit (vt à Spiritu Sancto) : Quare euident̃ eſt hominem Deum ſpeciali modo à Patre pendere.

Obijcies, quòd cùm inter Patrem & Filium non ſit ratio cauſæ efficientis & effectûs, quæ tamen eſt inter Deum & temporarium effectum, non poſſe eſſe ſpecialem rationem actionis inter Patrem & Chriſtum quoad generationem temporalem. Adde, quòd cùm idem ſit exiſtentiam Dei eſſe extenſam ad humanitatem, & humanitatem exiſtere per exiſtentiam diuinam; ſi non ſit ratio cauſæ & effectus inter Deum & extensionem exiſtentiaē, neque poſſe eſſe inter Deum & n humanitatem exiſtere.

Respondetur, quòd cùm respectu Patris sit processio directa secundùm naturam actionis ; sit etiam alietas & ratio effectûs ; non interesse quòd ratio efficientis desit respectu Filij, cùm non desit respectu effectûs integri. Respectu autem Spiritus Sancti deest processio, & respectu Filij, & processio & alietas. Vnde non potest inueniri ratio vera actionis, nisi respectu Patris, respectu cuius, propter distinctionem, datur vera ratio effectus, quæ facit veram rationem causæ, quæ deficit inter Filium & Patrem.

Dices, hunc effectum esse præuoluitum à Deo ; & per consequens, procedere à Spiritu Sancto, qui est volitio Dei. Sed & specialiter procedere ab ipso, patet ex eo quòd Christus dicitur conceptus de Spiritu Sancto ; & quod natum est in Virgine esse à Spiritu Sancto ; & obumbrationem Spiritus Sancti, & descensionem, præcedere conceptionem Virginis ; quæ omnia indicant specialem cooperationem tertiæ Personæ.

Respondetur, effectum quidem esse integrè volitum; sicut & ipsam generationem diuinam, quæ est quodammodo pars huius effectus. Sed prauolitum tantummodo esse ex parte, quatenus humanitas existit, non quatenus existentia extensa est; sed hanc prauolutionem non esse actionem; quia actio procedit per extensionem ad effectum, & non è contra; volitio verò incipit cùm respicitur creatura, vel potius illic incipit esse prauolitio, quæ respectu extensionis erat volitio concomitans.

Nomine verò Spiritus Sancti in illis locis intelligitur Pater; vt patet ex eo; quòd Angelus dicit Christum ex hac ratione vocatum iri, id est, futurum esse Filium Dei. Sed & notum est appellationem Spiritus Sancti transferri ad alias Personas. Adde quòd ex vsu veteris testamenti sint hæ locutiones: vnde Spiritus Sanctus non significabit nisi Deum, vel Deum Patrem; vnde dicitur etiam virtus altissimi; qui terminus, Deo, vel Deo Patri, solet attribui. Tandem cùm dicitur *de*, vel *ex*, signifi-

cat materiam præexistentem ; quod non potest verificari nisi de Patre, in quo solo natura diuina præexistit Filio.

Infertur vlteriùs, hanc actionem esse missionem : Cùm enim famulum ab hero mitti dicamus , cùm abit ad distantes ex vi cognitionis seu dictaminis mouentis ipsum , ex eo quòd ab alio hanc virtutem habente procedit : & Filius per hanc actionem accedit ad homines , ex cognitione , quæ est essentia ipsius, & impellit ipsum ex eo quòd est à Patre ; euidens est , omnia requisita ad mittentem esse in Patre , & ad missum esse in Filio ; & per consequens , hanc actionem , videlicet Incarnationem esse missionem.

Patet itaque esse missionem in diuinis ; hoc est , vnã personam mitti ab aliã ; & missionem includere processionem à personâ originante , & peruentionem ad extrinsecum , puta homines ; & quasi ex his duabus partibus componi. Missio itaque non pertinet nisi ad personas quæ sunt ab alio. Sed neque Filius mittitur ad

Spiritum Sanctum; quia non est distans, sed coniunctus: Spiritus verò Sanctus, si communicatur hominibus, mittitur à Patre & Filio. Et si mittitur ab utroque, ab utroque procedit.

Euidens quoque est, quicquid à Personâ missâ agitur apud distantes, ex vi missionis & mandati fieri; quandoquidem missio includit mandatum. Cùm enim agatur ex vi cognitionis seu volitionis acceptæ ab originante; hæc autem extendit sese ad omnia, & omnes circumstantias, singula & omnes singulorum partes ex vi talis mandati necessariò peraguntur.

LECTIO VIII.

De scientiâ Christi vt Hominis.

QVibus non obstantibus, clarum est in Christo Domino, etiam secundum naturam humanam, repertos fuisse scientiæ thesauros. Cùm enim homo vt homo sit cognoscitiuus,

cius; & cæteris magis Christus, propter eminentem modum existendi animæ ipsius; palam est, nisi scientiam conformem suæ naturæ haberet, vanam esse & mutilam in eo naturam humanam, quæ non habeat operationem ad quam nata est, & propter quam solam nata est produci.

Sed neque profuisset Christo Domino quatenus homo est esse Deum; cum non frueretur bono suo, neque illud omnino haberet, neque per intellectiōem, neque per voluntatem, quomodo habentur quæ ab hominibus habentur. Quare neque illud neque aliud ullum bonum haberet; sed foret omnino quasi truncus desertus & inutilis, diuinitate habente hominem, sed homine vt homine non habente diuinitatem.

Quid, quod neque nobis profuisset humanitatem esse susceptam; neque mysterij finis obtineretur. Non enim Christus exemplum nobis posset dare nisi fictitiè, & collusoriè, (quo modo dedecet Deum). Sed neque doctor foret, cum non intellige-

ret mente quod ore diceret. Sed neque Deus homo nobis appareret & apprehenderetur à nobis; cum hominem non intelligamus nisi talem qui discurret & intelligat.

Adijce quòd neque ratio animalis vel entis naturalis ei satis constaret; cum neque sensus haberet, sicut ceteri homines, cum sentire in homine sit cognoscere; neque media congrua sese alendi & sustentandi haberet, cum homo sine cognitione sit impotens ad hæc omnia, cum ex usu & non ex naturæ dictamine hæc omnia habeat. Quare non foret ens naturale, qualiter nos entia naturalia concipimus.

Nihil minus certum est, Christum scientiam suam operâ sensuum accepisse. Cum enim anima rationalis propterea corpori indatur, quia ex suâ specie propriâ non est idonea scientiæ colligendæ, ut pote quæ sit pura potentia; & hæc sit differentia animæ ab intelligentijs; palam est animam Christi non futuram fuisse animam humanam, si non nata fuisset pati quasi scientiam ab obiectis,

mediantibus sensuum organis.

Rursus, cum anima humana non sit ex naturâ suâ ens, primum ipsius obiectum etiam in statu separationis non est ipsamet, sed homo ex quo resoluta est. Quare tantundem de Christo asserendum est, primum ipsius obiectum non esse ipsam animam, sed hominem: & quod alioqui genere differret à cæteris hominibus; ut cuius primaria operatio foret diuersa. Quare cum corpus mediante sensu agat cognitionem, indubium debet esse, etiam Christi animam ab obiectis esse informatam.

Tandem cum usus sensuum perficiatur in sensu communi seu imaginatione; neque imaginatio possit moueri in homine absque impressione in animam, quæ vna est cum phantasiâ, patet vel dicendum esse, quod neque viderit, neque audiuerit, vel alia sensatione usus sit, sed finxerit sese audire, & moueri, &c. vel dicendum, quod per operationem sensuum acceperit scientiam.

Quibus tamen non obstantibus as-

serendum est, Christum in primo instanti conceptionis suæ habuisse integram scientiam omnium rerum præteritarum, præsentium, & futurarum. Cum enim anima ipsius sustineat esse independentem à corpore, & prius illo, clarum est quamlibet impressionem in eam factam, esse perfectam, & patefacere quicquid per consequentias ex primo per eam cognito educi potest. Quod cum sese sic extendat ad omnia, ut nihil plenè sit cognitum nisi cæteris omnibus cognitis, patet per impressionem factam in conceptione, Christum ad cognitionem omnium existentium peruenire potuisse, & peruenisse, cum in eâ aliquid cognouerit.

Dices, Christum non potuisse habere omnium scientiam, nisi haberet species omnium substantiarum; neque potuisse habere species omnium substantiarum mediatis sensibus, nisi in longo tempore; quare si habuerit scientiam omnium rerum in primo instanti, habuisse species earum à Deo impressas, & non mediante corpore: quare ex illo

capite plusquam hominem fuisse, & participasse de naturâ Angelorum.

Respondetur, scientiam humanam non esse per impressionem specierum, sed per collectionem consequentiarum; nullius enim substantiæ ratio habetur per impressionem speciei alicuius, ut notum est, cum nullo sensu percipiuntur. Sed neque accidens aliquod verè per impressionem speciei cognoscitur: Si enim comparemus definitionem caloris, humiditatis, dulcedinis, &c: ad impressiones quas faciunt, cernimus omnino dissimiles, & diuersæ naturæ esse.

Oppones, non posse negari similitudines accidentium esse in animâ; experimur enim in sequentibus cognitionibus nos ijs uti, ut si de calore vel humiditate inquiramus, pro subiecto utimur; *quod facit talem passionem in sensu*. Manifestum itaque est, ipsam passionis similitudinem, & quod sequitur, obiecti esse in ipsâ animâ in qua est propositio, atque adeo subiectum atque prædicatum.

Respondetur, hoc non efficere si-

militudinem accidentis esse in ipsâ animâ, sed duntaxat esse in phantasiâ: Cùm enim anima sit interiùs & indiuisibilis, nihil deceditur ab eâ, quod possit iteratò percutere phantasiâ, & facere se cognosci: quod est in causâ cur in hâc vitâ non videamus neque animam, neque actus ipsius in semetipsis, sed in causis & effectis ipsorum. Quid itaque sit in ipsâ animâ, non possumus experimento, sed ratiocinatione concludere.

Euidens autem est, secundùm rationem, quòd formalis similitudo entis diuisibilis siue permanentis, siue successiui, non valeat esse in animâ, cùm anima sit indiuisibilis: Non est enim quomodo partes quantitatiuz explicentur in re indiuisibili; & tamen formalis similitudo quanti, sine partibus nullo modo consistere potest. Cognitio itaque formalis non fit per assimilationem vniuocam.

Præterea, si non sit aliud cognoscere, quàm habere similitudinem objecti in sese per modum qualitatis; quæ ratio reddi potest, cur pannus vel charta coloribus imbuta, non cog-

noscit ; & multò magis speculum ; quod censetur à ponentibus entitates quas qualitates nominant , puris qualitatibus affici ; siue lumen siue species intentionales colorum im-
biberit.

Palam autem est unitatem cogniti ad cognoscentem non consistere in unitate , qualem qualitates habent ad subiecta sua ; cùm hoc primum sit in cognitione , vt rem esse sit in animâ : nisi enim cognoscat rem esse , non est subiecta veritati vel falsitati cognitio , id est , neque est bona neque mala ; & per consequens , neque cognitio. Est itaque unitas cognitionis , unitas entis existentis ad præexistens ; & per consequens , magis per modum membri vel instrumenti , quàm qualitatis.

Et si reflectamus , omnia cætera prædicamenta adijci substantiæ secundum notiones ab intellectu comparatiuo dependentes , (Quantitas enim comparat subiectum ad cætera corpora ; Qualitas ad ea quæ sunt suæ specialis naturæ ; Relatio ad corpora his affecta ; Vbi , Quando , A-

gere, Pati &c: ad specialia quādam corpora, speciales rationes ad subiectum habentia) Immo ipsas substantiæ species per diuisiones & limitationes constitui: reperiemus in omni cognitione nostrâ, solam rationem *τὴν esse* variè virtute nostrâ comparatiuâ variatum. Vnde nulla similitudinum apparet natura.

His si adijcimus, primum cognitum esse nostrum ipforum esse, patebit omnem cognitionem nostram non esse aliud, quàm quandam accommodationem nostri ipforum esse in intellectu nostro: & cognoscere omnia cætera, non esse nisi cognoscere nostrum ipforum esse, alio & alio modo; verbi gratia, cognoscere quomodo dependeat à causis, quomodo influat in effecta, & simpliciter & secundùm quid. Vnde non est vltcriùs difficultas quomodo sine speciebus anima possit omnium cognitionem acquirere.

Verùm ipsa quoque acceptio specierum in vitâ futurâ per infusionem, inconuenienter ponitur: cùm natura tantùm vnum modum perficiendi sese

fefe singulis entibus tribuat. Et quoniam hæc vita data est, vt præparet nos ad futuram, non minùs ex naturâ est, vt in futurâ sint aliqua imperfectiones, quàm vt in hâc vitâ fuerit impossibilitas acquirendi perfectionem. Sed & cum Deus non influat esse nouum animæ in separatione, neque qualitates ei influere conueniet.

Tandem vniuersa hæc doctrina de cognitione per species, supponit naturam cuiusdam entis consistere in hoc quòd sit similitudo; rursus distinguuntur entitatiuè qualitates à subiecto; & tandem eandem indiuisibilem entitatem habere efficientiam super semetipsam: quæ omnia sunt à Philosophiâ alienissima.

Neque vetat hæc scientiæ plenitudo in primo instanti Incarnationis, quin Christus toto vitæ suæ tempore profecerit in scientiâ, non cumulando noua objecta, sed confirmando & corroborando scientiam de objectis præacquisitam; sicut per iteratam cognitionem in nobis accidit. Vnde non solum per sensationem,

290 INSTITVT. SACRARVM.
sed etiam per discursum (phantasiâ
objecta prout magis conueniebat or-
dinante) potiora objecta magis for-
tificabar.

LECTIO IX.

*De Visione beatificâ, & Virtutibus
Christi Domini.*

VLterius infertur , Christum in
primo instanti conceptionis suæ
habuisse claram Dei visionem : cum
enim habuerit omnem scientiam,
& rectum iudicium, non potuit non
habere summam charitatem. Cum-
que ex aliâ parte habuerit statum
animæ in quo scientia non est alliga-
ta ad phantasmata , & per conse-
quens anima est capax in primo in-
stanti omnis scientiæ , cuius capax
esse potest ex parte suâ; sequitur (quo-
niam ex Dei parte non potest esse de-
fectus) absolutè Christum visionis
beatificæ in primo instanti fuisse
comptem.

Crescit necessitas ex eo quòd ex

naturæ vi prima cognitio fertur circa semetipsum ; & quod sequitur , cum Christus intrinsecè sit Deus , primam cognitionem Christi versatam fuisse circa Deum , ex ipsâ naturæ inclinatione : vnde si non potuerit semetipsum clarè videre sicut cætera ; palam est ingens non nasci desiderium in Christo Dei videndi non potuisse ; & quasi mutilum esse primum actû absque adiutorio visionis beatæ : Non potuit itaque non hanc à Deo accepisse cum ipso suo esse.

Pater quoque visionem Dei totâ vitâ in Christo augmentum accepisse per singulos actus Christi : cum enim scientia creuerit in Christo , charitas autem non possit non crescere , sicut scientia ; (cum in Christo præcipue nulla scientia non fuerit dispositio ad charitatem) necessum quoque sit quo maior est dispositio , maiorem quoque esse visionem , cum non possit esse ex parte Dei defectus : fit , secundum augmentum charitatis , in Christo credisse visionem beatificam.

Obijcies esse contra naturam comprehensoris crescere ; & rursus con-

292 INSTITVT. SACRARVM.
tra naturam beatitudinis ; cū non
sit aliquis verè beatus, quamdiū restat
aliquid desiderandum : Visionis au-
tem beatificæ palam est quemlibet
gradum & minimum augmentum
esse desiderabile super omnia. Adij-
ce, quòd dum Christus adhuc viueret,
poterat minus bonum agere ; & per
consequens , non ex necessitate ha-
biturus erat talem gradum. Non
itaque beatus censerì poterat , si visio
beatifica in eo poterat crescere.

Respondetur, rationem cur com-
prehensionì repugnet crescere in ca-
teris , esse quia iam sunt in statu per-
manentia, & quòd non vltra habent
vel agentium materialium incurfa-
tionem, vel multiplicitem actuum;
ex quo conficitur in Christo debere
esse augmentum ; cum & sensuum
percussiones, & multiplicitas actuum
simul reperiantur cum visione clara
Dei. Similiter desiderium quod op-
ponitur beatitudini, est quod affligit,
videlicet, vel quia conjunctum est
cum incertitudine, vel cum indigentiâ,
quarum neutra in Christo fuit,
sed omnimoda certitudo quod ha-

biturus esset quod ei adhuc deerat ; & plenitudo secundum præsentem capacitatem. Quamquam enim posset Christus ex potentiæ secundum sese considerata imperfectione , minus bonum agere ; non tamen poterat ei contingere vt minus bonum ageret ; & hoc ei certum erat. Vnde non potuit esse sollicitus , ne summum gradum amitteret.

Conficitur ex his, geminam fuisse in Christo charitatem ; puta aliam patriæ , aliam viæ. Cùm enim charitas vel dilectio non distinguatur à scientiâ , vel certè illam includat ; fit ex geminâ Christi de Deo scientiâ , geminam item oriri charitatem : quarum quæ abstracta seu obscura est , sit dispositio ad claram visionem , & eam charitatem , quæ cum eâ coniuncta est : attamen minima sit major quàm cuiuslibet puro homini viatori inesse possit ; cùm oriatur ex plenissimâ omnium creaturarum cognitione , & etiam Dei , quantum ex illis cognoscibilis est.

Accedit vtrique harum charitati , inesse conditionem quandam quæ

excedat naturam cuiuslibet puræ creaturæ ; puta quòd sit dilectio Dei vt suimetipsius. Cùm enim amor etiam vltimi finis & purissimus, oriatur ex eo quòd objectum sit cõforme nostro appetitui seu iudicio nostro; neque possit aliter euenire aut fieri amor ; cùm voluntatis objectum, super objectum intellectus, quod comprehendit omnes qualitates rei, addat respectum ad voluntatem conformitatis, & in eo consistat quod sit volibile : in Christo conuenientia hæc non est vnus ad alterum, sed eiusdem ad semetipsum ; quod necesse est amorem faciat longè aduentiorem.

Cùmque voluntas vt voluntas sit appetitus non cuiuslibet partis, sed totius suppositi ; sit amorem Dei in Christo fuisse naturalem, siue secundum primam & intimam propensionem ipsius voluntatis humanæ : vnde non potuit non totis viribus amare Deum ; neque poterat ex spiritali naturâ esse aliqua repugnantia vel impedimentum tali amori.

Cùmque etiam hoc euidenter sit ex

dictis, corpus Christi immediatè è manibus diuinis exiluisse, sine adiutorio creaturæ alicuius; pariter perspicuum est, fuisse metaphysicè apertissimum animæ ipsius; &, quod sequitur, nullam inordinationem ex corporis contactu in animam Christi potuisse promanare. Nulla proinde suspicio esse potest de contractione peccati originalis; quod consistit in habituali detorsione ab ultimo fine.

Nulla quoque difficultas esse potest, quin in Christo Domino fuerint omnes virtutes morales, vel formaliter, vel eminenter. Cùm enim tanta sapientia & tanta charitas fuerit in animâ Christi, quanta in nullo prætereà homine, & ex parte corporis cuncta facta ad obedientiam animæ, palam est operationes ipsius processisse ex constanti principio, quod ex rationis regulâ agere natum erat; quod est certè eminenter habere virtutes morales.

At postquam per frequentationem actuum, & animus roboratus magis est, & corpus assuefactum, & quasi

induratum ad tales operationes secundum præscriptum rationis exequendas; palam est, neque rationem habitus in mente, neque in corporeis virtutum instrumenta deesse potuisse; ac per consequens, virtutes morales etiam formaliter in Christo fuisse.

Petes, qualisnam fuerit constitutio corporis Christi? Respondetur, quòd cum anima sit essentialiter potentia ad scientiam; & anima Christi inter animas prima; & corpus aptissimum animæ; ex consequenti aptissimum scientiæ fuit. Scientia autem ex sensibus pēdet; & hi ex tactu; & actus in moderatione seu refractione primarum qualitatuum, maximè in nervis & spiritibus animalibus consistit; & hi à cerebro ortum habent; necesse itaque fuit, cerebrum liquidissimum & placidissimum Christo fuisse; & cætera membra, præsertim viscera, huic accommodata.

Attamen fides in Christo nequaquam fuit. Cum enim duo sint fidei objecta, Deus, & Dei opera; Dei visionem claram possidebat; creato

num verò demonstrationem non poterat non habere, propter plenitudinem scientiæ suæ. Cumque de ratione fidei sit obscuritas & visioni & demonstrationi opposita; clarum est Christum de neutro objecto fidem habuisse.

Dices, motiua fidei validiora ad persuadendum esse, quàm sit demonstratio; quare nihil obstat in Christo esse fidem, quantumvis fuerit demonstratio à posteriori. Adijce etiam respectu Dei, esse demonstrationem à posteriori in Christo non obstante visione, & efficere in Christo charitatem viæ, nihil obstante visione.

Respondetur, obscuritatem fidei, quâ opponitur demonstrationi, si tam esse in eò, quòd non appareat obiectum, seu non ostendat sese in accidentibus naturalibus, sed in cognitione alienâ. Vnde evidens est, neque hanc obscuritatem, neque adeò fidem posse esse in eo, qui habet demonstrationem à posteriori: hoc tamen nō impedit à motiuo fidei confirmationem animi accipi; sicut non obstante visione, demonstratio à po-

steriori confirmat Christum, & facit in eo charitatem viæ præuiam ad charitatem patriæ.

Quod autem in argumento dicitur; motiuum fidei esse validius motiuo demonstrationis; videtur fundari in eo quòd verbum Dei sit motiuum fidei : & si verbum Dei internum esset obiectum fidei, non posset dubitari. Si autem accipiatur de verbo externo Dei, cum reuelatio per opera sit à Deo & Dei vox, æquæ atque reuelatio per voces, non est omnimodis verum: quamuis ex eo quòd voces magis immediatè, & per pauciores consequentias pertingunt ad obiectum creditum, habet suam veritatem; sed differentia non est multum considerabilis, præsertim in Christo.

Consequenter asserendum in Christo non fuisse spem; neque de principali obiecto, puta visione Dei, quam actu possidebat; neque de alijs obiectis creatis, verbi gratia, de gloriâ corporis: spes enim non est nisi cum dubietate & timore sit commixta. In Christo autem erat ple-

na certitudo de omnibus bonis quæ postea habiturus erat; & per consequens, nullus spei locus.

Quamuis autem charitas & cætera virtutes, quæ in Christo sunt secundum speciales gradus & eminentias, (quas non est dubium in Christo fuisse) faciant cæteros homines facile mobiles à Spiritu Sancto, & eatenus dicuntur dona Spiritus Sancti; tamen neque hunc effectum, neque nomen in Christo habent; cum Personæ sit agere; & Persona Christi neque accipit agere à Spiritu Sancto (cùm non procedat ab eo) neque potest uti Spiritu Sancto quasi medio inter sese & humanitatem, ut per ipsum regat Christum; cùm regi & moveri sit Persona, æquè atque agere.

Si tamen nomine Spiritus Sancti intelligatur Pater, sic non malè intelligitur moveri à Spiritu Sancto. Quomodo videtur explicandum quòd Spiritus Sanctus visus est in columbæ specie descendere super Christum; ut scilicet columba significet virtutes Christi, quæ de cælo, id est, à Patre in Christo sunt. Neque officit

quodd creaturæ possint Christum mouere ; earum enim actiones sunt instrumentales ; neque significantur quasi cum authoritate : & propterea neque tales possunt attribui Deo , & quæ attribuuntur Deo in alios, in Christum non nisi Patri attribui nata sunt.

Eodem modo intelligendus est timor Domini esse in Christo , id est, Patris; non enim ad aliam Personam potest habere respectum quasi inferioris. Timor enim dicit reuerentiam seu æstimationem potestatis in semetipsum. Quod autem specialiter dicitur repletus Spiritu timoris, significat cætera dona eiusmodi esse, vt in certis operationibus adhiberi nati sint ; timorem autem ad omnia opera pertinere , & totam vitæ œconomiam replere.

LECTIO X.

*De sanctitate seu impeccabilitate
Christi.*

EX dictis facilè colligitur, Christum secundum humanitatem Sanctum fuisse; & quidem in eminentissimo gradu. Cum enim sanctitas nominet confirmationem in operationibus, quæ secundum regulam charitatis, seu rationis ad æterna motiua attendentis fiunt; eam habet Christus in tantâ mensurâ, ut non solum sit simpliciter impeccabilis, sed etiam semper ex necessitate agat quod optimum est, tum formaliter tum materialiter; & hoc ex pluribus capitibus & principijs.

In primis enim plenitudo scientiæ, quando non solum est pura ab errore, sed etiam proportionatæ intentionis secundum merita obiectorum; tribuit non solum scire quid in singulis occurrentijs sit agendum, sed etiam illud actu agere: cum quod

non actu agatur, ab eo qui scit quod agendum est, procedat ex eo quod scientia ipsius sit improporcionatè menti indita. Quare ex hoc capite Christus non habet solùm rectè agere formaliter, sed etiam materialiter, vt quod verè optimum est semper agat.

Rursus ex præexistentiâ illâ virtuali animæ ante corpus, accipit animam talem eminentiam supra corpus, vt violentia corporis comparata ad fortitudinem animæ, sit quasi nullius roboris. Vnde fit vt si anima semel in veritate & rectitudine circa vltimum finem sit constituta, non possit tota passionum & phantasie turbam eam facere deuiare. Cùm itaque Christus acceperit à Deo rectitudinem animæ in ipsâ creatione; consequens est, non potuisse eum in totâ vitâ suâ ab illâ deuiare & deflecti.

Sed & charitatis illud priuilegium, quod sit erga Deum vt semetipsum, securos nos facit, peccatum non posse cadere in Christum; cùm non possit cadere in humanam naturam, vt verè intendat malum sibi: (vnde ipsimet qui sese interimunt, appre-

hendunt carentiam mali esse bonum sibi, & ex charitate erga semetipsos operantur) necesse fuit itaque Christum ex hoc principio, nihil posse agere, nisi quod Deo bonum existimaret; hoc est ex charitate; cum quâ non consistit peccatum.

Beatifica deinde visio, ex eo quod sit summi boni possessio, saturantis videlicet, & totum hominem totaliter rapientis; necessitat etiam ipsa hominem beatum ad nihil agendum quod appareat quocumque modo oppositum beatitudini, & obiecto beatificanti. Quare etiam ex hoc capite in Christo Domino ponenda est addictio ad illud, quod videtur maximè conforme Deo beatificanti, & beatitudini ipsi, id est, quod est maximè secundum regulam charitatis.

Tandem ex eo quod humanitas existit existentia diuinâ, necesse est deitatem habere eam rationem ad actiones ceterorum hominum. Sed existentia est tota virtus entis in quo est, & à quâ accipitur ratio effectus, & tantummodo quasi limitatur ab essentia: sic itaque in Christi actio-

nibus necesse est spectare Deitatem tanquam ipsam virtutem agendi; & per consequens patet singulas actiones esse adeò perfectas, quàm ratio naturæ humanæ patitur; hoc est, circa optimum tam formaliter, quàm materialiter.

Ex his clarum est, sanctitatem non consistere in formali participatione alicuius entitatis quæ sit forma aliqua, sed in quâdem necessitate seu in impedibilitate ad operandum. Vnde qui volunt Christum Dominum formaliter sanctificari secundum humanitatem ab ipsâ delibutione & quasi effusione deitatis, conuincuntur nunquam examinauisse in quo consistat ratio sanctitatis.

Præterquam quod non sit intelligibile, quem alium effectum possit diuinitas tribuere humanitati, quàm vt faciat eam Deum seu aliquid Deis id est, faciat eam vnâ cum Deo. Vnde conari inuenire sanctitatem ex copulâ diuinitatis in humanitate quasi condistinctâ contra Deum vel diuinitatem, est huiusmodi, atque si quis conetur asserere parietem albedine

LIBER III. LECTIO X. 305

dine esse album exclusâ albedine;
quod est eodem Spiritu vtramque
partem contradictionis asserere.

Grauiùs adhuc est hanc sanctita-
tem non diuinitati, sed relationi Ver-
bi attribuere, appellando sanctita-
tem relatiuam. Præterquam enim
quòd superioris sententiæ crimina
participat, viam præterea facit, ad
omnia prædicata Dei absoluta, addi-
tâ hâc voce *relatiua*, approprianda
Personis; & multiplicandi, verbi gra-
tia, æternitatem, omnipotentiam, &
quæ à cæteris non differt nisi quòd
sit earum collectio, deitatem. Vnde
habebimus statim plures Deos rela-
tiuos.

Sed neque sanctitas potest vnioni
(vt loquuntur) hypostaticæ attribui,
& per eam humanitati, etsi in formâ
consisteret, & talis vnio distincta
foret entitas à compartibus; cùm se-
cundùm hâc asserentium principia,
non vnio albedinis faciat parietem
album, sed albedo; neque vnio ani-
mæ sed anima constituat animal.
Denique formalis effectus non est
nisi ipsa forma exhibita.

Obijcies , humanitatem Christi, præter hoc quod est existere Deum, accipere esse humanitatem , vel facere Christum hominem ab existentia diuinâ. Cur itaque non poterit aliud prædicatum communicare effectum limitatum humanitati , & diuersum ab eo quod est facere Deum ? vt sic humanitas possit esse sancta sanctitate limitatâ, vel illimitatâ, modo diuersa ab eâ quâ formaliter Deus est sanctus ?

Respondetur assumi falsum : existentia enim diuina non facit humanitatem existere; & si faceret , faceret eam esse Personam distinctam à Personâ verbi ; sicut facit Patrem & Spiritum Sanctum Personas distinctas ; non enim aliud est persona, quàm natura rationalis in indiuiduo existens. Non facit itaque humanitatem aliter esse , quàm esse Deum, vel aliquid Dei; quo modo & cætera attributa ei communicat , vel magis illam illis ; cùm illa sint Deus & immutabilia , ipsa , creatura & mutabilis.

Petes num à loco intrinseco repug-

net ex vi vnionis hypostaticæ Christum esse peccatorem : Respondetur quòd cùm repugnantia à loco intrinseco non possit in præsenti quæstione aliud significare, quàm formaliter, seu immediatè, seu non per accidens etsi necessariò fluens ; dicendum est vnionem hypostaticam non repugnare peccato per locum intrinsecum : Deus enim formaliter ad substantiam pertinet, peccatum ad operationem ; quæ cùm sit vt à substantiâ, patet repugnantiam ex necessitate esse mediatam ; & per oppositam actionem, puta charitatem. Vnde neque si per impossibile Christus poneretur peccare, solueretur vnio ex loco intrinseco, sed consequenter.

Vnde patet quæ obijciuntur, pleraque non attingere quæstionem ; vt-pote quæ vrgent malam rerum gubernationem, & similia ; quæ cùm per plura media sequantur, nihil faciunt contra veritatem assertam. Similiter quæ procedunt ex denominationibus communicatis, vt quòd Deus foret imprudens, peccator &c: clarum enim est, hæc dici secundum

quid ; sicut quòd sit mortalis , passibilis , trimestris. Item quòd Pater odisset Filium , quòd falsum foret , & plura huiusmodi , quæ facile est congerere.

LECTIO XI.

De libertate Christi Domini.

VErumenimverò contra impeccabilitatem Christi explicatam afferri solet, quòd infringat libertatem ipsius; cùm propter hanc Christus non possit non optimum facere. Respondetur libertatem non posse omnino consistere, absque eo quòd liber sit determinatus ad aliquem finem, ex vi cuius eligat ; quare non magis officit libertati vt Christus sit determinatus ad optimum agendum , quàm vt alius sit determinatus ad communem rationem boni; cùm sub vtrâque determinatione, maneat homo determinabilis ad hoc vt videat hoc esse optimum vel bonum; & in eo consistit vis libertatis;

ut determinet sese ad hoc: quo viso si manet indeterminatus, talis indeterminatio non est libertas, sed contingentia & defectus libertatis, & infirmitas quâ possit contra suam inclinationem agi.

Premitur fortius hic articulus, obijciendo Christum ex obedientiâ & vi mandati opera sua fecisse; maxime mortem obiisse; quod operum ipsius est maximum. Quare cum quod mandatur, ex vi ipsius mandati cognoscatur (non enim habet vim mandati, donec sit intimatum) cumque Christo impossibile fuerit esse inobedientem, ex necessitate, & non liberè opera sua patrauit.

Respondetur, hanc difficultatem supponere factum fuisse mandatum aliquod à Deo Christo ut homini, & non in qualitate Filij naturalis; quod est distinguere personam hominis à Personâ Dei. Cum enim allocutio sit respectu personæ, non potest intelligi aliqua allocutio facta à Deo Christo ut homini, absque eo quod Persona secunda alloquatur humanitatem; quod est dare illi qualitatem Personæ.

Præterea, non conuenit Christo etiam vt homini, accipere mandatum à Deo, in rigore dictum, prout inter homines intercedit: cùm mandatum non detur nisi vel ad manifestandum incognitum, vel ad flectendam voluntatem non promptam; vnde dicitur quod *Lex non est posita in isto*: Sed Christus & plenitudinem scientiæ habebat, quâ quid foret agendum sciret, & voluntatem ad optimum faciendum determinatam: non itaque conueniens erat ei mandatum ponere.

Rursus ex parte Dei inconueniens erat ponere mandata Christo: Tum quia Deus non habet voluntatem, cuius impletio pendeat ab alio, quod est imperfectionis: Tum quia non est dignum Deo obligare creaturam ad quicquam operandum, nisi ex naturâ ipsius, id est, quia ipsi bonum est: Nisi fortè creatura non est capax intelligendi, vel conformandi se bono suo; & propterea indiget sic gubernari.

Est itaque mādatum respectu Christi nomen personale, (quale est mis-

LIBER III. LECTIO. XI. 311

fio) & includit processionem Filij à
 Patre, & scientiam creatam Christi,
 prout à dictâ processione pendet; &
 ut dependens ab ipsâ habet vim gu-
 bernandi Christum in quantum est
 homo. Et sic patet reuerâ nullam es-
 se maiorem difficultatem de liberta-
 te Christi ratione mandati, quàm si-
 ne ipso; tota enim determinatio Chri-
 sti non est nisi ad faciendum opti-
 mum; sicut sine mandato; cum ip-
 sum mandatum non sit nisi declara-
 tio quid foret optimum: & hæc de-
 claratio non aliud, quàm discursus,
 vel alius sciendi modus, quo innotef-
 cit Christo quid sit optimum, hoc est,
 non aliud quàm ipsa determinatio
 Christi ad hoc agendum.

Ex his patet, non esse necessum re-
 currere ad hoc ut substantia mortis
 imperata sit absque circumstantijs;
 Tum quia falsum est, singulæ enim
 circumstantiæ includuntur in manda-
 to æquè atque ipsa mors. Tum quia
 non soluitur difficultas; mors enim
 secundum substantiam non erit obi-
 ta liberè, sed tantummodo materia-
 liter, vel secundum accidens; quod

312 INSTITVT. SACRARVM.
respectu naturæ intelligentis, quæ di-
stinguit rationes, est Christum non
esse mortuum liberè.

Minùs recurrendum est ad hoc vt
Christus potuerit recusare manda-
tum. In primis enim hoc & Deo in-
dignum est, vt sic proponat manda-
ta; & Christo vt etiam sic proposi-
tum non statim acceptet. Et præter-
ea loco huius vt ostendat liberta-
tem consistere cum mandato, ponit
mandatum non esse; dum enim man-
datum non obligat nondum est, &
donec potest non obligare pro tem-
pore impletionis non obligat. Et
quando impletur in hâc explicatione
ex necessitate impletur, saltem præ-
senti; prior enim saltem naturâ est
acceptatio mandati quàm impletio.
Præterea tam absurdum est Christum
posse non acceptare mandatum,
quàm posse non obedire; & eadem
prorsus difficultas.

Sed neque saluatur libertas, ex eo
quòd humanitas liberè acceptauerit
mandatum mortis. Cùm enim in pri-
mo instanti sui esse, corpus habue-
rit mortale; & quidem præuiè ad pri-
mum

num actum, qui sequitur constitutionem substantie; clarum est mortem ei determinatam fuisse à dante corpus; & non ipsius voluntati permissam. Sed & in hac sententiâ omnes actiones Christi ex necessitate presentis, & libertate præterita, putante acceptationem, ponendæ sunt fieri; qualis foret libertas illius qui non posset exire ex puteo, in quem se libere coniecisset.

Obiicies voces Christi ad Petrum, quibus docet se posse rogare patrem; & patrem in hoc casu eum saluaturum. Respondetur ex occasione verborum illorum, satis constare sensum esse, tantam esse sui dignitatem, ut leue esset imperare legionibus Angelorum, si conveniret. Unde illud *posse*, non pertinet ad potentiam libertatis, sed ad potentiam naturæ.

Petes, saltem in casu mandati talis per impossibile, an Christus foret liber? Responderur primò, liberum futurum à coactione, seu servitute, cum necessitas hæc adveniat ipsi ex principiis internis & naturalibus; & hoc satis esse, ut dicatur ipse po-

nere animam suam, & eam non auferri ab eo; & modum quidem esse nobiliorem quàm libertatis: sicut intentio finis; etsi necessaria, est nobilior quàm electio mediocrium.

Respondetur aliter, quòd quoniam facere bonum est naturale obiectum voluntatis humanæ; & Christus mandatum à Deo faciebat, quia bonum erat, seu per determinationem sui ad obediendum mandato ex principio prius habito; per consequens liberè implebat mandatum Dei; sicut facere mandatum acceptabat liberè. Quod enim à liberè resolutum pendet dum agitur, liberè etiam ipsum fit.

Et hoc fortassis est, quod alij dixerunt, qui Christi libertatem explicuerunt in eo consistere, quod in sensu diuiso poterat contrarium facere; puta antequam intelligatur esse determinatus ad hoc, vt quod Deus mandauit, faciendum iudicaret; non tempore, sed naturâ. Item quod alij dixerunt, libertatem Christi consistere in eo, quod vnio ad diuinitatem non mutauerit naturalem

LIBER III. LECTIO XII. 315

operandi modum: licet hic modus loquendi videatur potius innuere Christum duntaxat ex aternâ Dei prouidentiâ, & non ab intrinseco fuisse impeccabilem,

LECTIO XII.

De speciali qualitate Actionum

Christi Domini.

EX supra dictis deducimur ad hoc. Quod omnes Christi operationes fuerint theandricæ seu theurgicæ, hoc est, tales, vt in qualibet minimâ earum, reluceret Deum vt Deum esse authorem talis actionis; etsi non solum, sed simul etiam hominem; adeo vt qui comprehenderet minimam actionem Christi, posset ex eâ demonstratiuè colligere ipsum fuisse Deum; seu Deum cum eo esse.

Cum enim Christus non habeat aliam existentiam quàm diuinam; & virtus actionis ex necessitate debeat ab existentia nasci; & effectus magis assimilari potiori causæ; pa-

Dd ij

Iam est, quamlibet actionem Christi, ei qui penitus introspicere valeret, magis ostendere ipsum esse Deum, quam esse hominem; etiamsi tota externâ facies actionis appareret quasi hominis. Ergo si Christus comedebat, non sicut nos paulo plus vel minus, sed mathematicè quantum conducebat accipiebat. Si ambulabat, passum non temerè, sed mathematicè ubi congruebat collocabat; quæ homo purus non potest.

Dices: etiamsi verum sit purum hominem non posse sic mathematicè suas actiones regere, posset tamen homo ab Angelo directus. Non ergo ex hoc patebat esse Deum; sed à mentali quâ abstractâ gubernari. Veli addas, hoc etiam posse demonstrari, non ab intelligentiâ profectam esse actionem, siue assistente hypostasi vnâ cum homine; saltem per accidens, & non ex speciali qualitate actionis, in qua reluceat proprietas Dei, hoc convincetur: cum tam argumentum videatur plus posulare.

Respondetur, concedendo in explicatis nihil esse, ex quo proprietates Dei per se elucescebat; sed in ipsis operationibus quendam modum fuisse, quem creatura non possint imitari; videlicet quod cum intelligentia non nisi applicando actiua passiuis, mediante rarefactione, effectus naturales faciant, Christo sufficiebat dicere, aut velle; & causae secundae immediate obediabant, & faciebant quod iubebat, verbi gratia, demonium exhibat, ventus conticefcebant, mare desidebat; non ex alia causa, quam quia voluntas ipsius erat voluntas Dei. Sic itaque etiam in actionibus supra adductis, cum procederent ex phantasmatum motu, qui aliquo modo ab animâ dependebat, & ex directione Angeli procederent, comprehendens actionem, modum aliquem proprium Angelicae motioni in ijs deprehenderet; & per consequens, quoniam à solo Deo, etiam aliquis modus Deo proprius in ijs relucebat.

Dices, Deum non operari quicquam immediate, nisi solam existen-

tiam vel substantiam. Cum itaque voluntas, vel verba Christi, ex sese non contingant, neque vim habeant in creaturas, non poterunt effectus sequi; sequerentur enim ex immediatâ operatione Dei, quod est impossibile.

Respondetur, quod Deus non agat immediatè nisi existentiam, non esse ex defectu potentiae, seu virtutis actiuae, (cùm sit plenitudo entis) sed ex defectu determinationis, & ex remotione seu dissimilitudine ad rem faciendam: ex coniunctione verò cum humanitate, fit Deum esse similem cuiuscumque homo est similis; & determinatum ad omnia ad quae homo est determinatus, & propterea ad quemcumque effectum applicatur ex vi humanitatis, cum potest efficere.

Dices, humanitatem, cùm non habeat actionem supra creaturam, non posse applicare diuinam virtutem ad ipsam. Respondetur, euidens esse effectum qui procedit à Deo, ideo esse, quia voluntas Dei est vt sit; per hoc itaque præcisè quod voluntas huma-

na Christi sit vt effectus sit , sit vt sit.
etiam voluntas Dei: & sic manet vo-
luntas Dei applicata. Sed quia homi-
nes suam voluntatem applicant ad
alia mediantibus vocibus , etiam per
eas, cū opus esset, Christus poterat
voluntatem diuinam applicare.

Ex his constat omnipotentiam sim-
pliciter fuisse in Christo vt homine,
sed non simpliciter; id est, potesta-
tem quidem ad quidlibet facien-
dum; sed non tanquam foret causa
principalis, sed duntaxat vt causa in-
strumentalis. Cū enim in suā pote-
state haberet applicare voluntatem
diuinam; palam est nihil excessisse
potestatem ipsius. Cū tamen hoc
faceret per applicationem naturæ,
non suæ, patet non ex suā vi, atque
adeo tantū instrumentaliter, omni-
potentiam exercuisse.

Dices, Christum non habuisse per-
missionem à Deo quidlibet faciendi;
ac proinde non potuisse applicare
omnipotentiam nisi ad certos effe-
ctus; & per consequens, non habuisse
simpliciter omnipotentiam. Res-
pondetur, Christum non habuisse

320 INSTITVT. SACRARVM.
aliam prohibitionem, quàm sapien-
tiam sibi inditam; & per consequens;
verum est, si Christus voluisset vel
mandauisset creati nouum mun-
dum, fuisse futurum. Defuit enim so-
la voluntas, non potestas.

Ex quo rursus euidenter concludi-
tur, quòd Christus gratiarum gratis
datarum plenitudinem habebat; sed
neque gratis datam, sed connatural-
lem: vnde respectu ipsius non habe-
bant rationem gratiæ; sed neque ra-
tionem gratiarum; vt quæ non inef-
fent secundùm particulares ratio-
nes, secundùm quas reperiuntur in
hominibus sanctis; sed secundùm
vnam rationem communem omni-
potentiæ.

Hinc inferitur, non potuisse esse in
Christo voluntatem absolutam cu-
iuscumque voliti, quæ non foret im-
pleta. Nam neque sapientia permit-
tebat eum absolute velle, quod non
erat congruum factu; neque potestas
non fieri, quod absolute volebat. Si
autem hoc circa cætera sic sese habe-
bat, maxime certè circa proprium
corpus. Corpus itaque ipsius erat

subditum ipsi simpliciter ad omnia, sed secundum regulas sapientiae, ad ea omnia quae fieri conueniebant.

Ad quæ sequitur, neque intemperiam aëris, neque violentiam externam, siue hominum siue aliarum creaturarum, vim ullam habuisse contra Christum; non solum quia ex plenitudine sapientiae ea omnia poterat praeuenire; sed etiam quia vel ipsa creaturis poterat mandare, ne quid facerent in corpus suum; & ipsi corpori mandare, ne quid ab eis pateretur; sed vel resisteret, vel sese periculum sine noxâ præstaret.

Rursus patet voluntatem quâ rogauit Patrem ut passionem transferret, & si quæ similes in Christo fuerint, non fuisse absolutas, sed conditionatas; ut ipsa verba declarant: similiter motus appetitus sensitivi fuisse & præcisos, & permissos; & quod sequitur, nullatenus inuoluntarios; neque propriè passiones; cum non fuerint coacti, sed magis actiones ipsius Christi.

Petes, abstrahendo à copulatione diuinitatis ad humanitatem ex præcis

creatis dotibus humanitatis, num
 Christus potuerit impedire hos mo-
 tus appetitus sensitiui? Responderetur
 quòd cum anima Christi coniuncta
 sit corpori ad scientiam acquiren-
 dam, verè pars fuit humanitatis; &
 per consequens, non habuit virtu-
 tem imperandi toti, sed tantum ad-
 iuuandi totum, velut pars principa-
 lis; neque poterat impedire corpora
 alia in suum agere; nisi sicut ceteri
 homines, quantumuis in gradu ex-
 cellentiori.

Hinc fit, non potuisse impedire
 motum phantasie, nisi opponendo
 phantasmata phantasmatibus, & spi-
 ritus spiritibus; quos propter naturæ
 excellentiam & longam assuetudi-
 nem habebat copiosè subseruientes
 rationi, vt nunquam deessent. Sed
 & plenitudo scientiæ faciebat vt si
 vellet, omnes omnino spiritus ap-
 plicare potuisset; atque adeò vim ad-
 uersam prorsus enervare. Ex eadem
 fiebat vt nulla concussio iudicij, ne-
 que obliuio, aut erroris species ei
 subrepere posset. Adde, quòd cum
 appetitus non posset præuenire ratio-

rem, motus eius ex sese non nisi à ratione præueniente proueniebant.

Et hoc modo rem peractam esse, patet ex stupendâ agoniâ & sudore sanguineo; qui arguit tantam spirituum animalium copiam exudauisse, præ tantâ compressione & accensione spirituum, vt ijs deficientibus, succederint spiritus vitales, & ipsi exudauerint quoque; & cum ad frigus nocturnum concreuerent, in sanguinem, non prius satis immutati, rediuerint. Ex quo patet multitudine spirituum rem gestam esse, & non virtute omnipotentia.

Hinc quoque necesse fuit, vt Angelus confortaret eum; scilicet cum spiritus ei deficerent; neque posset anima alligata corpori, adeo breui spatio, quod ad passionem & effusionem sanguinis restabat, reparare hoc deliquium; Angelico ministerio, sicut olim ad suggerendos panes; sic nunc ad spiritus ex circumstante aëre progignendos, Christo opus erat; vt conuenienter ad humanæ infirmitatis leges, totum Passionis mysterium administraretur.

His nihil verantibus, non fuit aliqua voluntas in Christo alij voluntati contraria: & per consequens, nulla pugna voluntatum, puta spiritualium quæ consequuntur iudicium: patet enim vira spiritalem quæ in verbis discernitur nunquam perductam fuisse ad volitionem absolutam non moriendi, sed tantummodo ad conditionatā, vt clarum est ex ijs verbis *si possibile est, veritatem non mea, sed tua voluntas fiat; per meam, significantibus animam sensitivam.*

Ex quo rursus clarum est, nullam esse difficultatem quomodo tristitia & fructio beatifica potuerint simul consistere; cum subiecta habuerint æquē diuersa, ac sunt duæ partes continui, quarum vna potest esse alba & frigida, altera nigra & calida. Sic itaque fructio in animā spirituali erat, quæ doloris non erat capax; tristitia in appetitu sensitivo, in quo non erat gaudium.

Denique omnibus consideratis, patet Christum neque à suā carne retentum esse; quandoquidem ex propria dispositione caro in Christo sese re-

LIBER III. LECTIO XII. 325

ioni subiiciebat; & si quid contra di-
 damen animæ materialiter videba-
 ar facere, totum illud non ex suâ
 propensione, sicut in nobis; sed ab
 eternarum causarum violentiâ erat;
 vel ex imperio spiritualis animæ (no-
 stri exempli & doctrinæ causâ) spiri-
 tus sic agitante; sicut cum aqua ca-
 luit, vel ipsa caro Christi vulnerata
 effundebat sanguinem. Nulla itaque
 inter carnem & carnem pugna erat.

Dices in horto nullam fuisse cau-
 sam externam quæ posset impellere
 carnem Christi: quare necesse est ab
 ipsâ carnis infirmitate processisse
 hunc pugnam. Respondetur, nullam
 quidem fuisse causam quæ imme-
 diatè carnem secundum sensum affli-
 geret; sed propinquitatem passionis
 fuisse, quæ perphantasiam ageret in
 carnem, & eam commoveret quasi
 obiectum præsens. Neque refert ad
 hoc ut sit ab extrinseco, ut agat palam
 insensum, an larenter.

Quibus salvis, pater hoc certamen
 fuisse maximum, non solum quod va-
 quam fuit inter carnem & rationem,
 verum etiam quod esse possit confor-

miter ad leges humanæ naturæ. Cum enim quò magis sensituius est homo, tantò sit doloris capacior; Christus autem hominum possibilium maximè sensituius fuerit; sequitur obiecta pœnalia & viuissimè fuisse proposita, & sensibiliissimè fuisse in animam Christi sensituiam impressa. Quare ex parte subiecti non potuisse esse maiorem pœnæ capacitatem.

Sed & ex parte obiecti, quæ maximè affligunt hominem intelligentem, sunt pœnæ, quæ copiam spirituum congregant, & sic sunt grauiiores ijs quàm alijs; & mors quæ omnia vitæ amabilia vno ictu truncat. Ex parte verò animæ (quoniam sapientia & virtus lædi non possunt) sunt honor qui sequitur intelligentiam, & amicitia quæ comitatur virtutem; quæ læsa maximè affligunt hominem.

Sed in Christo pœnæ capiti, manibus, & pedibus, & vniuerso corpori, quæ sensu tactûs præditum est, ingeminatæ sunt, quæ sensum affligerent: Irrisio, contemptus, impropria priuatim & publicè, ab omni genere

hominum, Iudæis, Gentilibus, Sacerdotibus, Principibus, militibus, vilissimo popello, priuatis, vniuerso simul populo congesta sunt. Amicorum, qui tradebat, qui negabat, qui fugiebat: cæteri afflicti & dolore transfixi sunt.

Quare cum amor virtutis & sapientiæ fuerit incomparabiliter in Christo maior quàm in quolibet alio homine possibilis sit, pœnarum quoque susceptibilitas & actiuitas extra proportionem. Si quis præterea affectus erga temporalia, vel etiam erga proprium corpus & vitam rationaliter habetur, eodem modo maximi erant; sit impugnationem Christi fuisse eam, cui in genere humano nihil simile aut secundum possit contingere.

Vnde consequenter habetur, Charitatem quam Christus habuit in fine vitæ, non solum secundum speciem, verum etiam secundum gradum fuisse maximam, quæ in genere humano possit haberi. Cum enim anima sit forma corporis; & charitas dispositio animæ; non potest reperiri gra-

us charitatis, cui non correspondeat aliqua dispositio corporis. Cum itaque hoc certamen seu victoria Christi fuerit summa quæ humanæ naturæ competere potest, etiam charitas ad eam requisita maxima fuerit.

Similiter necesse est subjectionem corporis Christi, id est, virtutes morales Christi, tempore obitus, maximas fuisse, quæ in humanâ naturâ reperiri natæ sint: cum maxima impugnatione quæ à naturâ fieri potuit, nullam impressionem in animam spirituales facere potuerit, sed ipsa contra suffecerit ijs reiiciendis. Quare Christus consummauit quæ ad Personam suam spectabant.

Habetur etiam, quòd etiamsi humana anima secundum genus suum sit inferior Angelis; & per consequens, charitas humana secundum eam disparitatem subjecti, non possit æquare charitatem Angelicam; quia tamen charitas Christi eam superat in eâ conditione, quòd sit amor Dei ut suimet; & hæc conditio sit voluntatis, prout addit super intellectum, & per consequens, formalior quàm
illa,

illa, quâ Angeli superant homines; charitas Christi est simpliciter maxima charitatum possibilitium.

Quare concluditur humanitatem Christi, quantum creatura potest dici digna Deo, fuisse maximè idoneam quæ susciperetur ab ipso; & consequenter creaturarum dignissimam & nobilissimam; & officio suo, videlicet ad regendum mundum sub diuinitate, & reparandam naturam humanam, talem, ut nihil in eo desiderari, nihil superaddi natum sit. Ceteras verò quorumcumque Sanctorum naturas, tam longè inferiores & remotas ab ipsius humanitate esse, ut nullo modo ad susceptionem diuinitatis idoneæ reputari aut comparari valeant.

IN
S

L

Q:



perfe
tia c



INSTITVTIONVM SACRARVM

PERIPATETICIS
inædificatarum.

LIBER QVARTVS.

De admirando legio
gratiæ sacrificio.

LECTIO I.

*Quòd unicum, & quodnam, sit
legis gratiæ sacrificium.*

Huiusmodi-cùm fuerit Deus
homo, & ad hoc missus, vt
naturam humanam repara-
ret; nihil dubium quin id
perfecerit: nam neque tanta sapien-
tia quomodo parandum foret igno-

Ee ij

rare; neque tanta potentia in operando deficere; neque tanta mentis rectitudo non voluisse, vlllo modo credi potest. Sciuit itaque, & potuit; potuit, & voluit. Quate nihil ambigendum, quin, vt oportuit fieri, peregerit.

Reparatio autem humanæ naturæ nulla est, nisi, sicut in statu innocentia, ex vi status, peccatum erat in paucioribus, plerique verò ad finem, ad quem facti erant, peruenturi; sic multò maior hominum pars ad beatitudinem sit per Christi reparationem peruentura. Quòd cum in vna hominum ætate, quantumuis omnes salui forent, effici non possit; necesse est, ad reparationem humanæ naturæ, vt hæc felicitas per plura sæcula sit duratura.

Cùm itaque mortalia, non nisi suffectis nouis indiuiduis, plura sæcula occupent; neque successionem sine vi quâdam seminariâ reperiant; consequens est, talem à Christo Domino naturæ nostræ inditam esse, in ordine ad bonam vitam, per quam ad beatitudinem peruenitur. Bonam

autem vitam civilem legum præscriptis, & præfectorum legum observationi vigilantia perpetuari experimur.

Hoc igitur in operibus diuinis cum cernamus inuiolatum, vt secundum serum naturas omnia administrètur, vt quæ propter semetipsarum, & non propter Dei indigentiam creata sunt; sit & leges, & præfectos legum, Christianæ vitæ necessarios esse, atque adeo existere. Et cum præsides homines non nisi ad externa aduigilare nati sint, necessum quoque est corporalia & externa opera præcepta esse, per quorum curam spiritus recto Christianæ vitæ tramite dirigantur.

Hæc, quatenus eiusmodi sunt, quæ indifferenter omnium saluti sunt necessaria, vt communiter quoque obseruentur, ab illo vno, cui omnes voluntates subiectæ esse debent, institui debebant. Sunt itaque à Christo instituta quædam exteriora opera, cuius effectus sint interiores, atque adeo Christianæ vitæ perfectio; quæ ab omnibus Christianis obseruari de-

beant publicitùs; & prælati eorum obseruationi inuigilare teneantur.

Quoniam verò totius Religionis, seu vitæ Christianæ, & principium & terminus est Deus; palam est præcipuum & indispensabile eiusdem opus, esse agnoscere Deum, atque adeò primam actionem publicam, naturæ reparatæ à Christo imperandam, esse publicam testificationem quòd Deus sit essendi & omnis perfectionis author; quòd, consuetâ loquendi inter homines formulâ, dicitur esse vitæ necisque Dominum & authorem.

Hoc vt non volatilibus & fugacibus tantummodo verbis, sed etiam spectabili solemnitate, & verè per fideles oculos animæ imprimatur; humano more, suppositione alienæ vitæ vice nostræ ipsius, peragi solet. Inde sacræ animalium cædes: sacrum enim dicitur quod Deo appropriatum est; & quia quod occisum est, non ultra eripi dominio Dei poterat, & ipsius solius postmodum potestati est subiectum, quod sic occidebatur, fieri sacrum, & actio, sacrificium dicebatur.

Neque siue spectetur quid homo debeat, vel quid Deo conueniat, & quid summa sapientia instituere debeat, dubitari potest quodnam animal Deo sacrum fieri debeat: omnibus enim titulis venit summum, hoc est, ipse homo. Neque minùs dubitari potest, quin ipsæ primitiæ, & si quid eminet in nostro genere seponendum sit ad tale ministerium: atque adeò nihil esse ex sese optimum sacrificatu, præter ipsum Christum Dominum primogenitum totius creaturæ.

Rursus, si vtilitatem humanæ naturæ spectemus, & hostiam aliam quamlibet ad hanc comparemus, & hanc ipsam ad nostram; sit è vestigio perspicuum, admirationem; deuotionem; reuerentiam, humilitatem, & quæ aliæ virtutes sacrificio interuenire natæ sunt, tantò sublimiùs eleuari ex contemplatione talis hostiæ, vt alia quælibet incomparabiliter præcedatur, & quasi mortua appareat, in comparatione ad tam dignum & sublime sacrificium.

Idem expectari etiam inde potest,

quòd cùm sacrificium sapiùs reperitum sit , habiturus sit populus Christianus Deum nobiliori modo præsentem, quàm olim fuit in Synagoga super arcâ propitiatorij, cui præsens præsenti preces, oblationes, ipsas suas misérias repræsenteret. Quod quantæ deuotionis & fames & esca sit, norunt qui vim phantasiæ nostræ super animam, & præsentiæ obiecti super phantasiam attentè vel experti sunt, vel contemplati.

Sed cùm sacrificium hoc concomitantèr habeat vt sacrificantes participes fiant, & comedant de sacrificio, & quasi de eâdem mensâ cum Deo; quos charitatis feruores non excitabunt? quas extases & liquefactiones animarum non prouocabunt hæc cogitata? Deum ipsum suâ nos carne pascere, suo nos sanguine potare, in ore, in pectore gestari, coram adorari, spectari, tangi, misérias nostras non horrere, ad negligentias & peccata conuiuere, & similia; quæ assueti, cuius sint efficacis, quotidie experiuntur.

Tandem cùm ministri qui Deum tractant,

tractant, & pro cælesti arbitrio dispensant, dantes & negantes quibus sic conuenit, ijdem sint qui etiam euangelica præcepta populo tradunt; quantam & in semetipsis sanctimoniam, & à populis reuerentiam inde colligere nati sunt? Quare cum reuerentia & æstimatio prædicatorum sit cardo credulitatis populi, & gubernationis animarum; palam est, vtilitatem Ecclesiæ inæstimabilem ex hoc capite oriri.

Harum itaque conditionum quamlibet si mente tuâ vni Ecclesiæ adijcias, alteri demas; & attentè sequelam morum & differentiam sanctitatis, quatenus ex tali capite proficisci nata est, consideres; non poteris non vnam viuam, alteram mortuam; vnam cælo lapsam, alteram nihil vltra humanam inuentionem sapientem æstimare: adeo singulæ conditiones necessariae sunt, & nulla sine ingenti lacunâ deficere potest.

Cùm itaque totius diuinæ æconomix, ab vsque ipsâ conditurâ mundi ad consummationem sanctorum, cernamus regulam esse vtilitatem ge-

neris humani ; eamque præsertim quæ constituitur in formali præparatione animorum ad æternam beatitudinem ; nullus superest ambigendi locus, quin sacrificium quo immoletur Deo in Ecclesiâ ipse Christus Dominus, ab ipso met sit institutum ; ipsâ eius vtilitate conuincente possibilitatem ; postquam omnis possibilitas à bonitate Dei ortum habet.

Ex his patet, vnicum esse à Christo institutum sacrificium ; neque aliud Christianæ legis posse à quoquam institui. Cum enim hoc sacrificium tale sit, vt omnium possibilium sacrificiorum virtutes & conditiones in sese contineat ; sed & sacrificium sit ex naturâ suâ præcipuus externus actus Christianæ Religionis ; palam est neque quenquam præter Christum posse instituere sacrificium legis Christianæ ; neque aliud vllum esse necessarium ; neque quicquam aliud dignum quod in sacrificium assumatur.

LECTIO II.

In quo consistat & materialiter, & formaliter, ratio huius sacrificij.

EVidentissimum protinùs est, nihil indignius esse, quàm ut ea quæ in sacrificijs nata sunt fieri, Christo Domino nostro fiant in propriâ suâ specie. Cùm enim statutum sibi cursum consummaverit, & corpus suum subjecerit animæ perfectè, (quòd est viatorum pensum) reliquum est, ut secundùm ipsum corpus ad statum quietis deueniret, neque ipsum corpus ulterius mutationi subjaceat. Nō itaque ei competere potest, sacrificari secundùm propriam speciem.

Et, si non repugnaret ex parte corporis Dominici, quandoquidem tamen ad honorem & admirationem eiusdem, & amorem super omnia erudimur, omnino foret contra intentionem vitæ & legis Christianæ, ea in ipsum exercere, quæ in nequissimos & vilissimos homines non abs-

que auersatione & horrore fieri conspicimus, & facientes odio habemus & execramur. Quæ tamen necesse foret fieri à sanctissimis viris, & spectari ab vniuerso populo, si Christus deberet in propriâ specie sacrificari.

Adde, quòd cùm ad sacrificij rationem consequatur participatio, id est, manducatio hostiæ vel reliquiarum; sit autem contra charitatem naturalem, & supremus impietatis & barbariei gradus, vesci humanis carnibus: nihilominus, si Christus in propriâ specie sacrificaretur, etiam in propriâ specie manducandus foret; & loco pietatis, ad crudelitatem & extremam nequitiam in mensâ Dominicâ erudiremur.

Quoniam itaque Christus non in propriâ specie sit sacrificandus, attamen in specie manducabili, & eâ quidem toti humano generi gratâ & acceptabili: nihilque ex rebus vescis vel tam vniuersale sit, vel minùs repugnans dispositioni singularium hominum, quàm panis: esto in specie panis sacrificandus. Sed quo-

niam legitima manducatio non ex solo mastigabili, id est, calido & sicco sed etiam ex humido & frigido, id est, liquido conflatur; ut ex omnibus elementis quibus constamus etiam nutriamur; neque quicquam sit quod in consortium oblationis cum Christo venire mereatur: Ipsemet etiam sub vini quoque formâ esto sacrificandus.

Sed hæc vestitio Christi speciebus alienis non potest per puram alterationem perfici: cum sic spoliaretur suis; neque remaneret perfectus homo; sed, quantum ad facultatem operandi corporaliter, magis panis quam homo; cum operatio sequatur qualitatem accidentium. Adde quod (ut dictum est) violaretur in eo status quietis corporeæ, & termini, in quo iam collocatus est, si subiaceret mutationi suorum accidentium.

Eâdem operâ conclusum est, non fieri additionem solius quantitatis qualificatæ cæteris accidentibus, ad corpus Christi; sic enim, ex eo quod proportio quâtitatis ad corpus Christi foret major quam prius, sequeretur corpus Christi esse rarefactum, id

est, alteratum. Præterea cùm cætera qualitates intrinsecè includant, & supponant certum gradum raritatis & densitatis, totum corpus Christi à naturali suâ dispositione foret remotum.

Consequenter neque corpus Christi assumit sibi materiam, quasi per creationem, quæ non fuerit priùs, in quâ has species alienas sibi induat. Cùm enim materia ex sese sit indivisibilis, simul creata est (quantum creari potest) & tota quantitati subiecta; vnde non potest assumi ad vnum corpus, nisi detrahatur ab alio. Adde quòd si foris desumeretur, aut mundus ampliari deberet ad recipiendum augmentum corporis Christi; vel alia corpora còdensari ad faciendum ipsi locum; quorum neutrum rerum naturæ accommodatum est.

Confectum itaque est, Christo indui has species ex conuersione alicuius alterius corporis in corpus Christi, ex quâ consequitur, corpus Christi habere virtutem sustinendi similes species, absque vllâ mutatione earum qualitatum, quæ

eum ex naturæ humanæ ratione consequuntur. Cum enim non possit habere eas, absque eo quod virtus alterius corporis in eum transeat, palam est, tale corpus neque amplius esse; cum virtus ipsius sit substantia eius; neque interiisse, cum ea virtus in Christo maneat. Palam igitur est, esse conuersum in corpus ipsius.

Rursus manifestum est, hanc conuersionem non esse formalem, per quam naturali modo vnum corpus transmutatur in aliud. Talis enim fit per hoc, quod qualitates corporis mutati, mutantur in qualitates corporis in quod fit cōuersio; hic autem ē contra corpus in quod fit cōuersio, absq; iacturā suarū qualitatū, coassumit sibi qualitates corporis in sese conuersi.

Liquet ad hæc, substantiam corporis conuersi non esse sub speciebus ipsdem cum corpore Christi: corpus enim conuersum non manet in suâ specie. Præterea easdem qualitates esse duorum corporum, prorsus intelligibile est; cum non sint nisi determinationes & fines substantiæ. Adde quod ipsa præsentia seu locali-

344 INSTITVT. SACRARVM.

tas consequitur quantitatis rationem; unde absque eo quod eadē sit vtriusque quantitas, non potest vtrumque esse hīc. Tandem non vnum ens, sed vnum ex pluribus, id est, nullum, designaretur sensu & pronomine *hoc*. Præterquàm quòd quā vnitate duo hæc corpora sint vnita, non est intelligibile.

His confectis non superest nisi vt indiuidua seu prima substantia corporis conuersi, siue panis, immediatè conuertatur in corpus Christi, manentibus accidentibus ijsdem: vnde fiet vt corpus Christi sit sub speciebus panis. Cùm enim hæc actio sit conuersio, & non accidentalis, quia accidentia manent; neque partialis seu formalis, cùm materia non approprietur alteri formæ, quod fit per mutationem accidentium, & per consequens non separentur materia & forma: non restat nisi vt vtraque simul conuertatur indiuisibiliter in materiam & formam Christi. Quæ actio imposito, ab Ecclesiâ nomine, dicitur *Transsubstantiatio*.

Hic meminerimus, destructionem

animalis fieri per hoc, quòd sanguis, & reliquum animalis, quæ vnum quidpiam erant in animali, separentur & fiant & loco & substantijs plura; sicque sublatâ vnitatem non vltius remaneat entitas animalis: & considerato, quòd si corpus Christi subiiciatur speciebus panis, & sanguis Christi speciebus vini, verè corpus & sanguis fiant hoc & hoc, id est, plura; euidens fit, destructionis Christi rationem non deesse, quòminus Christianum sacrificium integretur.

Dices, æquivocè sumi rationem huius & huius: cùm enim naturale sit hominibus per accidentia indiuiduantia designare & determinare indiuidua; quodcumque habet diuersa accidentia indiuiduantia, meritò dicetur aliud hoc. Verum hoc non obstat quin indiuiduum verè dicatur indiuiduum per vnitatem substantialem præuiam accidentaria huic denominationi; quæque eadem est in corpore Christi ante & post sacrificium; & sic verè non fiunt corpus & sanguis hoc & hoc.

Respondetur, quòd formaliter lo-

quando, aliud est Christus, & aliud corpus Christi; & ex specie realis actionis posse contingere, vt operetur circa idem corpus secundum vnâ rationem, & non secundum aliam; sicut ignis calefaciens aquam, non tollit formaliter humiditatem, sed tantum frigus. Sic itaque contingit transubstantiationem versari circa ens quod est Christus, non quatenus Christus, sed quatenus corpus Christi est; & sic effectum, quatenus dependet ab hac actione, non esse Christum, sed corpus Christi; quod (quoniam actio est substantialis) facit ipsam effectum esse substantialiter alium sub speciebus panis; quàm sub speciebus vini.

Quare *τὸ* Hoc post consecrationem est quidditatiuè corpus, non autem quidditatiuè Christus; cum Christum esse corpus, vel corpus esse Christum, non sit magis formaliter verum, quàm animal esse manum vel pedem, aut è contrâ, pedem esse animal.

Petes, in quo consistat hæc substantialis differentia Christi in se, &

Christi in sacrificio? Respondetur, in hoc quod Christus ut in sacrificio sit formaliter aliud genus entis quam in cœlo; & quod si quærat, quid sit hoc ens in sacrificio, qui velit in rigore logico respondere, dicere debeat, esse corpus Christi; & si velit alias differentias addere, nunquam debeat addere quod includat sanguinem, vel vitam, vel aliud quod non possit competere corpori mortuo. De Christo autem in cœlo, prædicata quidditatiua directæ omnia debent significare ipsam totius rationem.

Et quoniam ens est naturale secundum officium & locum quem habet in naturâ; & corpus vel sanguis Christi non habet officium viventis in naturâ secundum hunc modum existendi, sed secundum diuersum; dicendum est Christum in cœlo, & corpus Christi in sacrificio (etsi sint materialiter idem ens, & tantum differant ex eo quod ex vi positionis quod est directum in vno sit indirectum in alio) ex vi suarum positionum constituere duas species seu essentias en-

ris naturalis; & similiter etiam corpus & sanguinem condistinctas esse naturalium entium species: quare illa per hanc actionem facta esse verè hoc & hoc, seu diuisa.

Si itaque per adiunctas preces hæc actio determinetur, vt sit in testimonium & honorem deitatis facta; patet nihil ad sacrificij rationem deesse. Immò etsi ex solo modo agendi aliud foret sanguis, aliud corpus, salua foret sacrificij ratio; quæ non consistit in re factâ, sed in ipsâ actione; cùm testificatio sit primò in verbis, & in actione tantùm vt idem oculis repræsentante, quod voces per aures infundunt. Vnde ratio manentis post actionem finitam, est accidentalis rationi sacrificij.

Facilè ex his ostenditur, quomodo hoc sacrificium sit repræsentatio sacrificij crucis, seu passionis Domini: cùm enim nihil repræsentet nisi quod est simile; & simile sit quod formaliter est vnum, materialiter diuersum; euident quoque sit ex explicatione factâ, sacrificium hoc cum morte Christi conuenire in formali,

puta in separatione corporis & sanguinis; differre quoque in materiali, puta quòd maneant non idem; conficitur hoc sacrificium esse expressissimam repræsentationem passionis Christi.

Patet etiam non posse consistere rationem sacrificij, in eo quod est esse purè repræsentationem passionis. Quia cùm imago non sit prototypum, si non aliunde haberet rationem sacrificij, nisi quia repræsentaret, non esset nisi æquiucòcè sacrificium; sicut pictus homo est homo. Præterquam quòd species panis & vini, imperfectissimè repræsentant corpus & sanguinem, nedum formalem eorum separationem. Deinde ipsum prototypum non habet perfectam rationem sacrificij: longè itaque minùs repræsentatio potest ex eo habere rationem sacrificij.

Verum nihilominus est, in ipsâ sacrificij huius ratione, includi quod sit repræsentatio passionis; cùm ex ipsâ vi verborum (in quibus potissimè residet testificationis vis) exprimitur relatio ad passionem: sed & ipsa

actio, ex vi institutionis & formæ ipsius, non sit aliud quàm positio ipsius passionis, absque illis conditionibus quibus reuerentiæ & amoris generis humani in Christum detraheretur.

Ex his patet, rationem sacrificij non rectè explicari per hoc, quod dicatur ex pane, quod est corpus non mactatum, fieri corpus mactatum; nisi valde formaliter accipiatur, pro hoc quod est, fieri corpus ex mactatione: sed etiam tunc non est panis transmutatio in quo consistit ratio sacrificij, vt videtur hæc explicatio insinuare, sed corpus Christi non mactatū, quod sit mactatum. Et sensus quidem explicationis videtur ad hoc tendere; vt corpus mactatum, significet crucifixum; quod non potest ingredi rationem huius sacrificij: similiter, quòd corpus Christi redditum sit manducabile ex non manducabili, formaliter non pertinet ad rationem sacrificij; cū neque omne manducabile sit sacrificium; neque omne sacrificium sit manducabile. Materialiter tamen accipiendo quod

viuum corpus non manducetur, sed occidatur vt manducari possit; fieri manducabile est fieri mortuum; & sic fieri manducabile est sacrificari.

Eodem modo dicendum est, sacrificij rationem non consistere in destructione panis & vini formaliter; sic enim verè panis & vinum, non Christus Dominus, foret hostia. Quatenus tamen per ipsam destructionem harum substantiarum corpus Christi ab eiusdem sanguine separatur, eatenus potest materialiter dici sacrificium consistere in destructione panis & vini.

Sed quia panis & vinum moraliter non destruuntur, sed mutantur in aliud; verè non est hæc destructio sufficiens ad testificationem, quæ necessaria est ad rationem sacrificij; quæ requirit vt non remaneat ex re sacrificatâ quidpiam æstimabile, vt verè destructum sit: In præsentia autem manet aliquid melius substantijs destructis; puta corpus Christi. Quod itaque dicantur hæ oblationes aliquando hostia, intelligendum est materialiter, vt designet ea esse materiam hostiæ, ex quâ fit hostia.

Patet consequenter, hostiam seu materiam circà quam versatur sacrificatio, & terminum à quo esse Christum viuum, seu prout viuum; ex quo fit Christus mortuus. Ex quo patet non potuisse tempore mortis Christi fieri sacrificium: sicut cæremonia Ecclesiastica etiamnum retinet; quia non fit mortuus nisi ex viuo; tunc autem non erat viuus ex quo fieret.

Euidens quoque est, consecratione alterius duntaxat speciei, non fieri integrè sacrificium; cùm non fiat aliud corpus, aliud sanguis; quod necessum est ad diuisionem: diuisio enim facit plura ex vno. Ponitur tamen corpus non posito sanguine. Sed hoc non sufficit ad repræsentationem quæ debet exprimere, non confundere essentiam repræsentati.

LECT

LECTIO III.

*De significatione vocum, Corpus,
sanguis, meum.*

EX dictis non est difficile intelligi Equid in hoc sacrificio, siue in consecratione ipsius, significatum veniat nominibus corporis & sanguinis; quæ clarum est accipi pro partibus distinctis, & constantibus Christum Dominum quasi mortuum: & quæcumque dicentur de vno termino, poterunt proportionaliter intelligi de altero, aut certè pleraque, vt non sit opus specialiter de singulis discurre.

In primis itaque euidens est, nomine corporis, non significari materiam primam, siue nudam, siue vestitam & connotantem accidentia, vt loquuntur: etenim, vt constat ex Philosophiâ, non est actu in composito: sed neque si foret, etiam hoc aliquid foret; vt posset significari per vocem *Hoc*. Et tandem non est ex se-

se capax essendi, vt possit de eâ simpliciter dici *est*. Et tandem nuda, communis est corpori & sanguini; & non explicat quòd corpus condistingatur contra sanguinem.

Tantâdem operâ rejicitur eadem materia prima induta formâ corporeitatis, vel formis partialibus membrorum humanorum: cùm enim constet paritèr ex Philosophiâ vnicam posse esse formam substantialem vnius entis naturalis; præter communem labem quam habent compositionis per partes actu, & cumulationis entitatis supra entitatem, id est, substantiæ supra substantiam, imbecillitèr transferuntur ad fidei mysteria declaranda: cùm primò disputandum sit, an sint aliqua talia in rerum naturâ.

Eâdem facilitate agitur contra illos, qui rationem communem corporis, vel certè aliquam rationem, corpori animalis viuo & mortuo communem faciunt huius vocis significatum. Cùm enim tum ex voce *hoc*, tum ex voce *meum*, sit constans, singulare, & primam quandam substantiam

esse de quo agitur; palam est non posse in ratione aliquâ communi & indifferêti ad plura collocari. Adde quòd rationes communes non sunt capaces essendi, nisi in particularibus; & proinde non sunt in inferioribus nisi in potentiâ rationis, in quâ solâ possunt existere separatæ.

Sed nequè significare potest corpus Christi prout in sepulchro sine sanguine iacuit; sic enim includit formam cadauericam; neque potest in hoc sensu applicari ad corpus viuum Christi, quale erat in vltimâ cœnâ, vel est in cælo; neque corpus frangibile, vel sanguinem affundendum. Si itaque necesse sit etiam applicari ad corpus viuum, non significat corpus prout excludit sanguinem; cùm vita in sanguine sit; vel certè sine sanguine non possit esse.

Ratio quoque communis corpori viuo & mortuo, etsi apprehēdi possit, ea tamē neque particularis est, vt supra dictum est, vt existere possit; neque determinata ad corpus animalis; quod ita vitam includit, vt animal mortuum æquiucè dicatur animal;

& tantundem est de oculo, manu, pede viuentis & mortui animalis; & tamen corpus prout distinguitur contra sanguinem, clarè significat corpus animalis quod sit compars sanguini.

Supereft ex dictis, materialiter seu entitatiuè loquendo, corpus siue sanguinem non significare aliud, quàm ipsum Christum Dominum: proformali autem vim seu virtutem illam quam in cōmunes operationes Christi habet substantia corporea reliqua secluso sanguine, vel sanguis secluso corpore: sicut enim pes, aut manus, aut oculus apprehenditur quasi animal quoddam de se, & habens specialem operationem; sic & caro, & os, & totum corpus secluso sanguine, & sanguis seclusis reliquis, proprietatem quandam habent, etiam si sine alijs ea non possit exerceri, secundum quam Christus dicatur corpus vel sanguis. Significant itaque corpus & sanguis Christum vt natum facere tales operationes suas, quatenus ab his partibus procedunt.

Cum enim in composito naturali,

nihil sit actu præter ipsum compositum seu totum, clarum est non esse assignandum aliud materiale cui libet reali prædicato quod sit in Christo, præter ipsum Christum. Formale autem, cum eiusmodi sit, ut per illud reliquum Christi condistinguantur à sanguine; sit particulare, utpote quod requirat accidentia determinantia usque ad ultimam indiuiduationem; possitque Christus dici *hoc & meum*, secundum illud; & nominis usurpationi sit accommodatum; palam est esse rectè factam nominis declarationem.

Obijcies, hanc rationem explicatam corporis vel sanguinis, non esse ralem, ut possit ex sese existere; & per consequens possit dici, *hoc est*. Respondetur, non esse rationum existere vel esse hæc; sed suppositorum secundum rationes existere; & sic quoniam hæc ratio particularis est, secundum eam suppositum est *hoc & existens*. Rursus nulla pars nata est existere extra compositum eadem qua in composito, sed diuersæ qualitaris: & sic hæc ratio existit in ea-

dauere, sed cum immutatione aliquâ, & imperfectione propriâ cadaueri.

Dices, saltem sequi esse rationem aliquam communem corpori viuo & mortuo. Responderetur, nomen corporis dici tantummodo analogicè de Christo viuo & mortuo, in hoc vsu vocis corporis; in viuo enim hæc ratio significat virtutem carnis, ossium, neruorum, &c, ad operationes vitales; in cadauere verò tantum ad operationes mixti; & dicitur corpus hominis non aliâ ratione, quàm quòd ex homine factum sit, seu reliquum corporis humani.

Neque hoc vetat, si Sacramentum corporis Christi conseruatum fuisset vsque ad mortem ipsius, quin ex vi verborum, forma cadaueris & cadauer fuisset sub speciebus. Cùm enim ex vi verborum, corpus positum fuisset tale, vt ex eo natum esset deuenire corpus mortuum, & causa causæ sit causa causati, accedentibus circumstantijs ex vi verborum futurum erat corpus mortuum existere.

Pari modo accipitur, quid significat.

cetur hâc voce *hoc*. Cùm enim clarum sit *hos* significare hæceitatem vt loquuntur, hoc est indiuidualem proprietatem; illa verò & constituitur, & cognoscitur per collectionem accidentium; patet voce *hoc*, exprimi pro formali quod cognoscitur, collectionem accidentium; pro materiali verò & confuso, subiectum in quo sunt.

Neque refert quòd *hoc*, sit vox designatiua; esse enim designatiuam non pertinet ad significationem, sed est per accidens: designare enim significat externo aliquo gestu (vt intento digito) adiuuare vel dirigere phantasiam personæ ad quam est sermo: significatio verò vocis est ad quam ducuntur sensus, & ijs mediantibus phantasia: vnde patet designationis vim esse accidentalem significationi.

Dices, *hoc* significare substantiam, & esse pronomen, non adiectiuum; quare non accidentia, sed vt minimum gradus indiuidualis substantiæ significatur hâc voce. Respondetur, significare quidem sub-

stantiam, sed sicut omnia adiectiua, in confuso; sicut album cū substantiuè ponitur; neque alia est vis pronominis: palam autem est, significare pro formali accidentia; cū significet rem quatenus subiicitur sensibus; alioqui non concomitaretur designationem.

Ex quibus non tam soluitur, quā perit difficultas prementium vocem *hoc*, dum primò promuntiatur, significare panem; ac proinde sensum propositionis esse, panem esse corpus Christi: præterquam enim quod non significat panem secundum propria, sed secundum accidentia communia ipsi, & corpori Christi; hoc est, panem secundum quod remanet de pane; & quod sit prædicati determinare subiectum; dicendum est voces nostras sæpius deficere à mente nostrâ, & tunc non mentem ad voces, sed voces ad mentem trahendas esse. Cū igitur volens efficere corpus de pane, non posset aliter sese explicare, voces sic intelligendæ sunt, ut conuenit huic effectui, si quæ in parte sint minùs explicitæ.

Ex

Ex quibus iterum clarum est, non inuertendam esse propositionem; ut ordo sit, *corpus meum est hoc*; sed prout iacet explicandam esse, *hoc est corpus meum*; designatum enim eo ipso habet rationem tum subiecti, tum manifesti; occultum autem de manifesto; & non designatum de designato, pronuciari natum est; & usu ipso dicimus, *hoc est caro, illud panis*; non è contra, *panis est hoc, caro illud*.

Rursus, *Hoc*, ex naturâ rei est particulare, *corpus commune* ex suâ significatione; & ex vi mysterij etiam *corpus meum*, quod de corpore loquentis, & de eo quod sub speciebus est, prædicabile fit. Quare corpus de *hoc*, non *hoc* de corpore prædicandum est. Adde quòd ex vi propositionis, corpus Christi trahitur ad locum panis, magis quàm panis ad corpus Christi: quare corpus Christi non nisi ex vi *est*, id est, consummatâ propositione, inest. Post itaque copulam, non ante, construenda est vox corporis.

Non minùs clarum est, per vocem *meum*, significari Personam Christi;

cum *ego* personæ sit expressio : non tamen propterea persona erit ex vi verborum sub speciebus sacris ; quia non ex vi vocis *meum* , est connexio inter corpus est Personam ; vt patet cum dicimus meus equus , mea domus ; quæ tamen non sunt vbicumque ego. Deinde *meum* est vox adiectiua, & additur designatiuè , vt significet , hoc est corpus , cui accidit esse in meâ personâ, siue de quo quodnam sit ex eo cognoscetis , quia est illud idem quod est in meâ personâ. Non autem exponenda est particula *meum* formaliter , vt significet, hoc est corpus Iesu quatenus Deus est. Neque melius explicatur *meum*, significare corpus meæ naturæ : semper enim meæ naturæ , dicit naturam meæ Personæ. Et rursus natura saltem foret ex vi verborum ; & per consequens , sanguis & anima , quæ pertinent ad naturam.

Obijcies , esse de ratione substantiæ vt sic , esse suppositum ; quare de ratione corporis ; & per consequens , persona est ex vi verborum sub speciebus. Respondetur, non esse du-

bium quin sit de ratione superiorum, ut differentias habeant; sed non propterea ipsæ differentię sunt de ratione communium; necesse enim est communia à particularibus solâ confusione & explicatione distingui. Sic itaque cum particularitas quâ substantia est suppositum, non explicetur nomine substantię vel corporis, ipsum suppositum non erit ex vi earum vocum sub speciebus. Adde quod ratio corporis explicata, est ratio partis & non totius; & per consequens, differentię proprię talis rationis non faciunt suppositum, sed individuum partis.

LECTIO IV.

*Quid sit esse concomitanter sub
sacris speciebus.*

Cum autem quęcumque sunt in substantiâ, sunt idem cum ipsâ substantiâ, ex eo quod vnum solum est actu in eâ; sit ubicūque est substantia, ibi etiâ esse quicquid in substantiâ est,

H h ij

quasi partes cum toto. Et, quod sequitur, quicquid hoc modo in corpore Christi est, etiam sub speciebus esse. Quod solet dici per concomitantiam esse, vel ex naturali connexionem partium inter se.

Ex quo patet, sanguinem, animam, diuinitatem Verbi, actus, habitus tum animæ tum corporis, & vno verbo quæcumque sunt in Christo in celo quasi aliquid Christi, vniuersa esse in speciebus panis ex coniunctione cum corpore; & sub speciebus vini per coniunctionem cum sanguine. Adde esse sub speciebus ipsum sitū membrorum qui statione vel sessione mutatur; propterea quod diuersa connexio partium sanguinis, & aliquarum partium corporis in similibus mutationibus eueniat; cum necessaria sit aliorum musculorum extensio, aliorum laxatio.

Neque specialis est difficultas de quantitate seu extensione Christi, cum non sit aliud quantitatem esse hic, quam quantitatem esse quantitatem corporis quod est coniunctum speciebus. Vnde non sequitur, quan-

itas est in speciebus, ergo extendit corpus Christi respectu specierum; vel corporum circumstantium species; sed tantummodo hinc esse extensionem quā Christus respectu carnis extenditur. Ut patet si loco *scilicet* supponatur, *est coniuncta corpori quod est sub speciebus*. Ex quo non magis sequitur, extendit respectu specierum, quam si manus est aliquid corporis quod est caput, sequitur extendere digitos in capite.

Dices: ergo saltem similiter potest dici, pedes per concomitantiam esse in pileo; cum sint aliquid corporis quod est coniunctum capiti. Respondetur negando sequelam; non enim quicquid coniunctum est inexistenti, ipsum inexistit per concomitantiam in eo in quo aliud existit; sed quod sic coniunctum est inexistenti, ut sit idem inexistenti, vel aliquid eius. Pes itaque & caput erunt in eo in quo est animal per concomitantiam; non tamen animal erit ubi pes est; quia non animal est aliquid pedis, sed pes est aliquid animalis; & ubi totum, ibi partes; non autem

vbi pars ibi totum, vel etiam alia pars.

Ex quibus rursus patet, cum dicitur Pater & Spiritus Sanctus esse concomitanter in hoc Sacramento, concomitantiam dici largius; quia scilicet sunt per circuminseffionem in Filio, qui Filius est concomitanter sub speciebus. Cum enim sint personæ diuersæ à Filio, non concomitantur eum sicut partes & affectiones; sed magis quasi amici. Vnde non possunt de ijs efferri prædicata quæ propter naturalem connexionem dicuntur, vt circumferri, manducari, esse hoc, & similia, quæ de cæteris dicuntur saltem per accidens.

Petes, vtrum possit dici Christum esse in cælo sub speciebus; hoc est, non esse in cælo Christum, esse sub speciebus; vel è contra, species esse in cælo? Respondetur, voci adiectiuæ competere duas explicationes, formalem, & materialem; sicut cum dicitur album est dulce, materialiter accipitur non album: non enim quia, vel quatenus album, propterea, vel eatenus est dulce. Cum autem dici-

tur, album disgregat visum, formaliter explicatur; quia subiectum hanc operationem ab albedine habet.

Sic quoque cum dicitur, Christus secundum hoc quo in cælo existit, continetur sub speciebus, materialiter verum est; quia quantitas Christi per quam in cælo est, est sub speciebus. Formaliter verò significat quantitatem respectu specierum exercere hanc rationem formalem ponendi Christum in cælo; quod manifestè est absurdum. Par est ratio de altero membro, quòd species sint in cælo: si enim sensus est esse in Christo qui est in cælo; seu Christum, qui habet species, esse in cælo; clara veritas est: si species habere relationem specialem ad cælum, æquè clarè falsum est.

Dices, cum Christus quantitatiuè sit vnum cum cælo, sequi ipsum cælum propter hanc vnitatem, debere dici esse in speciebus. Respondetur, quod non dicitur esse in aliquo nisi quia est in alio, si non dicitur esse in illo alio, non dicetur esse in primo. Cælum autem propter hanc vnita-

tem non dicitur esse in Christo, multò itaque minùs dicitur esse sub speciebus, sub quibus Christus est.

Hinc etiam patet ratio cur non dicatur humanitas Christi esse vbique, æquè atque diuinitas cui conjuncta est: Cùm enim non sit dubium, quin Persona seu homo sit vbique; si humanitatem Christi esse vbique, non significaret aliud quàm humanitatem esse in eo qui est vbiquè, vtiquè diceretur esse vbiquè. Quod itaq; rejicitur, est quia intelligitur per hanc propositionem, quod Christus vt homo sit vbique; id est, quod habeat hoc ex conditionibus proprijs humanitati: & sic apparet propositionem propter periculum erroris rejctam, quod plerumque euenit, cùm diuersa prædicata singulis Christi naturis conueniunt intrà idem genus.

Ex dictis facile est distinguere, quid sit Christum esse sub speciebus, ab eo quod est Christum esse præsentem sub speciebus, vel per species. Esse enim sub speciebus, vnitatem ad species dicit; qualem verbi gratia habet substantia ad quãtitatem suam.

Præsentia autem explicat ordinem ad locum specierum : unde patet species non esse locum corporis Christi ; neq; Christū in ijs vt in loco ; sed esse in loco ipsarum per ipsas quasi in loco.

Non itaque Christus secundum suam propriam quantitatem est circumscriptiue in loco specierum, seu præsens nobis ; quod esset quantitatem ipsius habere terminos eosdem, qui sunt loci specierum ; sed secundum quantitatem specierum est quodammodo circumscriptiue in hoc loco ; cum secundum eas, habeat terminos quantitatis sub quâ est, communes tum loco, siue eosdem qui sunt loci. Quoniam tamen vox *circumscriptiue*, videatur inducere quod non sit in alio loco, non solet applicari existentie Christi in loco specierum. Similiter patet Christum non esse definitiue sub speciebus in sensu Sanctorum, qui definitiue expleauerunt pro eo quod est sic esse in loco, vt non sit alibi : patet enim Christum & sub alijs speciebus, & in celo, non obstante hac localitate esse. Moderni verò hanc vocem ad alias significa-

tionem transtulere, neque voci congruentes, neque naturæ; sed falsis eorum hypothesebus dumtaxat conformes.

Patet consequenter quid significet, cætera quæ sunt in speciebus per concomitantiam esse præsentia. Sicut enim corpus Christi est præsens, quia est sub quâtitate quæ facit præsentiam, seu ad quam præsentia sequitur; sic cæterorum ratio præsentia, componitur ex eorum inexistentiâ in corpore Christi, & coniunctione corporis ad locum. Sic & anima est præses per hæc duo; esse formam corporis, & corpus esse per species hanc. Quantitas propria Christi est hanc, quia est extensio corporis, quod per quantitatem specierum est hanc.

Ex toto discursu evidens est, quæstiones quas moderni multiplicat de modo præsentia Christi in hoc Sacramento, à Philosophiâ & Theologiâ alienas esse; quia supponunt contradictionem spatij imaginarij; quia oberant chordâ entitatum fictitiarum; quia non explicant naturam loci, neque mysterij; & quia infinitis difficultatibus intrlicantur.

LECTIO V.

*Quomodo Accidentia panis & vini
maneant cum corpore Christi.*

Vlteriùs concluditur, quod quoniam actio est transubstantiatiua, hoc est, mutatio substantiæ integræ in substantiam integram, sic ut nihil præter accidentia sit commune; necessum est saltem ipsa accidentia esse communia; hoc est, adeò verè inhaerentia in corpore Christi, quam priùs in substantia panis; alioqui enim non essent communia: & quod factum foret, esset prorsùs aliud omnimodis ab eo quod fuerat.

Rursus, cum actio ex eo sit conuersio, quia subjectum, seu, ut vocant, terminus à quo, conuertat materialitèr ad factionem seu positionem termini ad quem; & hoc ablato, terminus à quo annihilatur, & terminus ad quem creetur; euidentis sit, nisi corpus Christi existat ex vi specierum, vel saltem ineipiat

existere ex vi illarum, non esse hanc actionem conuersiuam. Nisi autem corpus Christi sit realiter accidentatum per hæc accidentia, non potest intelligi quomodo accipiat esse ex vi accidentium.

Dices, actionem conuersiuam esse quandam entitatem, de cuius ratione sit, panem amplius non esse; & sic rectè intelligi ex vi desinentiæ panis, incipere esse corpus Christi, absque vlla cooperatione Accidentium. Et si obijcitur, panem non esse in eo instanti in quo corpus Christi primo est, & per consequens non posse concurrere ad efficiendum existentiam corporis Christi nisi per accidentia, respondetur hoc non obstante, desinentiam panis, posse esse conditionem talis actionis; quod sufficit ad propositum.

Respondetur, talem actionem esse entitatem fictitiā, non necessariā; fictā ad modum intellectus & cognitionis. Quid enim est posse respicere rem, quæ nihil ad eam attinet, nisi habere cognitionem & volitionem? Et tandem esse per mo-

dum conditionis, quæ nullam vim
vel causalitatem habeat, est purum
ignorantiæ perfugium; & contra-
dictio in terminis: valens quòd re-
quiritur seu necessarium est, & ad
nihil requiritur, seu non est necessa-
rium.

Ex ipsis quoque verbis consecra-
tionis conuincitur accidentia inhære-
re corpori Christi; cum clarum sit,
accidentia esse mediantibus quibus,
designatur corpus Christi. Vel ita-
que faciunt corpus Christi *hoc*, vel
non: si non, clarum est subiectum
propositionis esse falsum, vel non
supponens; non enim illud de quo
dicitur esse corpus Christi, est *hoc*:
neque per consequens, quod est *hoc*,
est corpus Christi. Accidentia enim
non possunt facere corpus Christi *hoc*,
nisi communicando suas rationes
formales.

Dices esse æquiuocè *hoc*: sicut
cum dicitur, *hic calix est Sanguis
meus*. Replicatur: ergo non est *hoc*,
sicut patris erat *hoc*: quare vel Chri-
stus explicuit se Apostolis, vel eos de-
cepit: & si explicuit, etiam illi no-

bis. Ostendatur itaque vestigium aliquod huius explicationis, vel in scriptis, vel in traditis. Rursus manifestum est, calicem accipi pro vino; & per consequens, ly *hic* propriè de vino dici; vt possit impropiè de calice dici; ne sit multiplicatio improprietatum vsque ad ænigma.

Sed & si ponantur per se existere accidentia, eo ipso facient vnum vel plura subsistentia: Ergo iam vis significationis *hæc* erit completa in accidentibus; & non poterit significare corpus Christi omninò, nisi per hoc quod sit præcognitum corpus Christi latere sub iis quasi sub veste. Necesse est itaque Apostolos & Ecclesiam, quibus hæc non sunt prædicta, per *hæc* intellexisse verè subiectum accidentium, sicut in pane solebant intelligere.

Rursus, vel per vocem *hoc*, aliquo modo significantur accidentia; vel habet omnino significationem ignotam; cum accidentia propria Christi non subiiciantur sensui. Si autem significantur & subsistunt, iam ipsa & Christus non facient *hoc*, sed *has*:

& erit eadem argumentatio, quæ fit contra ponentes substantiam panis remanere cum Christo: & propria locutio erit, accidentia esse corpus Christi.

Vox quoque *est*, erit æquivoca in his duabus propositionibus, *Hoc est panis*; & *Hoc est corpus*. Cum enim dicitur, *Hoc est panis*, accipitur esse pro denominatione intrinsecâ substantiali superioris de inferiori. Cum verò dicitur, *Hoc est corpus*, *est* significabit denominationem extrinsecam substantiæ aduenientis alteri substantiæ; sicut vestimentum seu habitus accedit vestito.

Accedit ad hæc, quòd non sit explicabile, qualis sit unio vel connectio inter species subsistentes & corpus Christi; sed asserenda est solummodo voluntas Christi, sponte sese componens, & quasi collatorie ad actiones sacerdotis circa accidentia. Quod cum non sit naturale, neque Philosophiâ vel Theologiâ dignum est; & facit summum mysterium imperfectum, & Deum in nobilissimo opere deficientem, & segnem architectum.

Sed neque intelligi potest, quomodo Christus omnino sit cum accidentibus nisi per penetrationem quantitatum, & vbicationum fictitiarum impressiones; quæ non solum nullum in naturâ fundamentum habent; sed sunt opposita notissimis principijs, & reddunt mysterium impossibile creditu Philosophis, & naturales notiones mordicus retinentibus.

Consequens quoque est ex accidentium subsistentiâ Christi corpus non videri, non tangi, non ferri, vel moueri; & quæcumque alia dicimus de eo, & quæ sunt ea quæ mouent populum Christianum ad pietatem. Quid enim magnum, albedinem videre, vel quantitatem tangere, vt dignitas sacerdotalis sit inde magna? & sanctitas non requiritur ex eo quod accidentia sunt subsistentia, sed quia sunt corporis Christi.

Maximè, non erit verum manducari corpus Christi; quod tamen est fermè totius mysterij caput, & quodammodò finis. Hoc quod Christus testes inculcauit, in quo posuit tantam

tam vim ad salutem & resurrectionem nostram: & denique quod summam deuotionem mouet in populo Christiano. Vnde apparet eam sententiam deficere admodum in explicando hoc tam grandi mysterio; & reddere illud diminutum & minus estimabile. Accedunt iam phrasés Sanctorum Patrum, mirè quàm efficaces. Accedit fides populi Christiani ab omni æuo; cuius sensus clarus est; nisi ubi ex mixtione scholastica disputationis inter prædicationes aliquid quasi speculatiuè intouatum est, sed sic vt non descendat ad praxim. Et tandem professio fidelis pleno Concilio Romano exacta à Berengario: quæ omnino dogmatica fidei Christianæ illius ætatis censeri debet, & propriissimè expressa.

Quid, quod in omni antiquitate ante scholasticos Doctores nusquam esse mentionem aut vestigium substantiæ accidentium; demonstratum est argumentum, non ex proprijs fidei, sed ex pscitijs ex Philosophicis speculationibus y introductam esse in cathedras hanc opinio-

nem: atque proinde merè ex Philosophicis considerationibus pendere ipsius auctoritatem.

Quibus si coniungas, supponere hanc sententiam quæ sunt alienissima à Philosophiâ: vtpote accidentia esse entitatiuè distincta à substantijs; atque proinde verè substantias, & non amplius modos & determinationes substantiæ: esse separabiles à substantiâ: posse illis communicari esse simpliciter, quod est fieri substantias: & mille inconuenientia & inextricabiles quæstiones de vniionibus, causalitate materiali, & ceteris quas videmus in Philosophiâ modernâ sinè resolutione cumulatas, apparebit hanc opinionem magis inuoluere & confundere mysterium, quam explicare.

Obijcies, corpus Christi, cum sit gloriosum, non posse alterari vt suscipiat hæc accidentia. Imò verò nequæ omnino eorum esse capax; cum adeò diuersa sint ab ijs quæ naturalia sunt homini. Respondetur, alterationem includere quod accidentia quæ Christus prius habuit mutentur, hoc

autem non accidere; & per consequens, corpus Christi non alterari; sed noua accidentia quasi per additionem assumere.

Quod autem accidentia panis, non sint propria corporis Christi; non est inconueniens propter exigentiam mysterij: neque secundum naturam aliquam impossibilitatem continet: cum videamus progressionem naturæ in generatione esse inducere aliena accidentia in subiectum corrumpendum. Sicut itaque aliqua possunt naturaliter consistere cum formâ oppositâ, sic non inconuenit omnia (quousque accidentium rationem habent) virtute diuinâ consistere cum substantiâ alienâ; cum hæc sit natura accidentis, posse abesse sine subiecti interitu.

Replicatur, hæc bene dici in sententiâ ponente accidentia esse entitates ascititias aduenientes substantiæ: Sed quoniam exacta Philosophia hanc doctrinam respuit, & accidentia non sunt verè aliud, quam ipsa substantia: quomodo potest intelligi omnia accidentia esse aliena, & sub-

stantiam manere eandem? maxime cum tunc nō sit amplius eadem substantia; cum non sit idoneum instrumentum ad primariam actionem; quod per aliena accidentia esse est impossibile.

Respondetur, his non obstantibus euidens esse, si sola accidentia sint mutata, manere semper eandem substantiam; cum quaecumque absunt, ex eo quod sint accidentia, abesse possint. Sed considerandum est maxime in animalibus, ita dispositionem ad formam esse in toto, vt non sit in singulis partibus. Vnde etiam parte aliquā corruptā, non propterea plusquam accidens corruptum est; verbi gratiā, truncato brachio, vel crure, animal non substantialiter, sed accidentaliter mutatum est.

Sic itaque si ponatur crus vel brachium gangrenā, vel paralyti, vel alio morbo corruptum esse, & vitā priuatum, adeo vt non amplius habeat naturam brachij vel cruris, (modo intra eos terminos, vt possit per naturam vel medicinam restitui) homo tantummodo secundum quid seu

partem, & accidentaliter mutatus est: neque membrum illud propterea fit aliud ens; sed remanet tanquam accidens spurium naturæ humanæ; & est per existentiam totius.

Sic itaque in præsentî, si Christus Dominus non haberet vlla accidentia propria, verè per accidentia panis non posset esse homo. Sed posito quod in cælo habeat propria accidentia, sicut esse sub speciebus est ei accidens, sic tantummodo est accidentale illi, quicquid hoc modo ei aduenit: & sicut verruca in homine, vel cornu (quod aliquando accidit) quod ei agnoscitur (et si non habeat dispositiones corporis humani) tamen est aliquid corporis humani; & dispositiones eorum sunt materialiter dispositiones hominis; sic dispositiones panis in hoc sacramento, sunt dispositiones corporis Christi Domini.

Obijcies rursus, Articulum quendam Ioannis Hûs, qui docebat accidentia non posse subsistere, condemnatum esse in Concilio Constantiensi: quare de fide erit saltem pos-

se subsistere accidētia sine aliquo sub-
jecto. Cum itaque non nisi ratione
huius mysterij illa doctrina sit repro-
bata ; consequens est, fuisse doctri-
nam Concilij in hoc mysterio subsi-
stere accidentia ; ac proinde etiam
hoc de fide esse.

Respondetur , propositionem de
quâ agitur, esse merè Philosophicam;
postquam clarum est, mysterium ni-
hilo peius, stante impossibilitate sub-
sistentiæ accidētium, explicari, quàm
cum possibilitate. Et propterea cen-
sura Concilij explicanda est, sicut in
aliis eiusdem naturæ. Et satis videtur
in Philosophicis (vbi proprius erat
locus) ad hanc difficultatem repli-
catum. Tantum itaque necessa-
rium est, vt obiter notemus, censuras
vagas non esse censuras ; cum rei de-
terminatæ prædicatum indefini-
tum actu inexistere implicet : sicut
existere animal quod sit vel homo
vel equus, prorsus chimæricū est. Et
propius ad rem accedendo, si de
duabus propositionibus enuntiaretur
alteram esse hæreticam ; nemo cre-
deret quamlibet earum esse pronun-

ciatam hæreticam. Similiter itaque si eidem propositioni duæ indefinitè censuræ applicentur, & dicatur hæc propositio vel est hæretica vel erronea; neutra censura eam percelleret; quia neutra contra eam est pronunciata. Patet hoc clarius in executione: vrgeat enim quispiam quòd sit hæretica; numquid non est liberum negare? vrgeat rursus quòd sit erronea; nonne & hoc ab eodem vel alio eodem tempore refutari potest? Si itaque sine authoritatis præiudicio possit defendi eam neque esse hæreticam neque erroneam, ubi est censura vis. Quid enim interest num ab uno an à pluribus fiant hæc negationes, modò legitime sint? Sed hæc fortassis argumenta logica argutis æstimabuntur: consideranti tamen, euidentiā etiam moralem secum ferunt. Pronunciet enim Iudex, capite vel bursâ plectendum nocentem, & abeat non relictâ cuiquam determinandi potestate, audebitne minister alteram exequi? Sed quicquid de his sit, cū aliquæ notarum censoriarum eiusmodi sint, vt cum

veritate propositionis consistant; clarum est, huiusmodi notas vagas non ad Theologos, qui veritatem examinant, sed ad iudices qui mores curant, pertinere.

Ex dictis patere potest, quomodo accidentia dici possint esse vñta hypostaticè Christo: non quòd habeant entitatem quandam physicam, cuius ratio sit esse vnionem (quod in Philosophia rejicitur) necum vt talis vnio terminetur ad Personalitatem verbi: sed quia insunt naturali modo in Christo, sicut prius inerat panis: & quia quaecumque in ente aliquo insunt dicuntur esse aliquid suppositi seu hypostasis, cum ratio suppositi confundat plura, vt dictum est supra.

Paret tursus, non esse necessarium imprimi speciebus vim quandam magneticam trahendi secum Christum Dominum, neque illum ex preciso motu suae voluntatis comitari species. Quorum neutrum habet aliquem laporem scientiae vel artis. Praeterquam quòd non explicat quomodo corpus Christi Domini sit

hæc ab accidentibus: quod tamen est totius mysterij basis & primum fundamentum.

Sed neque fingere quandam materialitatem seu inexplicabilem concursum materiæ primæ (præter unitatem quam habet cum accidentibus,) quæque suppleri possit in causâ generis efficientis, aliquid proficit: cum facere *hoc*, clarè sit per unitatem; talis autem materialisatio neque explicabilis sit, neque faciat ad rem. Neque quomodo distinguatur à concursu efficienti; & si distinguatur, quomodo suppleri possit in alio genere causæ; neque omninò quid ad rem nostram faciat, explicari possibile sit.

Sed & comminisci modum quandam perfectatis, qui imprimatur speciebus ut subsistant, intolerabile est; cum clarum sit *per se* non significare aliud, quàm ex sua vi finè alio: id est, quod sit subjectum sufficiens existentie: quod clarissime non potest dari accidenti, absque mutatione naturæ ipsius; & absque translatione ipsius in naturam substantiæ.

LECTIO VI.

*De modo quo corpus Christi se habet
ad sacras species.*

VLterius conficitur, Christum sic esse sub accidentibus panis mutati, vt etiam sit in potentiâ sub partibus eorundem accidentium. Cùm enim accidentia sint talis naturæ, vt non desinant esse eadem accidentia post aliquam diuisionem; palam autem sit, eum ex vi verborum esse *hoc*, id est, subiectum horum accidentium; etiam euident est, quamdiu sunt hæc accidentia, ipsum esse sub illis, & esse *hoc* illorum. Alioqui non esset tale *hoc* quale hæc accidentia requirunt, & nata sunt habere.

Pater etiam ex actione Christi; qui non diuisit vinum, sed dedit diuidendum per illa verba, *Bibite ex hoc omnes*. Vnde pater mansisse sanguinem postquam primus biberat, id est, post diuisionem factam. Similiter postquam diuisus erat panis in singulas

buccellas, omnes eas vnâ voce vocauit *Hoc*. Clarè itaque insinuauit hæcceitatem, de quâ loquebatur, non defecisse ex fractione seu diuisione.

Vnde rursus constat accidentia quæ manent seu dicuntur eadem, non esse in rigore metaphysico eadem; sed dumtaxat moraliter, seu secundum speciem vel indiuiduationem moralem: & magis quatenus ipsa faciunt seu nata sunt facere indiuiduationem, quàm quatenus eandem recipiunt à substantiâ & subjecto suo, in quo inhærent. Clarum enim est, panis integri & diuisi accidentia, non posse alio modo dici vel esse eadem.

Sublata est itaque difficultas quæ sese ingerebat, quomodo accidens potest magis transire de subjecto in subjectum, quàm subsistere. Patet enim accidentia panis, prout sunt in corpore Christi, habere specialem indiuiduationem ab ipsius corpore, distinctam ab eâ quàm accidentia panis habebant in pane; etsi conferant Christo ex suâ ratione eandem indi-

uiduationem quam conferebant pan-
ni. Dico ex suâ ratione; quia cum ra-
tio illorum sit causa tantum inadæ-
quata, necesse est effectum ex con-
iunctione alterius partis accipere
diuersitatem.

Et quoniam mixtum ex naturâ suâ
habet aliquam quantitatem mini-
mam, in quâ natum sit existere; eui-
dens fit, Christi corpus non esse in
potentiâ in aliquâ quantitatē mino-
ri, quam in quâ panis natus est exis-
tere; quia scilicet neque panis erat
cuius accidentia habet, & per quæ ra-
lem potentiam habet. Longe minus
est in punctis continuatiuis & termi-
natiuis; quæ neque capacia sunt cor-
poris naturalis, neque ipsamet sunt
in potentiâ vel in actu, nisi per mo-
dum negationum; cum non signifi-
cent aliud (cum sunt actu) nisi quan-
titem non esse maiorem, seu non
ulteriùs extendi.

Cum autem in mixtis necesse sit
contingere quædam minima esse sæ-
parata ab reliquis corporibus (ex
quibus mixta conflantur vel fiunt)
vndique ea circumdantibus, alia ve-

rò esse partes majoris complexionis mixti : Palam est in priorum loco corpus Christi esse actu, eo modo quo apprehenditur esse in integrâ hostiâ : in reliquis verò minimis, tantum in potentiâ ; sicut neque ipsæ sunt in majoribus partibus, nisi in potentiâ. Cùm enim & secundum quantitatem & secundum substantiam sint eadem cum majori parte, neque possunt esse plura actu.

Accedit quòd cùm contingat in simili proximitate eandem particulam alicuius elementi ad plura minima pertinere, talia duo minima non poterunt esse nisi indefinitè in potentiâ ; id est, quodlibet illorum, sed non vtrumque. Clarissimum itaque est, ea non esse actu ; id est, neutrum ipsorum ; ac per consequens, corpus Christi eodem modo esse in potentiâ, non in actu in singulis illorum.

Intelligitur quoque non difficulter quomodo Christus possit esse sub tantâ quantitate. Cùm enim infans in primâ conceptione (in qua dicitur non maior formicâ) sit idem in-

diuiduum, quòd in firmâ ætate; nihil præter naturam accidit, si Christo etiam in firmâ ætate, accrescere ponatur quantitas. Et cum limitatio quantitatis non sit secundum naturales causas, sed speciales fines diuinæ prouidentix, quantamlibet quantitatem Christus poterit subire, modò fini diuinæ ordinationis conueniat.

Clarum quoque est, quantitatem panis esse aliquo modo posteriorem in Christo, naturali quantitate ipsius. Cùm enim sit de ratione corporis in communi esse quantum, & de ratione talis corporis, puta, animalis, non solum esse quantum, sed esse tale quantum, id est, tali figurâ, & alijs sensibilibus qualitatibus præditum: sit quoque subiectum quantitatis panis non quodlibet corpus, sed corpus Christi; necesse est aliquo modo prærequiri in corpore Christi naturalem quantitatem, quatenus scilicet constituit corpus Christi. Patet etiam quòd cùm determinatum corpus sit instrumentum determinatæ actionis, neque possit intelligi aptum natum

facere talem actionem, nisi cum talibus dispositionibus; dispositiones verò omnes sint modi & termini quantitatis, sicut quantitas est substantiæ: clarum est non posse intelligi *Corpus Christi*, absque talibus dispositionibus.

Neque sufficit dicere quod sit aptum natum habere tales dispositiones: tum quia quidlibet potest habere tales dispositiones: tum quia, si dispositiones non sunt distinctæ à subiecto, subiectum ipsum non est tale, nisi per hoc quod habeat formaliter tales dispositiones.

Dices: ergo neque quantitas, neque alia dispositio, vel qualitas, potest esse accidentalis subiecto; & per consequens, omnia pertinebunt ad Prædicamentum substantiæ. Respondeo, quod cum dicitur quantitas esse accidens, intelligendum est de hac quantitate seu de quantitate singulari quâlibet; & per consequens de quantitate vniuersim, non tamen de ipsâ naturâ abstractâ quantitatis. Et tantundem dicendum est de cæteris

dispositionibus, proportionatè ad naturam cuius sunt.

Nihilò tamen minus verum est, quantitatem panis esse æquè immediatam substantiæ corporis Christi, quàm est propria sua quantitas. Cum enim quantitas propria, sit particularis ipsius quantitas, quæ est accidentalis, & non pertinet ad constitutionem corporis Christi quâ talis; sub eâ ratione quæ necessaria est ad constitutionem corporis Christi, potest æquè subsumi maior atque minor: sed maior includit quantitatem panis cum quantitate naturali; itaque quantitas panis æquè immediatè assumitur, quàm quantitas naturalis.

Tantundem euidentis est in natura. Cum in animali aliæ partes alijs sint magis essentielles: verbi gratiâ, cor, iecur, cerebrum, videntur ad eò necessaria, vt non possit intelligi animal sine illis; cætera autem, præsertim cataphragma ex ossibus, nervis, carne, &c. videntur ad accidentalem priorum conseruationem esse constituta: & tamen quantitas crurum vel

brachiorum non est minus immediata substantiæ animalis, quam quantitas priorum; cum sit eadem numero & subiecto quantitas; & per consequens substantiæ simul & semel utraque insit.

Dices, hoc quidem verum esse; sed quantitatem panis aduenire Christo post constitutionem completam indiuidui; cum quantitas cruris, vel brachij pertineat quodammodo ad eandem. Respondetur, si quæstio sit de constitutione indiuidui in ratione indiuidui, sic quantitatem esse posteriorem quasi naturæ, cum sub indiuiduali ratione, maximè in animalibus, magna sit latitudo. Præterquam quod indiuidui ratio, fortassis substantialiter est completa in qualitate iecoris, cordis, & cerebri; cum per hæc intelligatur essentialiter constitutum instrumentum ratiocinandi perpetuum.

Sin quæstio sit de aduentione temporaria post constitutionem indiuidui; sic non solum quantitas accrescit cruribus & brachijs, sed etiam partibus maximè essentialibus, sine

præiuditio constitutionis indiuidualis; & cum immediatione æquali ad substantiam, quam prior quantitas habuit. Hæc itaque posterioritas non debet præiudicare aduentui quantitatis panis, per actionem diuinam, quæ est intimior & potentior longè quàm sit actio naturæ. Sed neque propterea inconuenientiùs erit Christo talem quantitatem asciticiam habere, quòd non sit immediatè vnita quantitati naturali. Patet enim etiam in nostro corpore aliqua esse magis vnita, aliqua minùs; cum sanguis & humores sint liquidi; glandulæ aliquæ fortassis solâ proximitate coniunctæ. Et quid vetat in aliquo animalis corpore esse aliquod instrumentum prorsus separatum; vt fortassis petræ quæ in visceribus aliquorum animalium reperiuntur; quæ etiam si sint separata, non potest dubitari, quin sint partes substantiæ animalis.

E diuerso autem, plurima sunt exempla plurium substantiarum eadem quantitate connexarum: vt cum duo infantes in vtero materno collisi iisdem visceribus, duo capita, &

quatuor brachia & crura habere comperiuntur. Visus est iuuenis cum fratre gemino, qui peragratit totam Europam. Et Matrum cum infantibus per commune viscus continuatio, nullo modo est inficiabilis. Liquida verò quàm facilè commiscuntur, & vnâ quantitate duas naturas vestiunt? Vide oleum mixtum aceto, argentum auro, & plura similia: de quorum vnitatem secundum quantitatem, & diuersitatem secundum naturam, nemo dubitat.

Nullum itaque inconueniens est, plures quantitates simul Christo inesse. Maximè cum eo ipso quod sint in eodem subiecto, etiamsi secundum terminos sint plures, tamen vnâ faciant quantitatem, ex vnitatem subiecti: non aliter quàm in cubo sunt plures superficies & lineæ secundum diuersas terminationes; quantumvis sunt vna quantitas subiecto, & per vnitatem solidæ speciei. Sic itaque in Christo sunt plures solidæ quantitates, ad diuersas terminatæ, quæ tamen vnitatem subiecti colligantur in vnâ.

Ex quo deduces, Christum, dum est in sacris speciebus, esse maiorem & maiorem quoque mundi partem, quàm si non foret sub ijs; non tamen plures, vel plures partes mundi. Cum enim vnitas substantiæ Christi sit completa & indiuidualis; Christum autem esse plures partes mundi significet substantias esse plures; cum quantitas essentialitèr denominet substantiam non semetipsam, vt que non est capax talis denominationis, cum tantummodo sit modus alterius; substantia Christi non potest dici plures partes mundi.

Neque refert ad effectum quantitatis, subsistne ipsi substantia diuisibilis in plures numero, an verò cuius numerus iam sit determinatus. Pater enim & in elementis diuisibilem esse substantiam vel mutabilem secundum omnem variationem quantitatis; & in animalibus ex opposito idem indiuiduum cum pluribus quantitibus ipsum inuariatum permanere. In mixtis autem partim vno, partim altero modo euenire. Sicut itaque in animalibus idem indiui-

duum sustinet plures quantitates successiuè, sic in Christo simul.

Dices; quòd cum quantitas sit diuisibilitas, & non diuisibilis; necesse est, quoties diuiditur hostia, aliquid diuidi: sed diuidi est fieri plura ex non pluribus: aliquid itaque fit plura. Cum autem in Sacramento non sit aliud quàm corpus Christi & quantitas; necesse erit corpus Christi fieri plura & diuidi. Vel itaque fit plura entia alterius rationis; vt accidit cum animal diuiditur: vel eiusdem rationis; & tunc erunt plura corpora Christi: sicut priori modo, vel vnum corpus Christi cum alijs corporibus diuersæ rationis, vel simpliciter plura corpora, sed non Christi. Respondetur, non diuidi quantitatem sed corpus Christi. Verùm sicut in elementis quidem, ad esse maius vel minus secundum quantitatem, sequitur etiam esse aliud & aliud secundum substantiam; in animalibus autem hoc non sequitur: sic etiam si in corporibus alijs ex diuisione fiant plura corpora, hoc non accidere in corpore Christi non est inconueniens: quia secur-

398 INSTITVT. SACRARVM.
dùm indiuiduam suam rationē subi-
icitur vice panis. Vnde cùm panes
de pane fiunt, indiuidua de indiuiduo
fieri debebunt: quod quoniam est im-
possibile substantialitèr, fit acci-
dentaliter.

Fit itaque Christus plura indiui-
dua, seu plura numero accidentali,
quem quantitatum dicunt. Cum
quo consistit quòd sit substantialiter
semper idem. Sicut cubus est idem
quantum, etsi plura secundum su-
perficiem: & sicut electrum vel auri-
chalcum sunt ex opposito plura sub-
stantijs, etsi numero quantitatio
sint tantummodo vnum. Sed quo-
niam substantia est ens & vnum sim-
plicitèr, accidentia secundum quid;
dicendus est Christus absolutè vnus
& idem, & secundum quid plura. Et
similiter simpliciter loquendo non
diuisus, sed dumtaxat secundum spe-
cies.

Petes, vtrum secundum rationem
quantitatis sit simpliciter plura, vel
etiam ipsæ quantitates sint absolutè
plures. Respondetur, quod cùm qua-
ntitates ex proprijs habeant pluralita-

rem, & ex subjecto vnitatem, etiam si hæc vnitas sit maior quam varietas, tamen quia varietas est ex proprijs, eatenus quatenus agitur de ijs secundum propria, dicendæ sunt simpliciter plures, sicut & superficies cubi dicuntur simpliciter plures, etsi in eodem corpore existant.

LECTIO VII.

De ipsâ actione transubstantiativa.

EX his facile est gradum facere ad naturam actionis conuersiue seu consecratiue. Cum enim conuersio clarè dicat existens vnum fieri aliud; imprimis clarum est, neque terminum conuersum annihilari; neque terminum in quem fit conuersio, ex nihilo fieri, quod est creari. Neque panis itaque annihilatur, sed desinit in corpus Christi; neque corpus Christi creatur hîc, sed incipit esse hîc ex vi desitionis panis.

Sed cum specialiter in conuersione, alius sit terminus totalis, alius for-

400 INSTITVT. SACRARVM.

malis ; clarum est in præfenti, terminum à quo totalem, esse panem ; non quomodocumque, sed prout est *hoc* : Et terminum totalem ad quem, esse Christum non quomodocumque, sed vt ipse est per consecrationem *hoc*. Terminus itaque formalis à quo, est substantia panis ; terminus verò formalis ad quem, est substantia corporis Christi.

Patet etiam terminum formalem à quo, ex vi actionis conuersiuæ, non necessario desinere esse : sicut cum præciso ab homine crure fit cadauer crureum ex homine, non propterea desinit homo esse idem qui prius, sed tantum desinit esse cruratus. Nec ex altera parte necessario terminus ad quem incipit esse : Sicut cum alimentum conuertitur in animal, non propterea incipit esse animal. Sic ergo etiam ex vi huius actionis neque substantia panis desinit esse, neque corpus Christi incipit esse simpliciter, sed vtrumque in quantum *hoc*, seu accipit *non esse hoc*, vel *esse hoc*.

Quòd itaque panis desinat esse, per accidens est, ex eo quòd cum hæc actio transferat

transferat hæc accidentia in corpus Christi; & substantia panis non possit esse sine omnibus accidentibus; ex necessitate perit, quia non est causa aliqua secunda quæ determinet Deum ad ipsius conseruationem; sed magis ipsa translatio determinet Deum ad translationem actionis conseruatiuæ *esse* ad Christum Dominum.

Quod tamen Christus Dominus incipiat esse speciali modo, substantiali videlicet, vt corpus in rerum naturâ, est quidem ex vi actionis, sed non quatenus est conuersio, sed quatenus est conuersio in ens non prius existens. Si enim dictum foret, *hoc est Iesus*; conuersio fuisset facta, & tamen nihil de nouo extitisset, neque realiter neque formaliter. Nunc autem, saltem formaliter, existit de nouo ratio corporis Christi, quod prius materialiter in Christo continebatur.

Hæc non impediunt, quin ex vi actionis consecratiuæ, panis desinat esse *hoc*: Et quidem secundum integram substantiam suam: quando-

quidem actio non est quomodocumque conuersio substantialis, sed transubstantiatio. Quare tota substantia in totam substantiam transfertur; vt quoad effectum essendi *hoc*, & forma panis maneat sub formâ Christi, & materia sub materiâ.

Ex quo fit, quòd cum materia prima, prout erat prius in Christo, non posset facere Christum esse quod erat; & etiam esse *hoc*, id est, maiorem partem vniuersi, quam prius erat, absque rarefactione; & neque sic propriè, (cum ex parte materiæ, non fuisset maior vniuersi pars, & quantitas nata sit proportionare corpora etiam secundum materiam) consequens est, ex vi actionis, virtutem materiei, quatenus in pane erat, manere in materiâ Christi.

Non tamen sic, vt materia panis maneat inconuersa, sicut cum actio est expulsiua formæ intactâ manente materiâ: Sed vt ex vi mutationis, Christus secundum materiam suam non mutatam, sed in quam mutata est alia, iam habeat maiorem virtutem sustinendi formas & quantita-

rem, quam prius haberet. Ex eo quod cum materia ex se sit indiuisibilis in toto vniuerso; per hoc quod accipiat determinationem essendi per conuersionem in illo quod prius erat, est in illo magis virtualiter absque mutatione ex parte sui.

Et hoc ipsum, quoad substantiam effectus, in nutritione contingit. Materia enim panis comesti, non additur corpori animalis, sicut pars parti, cum nullæ sint partes, nulla diuersitas, in materiâ nudâ: sed adiectâ animali quantitate alimenti, materia animalis fit virtuosior secundum materiam, ex determinatione per actionem factam, quâ vis materiæ (quæ non amplius est sustentatiua alimenti) per accretionem alimenti ad animal, determinatur ad sustentationem quantitatis animalis.

Differentia tantummodo est in modo actionum: quod in actione naturali, determinatio fit in ipsâ materiâ, dispositionibus ei aduenientibus paulatim mutatis, & remotis quæ prius inerant, ipsâ quodammodo immotâ manente, & manente

potius quàm translata. In transubstantiatione vero, actio est circa accidentia, quare illa transferuntur quasi immota. Materia autem, sicut & forma, comparatur dispositionibus mutatis & remotis. Vnde ex hac actione materia est in termino ex vi mutationis, in naturali verò actione, ex eo quod non mutatur.

Vnde patet, eos qui credunt partes actu in materiâ, difficulter posse declarare, quomodo panis maneat virtualitèr in corpore Christi; quod tamen est necessarium ad veram conuersionem: alioquin enim annihilatus erit panis. In hac autem viâ, ex eo quod esse *hac* potissimè consistat in sustentatione accidentium, patet autem & materiam Christi accipere hanc virtutem, per transubstantiationem, & animam Christi consequenter habere virtutem formæ panis, quoad hunc effectum, patet conuersionis rationem esse integram.

Dices, cum aqua conuertitur in ignem, vera est conuersio, & tamen non remanet virtus aquæ in igne, cum virtutes sint contrariæ. Respon-

detur, particulares virtutes esse contrarias, sed generalem virtutem ac-
tuandi materiam & implendi vni-
uersum, esse communem vtrique: &
secundum hanc ignis succedit aquæ,
In hoc autem mysterio si accidentia
ponantur subsistere, Christi corpus
non succedit pani, vel in hoc effectus;
cum non ipsum sit maior pars vniuer-
si, sed accidentia sola impleant mun-
dum; saltem quoad apparentiam.
Adde quod conuersiones naturales
compositæ cum hâc conuersione, sunt
defectiuæ & partiales, & non æque
merentur nomen conuersionis.

Quoniam autem supra explicatum
est, quid significetur nomine corpo-
ris & sanguinis; non est necessum
explicare quis sit terminus formalis
conuersionis huius; seu quæ sint illa
quæ ponuntur ex vi verborum. Pa-
tet enim esse materiam, formam, ex-
istentiam, & si quid aliud formali-
ter concurrat ad constitutionem cor-
poris vt sic; non autem accidentia
vt talia; cum quatenus talia, sint ex-
tra rationem substantialem.

Patet consequenter, si Deus hominem

non priùs esset, non iri positum ex vi huius actionis. Cum enim positio naturalis Dei hominis procedat per existentiam & animam ad corpus, patet rationem corporis, & per consequens actionem ad illam, esse posteriorem ad actionem ad Christum. Cùm itaque posteriora ex prioribus, non autem priora ex posterioribus nata sint sequi, & hæc actio præsupponat eam quâ Christus est, termino huius non sequitur Christus, qui est terminus prioris; sed magis hæc actio non poterit esse propter defectum prioris.

Dices, ex hoc sequi quod non possit fieri consecratio in triduo: quia nomen corporis per priùs significat Corpus viuum quam mortuum. Cum itaque corpus viuum tunc non existeret, corpus mortuum non posset verborum in species introduci; quia actio consecrationis non habet vim anteriora. Adde quod verba consecrationis non forent legitima; cùm *meum*, supponat Christum loquentem; qui eo tempore erat mortuus. Sed neque Sacrificii ratio constaret,

cum Christus non fieret de viuo mortuus. Respondetur, quòd cùm dicitur actionem aliquam non posse facere priora suo termino, intelligendum est de prioribus faciendis non factis. Prioritas autem corporis viui ad mortuum, iam facta erat non facienda. Vnde per consecrationem in triduo, non erat ponendum corpus viuum sed mortuum; quòd tum temporis primariò significabatur per illas voces *Corpus meum*; ideoque ex vi consecrationis poni poterat.

Neque obstat consecrationi, quod *meum* videatur supponere Christum loquentem. Cùm enim Christus in consecratione non loquatur suo ore; sed ministri, qui tempore tridui loqui poterat verbis Personæ quæ non defecerat, *ro meum* sufficientè verificaretur. Ratio autem Sacrificij siue sit siue non sit, non pertinet ad validitatē consecrationis, sed tantummodò ad licitum vsum illius. Vnde dicendum est consecrationem futuram fuisse validam, sed non licitam in triduo sepulturæ Christi.

Quibus nihil vetantibus, actio hæc

dicenda est substantialis ; immo & conferre esse ; cùm terminus formalis ipsius sit substantia , puta corpus Christi , & sub ratione sub quâ non priùs existerat. Cùm priùs existeret tantùm sub ratione Christi, nunc autem sub ratione corporis Christi, quæ sunt distinctæ rationes substantiales : & per consequens , trahunt secum distinctas rationes essendi ex ratione rei , nisi ratione existentiae diuinæ coirent in vnicam.

Petes , vtrum ratio corporis Christi sit absolute actu ex vi huius actionis ? Respondetur , quòd cùm hic terminus supponat Christum existentem , clarum est non esse actu. Sed tamen magis est actu , quàm sine hac actione ; cum natum sit subiectare accidentia formalitèr, quod prius non poterat. Videtur ergo accepisse illam actualitatis rationem , quâ partes continui superant modum existendi elementorum in mixto ; & indiuisibilia terminatiua superant continuatiua ; quorum tamen neutra simpliciter actu existunt in suis compositis.

Manife

Manifestum quoque est subjectum huius actionis, seu potius materiam circa quam, esse suppositum panis, ex quo non maneant nisi accidentia. Ex quo inferitur, hanc actionem esse intellectualem, cum panis quatenus *hoc*, non possit esse subiectum nisi in mente, in qua naturale est ut ratio superior dicatur de inferiori, Cum itaque ratio huius sit maximè particularis, actioni intellectuali conuenit accipere *hoc* pro subiecto, & rationem aliquam prædicabilem pro formâ.

Patet eâdem operâ virtutem huius actionis pendere inmediate à Deo; cum effectus sit instantaneus & substantialis. Est enim sine præuiâ mutatione intrinsecâ in momento quod *erat hoc panis, esse hoc Christum*, quod actioni intellectuali quæ per significationem operatur conueniens est. Sed non aliâ virtute quàm diuinâ fecundante actionem creatam.

Dices, si actio sit instantanea, & accidentia non sint realiter eadem in corpore Christi quæ in pane, sequetur nihil re vera commune esse ter-

minis à quo & ad quem; & per consequens, neque esse conuersionem. Respondetur, quòd cùm actio sit intellectualis, satis est subiectum esse commune realiter respectu ipsorum, sic itaque cùm intellectus accipiat accidentia in ratione indiuiduantium pro subiecto propositionis, sufficit quòd realiter conueniant accidentia panis & accidentia corporis Christi in hâc reali naturâ, quæ est esse indiuiduantes seu natas indiuiduare.

Ex quibus intelligitur, quomodo etsi hæc accidentia sint realiter ipsa forma & corpus panis, tamen ipsa remanere possint, substantiâ panis non remanente. Sicut enim etsi esse in tali figurâ, sit ipsa substantia animalis, tamen truncato crure non amplius illa figura, sed iam figura trunci est figura animalis, eodem modo quo prior figura erat, sic, vt duæ figuræ successiuè sint eadem eadem animali. Sic & facilius eadem figurâ vel complexio accidentium specie, potest successiuè esse identificata diuersis naturis, modò pani,

modò corpori Christi, & dum identificata est pani, propter talem identificationem esse forma panis: & dum identificatur corpori Christi, esse forma corporis Christi, vt tale corpus est.

Sic itaque corpus Christi per transubstantiationem reperitur identificatum omnibus accidentibus panis; id est, quatenus panis immutari posset citra mutationem substantiæ. In alteratione enim panis proceditur ad maiorem & maiorem, vsque dum immediatè iam foret non panis si ultra mutaretur; & eousque sunt accidentia substantiæ panis, postmodum ipsa substantia; cum aliquid mutatur sine quo non consistit essentia panis.

Dices, per hæc declarari quomodo panis posset existere sine suis accidentibus cum accidentibus alienis; sed nondum quomodò corpus Christi possit existere cum accidentibus panis, sine substantia panis. Cum enim priora sint de ratione posteriorum, non intelligitur quomodo posteriora possunt esse sine priori-

bus. Verbi gratiâ, si albedo sit de essentiâ panis, sed non hæc albedo, potest intelligi quomodo panis possit existere sine hâc albedine : Sed quod hæc albedo existat sine albedine, impossibile est. Si itaque albedo, quantitas, &c: sint forma panis, non est intelligibile hanc albedinem, quantitatem, &c: esse, & non esse formam panis. Sic ergo non est intelligibile, quomodo Christus habeat accidentia indiuiduantia panis, sine communibus & essentialibus, id est, ipsâ formâ panis.

Respondetur, hanc replicam semetipsam inuoluere : si enim declaratum est, quomodo panis possit existere cum accidentibus alienis, pariter declaratum est, quomodo accidentia aliena possunt existere sine suâ substantiâ.

Clarum est itaque accidentia esse partes quasi integrantes substantiæ per identitatem ad substantiam in quâ sunt. Si itaque sint in alienâ substantiâ, non sunt amplius constituentes priorera substantiam. Quare accidentia panis postquam sunt in

LIBER IV. LECTIO VII. 413

corpore Christi, nullam habent relationem ad formam panis. Cum itaque omnia, quousque sunt accidentia, sint in corpore Christi, non sunt aliquid de pane, neque pertinent ad substantiam ipsius.

Quare quod dicatur ratio communis esse de ratione particularium, nihil vrget: ipsæ enim rationes communes, prout sunt identificatae corpori Christi, & respectu ipsius panis, possunt habere rationem accidentium; neque forma panis vlllo modo esse in corpore Christi: quæ etiam in pane (etsi identificata his, & quamuis hæc etiam de ratione ipsius forent cum perfectè definiretur) tamen in suâ ratione strictâ nihil ijs simile habet, sed est quiddam indiuisibile; vt solet explicari per exemplum pluralitatis & mutationis figuræ; & acceptis singulorum definitionibus satis elucet. Sed & quamuis dicatur omnia accidentia panis esse in corpore Christi, non propterea habetur omnem formam in pane esse in corpore Christi. Rationes itaque communes accidentium solæ, non

constituebant formam panis, sed per coniunctionem cum alijs prædicatis, quibus deficientibus, non sunt forma panis, sed tantum accidentia.

Ex dictis habetur ratio particularis actionis consecratiuæ per comparisonem ad alias. Quatenus enim quoad effectum est integra substantia & momento posita, sapit creationem: quatenus ex subiecto facit quod facit, eatenus est conuersio: quatenus ipsa locutio est successiua, & quatenus ponit rationem primam corporis Dominici, eatenus sapit generationem: quatenus verò est circa corpus Dominicum iam existens, sic refertur quasi ad nutritionem. Tandem quatenus hæc omnia exercet manentibus indiuiduantibus accidentibus, eatenus est species particularis, dicta *transubstantiatio*.

Patet quoque ex collectione omnium particularium, quod etiam si actio totalis sit specialis & admiranda, in particulari tamen nihil habet cuius exemplum in naturâ non reperiatur. Vt accidentia in alieno subiecto, immediatè ante omnem

LIBER IV. LECTIO. VII. 415

conuersionem substantialem; maiorem quantitatem, in omni augmentatione; plures quantitates, in membris fluidis & solutis, & superficiebus pluribus eiusdem corporis; esse autem in pluribus locis, pluribus quantitibus naturale est.

Quare hoc mysterium ex arcanis Metaphysicis de essentiâ corporum collectum est, contra illa verò nihil continet. Vnde quò magis admirandum, eo quoque magis credendum est, quasi verbum Dei & non verbum hominis.

Patet etiam ex dictis, quoad modum loquendi has locutiones, Panis conuertitur in corpus Christi, transit in corpus Christi, manet in corpore Christi (scilicet in virtute suâ) esse satis proprias. Eas vero, corpus Christi fit ex pane, vel de pane, vtramque esse veram, etsi magis innoxie dicitur *ex*; cum *de*, videatur sonare substantiam: quia tamen fit de hoc quod est panis, etiam de pane fieri dici potest. *de* enim *hoc* substantiam sonat, & quasi suppositum. Vnde non est fugienda illa propositio. Hæ

autem , corpus Christi fit , vel Christus fit , sunt duriores ; & prima forte aliquo modo formaliter vera , sed male sonans in populo non penetrante Metaphysica : Posterior absolute impropria , & non toleranda , nisi ex necessitate explicanda aliquando veritatis.

LECTIO VIII.

*De quibusdam consequentibus
ad existentiam Christi sub
speciebus.*

VLteriùs aperta est semita ad ea quæ consequuntur Christi existentiam in hoc Sacramento. Et imprimis quomodo fit in pluribus locis. Cùm enim quantitatem sequatur locus , apparet positus pluribus quantitibus , consequens esse eam in pluribus locis esse ; & quidem circumscriptiuè ; si de collatione quantitatis ad locum sermo sit ; sed propriè loquendo , speciali modo qui dicitur Sacramentalis.

Ex quo patet, non opus esse duplici actione substantiali adæquatâ ad ponendum Christum in pluribus locis ; cum localitas non pertineat nisi consequenter ad substantiam, & naturalitèr sequatur quantitatem. Præterquam quòd cum nihil possit esse magis notum vi naturalis iudicij, quàm factum non posse fieri ; mirum est quomodo quispiam rationis compos possit affirmare actione aliquâ fieri quod per aliam fit. Neque minoris si non maioris hebetudinis est, asserere substantiam eandem replicari, & valere, quantum plures substantias; id est, non esse mutatam, quia est eadem ; & esse, quia iam est æqualis pluribus.

Non absimiles sunt consequentiæ quas inducunt, puta posse esse qualificatum affirmatiuè in vno loco, & in alio negatiuè. Et hoc non solum qualitatibus corporeis, sed etiam spiritualibus. Neque parcent ipsi existentia ; sed affirmant esse & non esse ; annihilari & creari ; mori & nasci, in diuersis locis posse huiusmodi corporibus contingere. Quasi locus

& circumstantiæ post existentiam sequentes, forent subiectum existentia. Sed quia his ipsis positionibus nihil absurdius potest inferri, omitantur.

Pater vlteriùs commentum entitatum, quæ vocationes solent vocari, adeò inconueniens esse in hoc mysterio, vt vel propter hoc solum rejici mereatur. Quale enim est, vt corpus gloriosum Christi Domini, non solum complicatum, vt in fasciis vel vtero materno ponatur, sed etiam vt membra in minima loca vel puncta, sine vllò ordine vel modo coaceruentur, & reddantur inhabilia omni vsui; habeatque Christus quasi oculos abstrictos, aures obruratas, tactum stupentem; & similiter de reliquis sensibus & membris.

Consequentè dicimus vno verbo, Christum sub speciebus posse agere & pati omnia quæ secundum easdem species nata sunt agi & pati; seu quæ panis natus erat agere vel pati, & amplius nihil. Neque hoc magis inconuenit quàm quòd in proprio corpore secundum pedem non possit vi-

dere, neque aliud agere quàm quòd per pedes natum est agi vel pati. Et consequentiæ sunt pares, & paritèr evidentes, cùm ex ratione dispositionum sumendus sit ordo ad operandum. Dispositiones autem in Sacramento sunt dispositiones panis.

Quo non obstante, eodem modo quo dicuntur plura per concomitantiam esse sub speciebus, dici potest etiam operari sub speciebus quæ in cælo operatur. Sed neutrum dicitur in rigore, sed dumtaxat secundùm quid: & in scholis non sunt admittendæ similes propositiones sine adiectione termini alicuius restrictiui: & negatiuæ ob solutè tenendæ sunt pro veris, & sine restrictione admittendæ.

Et hoc est admittendum vniuersaliter, id est, vt cum restrictione non solum dicatur habere hic operationes spirituales, vt intelligere, velle, disponere fata hominum, mittere angelos, &c: Sed etiam corporeas, vt videre, loqui, &c: Neque illas solas quæ videntur ad semetipsum tantum referri, sed etiam illas quæ ad

circumstantia referuntur, vt ambulare, esse in cælo, porrigere manum alicui, &c: si quas tales actiones ponatur exercere in cælo, vsque ad ipsum esse in cælo.

Ratio non est difficilis, cum enim esse sub speciebus per concomitantiam, significet esse in Christo, vel corpore Christi quod est sub speciebus; & euidens sit hæc omnia, & ipsum esse in cælo, esse in corpore Christi quod est sub speciebus, declarato sensu propositionis, euidens est hæc omnia posse dici, & non posse negari esse sub speciebus seu esse hîc.

Quia tamen quædam propositiones natæ sunt dici de Christo secundum vtrumque statum, ex quamvis de Christo sub speciebus sub reduplicatione natæ sunt pronunciari, non tamen simpliciter de eo dicuntur. Tales sunt videri, ferri, diuidi, &c: non enim simpliciter loquendo Christus videtur, cum per alias species videtur: neque absolute mutat locum, vel diuiditur, cum secundum species panis hæc patitur: quan-

tumuis sub reduplicatione sint verissimæ propositiones, scilicet adiecto quatenus hîc, & sub speciebus. Sed quod secundum proprias species operatur, absolute operatur; sicut & esse simpliciter secundum illas habet. Quæ autem prædicata non sunt nata de ipso dici secundum species panis, neque sunt vera secundum proprias, clarum est non omnino de illo enunciari. Talès sunt, esse mutum, surdum, mutilari, laniari, &c. Quæ cum supponant corpus organicum, non affirmantur de Christo secundum species panis, neque sunt veræ de illo secundum figuram propriam. Vnde patet per diuisionem specierum vnâ partem aut membrum ab alio non diuidi.

Patet ex dictis quid dicendum sit ad illam quæstionem, utrum videri possit Christus prout est sub speciebus? Afferendum enim clarè est, eum absolute videri prout est sub speciebus coloris, æquè atque aliud corpus. Si tamen quæstio sit de modo inexistendi, sic non est obiectum visibile, sed intelligibile; sed adeo intelli-

bile, sicut existentia cuiusvis substantiæ, præsertim animalis, sub suis accidentibus.

Clarum quoque ex dictis est, quâ vi Christi corpus conseruetur sub speciebus. Cum enim generalis conseruatio rerum sit ex emanatione *non esse* à Deo, per quam quævis substantia retinet esse acceptum, donec per secundarum causarum operationem nouum esse succedat; fit, postquam ex vi verborum esse Christi est sub speciebus, ibidem permanere, donec, vel *non esse hoc*, vel *non esse corpus Christi*, ex secundarum causarum mutatione sit ablatum.

Vnde patet quod si species à Christo consecratae, fuissent conseruatae in triduo mortis, Christus non fuisset sub speciebus panis, sed tantum cadauer. Cum enim ex ordine secundarum causarum Christus non amplius esset, neque sub speciebus esse poterat. Sed quia *non Corpus meum*, etsi metaphysicè æquiuocum, moraliter tamen (quomodo pronunciatum est) extendit sese ad corpus mortuum seu cadauer, etiam cada-

ner sub speciebus ex vi verborum
fuiſſet.

Conſequens eſt , etiamſi corpus
Chriſti combuſtum fuiſſet , cineres
& fumum futura fuiſſe ſub ſpecie-
bus. Ex eo enim quòd ex vi verbo-
rum corpus Chriſti ſit in his ſpecie-
bus , etiam quicquid vi cauſarum
naturalium ſit ex corpore, ſit exiſtens
ſub his ſpeciebus. Formæ enim mu-
tatio accidit ſinè vllâ præuiâ muta-
tione ſubiecti ; (modò contingat
formam eſſe mutatam) ſicut & in-
cipit ineſſe ſine aliquâ circa ipſam
mutatione per ſolam alterationem
ſubiecti.

Accipitur conſequenter, cum ſpe-
cies panis corrumpuntur , non am-
plius manere corpus Chriſti , ſed
ſieri ex corpore Chriſti quatenus eſt
hoc, aliud corpus ; eodem modo quo
ſudor vel aliud mixtum ex corpore
Chriſti viuentis : neque vllam eſſe
ſpecialem difficultatem , ſiue circa
formam, ſiue circa materiam ; Cùm
materia in Chriſti corpore ſit ſuffi-
ciens, & non quantitas ſed ſubſtan-
tia ſit ſubiectum mutationis. Vnde

424 INSTITVT. SACRARVM.
totum peragitur naturali modo abs-
que specialiratione difficultatis.

LECTIO IX.

*Quid sit quod Fideles Missa nomine
intelligant.*

Ex dictis comprehenditur, quid
Missæ nuncupatione in Ecclesiâ
Catholicâ designatum veniat. Cum
enim non nisi sacrificium (sed cir-
cumstantijs vestitum) appellemus
Missam; sacrificium autem sit testi-
monium; testificatio autem vt actio-
nibus fit, sic magis verbis; Missa
quoad essentiam est contestatio sum-
mæ in Deo potestatis, per separationē
corporis & sanguinis Dominici co-
mitata in verbis explicantibus eam
esse oblationem in honorem & reue-
rentiam Dei factam.

Quare cum oratio significet ele-
uationem mentis in Deum, palam-
que sit offerentem Deo aliquid, men-
tem versus ipsum dirigere & eleuare:
consequens est, Missam esse oratio-
nem,

LIBER IV. LECTIO IX. 425

nem. Et quia sacrificium est testimonium summæ excellentiæ redditum Deo, palam est esse supremam speciem orationis, seu eleuationis eternæ ad Deum. Et quoniam perfectio humanæ naturæ consistit in eleuatione mentis ad Deum, patet hanc orationem esse supremam operationem naturæ humanæ.

Et quoniam excellentia opera, non possunt dignè fieri, nisi ab excellentibus Personis: palam est hanc operationem ex merito & qualitate suâ requirere excellentissimum gradum naturæ humanæ: & quod sequitur, & homines eligi debere, quorum opus peculiare sit, & eos debere esse prorsus eminentissimos totius generis humani; maximè cum ipsum materiale sacrificij, sit verum corpus & sanguis Dei, & Domini nostri Iesu Christi.

Ex eo autem quod sacrificium principale sit destructio animalis, animal autem mortuum fiat esca hominum; & hoc sacrificium impleat speciem omnium sacrificiorum; sit Missæ duas esse potissimas, & quasi essen-

tiales partes : consecrationem seu oblationem; & consummationem seu participationem. Quarum hæc ad populum spectat, illa peculiariter ad sacerdotem : & populus consummatione, tanquàm propria actione attestatur se offerre sacrificium ; & sacerdos cum consummat, hoc facit quasi vnus de populo.

Vt autem consecratio etiam actione visibili repræsentaret mortem Christi, additæ sunt consecrationi fractio panis, repræsentans mortem, & mixtio panis cum vino, designans vel sepulturam, quæ videtur consummatio mortis; vel descensum animæ in abyssum, qui & ipse quasi terminus quidam mortis est.

Cætera quæ sunt in missâ, vel sunt instructio populi, vsque ad offertorium; præparatio materiæ, vsque ad consecrationem; vel preces seu gratiarum actio sequens.

Forma consecrationis ex parte sacerdotis est deprecatiua, ex parte Christi enunciatiua : vtraque necessaria; nisi quod deprecatio sacerdotis suppleri potest aliquo apparatu ad-

tionis ad idem determinantis. Vnde per verba Christi sine cæremoniâ prolata, non conficeretur sacrificium; debet enim esse moralis actio sacerdotis quasi solennitèr agentis per verba Christi. Quæ si sine tali solennitate proferrentur, significarent corpus & sanguinem Sacerdotis, non Christi.

Benedictiones quæ post consecrationem oblatis impenduntur, sunt formales; hoc est, datæ corpori & sanguini Christi, vt formaliter sunt in altari, videlicet non inclusâ vitâ. Quomodo Christus, & Sacerdos qui Christi vices agit, est quid maius, & natum benedicere eis, id est, precari Deum vt illis beneficiat quoad finem sacrificij; seu vt faciat illa vtilia populo fidelium.

Ex quo etiam patet, preces formales quæ pertinent ad sacrificium, non debere (saltem post consecrationem) dirigi ad Christum, vel spiritum sanctum, vel Sanctissimam Trinitatem, sed tantummodò ad æternum Patrem, à quo solo processit Christus, & ad quem solum referri & redire.

habet. Et si enim sit corpus Christi post consecrationem, tamen est Christus & non corpus eius quod sacrificatur: & si offertur corpus, est quasi aliquid Christi, & sic semper ad solum patrem debet referri.

Et sacrificans quidem est solus sacerdos: Quia vox hæc externum ministerium sonat. Offerens autem est primò Ecclesia, quæ Sacerdotes ad hoc instituit, conseruat, regit: proximè, qui curat Missam fieri: sed & quisquis astat debitâ cùm cæremoniâ, & quisquis voluntate suâ concurrit: & tandem sacerdos quatenus exhibet externum ministerium. Alioquin enim tanquam vnus ex populo suam partem oblationis habet.

Sic itaque patet non esse in potestate Sacerdotis, fraudare Ecclesiam vel alios, etsi summè cuperet, fructu sacrificij; modo Missam dicat. Immo si Missam non diceret, non fraudaret curantem. Missam dici, quin haberet eum fructum qui ex Missâ dictâ ex parte operis ei responderet. Cùm enim Missâ sit testificatio excellentiæ diuinæ, hanc ille fecit cu-

rando eam dici; siue effectus sequatur siue non.

Quoniam autem hoc sacrificium continet omnem speciem sacrificij; orationes adjunctæ non sunt præcisè testificationis sed etiam deprecationis. Et per impetrationem hoc sacrificium est causa omnium bonorum, puta remissionis peccatorum viuis & defunctis: & largitionis gratiarum tam corporalium quàm spiritualium. Aded vt applicari possit cusslibet necessitati generis humani.

Quoniam autem deprecantes solent munere præuenire animos eorum quos ambiunt, & etiam per modum obtestationis repræsentare eis charissima, quæque ipsis ad commouendos eorum animos maximè efficacia videntur; triplicem virtutem habet hoc sacrificium. Vtimur enim illo ad excitandos & figendos animos nostros in Deo; rursus ad confirmandos animos nostros magnitudine doni quod offerimus; & ad excitandam spem, cum exhibemus coram passionem vnigeniti Filij ip-

sius ; quo nihil ex nostris potest ei
charius esse.

Ex hoc patet quomodo sacerdos
pro alio offerre potest sacrificium;
namque per modum testificationis
offert pro iis quorum voluntas est vt
hoc sacrificium offeratur; quasi vice
fungens illorum. Per modum autem
deprecationis, pro quibuscumque, qua-
tenus & doni & pignora charitatis
ingerens Deo, confirmat supplicatio-
nem per quam aliquam gratiam iis
impetrare conatur.

Ex quibus deducitur, quod etiam
si valor Missæ sit infinitus, & infini-
tis presentibus possit infinita bona
procurare; tamen vni sacerdoti tan-
tum impetrat secundum dispositio-
nem & affectum proprium & limita-
tè; & plus bono quàm malo. Vnde
interest curantium Missas, vt bonos
sacerdotes eligant. Patet etiam sa-
cerdotem qui eandem Missam pro
pluribus debitis faciat, iniuriam fa-
cere ijs, à quibus Eleemosynam ac-
cepit.

Tandem patet quòd Missæ pre-
cium est nullum : sed quia plures

LIBER IV. LECTIO. IX. 431

sunt sacerdotes ad supplendas deuotioni populi Missas instituti, quàm Ecclesia nutrire valeat ; ad eorum alimoniam Ecclesia taxat per iustitiam distributiuam quid pro singulis Missis accipi debeat, vt competens sit alimonia cunctis. Vnde defraudans defraudet ceteros sacerdotes, impediens illos à debito alimentis ; & eum pro quo Missas dicit, eo fructu, qui ex eorum deuotione ipsi accresceret.

FINIS.

8 =

INSTITVTIONVM
SACRARVM
PERIPATETICIS
INÆDIFICATARVM;

HOC EST,

Theologiæ, super fundamentis in
Peripateticâ Digbæanâ iactis,
extractæ;

PARS THEORICA.

Authore THOMÆ Anglo, è generosâ
ALBIORVM in Oriente Trinobantum
Prosapia oriundo.

TOMVS SECVNDVS.

*Narrauerunt mihi iniqui fabulationes;
sed non vt lex tua Domine. Pl. 118.*



M. DC. LII.

Sold

8° 5 19

Sh

INSTITUTION
SACRA RVM
PAPALITATIS
LIBRARIAM
HOC EST
LIBRARIAM
HOC EST
LIBRARIAM

LIBRARIAM
LIBRARIAM
LIBRARIAM
LIBRARIAM
LIBRARIAM
LIBRARIAM
LIBRARIAM
LIBRARIAM



LIBRARIAM
LIBRARIAM
LIBRARIAM
LIBRARIAM
LIBRARIAM
LIBRARIAM
LIBRARIAM
LIBRARIAM



INDEX
LIBRORVM
ETLECTIONVM
quæ in hoc secundo to-
mo continentur.

LIBER PRIMVS.

*De sacramentis legis gratia
in communi.*

LECTIO I. Quòd sint sa-
cramenta : Et quid sit sa-
cramentum. pag. 1.

Lect. II. De Materiâ & formâ
sacramentorum in com-
muni. pag. 9.

Lect. III. De numero sacra-
mentorum ; & quibusdam
eorum diuisionibus. pag. 16.

Lect. IV. De caractere quem
imprimunt sacramenta : de

- Institutoꝛe quoque, & mu-
tatione eorundem pag. 28.
Lect. V. De efficaciâ seu virtu-
te conferendi gratiam, quæ
est in sacramentis. pag. 36.
Lect. VI. De Ministro sacra-
mentorum. pag. 44.
Lect. VII. De Intentione Mi-
nistri, circa quid versetur.
pag. 58.
Lect. VIII. De dispositionibus
necessarijs suscipientium &
ministrantium. pag. 65.
Lect. IX. Quomodo sacramen-
ta conferant gratiam *ex ope-
re operato*. pag. 73.
Lect. X. De necessitate sacra-
mentorum. pag. 82.

LIBER SECVNDVS.

*De Angelorum natura &
ministerio.*

- Lect. I. Quod sint Angeli, &
quem ordinem habeant in
vniuerso. pag. 87.

u.
8.
u.
12
6.
2.
4.
i.
r.
is
&
5.
1.
-
.
.
Lect. II. De objecto cognitionis Angelicæ. pag. 94.

Lect. III. De modo sciendi Angelorum. pag. 104.

Lect. IV. De volitione, & distinctione Angelorum. p. 116.

Lect. V. De nominibus & multitudine Angelorum. p. 125.

Lect. VI. De primo peccato Angelorum. pag. 133.

Lect. VII. De viâ Angelorum: & auxilijs ijs datis. pag. 140.

Lect. VIII. De actione Angelorum in inuicem. pag. 151.

Lect. IX. De actione Angelorum in corpora: Et specialiter in homines. pag. 162.

Lect. X. de actione malorum Angelorum, tum in homines tum in Angelos bonos. pag. 171.

Lect. XI. Quomodo Angeli sint in loco: & Dæmones in energumenis. pag. 188.

LIBER TERTIVS.

*De Institutione, progressu, &
Consummatione sanctæ
Ecclesiæ.*

Lect. I. De Causis sanctæ Ecclesiæ perpetuitatis. pag. 201.

Lect. II. De inceptione & progressu sanctæ Ecclesiæ. p. 210.

Lect. III. De fine Mundi : & quod futura sit Resurrectio corporum. pag. 219.

Lect. IV. De substantia Resurrectionis. pag. 228.

Lect. V. De modo Resurrectionis. pag. 240.

Lect. VI. De visione beatificæ quoad substantiam ipsius. pag. 251.

Lect. VII. De objecto visionis beatificæ, & incomprehensibilitate Dei. pag. 260.

Lect. VIII. De proprietatibus & causis visionis beatificæ. pag. 278.

S. Lect. IX. De damnatione Re-
probiorum. pag. 290.

Lect. X. De Purgatione pecca-
torum in mortuis. pag. 299.

e. Lect. XI. De statu & loco fina-
li corporum. pag. 308.

i. Lect. XII. Quod Christus per-
fecerit ea, ad quæ exequenda
missus est. pag. 314.

o. Lect. XIII. Quibus modis
Christus effecerit quæ fecit
pag. 320.

3. Lect. XIV. Quomodo creata
omnia processerint a Deo.
pag. 330.

a. Lect. XV. Cur homines non
sunt creati in statu Beatitudi-
nis. pag. 337.

s. Lect. XVI. Dei gubernatio-
nem in communi esse con-
formem naturæ hominum.
pag. 345.



APPENDIX

S I V E.

*Brevis exegesis in aliquot diuina
Apocalypseos capita, qua sancta
Ecclesie Catholicae progressus
& consummatio, magis parti-
culariter enarrantur, quam in
sacris Institutionibus, in ea-
rundem supplementum.*

PRÆFATIO ad lectorem. pag. 1

INTRODVCTIO naturam facul-
tatum ad locutionem spe-
ctantium maximè Poëtices
explanans. pag. 5

Sect. I. Argumentum & diuio
operis. pag. 14

Sect. II. Declaratio capitis
quarti. pag. 18

Sect. III. Declaratio capitis
quinti. pag. 22

- Sect. IV. Declaratio capitis
sexti pag. 24.
- Sect. V. Declaratio capitis
septimi. pag. 28.
- Sect. VI. Declaratio octavi
capitis. pag. 29.
- Sect. VII. Declaratio locusta-
rum Apocalypticarum. p 34.
- Sect. VIII Declaratio eque-
stris exercitus Apocalyptici.
pag. 38.
- Sect. IX. Declaratio capitis de-
cimi. pag. 42.
- Sect. X. Declaratio capitis vn-
decimi. pag. 45.
- Sect. XI. Enarratio capitis duo-
decimi. pag. 47.
- Sect. XII. Declaratio Bestiæ
marinæ Apocalypticæ. p. 52.
- Sect. XIII. Declaratio Bestiæ
terrestriſ Apocalypticæ p. 55.
- Sect. XIV. Declaratio capitis
decimi quarti. pag. 60.
- Sect. XV. Declaratio capitis

decimi quinti. pag 64.

Sect. XVI. Declaratio capitis
decimi sexti. pag 65.

Sect. XVII. Declaratio eorum
quæ euentura sunt circa
finem mundi , prædicto-
rum capite decimo septimo.
pag. 69

Sect. XVIII. Enarratio histo-
riæ Capitem decimi noni &
vicesimi. pag 76.

Sect XIX. Conclusio per omis-
sionem capitis vicesimi pri-
mi & secundi. pag 79.

CONCLUSIO continens bre-
uem totius operis periocham.
pag. 80.



INSTITUTIONVM

SACRARVM

PERIPATETICIS
inædificatarum.

LIBER PRIMVS.

De sacramentis legis gra-
tiæ in communi.

LECTIO I.

*Quod sint Sacramenta: & quid
sit Sacramentum.*

QVandoquidem Ecclesia est
multitudo hominum hu-
mano more socialiter vi-
uens, & collecta in hunc finem,
vt æternam beatitudinem commo-
diùs assequantur per morem viuen-

2 INSTITVT. SACRARVM.

di tanto fini consentaneum : palam est , non sufficere solam adorandi cæremoniam, quantumuis optimam ; sed plures solemnitates , seu sollennes actiones Christianæ vitæ esse necessarias.

Habet enim hoc humana consuetudo , vt vilescant ei consueta , & in obliuionē abeant desueta , & excitetur nouis , & quasi instauretur languescens animus ; & fastidiens eadem semper repetita , varietate irritetur , & nouum robur assumat. Et sic videmus in omnibus societatibus , quasdam sollennitates & extraordinarias coitiones ordinatas , ad perpetuandum feruorem primæ institutionis.

Rursus , cùm vita Christiana sit implantata naturæ ; & hæc habeat conuersiones quasdam , alias ex instituto naturæ , alias ex necessitate ; { nam & puer fit adolescens , & hic , vir ; & mox senex ; ex progressionis naturæ ordine : & ex necessitate incurrunt morbi , & fortuita siuè mala siuè bona : } fit alias & alias etiam in vitâ Christianâ debere esse partes , &

LIBER I. LECTIO I. 3

partium solennes auspicationes, accommodatè ad mutationes naturæ.

Adde quod vita Christiana est actio tendens ad finem arduum; puta, vitæ æternæ, superatam facultatem naturæ. Vndè sicut qui in altum & arduum montem contendunt, plures respirationes in iugis mediis coguntur subire; sic in vitâ Christianâ oportet esse plures gradus & celsitudines, ad quas per nouas quasdam inceptions aggrediendum est, & sapius proinde initiari hominem.

Tandem, cum tota lex Christiana à Deo per Christum descenderit; & per consequens, sit quidpiam mysteriosum & abditum respectu naturæ humanæ; consentaneum est vt Deus sapius quasi porrectâ manu adiuuet, & benedicat, & initium det maximis operibus & gradationibus vitæ humanæ; quatenus per Christianas institutiones dirigatur & eleuatur ad nobiliorem agendi modum.

Ex quibus deducitur, sacramenta (sic enim à Theologis vocantur hæ actiones) esse solennitates Christiani populi, quibus partes, seu præci-

4 INSTITVT. SACRARVM.

pux Christianæ vitæ operationes, initium accipiunt; & impetus quidam ad operationes perficiendum, quomodo ad finem vitæ æternæ conducit.

Cùm itaque vita Christiana, vt talis, sit sancta (quando constans est) necesse est robur & virtutem ad eam ritè agendam, dici esse sanctitatem; & sanctificari homines per Sacramenta. Cùm rursus vita Christiana consistat in animæ operationibus, necesse est hanc sanctitatem consistere in virtute faciendi in hominibus dignam æstimationem & volitionem circa illa quæ docet & imperat Christi lex & doctrina. Hoc vt conuenientè fiat per actionem externam capacem solennitatis, necesse est, vt actio externa talis sit, vt ducat nos ad doctrinam interiorem, quæ ædificet animas; ideoque contineat in sese virtutem sanctificandi sanctitate inuisibili: celet itaque rem altiorrem quàm ostendat: & sit per consequens mysterium; id est, secretum (quod & græca vox sonat.) Et quia quæ non nisi Sacramento adactis, id

LIBER I. LECTIO I. 3

est, iuratis creduntur, secreta sunt, etiam latinè *Sacramentum* in eâdem significatione appellatur.

Quoniam verò tota Christiana vita à Deo originem trahit; & per consequens, specialitèr Sacramenta; necessum est rationem Sacramenti specialiter competere his actionibus, quatenus à Deo fluunt, seu quatenus sunt actiones Dei in nos. Vnde ferè actio Ministri apud Theologos consideratur tanquam integrum Sacramentum; etsi verè actio Sacramentalis includat etiam actionem suscipientis quatenus suspiciens est; ut patet specialitèr in Pœnitentiâ & Matrimonio.

Sic accepta ratio Sacramenti componi dicitur ex actione externâ, puta lotionem, impositionem manuum, &c.: & verbis explicantibus vim actionis, tanquam ex materiâ & forma. Cùm enim finis Sacramenti sit sanctificare, seu suscipientem ad actum virtutis initiare, & actionis seu talis partis Christianæ vitæ initium facere; verba autem sunt propriissimum instrumentum informandi animum huma-

6 INSTITVT. SACRAM. VM.

num; necesse est verba habere formaliorem seu virtuosiorẽ rationem in Sacramento

Ex quo patet, Sacramentum esse essentialitẽr in ratione signi; quoniam potestas Sacramenti est vis significandi, per quam verba nata sunt inducere homines ad actus interiores virtutum, & per eos ad actus exteriores. Neque quicquam est formidandum ne sacramenta sint propterea entia rationis. Si enim hoc nomine significetur, quod habet vim mouendi rationem, & per illam impellendi ceteras potentias; omnino esserendum est esse ens rationis: & hoc genus entis esse nobilius puris materialibus in suo genere. Vt autem credant rationem Sacramenti esse fictam, ipsi debent ratione carere.

Neque inconueniens est, vt Sacramenta sint entia per accidens; id est, ex duabus rationibus per accidens conjunctis constent: cum neque omne sanctificans sit signum; neque omne signum, sanctificans; hoc enim commune est omnibus arte-

factis, in quibus ferè subiectum habet rationem generis; ordo, rationem differentiarum: sicut cum definitur Harmonia esse sonus modulatus. Sic in Sacramento & actio & voces sunt in genere signi; quod autem significatur, seu esse sacrum quod significant, est formalis differentia. Vel si actio accipiat pro subiecto; verba declarantia qualis sit actio, sunt quasi forma vel differentia.

Ex dictis patet, quod cum ratio Sacramenti consistat in eo quod significando operetur sanctitatem in fidelibus; & caeremoniae veteris legis non prætulerint nisi temporales benedictiones, à Deo consequendas, in literali verborum & actionum expressione; & non operabantur nisi dignitatem quandam ad eas à Deo obtinendas, quantumvis significarent ipsam sanctitatem quæ datur fidelibus in mystica & allegorica applicatione; verè eas caeremonias non fuisse uniuocè Sacramenta, neque continuisse gratiam quam significabant, neque aliam, quàm carnalem munditiam præstitisse.

8 INSTITVT. SACRARVM.

Rursus cùm in quantum constet nobis de lege naturæ & de statu Paradisi actuali (quid enim futurum fuisset, si diu perseverauisset ille status, in imaginatione solâ est) vtraque fuerit imperfectior lege Mosaicâ; & hoc videatur ordo prouidentia diuinæ requirere ; & per consequens , vterque status publicè tantum ad temporalem felicitatem institutus fuerit ; sit eorum Sacramenta etiam analogicè fuisse sanctificatiua , & significauisse magis gratiam quàm exhibuisse. Quatenus autem hæc omnia Christum significabant , eatenus non pertinent ad sacramentalem naturam , prout hic eam accipimus, videntem Sanctitatem ; sed ad sacramenta speculatiua id est , ad mysteria sub vmbris & velaminibus tradita.

LECTIO II.

*De materia & forma Sacramentorum
in communi.*

IN primis quoad verba, clarum est
ea non esse materialiter determi-
nata; hoc est, quoad ipsas voces &
sonos; sed duntaxat quoad sensum:
alioqui vnicâ linguâ, quâ Christus ea
tradidisset, efferri possent; neque
haberent respectu humani generis
eum vsum propter quem sunt insti-
tuta, videlicet vt determinent signi-
ficationem actionis: cum ipsa forent
magis indeterminata ipsâ actione.
Neque refert quòd per interpreta-
tionem suppleri possit hic defectus:
hoc enim magis ostendit institutio-
nem non esse recte factam, si indiget
vniuersaliter supplemento.

Ex hoc rursus fit euidentius, nume-
rum vocum non esse determinatum;
cum quod in vnâ linguâ vnâ voce
profertur, in aliâ linguâ interdum
non nisi periphrasticè exponi possit.

Quarè cùm solus sensus sit determinatus, etsi integras periodos pro vocibus minister subijciat, constabit forma Sacramenti, modo idem sensus retineatur: verbi causâ, si loco Patris & Filij, &c: subijcerentur omnia quæ de singulis Personis in Symbolo recitantur; nihilominus constaret sibi forma Baptismi.

Infertur rursus, non alligari Sacramenta ad formam locutionis enuntiativam, vel etiam imperativam; sed posse in deprecativâ administrari. Cum enim Sacramentum applicet virtutem diuinam ad suscipientem, & sit quædam benedictio; clarum quoque sit, benedictiones esse ferri connaturalissime in formâ deprecativâ; nihil vetat Sacramentales benedictiones etiam deprecativè esse ferri, æquè connaturaliter atquè in aliâ formâ.

Non tamen quælibet forma est sufficiens. Cum enim verba sacramentalia sint consecratoria; necesse est formam esse eiusmodi, ut applicet virtutem diuinam ad subiectum. Undè pura recitatio non est suffi-

ciens; per hanc enim nihil fit. Sed neque purè optatiua, vel interrogatiua; etsi circumstantiæ tales contingere possunt, vt aliquando similes formæ sint applicatiuæ; vt cum Eliaz percussio flumine palatio Eliaz subiunxit, *Vbi est Deus Elia, etiam nunc?*

Patet etiam corruptionem vocum per ignorantiam linguæ (modò agnosci possit quas voces minister intendit proferre, & sic sint significatiuæ respectu intelligentis linguæ) non impedire constitutionem Sacramenti. Cum enim voces sint ad declarandam mentem loquentis; & ea agnoscitur per ipsas voces corruptas; patet voces habere substantiam talis instrumenti, quale essentialiter sunt: patet itaque non esse corruptas essentialiter, siue constructio sit luxata, siue ipsa vocis variatio sit vitiata.

Si tamen ex intentione malignâ peruerterentur voces in aliam formam; sicut vitandî iuramenti causâ, videmus similes nonnunquam voces supponi, non consisteret Sacramenti essentia. Cum vocis signifi-

catio in particulari ex intentione per se loquentis pendeat ; euidentem autem sit, huiusmodi loquentes, dedita operâ vitare voces & sensum vocum; & quod sequitur, non dicere neque tenere sensum & substantiam formæ sacramentalis.

Patet etiam voces additas erroris explicandi gratiâ, secundum qualitatem erroris vitare formam. Quoties enim error est destructiuus sensûs necessarij, inuadat formam : sin verò compossibilis est, quoad moraliter perspicui potest, manet vis Sacramenti. Propterea si Arrianus post nomen *Fily*, adderet, à Deo factis; peruerteret baptismum; non enim in Dei nomen baptizaret: sin Græcus post vocem *Spiritus Sancti*, adderet non procedentis à Filio; incolume foret Sacramentum ; quia hic error non tollit, quin sit Deus.

Clarum quoque est, eandem vocem posse irritare Sacramentum in vniis circumstantijs, & non in alijs; vt vox *homoiousias*, addita Filio ab Arriano, redderet inuolidum Sacramentum; quæ si à Catholico profer-

tetur, non noceret. Quia nempe ex prolatione Arrianâ, faceret hunc sensum, Christum non esse Deum; & ex prolatione Catholicâ, nil tale sonaret. Et è diuerso, potest contingere voces ex sese insufficientes, per determinationem circumstantiarum fieri idoneas.

Ex eisdem principijs, de transpositione & interruptione vocum, non est difficile iudicare: aduertendo videlicet vtrum significationem totius orationis substantialitèr violent. Particularitates autem dependent partim ex regulis Grammaticorum; partim ex iudicio prudentis viri, qui circumstantias diligentèr examinauerit, & examinatas perpenderit.

Similitèr de additis post perfectam consuetam Sacramenti formam iudicari debet. Siquidem enim proferuntur vt eiusdem propositionis partes, secundùm qualitatem significatorum possunt irritum reddere Sacramentum. Vt qui post formam Baptismi, apposuit, & Beatæ Virginis, inualidè egit; cùm Baptismus in solum nomen Dei sit, & non patia-

14 INSTITVT. SACRARVM.
tur consortium creaturæ. Sicut finis
vltimus non patitur quicquamsecum
coniungi.

Colligitur quoque opinionem mi-
nistri, etsi declaratam, & profiten-
tis, qui teneat talem errorem circa
Sacramentum, vt illud inuvalidaret,
si influeret, non nocere valori Sa-
cramenti, si nihil immutetur in ipsâ
formâ & sensu verborum, sed tan-
tummodo in ijs quæ accidentaliter
coniuncta sunt. Patet enim talem
opinionem per accidens sese habe-
re ad effectiorem Sacramenti; quæ
perficitur, si hoc sit à ministro, quod
ab institute ordinatum est.

Quoad materiam proximam Sa-
cramenti, id est, actionem ministri,
patet eam vniuersalitèr consistere in
impositione manuum. Cùm enim sig-
nificare debeat virtutem à Deo in-
flui suscipienti per ministerium con-
ferentis Sacramentum, agentia au-
tem materialia per contactum agant,
tactus autem humanus specialitèr
censetur residere in manibus; quæ
etiam sunt organum quasi vniuersale
actionis humanæ; fit cæremoniam

impositionis manuum esse conuenientissimam conferendis Sacramentis.

Hanc etiam euidentem est congruè variari, per applicationem diuersorum corporum, iuxta proprietatem singulorum Sacramentorum; vt modò aqua, modò chrisma, modò oleum, modò aliquid aliud applicetur à ministro suscipienti; modò fortassis nihil aliud nisi pura verba; secundum proprietates effectuum Sacramentalium per huiusmodi actiones exprimendorum.

Pater itaque esse analogiam quandam inter actionem materiale extrinsecus exhibitam, & significationem vocum, vel etiam naturam effectuum spiritualium consequentium Sacramentorum collationem: ideòque non esse Sacramenta purè signa ad placitum, sicut sunt voces; sed confusam quandam significationem ex sese habere, ex quâ habeant subesse & determinari à vocibus, & esse quasi earum materiam.

LECTIO III.

De numero Sacramentorum, & quibusdam eorum diuisionibus.

EX dictis colligitur quis numerus sacramentis debeatur. Cum enim vita Christiana septem partibus insignibus diuersificetur; septem videlicet virtutibus, quarum tres Theologicae, quatuor morales & Cardinales, quasi totius vitae & morum cardines, appellentur; Sacramenta autem sint quædam initiationes seu auspicationes præcipuarum vitae partium à Deo profectæ; clarum est, singulis virtutibus singula Sacramenta deberi; atque adeo septem esse Sacramenta.

Neque minùs clara est singulorum singulis appropriatio. Baptismus enim clarè est professio quædam sollemnis fidei, & susceptio legis Christianæ. Confirmatio est spei protestatio, quâ ad exercitium quasi athleticum virtutum, & tolerantiam malorum

malorum animamur, & nos paratos ostendimus. Eucharistia quoque parentissimè conuiuium quoddam & amoris charitatisque exercitium & augmentum est.

Clarè quoque Ordini peculiaris est prudentia; quæ gubernatium & alios dirigentium eminentissima est qualitas. Iustitia non minùs in Pœnitentiâ relucet; quâ iniustitiæ perpetratae emendantur & castigantur. Fortitudinis nobilissima portio contra mortem (quæ bona temporalia & delectabilia omnia vno ictu præcidit, & malorum terribilissimum est) extrema fuit armanda vactione. Cohibenda tandem vehementissima circa venerea intemperantia legibus matrimonij.

Rursus cum vita Christiana vita naturali & civili (quæ naturalis pars est) in genere humano sit implantata, & conformata; necessum est illustrioribus naturalis vitæ portionibus, Sacramenta quoque esse assignata. Fluius autem vitæ nodos septem, & quasi articulos est advertere. Nascimur enim cum magnâ infirmitate. Robor-

ramur deinde: & in ciuilem virorum conuersationem transimus. Patres deinde familias facti, in summo idioticæ vitæ consistimus. Sed quoniam subiecta est malis & defectui, tum ab ipsâ naturâ, tum a violentiâ extrinsecâ, vita nostra, ea partim præuenimus, partim non bene cauta medicamur.

Natiuitati itaque respondet Baptismus; fides enim Christianum facit, sed infirmum & debilem. Succedit itaque Confirmatio, quæ contra occurrentia mala corroborat, & à cedendo impedit. Iam verò per Eucharistiam ad conuietum Ecclesiæ & Charitatis cõmunionem admittimur. Ordo Patres familias per Ecclesiæ gubernationem & propagationem constituit. Defectus & cõcupiscibili & irascibili parti ingruentes, præueniunt Matrimonium & Extremam Vnctio. Mala passis medetur Pœnitentia.

Petitiones quoque Orationis Dominicæ, utpote continentes quæ necessaria sunt toti vitæ Christianæ, huic numero astipulantur. Baptis-

mo enim sanctificamus nomen Dei, agnoscentes eum, quod Sanctus sit. Confirmatione expectamus regnum Dei. Eucharistiâ conformamur voluntati eius, & quasi consubstantiamur ei. Panis quotidianus est instructio quæ ab Ordinatis Ecclesiæ exhibetur. Per Pœnitentiam remittuntur peccata. Per Matrimonium non concludimur tentatione. Et tandem per extremam Vnctionem liberamur à malo in morte timendo.

Ex his clarum est, in quo consistat gratia illa specialis, quam singula Sacramenta conferunt. Cùm enim singula Sacramenta sint initiationes ad singulas virtutes Christianæ vitæ; palam est proprietatem talis virtutis esse gratiam quæ per proprium Sacramentum confertur. Cumque nulla virtus Christiana sit, quæ non accipiat regulam suam à charitate; neque qui habet charitatem potest esse non inclinatus ad rectitudinem cuiusvis virtutis cùm occasio occurrerit; palam est has gratias cum gratiâ sanctificante esse connexas, & ad ipsam pertinere. Perspicuum quoque est, quod, quo-

niam Sacramenta sunt quædam consecrationes ad actiones virtutum; relinquatur in suscipiente ex vi sacramenti quiddam quasi in actu primo determinans ad vitam Christianam, præter ipsum virtutis habitum; non absimile illi obligationi quæ ex voto & iuramento manet in ijs qui taliter aliquid promiserunt; cum hæc diuersitate, quod illa tenet sese tantummodo ex parte hominis, & valorem habet ex vi animæ ipsius: hoc autem principalius ex parte Dei, licet hominis concursus non desit. Baptismus itaque Confirmatio & Ordo, relinquunt destinationem personæ ad Christianam vitam; tum ex suo voto, tum ex deputatione Dei, in communi; etiam cum periculo & difficultate: neque solum ad conseruandum eam in semetipso, sed etiam ad propagationem in alijs. A Matrimonio, & extremâ Vnctione, obligatio ad coniugalem fidem, & promptitudo & accinctio ad agonem mortis; ab Eucharistiâ, vigor, similis ei quem homo sanus & bene pascuus ad labores affert; à Pœnitentiâ,

cautela & cura, qualem conualefcens natus est habere ex memoriâ mali & dolorum, quæ in infirmitate paſſus eſt; manent in initiatis.

Conſiſtunt autem hæc omnia in Synderesi ſeu conſcientiâ accepti diuinitus beneficii; & ſubmiſſionis ſeu voti ex parte hominis facti; ex quibus ad Chriſtanz vitæ ſtudio conſtringitur. Et quoniam ſunt principia quædam rectè agendi, & vitæ Chriſtiane pro tantæ rei merito tranſigenda; palam eſt ad gratiam ſanctificantem etiam hæc pertinere; etſi non æquè immediatè quàm præcedentes: & gratias & eſſe, & dici debere, relatè ad eas propter quas ſunt.

Ex quibus iterum concluditur, merito Theologos in Sacramentis venari quidpiam quod ſit res Sacramenti tantum; aliud quod ſit Sacramentum tantum; & tertium quod & Sacramenti & rei naturam in ſole concludat. Ipſa enim virtus ſive actualis ſive habitualis, clarè eſt res Sacramenti, quæ ſignificatur, & eſt fructus Sacramenti; ſed quia inuiſibilis eſt, nihil ſignificat, ſaltem ad

Sacramentum pertinens. Externum symbolum significat, sed non significatur, cum sit visibile. Destinatio verò explicata, & ipsa significat, virtutem consequentem, & significatur, seu quasi videtur per externum symbolum.

Protinùs apparet, cur Sacramenta validè suscepta, si quando ratione fictionis non profunt ad salutem, in ipsâ susceptione; recedente fictione, valent etiam ad salutem; non quia aliqui virtus quam in susceptione debuissemus habere, postmodum nobis conferatur: sed quia deputatio Dei & votum nostrum in Sacramento contentum, postmodum incipit suum effectum consequi; aditum nobis patefaciendo, ex usu & institutione Ecclesiæ, ad Sacramenta & vitam ordinariam Christiani populi; & urgendo nos ad acriùs insistendum viæ salutis, etiam ex conscientia prioris fictionis.

Tandem patet cur Baptismus & Pœnitentia specialiter dicantur Sacramenta mortuorum, cætera viuorum. Non ex eo scilicet, quod confe-

tantur mortuis, vel vim habeant resuscitandi eos, qui verè sunt mortui: cum & fides viua prærequiratur Baptismo; & contritio sit pars sacramentalis Pænitentiae ex parte suscipientis: sed quia ex vi symbolorum, supponunt suscipientem fuisse mortuum; & actio ministri quasi circa mortuum procedit, sed Ecclesiasticè in foro externo, id est, ex auditis seu allegatis, & in ordine ad conuictum Sacramentalem, & exercitium vitae Christianae in societate fidelium; non ex inuisibilibus quae soli Deo sunt nota.

Nihil enim absurdius, & magis alienum à Christianâ doctrinâ dici potest, quàm peccata remitti illi, qui adhuc est in affectu peccati. Ergo peccator ad Pænitentiam accedens, vel habet Deum pro ultimo fine, vel diligit aliud vt ultimum finem. Si diligit aliud vt ultimum finem, quomodo capax est remissionis peccatorum? vel quomodo etiam post absolutionem non habet creaturam pro ultimo fine? Sin cum sese præbet absolutioni, diligit Deum vt ultimum finem;

non habet peccatum, quod ei remittatur coram Deo, sed tantum coram Ecclesiâ.

Dices esse statum quendam medium, quo neque Deum, neque creaturam habeat pro fine ultimo; ex quo vi Sacramenti, transferri possit in statum habendi Deum pro ultimo fine. Respondetur, quod cum necesse sit omnem actum humanum vel circa finem vel propter illum esse; consequens est, in omni actu finem aliquem ultimatè attingi; & hominem in eo statu perseverare, donec talis actus sit retractatus; & per consequens, non esse statum medium. Et si foret status medius, contra naturæ & causarum secundarum rationes est, posse transferri hominem, nisi mediante cognitione, de vno in alium.

Præterea, si poenitentia remitteret peccatum simpliciter, sicut Persona offensa remittit; non foret Sacramentalis actio. Cum Sacramentalis actio sit iudicialis quædam absolutio non verò misericordiosa remissio. Iudex autem est cognitor, & pronunciat.

nunciat de merito & qualitate delinquentis; id est, vtrum ex allegatis & probatis sit delinquens nècne; & verè delinquentem non absoluit. Sic itaque & sacerdos agere habet; & non gratis remittere.

Petes, quam vim habet absolutio Sacramentalis? vel in quo melior est iudicio viri periti, qui non sit in potestate constitutus. Respondetur, ex proportionem ad ciuilia Iudicia intelligi: delinquens enim cum Pretori sistitur, supponitur carceratus vel victus; puta impeditus à libero conuictu & vitâ conuiuium. Iudex non inquit an fecerit delictum, sed an probationes sint sufficientes. Si non sunt, pronunciat innocentem; & ex vi sententiæ Iudicis restituitur conuictui conuiuium.

Conuictus modo Christianorum est communio in Sacramentis; maxime Eucharistiâ. Qui peccauit, se exhibet sacerdoti declarâs statum, & professus se pænitere. Sacerdos iudicat ex facti & pænitentiae qualitate, an dignus sit restitui ad Sacramenta; id est, an appareat probabilitas quod

deinceps victurus sit vt Christianus; id est, non temerè relapsurus; sed ex fragilitate non plerumquè cedente; id est, an habeat eam dispositionem animi quæ cōgruit homini Christiano, id est, constanter ad sacramenta accessuro. Si talis appareat, liberat eum ab abstentione Sacramentorum, ad quam tenebatur peccato.

Et hoc est sacramentaliter absolui a peccatis. Et qui non habet potestatem, sed tantum scientiam, potest quidem docere quòd sit dignus; sed quia non habet clauēs, non potest admittere delinquentem ad Sacramentorum sumptionem: nisi cum deest copia iudicis: quod facit vt lex positiua non obliget in tali circumstantia, propter aliquam necessitatem, sed sufficiat ipsius Pœnitentis deuotio, vt possit sine Sacramente & formâ publicâ adire reliqua Sacramenta.

Clara sunt hæc ex ipso fine & necessitate pœnitentiæ, quæ instituta est, vt quoniam Christiani plerique sunt rudes in discernendâ qualitate suæ conscientiæ, & nimium sibi propitij &

ignari exercitiorum, quibus ad veram & solidam pietatem perducantur; propterea submittre sese debeant iudicio sacerdotis, qui supponitur peritus & integri iudicij, ut ipsius prudentiâ regatur in infirmitate suâ. Quare peccator per absolutionem sacerdotis, eximitur hoc vinculo spirituali, quo tenebatur & à Sacramentis abstinere, & subiectus esse speciali illi sacerdotis imperio, propter peccatum commissum.

Ex quibus patet, quod si Deus transferret hominem adultum ex tali dispositione ad gratiam & charitatem ex vi solius ceremoniæ externæ: non tantum miraculosè operaretur, sed etiam contra determinationem causarum secundarum, id est, contra vniuersalem modum actionis diuinæ; & contra vniuersalem sensum Ecclesiæ, qui nos vrget, ut præparemus nos, & assiduitate & diligentia certam electionem nostram faciamus.

Ex quo rursus sequitur (quoniam nos adultos, iustificari per actus nostros, & non nisi per dilectionem;

est publica Christi vox, & Sanctorum, & Ecclesiæ) doctrinam quæ docet citra actum charitatis iustificari posse in sacramento ad cultum, esse hæreticam, & perniciosissimum errorem; vt qui subuertat ipsum fundamentum & totam fabricam Christianæ pietatis, super affectu charitatis & operibus nostris ædificatæ; nequè posse quâlibet multitudine Patronorum fieri probabilem, nisi expressa reuelatio diuina possit pro illâ allegari.

LECTIO IV.

De charactere quem imprimunt sacramenta: de institutore quoque, & mutatione eorundem.

VLterius perspicitur, harum Sacramentalium designationum alias esse ad speciales actiones & temporarias; alias verò ad vniuersam vitam. Et eo ipso conclusum est, illas sæpius pro occasione talium actionum repeti vel posse vel etiam debe.

re: has autem (quia respectu Personarum sunt vniuersales , & eam totam comprehendunt) neque debere repeti , neque si repetantur , vllum effectum maiorem sortiri per repetitionem , quàm quem prius habebant.

Patet etiam ex naturâ actionum ad quas destinantur, posterius hoc genus tribus, Baptismo, Confirmatione, & Ordine finiri. Vita enim Christiana, laborumque tolerantia, & Ecclesiæ gubernatio, seu necessitas administrandi eam, non possunt deficere; vel certe ex naturâ rei habent perpetuari, quantum hæc ipsa vita. Non itaque repeti debent hæc Sacramenta. Nihilominus in dubio metuere Sacrilegium; vel addere conditionalem ad illud vitandum; nimis metaphysicum est in re morali. Quod non obstat, quin rectè adhibeatur talis cautio in Baptismo, ad vitandam suspensionem erroris Rebaptizantium; vel eum detestandum, in iis locis in quibus tales Hæretici sunt frequentes.

Armari verò ad mortem, ex eo

quod mors aliquando in præsens imminens vitetur, sæpius contingit esse necessarium. Similiter & coniugum fortuita duratio, matrimonium facit iteratu quandoque consentaneum. Et fragilitas humanæ constantiæ & resolutionis, & restitutionem ad vitam Christianam, & instaurationem seu vegetationem charitatis, facit esse iteratu plusquam necessarias.

Euidens itaque est, tria priora Sacramenta imprimere homini sigillationem seu destinationem quandam indelebilem totâ vitâ; ac per consequens, particularizare ipsum, hoc est, personam ipsius, seu totam vitam ipsius contra non suscipientes eadem: & hanc particularitatem recte dici characterem; deductâ metaphorâ à figuris impressis animalibus, & seruis, vel militibus, (si olim talis fuit consuetudo) quibus quorumnam essent Dominorum posset dignosci, ad tuendam singulorum proprietatem.

Pater consequenter characterem esse de relationibus secundi ordinis, quæ fundantur in actione & passio-

ne, qualis est calefactini ad calefactibile, gubernatoris ad nauem, &c. Vnde non est mirum Theologos egregios in potentiarum classẽ, quæ sunt eius fundamentum, characteris rationem collocasse: vicina enim sunt. Sed potentia, saltem ad aliquorum actiones, est in cæteris, maxime fidelibus; designatio autem tantum in ijs qui Sacramenta susceperint.

Et quidẽ si relatio dicatur esse rationis, vt quæ sit fundata in actione humanâ cuius principium sit ratio; sic character erit relatio rationis. Sed quoniam palam est rationem & physicè agere, & plerumque potentiis purâ naturâ, ex eo capite nihil minus, sed aliquândo plus habebit quam relationes physicæ. Sin quis relationem rationis interpretatur conceptam ex modo apprehendendi sine debito fundamento à parte rerum, clarum est characterem non esse eiusmodi.

Cum verò actiones, ad quas deputatur homo per sacramenta, finiantur cum hac vitâ, palam quoque est, deputationem termino vitæ esse com-

prehensam; ac proinde characterem propriè loquendo non durare post hanc vitam. Et si dicatur durare, intelligendum est semper apparere quod fuerit vitæ tempore deputatus ad similia ministeria: quod ex spirituum memoriâ, quorum est futurum æuum, elabi nequaquam potest.

Vnde apparet materialiter admodum eos philosophari, qui ponunt characterem esse signum, siue naturale siue ad placitum; esse formalem repræsentationem siue Christi, siue Sacramentorum; positumque in animabus ad hoc vt à Christo vel Angelis cognoscantur. Quæ procedunt ex æquiocatione vocis signi; quæ in præsentem ponitur pro signaculo, non pro monituo: & ex metaphoricis quibusdam locutionibus Sanctorum sæculi intellectorum: clarè enim absurdissimum est putare Christum vel Angelos indigere notis monitorijs, vt nouerint qui sint Christiani, qui non; vel qui ordinati, qui non. Et rursus ponere signa spiritualia, id est, inuisibilia, contra ipsam rationem signi est; quod pro materiali oportet

esse notum & visibile; pro eo verò quod significat, latens. Vnde non nisi inter homines, qui colligunt scientiam ex obiectis reperiuntur: & & non possunt esse spiritualia, sed ex necessitate sensibilia. Cogitare tandem imaginem Christi vel sacramentorum quasi inuri spiritibus, risu magis quam impugnatione dignum est.

Pater tandem non dari in Angelis characteres: cum neque ministeria aliqua sint ad quæ deputentur; neque multitudo confusa, in qua eminere, & ex qua seligi debeant. Sed & in hominibus patet ipsam Personam esse subiectum characteris, cum actio sit communis corpori & animæ, id est, totius. Sed & relationes non sint actus, ut sint in potentijs; sed notiones suppositorum quatenus referuntur ad alia supposita. Actiones enim & passionες sunt suppositorum.

Ad dicta consequens est, institutionem sacramentorum ad solum Deum pertinere. Cum enim Sacramentum sit deputatio Personæ ad certas operationes agendas in qualitate serui Dei: nemo autem nisi Deus,

34 INSTITVT. SACRAMV.

vel vt habens potestatem ab ipso; possit designare seruum ipsi; consequens est principalem authorem Sacramenti esse Deum. Quod non verat (si ita conuenisset) alium potuisse esse immediatum institutorem alicuius Sacramenti, ex iussu Dei.

Accedit vitam Christianam à Deo rotam dirigi, & à Deo rotam effluere, & Christum Dominum eiusdem magistrum ipso teste vnicum esse. Cum itaque Sacramenta sint cardines & articuli totius vitæ Christianæ, quatenus ea publice exercetur; & ad communitatem Ecclesiæ pertinet; clarum est ad Christum personaliter pertinuisse Sacramentorum rationem, & ritus ab omnibus obseruandos tradere; vt sic in vniuersos fideles sine contradictione penetrarent.

Patet specialitèr nullam posse esse Ecclesiæ potestatem ad Sacramenta instituenda. Cum enim Ecclesia sit congregatio collecta & instituta ab alio ad certas operationes patrandas: clarum est, has operationes à congregante ipsi determinandas fuisse, & non ab ipsâ Ecclesiâ eligendas.

alioquin Ecclesia semetipsam faceret. Cum itaque Sacramenta sint principia harum operationum, maxime prout ad Ecclesiam pertinent, id est, quatenus sollemniter & publice præstantur; palam est ad essentiam & finem Ecclesiæ pertinere; & per consequens, ipsi præstitui debere.

Sequitur ex his, neque Ecclesiam posse quidpiam addere, vel demere de essentialibus; & si faceret irritum fore. Cum clarum sit mutari Sacramentum, sicut aliud quodlibet totum, mutato quolibet ad essentiam pertinente; quare sicut non est in potestate Ecclesiæ mutare semetipsam, sic neque mutare illud quod est quodammodo prius essentiæ ipsius; & ad quod ipsa tanquam ad operationem finalem & propter quam fit, destinatur.

Ex eo tamen quod materia Sacramenti sit ex sese quidpiam mutabile, siue ab agente rationali, siue naturali; nihil impedit materiam Sacramenti mutari, non per aliquam potestatem circa Sacramentum, sed per accidens ex mutatione materiæ. Si-

cut qui occidit maritum liberat faminam ab obligatione coniugij, non ex aliquâ potestate circâ Sacramentum, sed circâ materiam Sacramenti, quæ est Persona hominis.

Sic itaque cùm materia Sacramenti Matrimonij sit contractus ex vsu ciuilibus consuetudinis & congruentia Reipublicæ; si vsu vel lege talis contractus conditiones varientur, fiet varietas in Matrimonio; non ex potestate circa Sacramentum, sed circâ materiam Sacramenti. Et sic Ecclesia in Concilio Tridentino irritauit Matrimonia clandestina, annullando contractum Ecclesiasticum, qui erat prius materia, & post irritationem amplius non est.

LECTIO V.

De efficacia seu virtute conferendi gratiam, quæ est in Sacramentis.

CONSTAT ex dictis, Ministrum Sacramenti actionem Sacramentalem facere, & verba proferre nomi-

ne Christi; & Christum esse principalem agentem in Sacramento. Cùm enim Sacramentum sit designatio Personæ, ex parte ipsius Dei ad homines descendens, seu assumptio Personæ; & clarum sit, quod nomine Dei geritur, esse primariò actionem Dei; clarum est, Ministrum tantum esse proferentem verba vice & loco alterius, & actionem simul & verba esse principaliter Christi.

Ex hoc rursus fit evidens, nihil esse incredibile per Sacramentalem benedictionem factum esse, quod non excedit potestatem Dei. Sed quicquid dicitur verbis, absque dubio opere fieri. Cùm tam verè hæc verba sint verba Christi, quam cum Apostoli dicerent Domino cœnaculi eiusdem vocibus, *Vbi faciam Pascha cum Discipulis?* vel Domino a sinæ, *Dominus opus habet.* Vel ipsemet Christus leproso, *Mundare:*

Et ex hoc non minùs constat, influxum Sacramenti in suscipientem vel materiam, esse realem & physicam. Cum enim quod fit, in virtute Dei fiat; virtus autem Dei sit æque

propriè in verbis, quàm artificium lecti in sectione cultri quâ fit lectus; adeo physicè concurrent verba & Sacramentalis actio ad effectum significatum, quàm culter ad existentiam lecti per ipsum facti.

Cum enim potentia Dei sit ipsius scientia, etiam nonnunquam actio propria, est locutio. Vnde, respectu Dei, locutio est operatio transferens virtutem seu potentiam ipsius in effectum. Exprimitur itaque & quasi exit ex Deo mediante locutione virtus ipsius operatiua. Et quoniam locutio ad aliquid dirigitur; & circa aliquid est, locutio applicat virtutem ad tale subiectum. Vnde necesse est ex vi locutionis immutari subiectum; & existere effectum à Deo vel Dei nomine dictum.

Dices, necessarium esse vt instrumentum operetur aliquid sibi connaturale, non excedens vires suas, circa subiectum; alioquin virtus cause principalis non potest physicè applicari per instrumentum. Sed locutio, saltem respectu rei non sensitiuæ vel non intelligentis, & multo

magis circa rem absentem non potest quicquam sibi connaturale operari : non itaque concurrer nisi moraliter, hoc est, ut Deus ad positionem ipsius efficiat ; & non physice, ut mediante ipsius operatione efficiat. Et idem erit de Sacramentis.

Responderetur, locutionem operari quidpiam sibi naturale circa subiectum, nihil obstante quod subiectum non sentiat vel intelligat. Et hoc est significare. Sicut enim cum sermo fit ad plures, ipsa propositio elocutata est significatiua respectu non intelligentium, quam respectu intelligentium : sic si sermo fiat ad fascies vel asseres, non minus est significatiua, neque minus exercet naturalem suam facultatem, quam quando est dicta ad intelligentes ; etsi effectum non æqualem sortiatur, propter indispositionem subiecti.

Quare si ponatur vis quædam latens in virtute & actione significandi, quæ sufficiens sit superare incapacitatem subiecti ; habebit effectum suum æque circa subiectum non intelligens, quam intelligens. Ne-

que refert quod non faciat subiectum intelligere. Non enim hoc necessarium est ad effectum illius virtutis quam habet intrinsecè latentem; sed sufficit quod eam quasi ex Deo exprimat & applicet subiecto.

Neque refert vtrum subiectum sit præsens vel absens; sicut erat seruus Centurionis. Cùm enim duo sint officia vocis, excitare, & significare: hoc posterius est spirituale & ad scientiam pertinens; prius materiale & materialiter cōcurrens, & propterea requirit indistantiam; *pro* autem significare intellectuale est, & sic per accidens in loco; ex vi autem suâ, sic nullo in loco, vt etiam ab nullo sit distans; quoniam distantia & indistantia sunt conditiones corporum. Virtus autem diuina, cum scientia sit & omnipotens, per significationem operatur, non indigens excitatione subiecti.

Dices, vt sit actio physica, necessum esse vt virtus diuina sit talis, vt possit cum significatione, id est, actione instrumenti concurrere; hoc est identificari & esse vnum: sic enim
in

in ceteris instrumentis videmus contingere ; & alioqui sunt duæ causæ magis quam instrumentum & causa, si virtutes eorum sunt diuersarum naturarum. Hic autem non potest intelligi quod vis diuina, sit sub eodem genere, sub quo est significatio, cum sit productiua actio.

Respondetur, quod clarum est iussionem esse eiusdem naturæ cum significatione, puta, locutionem specialem. Iterum iussio diuina est actio diuina, quæ facit omnia quæ facit. Patet itaque ex eo quod locutio sacramentalis sit idem quod iussio diuina, eam operari quicquid voluntas diuina per intellectum operatur ; & per consequens, verè locutionem sacerdotis creaturam Angelos, vel alium mundum, si verba Sacramentalia hoc ferrent : & esse verè physicum instrumentum respectu effectus significati.

Ex dictis reiectæ manent illæ questiones, quæ solent agitari de tempore quo Sacramentalis actio sortitur effectum ; puta, vtrum non nisi vltimâ syllabâ finitâ : vtrum expectan-

42 INSTITVT. SACRAMV.

dum sit aliquātulum temporis etiam post illam finitam, tantisper dum ex naturâ rei nihil ad eandem propositionem pertinens natum sit adici? Vtrum dum sunt? vel postquam transierunt? vel in instanti terminatione? & similes.

Cum enim effectus sequatur positus verbis, ex vi diuinâ mouente ministrum ad dicendum & in dicendo dicta verba; hominis autem non sit aliud, quam ponere ipsa verba; effectus non est alligatus ad præsentiam verborum, sed ad significationem: &, si significant pro tempore futuro, effectus eo tempore ex vi illorum sequeretur non minùs quàm Filius ex vi Patris iam mortui vel absentis cum anima infunditur proli. Verba enim posuerunt dispositionem, ex quâ secuturus est effectus tempore idoneo.

Vnde etiam patet significationem verborum; (etsi sonet de præsentia & etiam sit) non efficere effectum in instanti, vel in aliquo metaphysicè præsentia, sed moralitèr; sicut reuerà significare natæ sunt voces humane.

In illo verò præfenti ex virtute Dei effectus est completo essentialitèr Sacramento, id est, cum verba & actio Sacramentalis primo vim significatiuam effectus habent; quod plerumque est ante vltimam syllabam: inquirere verò specialius inutile est.

Manifestum quoque est, propositiones Sacramentales non esse veras, sicut reliquæ propositiones humanæ; sed per modum diuinarum. Non enim veræ sunt, quia sunt similes objectis; sed quia objecta sunt similia ijs; seu quia sunt quasi artes actuales, efficaces, ex vi quarum objecta sunt eo ipso quod ipsæ sunt. Perfectio proinde obiecti est esse simile ijs: ipsæ autem perfectionem suam secum ferunt independententer ab objectis, atque etiam ab audientibus: quam hauriunt a mente diuinâ à quâ procedunt.

LECTIO VI.

De Ministro Sacramentorum.

EX dictis accipitur, Ministrum Sacramenti non posse esse Angelum; neque animam separatam; neque brutum; aut ens insensituum. Cum nihil horum natum sit loqui; verba autem (prout significatiua) sint vis per quam Minister Sacramenti operatur. Sed hoc intelligendum est de Ministro Ordinario: Deus enim suâ potestate potest conferre aliis virtutem ministrandi Sacramenta: sicut quædam historiæ innuunt aliquando fuisse factum.

Sed neque Sanctus aliquis in corpore glorioso, vel etiam rediuiuus in corpore mortali, retinent vim ministrandi Sacramenta, quam viui habuerunt. Consecratio enim ordinaria cessat quâdo hæc vita, ad quam dirigitur cessat. Hæc autem vita cessat, cum irrecuperabiliter secundum ordinem naturæ corpus ab anima se-

paratum est. Miraculum autem non restituit nisi quantum Deus vult; & per consequens non restituit purè accidentia, nisi aliunde constet.

Dices: ergo resuscitatus deberet denuo baptizari & confirmari; quod tamen non legimus Sanctos obseruasse, qui complures resuscitarunt. Respondetur, quod cùm effectus Sacramentorum illorum in resuscitatis maneat, videlicet gratia; non est cur denuò Sacramenta suscipiant. Adde quòd plerumque resuscitatio tam subitò fit post mortem, vt non noua vita, sed eadem; neque mors, sed interruptio vitæ moraliter habeatur: Sacramenta autem moraliter tractanda sunt.

Conficitur deinde, Ministrum Sacramenti ordinarium esse sacerdotem seu ordinatum. Cùm enim Sacramentum sit quædam consecratio, esse ministrum ordinarium, est esse deputatum ad consecrandum. Cùm itaque consecratio pro formali non sit nisi deputatio sollemnis, tantum est esse Ministrum Ordinarium, seu per se, quantum esse consecratum ad

alios consecrandos. Sed consecratio ad consecrandum non est alia quam Ordinatio. Est itaque ordinatus seu sacerdos.

Accedit, quòd omnis ministratio Sacramenti est actus habentis potestatem in Ecclesiam. Verbi causâ, Baptismus allectio in familiam; Confirmatio in militem; Ordo in Patremfamilias; de Pœnitentia clarum est; & de largitione vel negatione Eucharistiæ; maritali sufficiunt nouam prolem, vnde reparetur Ecclesia militans; & morientes aggregantur in Ecclesiam triumphantem per extremam Vñctionem. Quare in omnibus cognitione opus est, vt sciat Minister aptitudinem suscipientium ad talem locum in Ecclesiâ obtinendum; quæ est fundamentum potestatis. Et per consequens, ordinarius Minister debet esse in potestate constitutus, id est, hierarcha seu sacerdos.

Obijcies primo, Baptismum à quolibet conferri; neque iterari posse postquam collatus est, sine sacrilegio. Respondetur, in Baptismo duo considerari; effectum internum, & ad-

missionem in Ecclesiam : & effectum quidem internum conferri à quocumque ministro: quod autem fiat visibilis pars Ecclesiæ , suppleri per consensum Pastorum Ecclesiæ : alioquin ipsum Sacramentum requirere ministerium Sacerdotis; cum clarum sit tale esse, vt non nisi dignis conferri debeat; & per consequens, administratio eius sit sapientis, id est, præpositi & sacerdotis.

Quoad repetitionem autem, sciendum est, quòd propter errorem rebaptizantium, Ecclesia extimuit repetere baptismum priuatum : & non propter sacrilegium, (quod sine irreuerentiâ nullum est) neque magis in Baptismo, quàm in consecratione Missæ timendum est sacrilegium, quam in Ordinationibus à pluribus perfici sine periculo sacrilegij, non solum tacente, sed imperante Ecclesiâ videmus, absque ijs cautelis quas priuati iuxta conceptas in scholâ sententias priuato iudicio faciunt.

Cum itaque verba, & etiam materia Sacramenti sint res inuisibiles, nullum potest esse sacrilegium res-

48 INSTITVT. SACRAM. V.

pectu illorum. Neque est aliqua forma debita materiæ, aut materia formæ, si ad se sola comparentur. Sed hominibus & Ecclesiæ debetur, ne instrumenta sanctificationis sine honore tractentur. Vnde si nulla sit visibilis & offensus irreuerentia, nullum est sacrilegium aut periculum sacrilegij.

Neque si foret, præpositâ conditionali, *si non es Baptizatus*, vitaretur sacrilegium; cum nihilominus verba & actio exerceantur circa indebitam materiam. Neque intentio ministri hoc impediatur; quæ cum in ministro resideat, non potest esse pars Sacramenti, etsi possit prærequiri ad constituendum agentem perfectum. Conditionalis itaque præmitti solita, est ad vitandum scandalum & opinionem erroris Rebaptizantium: & ubi non est periculum scandali, ad nihil seruit vt supra dictum est.

Obijcitur iterum Sacramentum matrimonij, in quo (cum in contractu consistat) necesse est contrahentes esse ministros. Respondetur, hoc primò suspectum esse in eâ sententiâ, quod

quod sine exemplo sit ; cum cætera Sacramenta, quotquot sunt, absque controuersia pro ministro ordinario sortiantur sacerdotem. Cur itaque in hoc solo aliter sese res habeat?

Præterea, contrahentes (quod supponit argumentum) non sunt ministri contractus, sed causa principalis. Vnde neque Sacramenti ministri esse possunt; sed potius mediatores erunt ministri, cum per medios fit contractus. Sed neque naturæ conforme est; cum efficiens & materia secundum leges naturæ non sint nata coincidere in idem subiectum ; contrahentes autem sunt materia matrimonij, vel certè pertinent ad eam.

Adde, quod cum sermo est de ordinario, intelligunt omnes eum ex officio agere; & per consequens, esse aliquo modo Personam publicam: contrahentes verò priuati sunt, & semel tantum hanc actionem nati sunt agere; nisi per accidens contingat alterum mori. Vnde fit euidenter ponentes contrahentes esse ministros, re ipsa ponere nullum esse ministrum. Quid, quod ponunt plures ministros

30 INSTITVT. SACRAM. VM.

eiufdem Sacramenti, & non vnum
Supponamus quoque contrahentes
ex libidine vel auaritiâ contractum
hunc priuatim facere, fine vllâ curâ
vel cogitatione de Deo vel re spiri-
tuali; nihilo minùs, secundùm illam
sententiam, Sacramentum est; & ta-
men nihil continet, non dico sacrum,
sed non execrandum: & nulla est ali-
cuius sanctitatis assimilatio, vel men-
tio, vel cogitatio.

Sed neque vlla est similitudo Sa-
cramenti in tali cōtractu. Cum enim
Sacramentum sit cæremonia visibi-
lis, instituta ad significandum ali-
quam interiorem gratiam; oportet
vt Sacramentum sit aliquid extraor-
dinarium, quod possit excitare viden-
tes ad cogitandum de tali gratiâ;
oportet esse institutum ad hoc ipsum;
oportet esse aliquo modo solenne &
cæremoniosum: quæ omnia defunt
contractui, quem Sacramentum esse
contendunt hi authores.

Rursus, de essentiâ Sacramenti est,
vt in nomine Dei perficiatur, & à
Deo in homines deriuetur, & profi-
ciscatur; & hoc formalitèr ex vi actio-

LIBER I. LECTIO VI. 51

nis & ceremoniarum, & non tantum ex vi naturæ, sicut omnes effectus naturales. Sed in tali contractu nihil est quod aliter proficiscatur à Deo, quam ex vi rationis infusæ contrahentibus, & ex vi creationis & naturalis benedictionis. Vnde necessum est talem contractum longe abesse à natura Sacramenti.

Immò verò ipsa translatio non est facta ex nobilissimo genere contractus; cum consentaneum sit supernaturale conforme esse summis naturalium. Videmus enim contractus particulares, ut sint fortiores, deferri ad iudices & curias supremas, & ibi confirmari. Sic itaque matrimonium ut Sacramentum, debet consistere in confirmatione à curiâ diuinâ in terris, id est, à sacerdote, qui est minister Dei in Ecclesiâ.

Tandem ex processu matrimoniali, examinatione partium, publicatione & cæteris actibus Ecclesiasticis, qui præcedunt matrimonium, clarum est officium sacerdotis circa coniugandos, esse Iudicis & superioris. Quam itaque inconsequens est

accidentia ad rempublicam pertinere, substantiam autem priuati omnino iuris esse, & non etiam ad publicum Ecclesiæ tribunal pertinere?

Declarauit autem & Deus, cùm Euam adduxit ad Adamum; & Christus Dominus, cùm testatus est Deum coniunxisse coniugatos; Matrimonium ex suâ ratione à Deo initium habere debere; & per consequens, prout est Sacramentum, ab ipsius ministro perfici debere.

Neque refert eas orationes quæ benedictio vocantur, in secundis nuptijs non vsurpari. Illæ enim non pertinent ad substantiam Sacramenti, sed tantum ad maiorem solennitatem. Neque inconueniens est multa Christianorum Matrimonia non futura Sacramenta; cùm Diuus Paulus hortatus sit fideles ad viuendum cum infidelibus, etsi constet ea Matrimonia non fuisse Sacramenta. Adde quod omne Matrimonium ex naturâ rei sit indissolubile; cùm sit contractus in totam vitam.

Obijcitur denuo, ex eo quod conclusum sit, esse Personam ad hoc opus

consecratam, non protinùs esse conclusum, esse sacerdotem: cum ordinati sint plures, & alij maiores, alij minores, quorum quilibet esse possit. Respondetur nihilominus rectè conclusum esse. Maior enim Sacerdote nullus est consecratorum; cùm Episcopus (de quo solo posset esse quaestio) non sit nisi in ratione Sacerdotis maior: non quòd non sit ipsa suâ ordinatione maior, sed quòd ordinatio ipsius sit dumtaxat gradus Sacerdotij; sicut effici virum est gradus quidam hominis.

Cùm enim evidens sit Episcopum ad nihil altius consecrari, quàm consecratur simplex Sacerdos; non potest rationabiliter dici esse alium Ordinem Episcopatus à Sacerdotij ordine. Si enim alius est, celsior est; & si celsior, celsius opus ad quod consecratur; alioquì celsitudo ipsius in accidentali aliquo consistet, & non distinguet essentialitè rationem Ordinis in Episcopo & Sacerdote.

Quod autem opus Episcopi non sit maius opere sacerdotis; patet tum in primario opere, quod est prædicatio-

nis, in quo ex institutione vtrique iur-
bentur prædicare & dicere, *appropin-*
quant in vos regnum Dei; hoc est, do-
cere eos quæ ad regnum Dei spectant:
sed & morem sese gerendi eundem ac-
cipiunt: solum Apostoli, hoc est, Epis-
copi, erant priores, & vt constat, vbi-
que propinquiore Christo, & supe-
riores.

Secundarium quoque opus admini-
strationis Sacramentorum, non est
maius in Episcopo; cùm euident sit,
ipsa Sacramenta Ordinis & Confir-
mationis (quæ sunt reseruata Episco-
pis) ordinata esse ad Eucharistiam,
quæ sine omni dubio est caput om-
nium Sacramentorum; & est com-
mune Episcopiscum simplici Sacer-
dote; etsi antiquitus non licebat Sa-
cerdoti in præsentia Episcopi sacri-
ficare.

Rursus & nomen sacerdotis & sa-
cerdotij sunt æque propria nomi-
na Episcopi, atque simplicis sacer-
dotis; neque est aliqua appellatio pro-
pria officij Episcopalis præter nomen
sacerdotis. Et communis sensus fide-
lium tum nouæ tum antiquæ legis

LIBER I. LECTIO VI. 55

non accipit Episcopum pro officio superiori; sed pro summo huius officij culmine; quasi quod non aliud agat, sed selecta sacerdotij munia, praesertim praedicare; exemplo Christi, qui ipsemet non baptizabat, sed ipse praedicabat: & Pauli, qui testatur se non esse missum ad baptizandum sed ad euangelizandum. Tandem si Episcopus foret ratione Ordinis superior Presbytero, Presbyteri non possent concurrere ad ordinationem Episcopi: quod tamen antiquitus esse factum testantur Hieronymus & Eurychius: & constat totum clerum solitum imponere manus Episcopo consecrando, in quo potissimum constituisse consecrationem, patet ex Actis Apostolorum, & ex Graeco nomine. Adde quod exinde remansit consuetudo ut Episcopus non sine tribus, qui imponerent manus, consecraretur. Numerus autem ternarius multitudinem representat, quasi vice totius cleri haec tres manus imponant.

Rursus nullum minorum Ordinum habere rationem Sacramenti constat, cum non sint à Christo immediatè

constituti. Patet enim Diaconatum ex occasione ab Apostolis introductum, absque aliquâ mentione mandati Christi Domini. Neque refert quod Christus dicatur instituisse Hierarchiam ex Episcopis Presbyteris & Ministris : neque enim ex naturâ rei maior dat ministros inferiori, sed dat ei potestatem eos eligendi; & sic Christus intelligendus est constituisse Hierarchiam ex Ministris, in quantum imperauit vt Episcopi & Presbyteri sibi cooptarent ministros.

Præterea patet Diaconos non esse Ordinatos in primâ sui institutione ad ministerium mysticum & sacramentale, sed ad distributionem alimentorum publicorum; postmodum cum multitudo fidelium & maiestas caeremoniarum aucta foret, adhibitos esse ad sacramentorum ministerium. Quare palam est consecrationem eorum etiam non esse mysticam & sacramentalem, sed tantum Ecclesiasticam, & posse fieri à non sacerdotibus ex delegatione, si necessitas requirat.

Rursus cum ipsum Diaconi nomen

significet ministrum ; & constet ministros magistratum non esse magistratus ; consequens est, neque Diaconos esse Hierarchas ; sed pertinere ad Hierarchiam reductiuè , quasi instrumenta Hierarcharum. Cum itaque Sacramentum Ordinis constituat gubernatores Ecclesiæ, & quasi Patresfamilias ; vel Sacramenta Ordinis erunt duo , & quidem æquiuocè ; vel Diaconi non erunt consecrati sacramentaliter.

Siverò Diaconatus non conferatur per Sacramentum ; à fortiori Subdiaconatus, & reliqui inferiores ordines, non erunt partes Sacramenti Ordinis, quos non constat vel ab ipsis Apostolis introductos. Neque refert quod aliqui eorum sunt ad munera sacra instituti ; non enim ad aliud instituuntur, quàm vt sint ministri, & ad munia denominatiuè à Sacramentis appellata sacra ; quasi quæ pertineant ad magis proprie sacra.

Tandem euidens est, neque prudentiam quæ est specialis virtus ordinatorum, requiri in ministro per se ;

58 INSTITVT. SACRAM.
 cū non pertineat ad ipsum iudicare,
 sed imperata exequi : Neque quic-
 quam supra vires humanas (qualia
 sunt habere potestatem in corpus
 Domini sive reale sive mysticum) ad
 quæ speciales gratiæ & dona requi-
 runtur. Quare nullum est signum Sa-
 cramenti in his ordinibus.

LECTIO VII.

*De Intentione Ministrī, circa
 quid versetur.*

A Crescit protinus, quod quo-
 niam Minister est loquens &
 homo; etiam actio ipsius debeat esse
 humana, id est, ex cognitione & vo-
 litione profecta : talem autem sole-
 mus dicere intentam, seu ex inten-
 tione factam. Palam itaque est Mi-
 nistrum intendere debere facere,
 quod facit, saltem quoad externam
 actionem. Sicut autem hoc clarum est,
 sic etiam liquet consideranti, nihil
 opus esse ad valorem Sacramenti in-
 tentione vltiori.

In primis enim cum Sacramentum operetur præcisè ex vi significationis verborum, quæ non est aliud, quàm ipsa entitas verborum; non pertinet ad ministrum aliud quoad substantiam effectus, quàm facere ipsam entitatem Verborum. Et tantundem est de entitate actionis. Si quidem igitur habet intentionem sufficientem ad hæc agenda, clarè habet intentionem sufficientem ad valorem Sacramenti.

Simile est, quòd omne instrumentum adhibetur ad faciendam actionem conformem naturæ suæ, seu quæ ex naturâ suâ competit ipsi: quicquid verò exuperat naturam instrumenti, ex impressione causæ principalis in instrumentum fit. Sic itaque cum effectus intentionis totus præter externam actionem sit supra naturam hominis, verbi causâ causare gratiam vel deputationem nomine Dei; neque talis effectus, neque intentio ipsius, potest esse necessaria ex parte hominis.

Rursus, cum Patres vnanimitèr profiteantur actionem Sacramenti

60 INSTITVT. SACRARVM.

in animam proficisci ex virtute diuinâ, & à Deo solo esse; posito quod Minister habeat intentionem alicuius talis effectus, palam est non propterea effectum magis proficisci ab ipso, seu ipsum esse magis quàm materiale agens respectu illius, quale esset sine tali intentione. Euidens itaque est, talem intentionem nullum effectum habere; atque adeò non esse necessariam,

Adde quod Baptismi Athanasij & aliorum puerorum per lusum exercentium Sacramentum, ab antiquis pro ratis habitum fuit, ex eo quòd fecissent, seu fecisse se dixissent, quod in templo fieri vidissent. Cùm itaque non possit præsumi, immò neque facile credi de pueris, quod habuerint intentionem vltiorem quam faciendi actionem exteriorem, neque quicquam scriptum sit ex quo aliud deducatur, consequens est, hanc solam intentionem requiri ex sensu Sanctorum, qui eorum actiones approbauerunt. Sed & Baptismus Iudæorum & Atheorum à Sanctis reputatur validus: & tamen quomodo

LIBER I. LECTIO VII. 61

potest intelligi quod talis quispiam possit habere intentionem operandi quicquam supernaturale per suam actionem? cum non credat aliquid supernaturale esse in Ecclesiâ Dei, siue aliud esse in Sacramento, quàm actionem externam. Clarum itaque est, sensum Sanctorum non requisivisse aliud quàm intentionem externæ actionis.

Confirmat hæc modus agendi humanus, cui non est dubium conformem esse actionem Sacramentorum. Si enim procurator faciat externam actionem in conciliando matrimonio; quis dubitat de veritate Matrimonij, vel examinat quam intentionem interioriorem habeat? Quia scilicet effectus ab intentione agentis principalis, & non ipsius, pender.

Similiter in emptione; si procurator nomine Domini sui emit, nemo dubitat, & Iudex declarat emptionem validam, & emptum esse Domini, vel invito procuratore & deie-rante se sibi & non hero emisse. Et quid manifestius quàm cum per scripta res agitur? numquid etiam in

literis & chartâ requiretur propria & peculiaris intentio?

Cogit tandem ad hanc sententiam, enormitas inconuenientium quæ ex aliâ sequerentur in Ecclesiâ Dei; atque adeò totius Ecclesiæ incertitudo. Si enim Sacramentorum veritas ab insensibili intentione hominis pendeat, plusquam morali euidentiâ certum erit, nihil in aliquibus, si non in omnibus, regionibus certum esse. Quis respondeat de tot Mauris in Hispaniâ; Iudæis in Lusitaniâ; Hæreticis in alijs regionibus; Atheis & nequissimis hominibus vbique; qui ad Sacros Ordines prouecti sunt, quorum quilibet irreparabilem incertitudinem fecerit.

Cùm itaque vel recurrendum sit ad hoc vt Deus ex machina suppleuerit hos defectus, vel admittenda sufficiencia intentionis externæ actionis, palam est non rectè consultum esse Ecclesiæ à Deo, si alia intentio requiratur. Adde quòd impossibile sit satisfacere hæreticis hoc pro Achille obijcientibus, vt quotidie experimur; neque possit cuilibet prudenti

hæc examinanti eximi sollicitudo.

Neque sufficit recriminari formam & materiam pati suas incertitudines ex vitio sacerdotum. Nihil enim simile in ijs est. Et cùm sint externa, deprehensioni subiecta sunt; Neque excedunt defectibilitatem ordinariam rerum materialium; & per consequens, nihil notabilis vel scandalosæ incertitudinis secum afferunt.

Minus insisti potest verbis Sacrosancti Concilij Tridentini; quæ neque quicquam dicunt in præiudicium huius sententiæ; & clarissimè intentata sunt contra Lutherum, qui eam propositionem vulgauerat, Sacramenta etiam per ludum perfectæ, habere valorem & qualitatem Sacramentorum. Vnde leue valde est hoc fundamentum.

Sed quod acrius est, certum est hanc sententiam & agitatum in Concilio, & defensam post Concilium ab ijs qui interfuerunt Concilio; & Patres deditâ operâ abstinuissè à decidendis litibus scholasticis inter Catholicos. Vnde patet vrgentes Concilium, expressè contra intentionem ipsius agere, & sensum eius

64 INSTITVT. SACRARVM.

non interpretari, sed maliciosè per-
vertere. Quare nullam omnino au-
thoritatem habere possunt.

Lepidum verò est, authores con-
trarios, postquam hanc sententiam
exagitauerunt, ipsosmet eandem
tueri. Si enim quæratur, qualem in-
tentionem Minister debeat habere;
aiunt, constituendi Sacramentum;
quod clare fit per actionē externam;
vel faciendi quod facit Ecclesia; quasi
Ecclesia non faceret, vel aliud faceret
quam externam cæremoniam. Vn-
de minùs explicant qui requirunt, vt
intendat facere Ecclesiasticam cære-
moniam, seu quod Christus iussit, seu
effendi Minister Christi: totum enim
hoc in intentione faciendi externam
cæremoniam continetur.

Sed putant maximè in Pœnitentiâ
euidens esse requiri intentionem ali-
quam interiorem; cùm Sacerdos
agat vt Iudex & cognitor; & etiam
in alijs vt dispensator; quæ non pos-
sunt rectè fieri, sine iudicio & inten-
tione vltiori. Respondetur, non
hîc quæri nisi de eo quod in ipsâ ac-
tione requiritur ad valorem. Sic ita-
que

LIBER I. LECTIO VIII. 85

que in Pœnitentiâ non requiritur nisi voluntas pronuntiandi absolutio- nem; cetera autem prærequiruntur, & non pertinent ab hac quæstio- nem; sicut neque vtrum intellexerit vel dormierit; dum pœnitens confi- teretur.

LECTIO VIII.

*De dispositionibus necessarijs susci-
pientium & Ministrantium.*

ATamen suscipientis (quan-
quam & ipse quoquo modo
Ministri rationem videtur habere)
non eadem est ratio; cum neque pro-
prie instrumentum sit; & per conse-
quens, actio ipsius non ex alienâ in-
tentione pendeat vel suppleri possit;
& ad valorem Sacramenti necesse sit
etiam actionem ipsius esse huma-
nam; & ex intentione procedere.
Necesse itaque est ipsum habere in-
tentionem vltiorem quàm solius
acti onis externæ.

Cum enim Sacramentum sit qui-

dam quasi contractus inter Deum & hominem; Deus enim naturam humanam conformiter ad leges libertatis gubernat, neque cogit quemquam ad legem suam. In Sacramento itaque suscipiens edit professionem illius actionis ad quam Deus illum eligit & acceptat. Quare evidens est, saltem in communi, debere intelligere supernaturale aliquid ad Christianam vitam pertinens peragi.

Sed quoad qualitatem intentionis, è conuerso accidit. Necessum enim est in ministro intencionem esse actua-lem; in suscipiente verò sufficit habitualis: quia actio non procedit nisi ab agente, quod sit in actu secundo; materie verò sufficit habitudo actus primi; qui quodammodo est proprius actus potentie; actus verò secundus seu motus prouenit ab agente in ipsum.

Ex his patet, si minister praeuideat se in somno ministraturum aliquod Sacramentum; & vigilans immitrat sese circumstantijs; non propterea Sacramentum fore validum. Cum

LIBER I. LECTIO. VIII.

dormiens ex ligatione sensuum, non sit in actu secundo animal rationale; etsi enim aliquatenus ratiocinetur, non tamen est absolutè ita potens iudicij sui, quomodo homo secundum naturam constitutus natus est esse; sed si incidat quidpiam eorum secundum quod ligatus est, errat, & miscet falsa veris.

E contra sufficit in suscipiente voluntas non retractata: Et si conferretur Sacramentum huiusmodi dormienti, vel sopito vi morbi, aut alio modo, Sacramentum validè collatum foret. Immo Baptismus & Confirmatio validè conferuntur propter vota parentum, aut aliorum in quorum potestate sunt infantes quibus ministrantur. In cæteris verò Sacramentis non incurreret obligationem aliquam suscipiens ex tali administratione. In his verò obligatio est, ex eo quòd salus ex voto Sacramenti necessariò pendeat; & per consequens, perit suscipiens si repugnet. Teneatur itaque etiam alieno voto, quia & contra illud tenetur.

Oportet tamen voluntatem susci-

pientis fuisse formalem, id est, de hoc Sacramento in particulari; & talem, vt voluntas non suscipiendi Sacramentum non posset simul consistere. Alioquin non esset vera voluntas Sacramenti; neque inferret aliquam obligationem ad eas actiones ad quas ex vi sacramenti specialiter obligatur: quæ tamen est de essentiâ sacramenti, & primarius effectus, quo non posito, Sacramentum non est validum.

Patet consequenter suscipientem Sacramentum ex naturâ rei debere esse sanctum. Cum enim professio, seu sponsio cuiuslibet virtutis coniuncta cum charitate, sit consequenter professio & sponsio charitatis; vera autem sponsio charitatis sine charitate ipsâ non possit consistere; sit non fieri sacramentum quomodò oportet, & cum reuerentiâ debitâ, nisi ab eo qui vel actualiter vel habitualiter sit in charitate.

Cumque Minister teneatur ex parte Dei causare talem dispositionem in suscipiente, quem facit hoc profiteri: charitas autem non sit nata

LIBER I. LECTIO. VIII. 69

proficisci nisi ab eo in quo est (agens enim agit, in quantum ipse est actu) clarum est Ministrum à fortiori teneri esse in charitate quando ministrat Sacramentum; & ipsum ex charitate administrare. Et quoniam susceptio Sacramenti est notabilis actio, & pertinet ad illustrem partem vitæ nostræ; palam est hunc defectum ex vtraque parte esse notabilem & insignem, & ex genere suo mortiferum.

Patet hanc doctrinam non extendi ad ministros actionum materialium tantummodo; ad quos non pertinet inducere charitatem in suscipientem; verbi gratiâ ad Diaconum ministrantem corpus & sanguinem Domini; ad inferuientes Missæ; & vniuersim ad inferiorum Ordinum exercitatores. Extenditur tamen ad prædicatores, qui nisi ex affectu charitatis loquantur, non sunt idonei ad similem affectum in auditore permouendum; iuxta illud, *Si vis me flere, dolendum est primum ipsi tibi.*

Patet consequenter in quo consistat sacrilegium quod committitur impertiendo sacramenta indignis. Quia

scilicet concurritur ad sacrilegium illorum quo sese ingerunt. Patet etiam non esse reiiciendos nisi publicos peccatores. Cum enim Minister iudicis locum habeat, neque concurrat ad eorum sacrilegium nisi quatenus tenetur impedire & agnoscere; neque publicus Minister hoc debeat vel possit, nisi cum vel crimina sunt de se publica, vel sufficienti probatione constant; clarum est, neque posse reiicere publicè peccatorem, quem non possit publicè traducere.

Veruntamen hæc indignitas, siue Ministri, siue suscipientis, non inualidat Sacramentum, modò non aufert potestatem Ministri, vel intentionem suscipientis. Et inde est, quod Sacramenta dicuntur reuiuiscere & valere ad salutem, post pœnitentiam suscipientis. Cùm enim illud quod diximus vocari simul sacramentum & rem Sacramenti, efficiatur, & sit necessarium ad vitam Christianam, & pertineat ad gratiam sanctificantem; palam est, illud positis dispositionibus congruis, valere suscipienti ad

LIBER I. LECTIO VIII. 71

salutem, & mediante illo, ipsum sacramentum.

Habetur quoque ex dictis, omnem actionem sacramentalem, esse actum potestatis seu iurisdictionis; quare & Ordinem idem esse ac potestatem seu principatum. Ex quo sequitur, nullum actum sacramentalem validè perfici nisi ab habentè similem potestatem. Ex quo rursus clarum est, si quando actus Sacramentalis perficitur ab alio quàm à Sacerdote, fieri in virtute ratihabitionis sacerdotalis, seu ex voluntate Ecclesiæ; sicut accidit cum quilibet sacerdos absoluit in articulo mortis.

Ex quibus iterum colligitur, ex vi ordinis tribui sacerdoti potestatem in vniuersum orbem diuine, id est, in quolibet personas quas adit & contingit: cùm nulla ei limitata portio assignetur, & tamen potestatem accipiat. Sicut & à principio in Apostolis & primis prædicatoribus usu exercitatum esse, & Sacræ literæ, & historia Ecclesiastica demonstrat; neminem scilicet non prædicauisse, & Ecclesias constituisse, vbi-

cumque necessitatem inuenerunt.

Vnde infertur inualiditatem aliorum Sacramentorum, ex diuisione Ecclesiasticâ prouenisse; ex quâ factum est, vt alius Episcopus vel sacerdos non habeat potestatem in homines assignatos alteri, extra casus quosdam exceptos. Pater itaque, sicut in Matrimonio inualidato contractu, irritatum etiam esse Sacramentum; sic etiam in reliquis, subtractâ materiâ potestatis, Sacramenta manere nulla. Et quoniam iurisdictio seu potestas requiritur ad omnia Sacramenta; idem posse in omnibus per Ecclesiam (si ipsa volet) perfici.

Et hinc clarum est, quemuis Episcopum, vel sacerdotem, aduenientem in regionem, vbi nulladum est diuisio Ecclesiastica, ex vi sui Ordinis, posse quælibet officia Episcopalia & sacerdotalia in illâ obire; neque aliter prohiberi posse, quam appropriatâ tali terrâ alicui Pastori proprio; hoc est, factâ diuisione ipsius à reliquis Ecclesijs.

LECTIO IX.

Quomodo Sacramenta conferant gratiam ex opere operato.

ELicitur ex suprâ dictis, quod Equoniam Sacramentalis actio est designatio ad certam virtutē: designatio autem significat cæremoniā quandam quæ ponitur initium vitæ in eo genere virtuosa: hæc cæremonia habeat vim permouendi hominem ad actum talis virtutis; & per consequens, si dignè & congruè cum dispositione sumatur Sacramentum, re ipsâ elici ab adulto talis virtutis actum, ex vi ipsius externæ cæremoniæ.

Et quoniam omnes hæ virtutes habent intrinsecum ordinem ad charitatem, & connexionem cum eâ; etiam actum charitatis elici à suscipiente ex vi susceptionis Sacramentis; & talem actum procedere à Ministro mediante Sacramento, non mi-

nus, neque alio ferme modo, quàm quo scientia discipuli procedit à Magistro, mediantibus verbis; &, si opus est, figuris propositis quibus, apprehensiones format in ipso.

Vnde apparet eos qui fingunt Deum, certum gratiæ gradum infundere animæ mediante actione Sacramentali, vltra illam quæ correspondet dispositioni recipientis; & quidem gratiæ habitualis insensibilis, cuius quantitatem ipse solus nouit, quique sit æqualis in omnibus; admodum crasse theologari, & nimis ex mercatorio vsu Mysteria fidei, quæ sunt implantata naturæ, explicare.

Obijcies, Doctores Theologos qui Sacro Concilio Tridentino interfuerunt, omnes vnanimiter sic intellexisse Concilium; vel magis suggestisse Concilio, quasi vnanimem Theologorum, & per consequens Sanctæ Ecclesiæ, sententiam; atque adeò Concilij Patres in hoc sensu definitiuissse; & canones sic esse intelligendos & credendos,

Respondetur, definitiones Conciliorum non ex Scholasticorum sententiis qui intersint, sed ex inspiratione Sancti Spiritus, & sensu Ecclesie, & sanctorum Patrum, esse æstimandas; neque rationes, sed ipsa dicta, & verba, pensanda esse; quæ si pensentur, apparebit nostra sententia nullatenus ab integrâ vi illorum deficere; & prætereâ esse longe rationabilior, & rerum naturis, & diuinorum operum ordini magis consentanea.

Adde quod nullatenus probabile sit, omnes Doctores conspirauisse in sententiam, quæ nullum habeat fundamentum in Sanctis Patribus; sed à phrasi ipsorum sit prorsus aliena: vt qui Deum solum in animam agere declarent. Sed & constat lites & explicationes scholasticas Patribus molestas fuisse, & quandoque reprehensas; Patrumque sensum & phrasim, & ad summum Sancti Thomæ loquendi modum, ab iis vsurpatum.

Sed & cùm Concilium deditâ operâ abstinuerit à questionibus inter

Catholicos, non est vlllo modo verisimile, illud talem sententiam esse amplexum, in quâ supponantur tot Metaphysica dogmata; puta, distinctio realis gratiæ à charitate & ab animâ; infusio habituum immediatè à Deo; & quidam actionis & influxus, seu producendi gratiam modus Metaphysicus vel potiùs fictitiuus; quæ fidem confundere nata sunt, magis quàm explicare; sed & graduum charitatis distinctio.

Tandem Concilium Tridentinum docet in Sacramentis gratiam dari proportionalitèr ad dispositionem suscipientium; quod non consistit cum hâc sententiâ. Sint enim duo suscipientes, quorum dispositiones sint, alterius vt duo, alterius vt tria; & singulis addatur ex vi materiali Sacramenti citra meritum suscipientis, vnus gradus gratiæ; vnus habebit tres gradus gratiæ, alter quatuor. Sed trium ad quatuor alia est proportio, quam duorum ad tria; non itaque cum hâc sententiâ consistit dari gratia iuxta dispositionem recipientium. Præterquam quòd ipsa

sentētia ex diametro opponatur huic definitioni sacrosancti Concilij: cū hęc dicat gratiam dari iuxta dispositionem recipientium; illa verò ultra eandem, id est, non iuxta illam.

Petes: quid ergo Concilium intendit per eas voces, *ex opere operato*? Respondetur per has voces intelligi ipsam executionem actionis sacramentalis; & non solum votum, vel suscipientis à sese preparationem, concurrere ad gratiam. Cū enim antiqua Sacramenta formaliter ad benedictiones temporales tenderent, & tantū allegoricè ad virtutes solidas; executio illorum ex vi suā non tribuebat virtutem solidam. Cū verò Christiana Sacramenta formaliter ad virtutes & charitatem ferantur; ipsa executio eas auget, ex vi & proprietate suā. Et hęc explicatio solida est; & videtur propria intentioni Concilij; quod pramittit inefficiam Sacramentorum veteris legis; quæ non continebant, sed purè significabant, gratiam. Potest tamen etiam dici sensum sacrosancti Concilij esse quem supra explicuimus; vt *ex opere opera-*

78 INSTITVT. SACRAMV.M?

10, significet voces & actionem sacramentalem, (ex eo quòd sint voces & actio Christi ; & per consequens, ordinata à virtute & mente diuinâ) continere in se, & explicare & exercere ipsam potentiam diuinam, æquè efficaciter, atque scalprium ordinatum ab arte statuarij, ideam ipsius imprimit ligno vel lapidi quem fingit. Vnde patet, nullum verbum nullamue similitudinem profanitatis illius vt gratiæ proprius gradus debeat actui externo, in Concilio apparere.

Considerandum autem venit in illâ sententiâ, quod nouum miraculum introducit ; puta quòd qualitas spiritualis immediatè fit, & anima spiritualiter immutatur à corporeo agente absque proprijs actibus. Quale miraculum non potest cognosci à nobis absque speciali reuelatione ; & quidem expressâ ; qualis non habetur, neque prudenti persuasibilis est, sine argumentis irrefragabilibus.

Deinde innumeras quaestiones difficiles & inutiles sequi, de loco, tempore, & quantitate, collata gratiæ

Vtrum duæ species plus conferant
quam vna? vtrum maior hostia plus
minore? vtrum toto tempore quo est
in stomacho? vtrum comestio sit in
certâ parte gulæ? in quibus & multis
alijs per insulas solutiones graua in-
conuenientia sequuntur: vt quòd ca-
lix iniuste sublatus sit à populo; &
alia plurima.

Ad hæc manifestè contrariatur ex-
perientia; quæ docet tepidè, etsi non
indignè accedentes, nihil sensibilibiter
proficere; etsi singulis diebus acce-
dant ad Sacramenta: eos verò qui
multum & serio laborant in sese præ-
parandis, quantum non semel am-
plius in mense accedant; meliores
inde effici; & quo frequentius cum
iustâ dispositione accedunt, eò plus
proficere: vt accessio frequens videat-
ur commendanda propter disposi-
tionem, magis quàm è contrà

Sic quoque testatur antiquorum
Sanctorum praxis, qui totos & qui-
dem plures sæpe annos abstinebant,
vt patet in Anachoretis; quod nostro
sæculo scandalosum foret; vt visum
est aliquando. Adde quòd sacrosan-

ēta Concilia, aliquando etiam in articulo mortis, prohibuerunt Sinaxim sacram dari pœnitentibus; expectantia maiorem fructum ex eâ humilia-
tione, quàm ex sacrâ communione: Quod non potuissent facere, si prater dispositionem gratia conferretur.

Quid dicam de vitiosâ Theologiâ: quod huius sententiæ Patroni, videantur neque naturam meriti nouisse; quæ consistit in connaturali vi actuum nostrorum circa charitatem; neque augmentum charitatis, vbi maior semper continet minorem, neque sicut in nummis alia pars eiusdem valoris potest addi priori. Quid, quòd gratia non est ipsum præmium nostrum, vt illi Philosophantur; sed medium ad præmium: & totus locus ex conductione operariorum, quæ non nisi Metaphorica est, traducitur.

Attamen quod his omnibus deterius est, grauissima inconuenientia in Ecclesiam Dei inuehuntur ex hâc crassâ sacramentorum interpretatione. In primis redduntur fideles negligentes in dispositione ad Sacramenta;

credunt pecunijs emigratiam; sacerdotes ignorantes & scandalosi ad supplendum populo Missarum numerum multiplicantur; & dignitas, quæ imperium orbis terrarum suâ vimeretur, vulgatur triobolaribus hominibus, & fit artium contemptibilissima. Fœdatur Hierarchia; mulierculæ præscribunt Officia Ecclesiastica; hoc habitu, his collectis, fiet hodiè officium diuinum. Reuerentia populi erga Magistros fidei perit. Nihil creditur ex autoritate dicentium, sed pro voluntate audientium. Denique paulatim tota fidei & vitæ Christianæ acrimonia & vigor, marcescit & evanescit.

Neque mirum; cum hæc sententia, vitam & perfectionem Christianam, quæ in culturâ animi & in bonis actibus consistit, transferat in ritus & superstitionem paganam, quæ credantur certa opera externa placere Deo, & efficere (vi quasi magicâ) bonitatem, non nisi violentiâ intensi affectus rapiendam. Quare evidens est hanc sententiam magis facibus abolendam esse, quam argumentis.

82 INSTITVT. SACRAMV
confutandam; vt quæ neque funda-
mentum considerabile habeat; & sit
consequentia extremè pernitiola
Ecclesiæ & pietati Christianæ; & di-
rectè opposita sacris Concilijs.

LECTIO X.

De Necessitate Sacramentorum.

EX declaratis, aperta est via ad ne-
cessitatem Sacramentorum in-
telligendam; modò quæstio sit quo-
modo necessaria sint supposito hoc
Ecclesiæ ordine, quem Christus Do-
minus actu posuit. Palam enim est,
eum potuisse alium aliquem effinxisse,
in quo nihil horum esset ad salu-
tem requisitum; quo in casu nullum
horum Sacramentorum, quoad ex-
ternam figuram, esset necessarium.

In primis itaque patet quicquid
est necessarium necessitate præcepti,
idem esse necessarium necessitate
medij. Cum enim in rectâ guber-
natione, nihil præcipiatur, nisi quum
utile est subjectis, propter quos est

ipsa gubernatio; consequens est, omnia, quæ ratione præcepti sunt facienda, maximè si à Deo ponàture esse imperata, habere talem proportionem ad vitam subditorum, vt agenda fuissent, etiam citra vim præcepti, si utilitas eorum cognita fuisset: quod esse fuisse necessaria necessitate mediij.

Rursus neque quicquam est ratione mediij necessarium, quin sit etiam ratione præcepti. Cùm enim quod est necessarium ratione mediij, sit necessarium propter commoda quæ sequuntur factionem, & incommoda quæ sequuntur omissionem; quæ ponuntur esse nobis cognita: palam est, sub præmio & pœnâ esse nobis intimatum à Deo vt illa agamus. Neque quicquam aliter præceptum est, nisi quia cælum facientibus, infernum omittentibus, promissa sunt.

Ex quibus deducitur, omnia & singula Sacramenta toti Ecclesiæ esse necessaria, tum necessitate mediij, tum præcepti. Cùm clarum sit, necessarium esse naturæ humanæ per symbola exteriora rectificari interiùs & excoli quoad animam. Cùm ita

84 INSTITVT. SACRAM. VM.

que toti Ecclesiæ omnes virtutes sint necessariae, consequens est etiam Sacramentorum culturam, illi adeo esse necessariam in hac à Christo institutâ Ecclesiæ politiâ, vt notabilis pars peritura esset, quæ iam saluabitur, si quodlibet horum Sacramentorum aut non fuisset institutum, aut negligatur. Et quod de totâ Ecclesiâ, hoc idem de singulis ipsius partibus seu Dioccesibus, eodem argumento euidentest: cum utilitas Sacramentorum, virtutis suæ sphæram, in vnâ diocesi habeat.

Hoc etiam manifestum est, nulum Sacramentum, prout dicit externum signum, esse necessarium necessitate mediij, actu & in executione. Cum enim signum tantummodo sit ad efficiendam deuotionem internam, quæ est res Sacramenti, non est autem vnicum medium ad illam, saltèm in adultis & vniuersaliter: fit euident, ipsam externam ceremoniam in actu non requiri in plebisque. Vnde videmus ea quæ sunt maximè necessaria, vt Baptismum, aliunde suppleri.

Nihilominus cum affectus virtutis propriæ cuiusque Sacramenti, sit etiam affectus Sacramenti quoad rem quia quoad vitam spirituales illa est substantia Sacramenti, & essentialis ratio eiusdem; non potest dubitari quin necessarium sit cunctis proportionaliter habere in voto, ut vocant, Sacramentum; hoc est, talem virtutem. Verbi gratia, ut qui miscet sese gubernationi Ecclesiæ, Ordinem in voto habeat: qui familiam tangit, Matrimonium; & sic de cæteris.

Attamen quia & nos ex corpore & animâ consistimus, & proinde secundum utraque sanctificari natifumus; & quia virtutes mediantibus corporis actionibus (maximè Sacramentalibus) in nobis perficiuntur, & instituta sunt Sacramenta ad communiter vitæ Spirituales Politicæ, quam colere naturæ nostræ consentaneum est: non potest dubitari quin unusquisque teneatur Sacramenta suo statui congrua suscipere & desiderare; etiam quoad externum signum.

Et quia appetentia virtutis Sacramentalis fertur ad virtutem & Sacramentum per modum vnius completè sanctificantis secundum corpus & animam; & in huiusmodi, externus actus habet quasi rationem totius & obiecti, internus verò rationem modi & qualitatis externæ actionis; palam est, votum tale sanctificare ex vi ipsius externi signi; & per consequens, etiam externum signum in voto esse necessarium singulis Personis necessitate mediij, quibus respectuè necessariae sunt ipsæ virtutes appropriatæ Sacramentis.

Ex quibus habetur, cur contritio sit magis votum pœnitentiæ, quàm alterius actionis necessariae; verbi gratiâ, Restitutionis; cum enim Pœnitentia sit propius actus externus contritionis; Restitutio verò, tantum aliquid consequens; clarum est non hanc, sed illam formalitèr concupisci. Notum quoque est votum Sacramenti non Sacramentalitèr sanctificare, cum hoc significet per externam caeremoniam sanctificare; quod certè non fit formaliter.



INSTITUTIONVM

SACRARVM

PERIPATETICIS

inædicatarum.

LIBER SECVNDVS.

De Angelorum naturâ, &
ministerio.

LECTIO I.

*Quod sint Angeli, & quem ordinem
habeant in Vniuerso.*



Vm ex suprà dictis con-
stet, genus humanum ad
orandum Deum totacces-
pisse auxilia, consecratio-
nes, sacerdotes, sacrificium, nomina
& pignora maximâ charitatis & be-

nevolentia; præter exhortationes & promissiones Christi Domini: Cumque oratio fidem, spem, & charitatem in Deum exerceat & augeat, in quibus vitæ nostræ ratio consistit, quid superest, nisi vt omnia sibi necessaria & vtilia à Deo postulet, & exorare non dubitet?

Porro si hæc diuinæ prouidentia est institutio, vt conformitèr ad humanæ naturæ leges & consuetudines, eam in finem suum suauiter & fortitèr perducatur, inter homines verò nemo accedit ad rogandum nisi talem à quo expectat id fieri quod rogatur; palàm est etiam Deum, qui homines per orationem ad beatitudinem perducere machinatur, etiam hoc debere præstare, vt sæpe id fiat quod rogant: sintque proinde secundæ causæ, per quas perficiantur quæ iuxta qualitatem talium orationum expedit fieri.

Palam autem est, simplices fideles magnâ fide, & tali quæ recusari non potest absque præiudicio diuinæ promissionis, & methodi, per quam natura nostra trahitur ad diuinam, & quæ
maior

LIBER II. LECTIO I. 89

maior non inuenitur fere in Ecclesiâ; sæpe petere quæ per causas naturales exhiberi non possunt; maximè corporis sanitatem. Clarum itaque est, ordini diuinæ gubernationis conuenire, esse causas aliquas præter ordinarias has corporeas quas videmus, ad immutandum ordinem causarum naturalium in eiusmodi articulis.

Sed & vniuersaliter considerando preces Ecclesiæ, si nihil earum intuitu sit, nisi quod ex præinstituta causarum serie euenturum erat, frustranea videntur & nullum effectum sortiri. Sin inuertatur ordo naturæ ab ijs tanquam causis & præcedentibus, patet frequentes esse, etsi non visibiles, naturæ mutationes; & per consequens, consensaneum esse dispositas esse causas quæ hoc (cum opus fuerit) præstent ordinatè & regulariter.

Rursus cum Christianæ religionis ratio in eo potissimè sita sit, vt omnes actiones & cogitationes nostras reuocet ad Deum & diuina; natura autem sensibus ducatur; si nunquam accidat visibile & notorium, quod possit iudicari præter causas obuias &

90 INSTITVT. SACRARVM.

Deo prouenisse, palam est euanescere paulatim & sensim opinionem necessariam de Deo omnia in nobis operante : quare manifestum est, ad fidem tutandam oportere nunnunquam extraordinaria signa conspici.

Tandem cum ipsa fides sit rerum non visarum, & quæ autoritate constare debeant; perspicuum est, eam neque sine operibus supra ordinem consuetum naturæ exercitis, per quæ autoritas conciliaretur prædicatoribus, plantari potuisse: & ex suâ ratione nouum quendam ordinem in rerum naturam inferre. Vnde effectus etiam à naturali ordine extraneos, & producere, & a Deo producendos requirere. Constat itaque debere esse causas aliquas secundas, ad hæc agenda, connaturaliter constitutas.

Hæ causæ cum neque corporeæ esse possint, (tales enim seriem ordinariam causarum integrant) neque adesse possint quasi è machinâ; neque cognoscere quando ijs opus sit orationum causa: neque animæ à corpo-

ribus absolutæ (tales enim non nisi per sua corpora agunt in alia) Deus autem immediatè non præstet quæ per motum fiunt , consequens est , ex eo esse numero quos Intelligentias Philosophi appellant ; suntque puri Spiritus , seu cognoscitivi essentialitèr : & quidditas earum ex cogitionis ratione cognoscenda. Tales autem Theologi consueverunt Angelos appellare.

Cum itaque notum sit, cognitum secundum totum suum esse & existere, fieri aliquid cognoscentis per cognitionem ; ita ut cognoscens sit quod erat, & novum posse accipiat: Palam est angelicam naturam à corporeâ in hoc distingui, quòd corporea composita sit ex partibus componentibus subiectum existentia: & quodecumque aduenit ipsi non possit esse ex se se existens, sed pars existentis : Angelus sit ipsemet existens, & capax alterius existentis absque præiudicio existentia: utriusvis.

Ab animabus verò separatis discernitur, ex eo quòd quæ cognoscuntur ab ijs, sunt accidentia logica respe-

72 INSTITVT. SACRARVM.

etur ipſius; hoc eſt, talia vt poſſit contingere actu abeſſe, & non inſint niſi meritò cauſæ efficientis extrinſeca agentis in ipſam iam exiſtente[m]: Angelo verò cognita connaturalitèr & inſeparabiliter inſunt ex vi creationis ipſorum, neque ſint aliqua cauſa quæ ſeparare ea poſſint; vel tempus in quo non fuerint, adeò vt ſint Propria (non accidentia) Logicè loquendo.

Penitiùs autem conſideranti apparet, quòd quoniam primum obiectum cognitum eſt ipſa eſſentia cognoſcentis; conſequens eſt, cætera cognita eſſe in cognoſcente quaſi modos & terminos eſſentia ipſius: verbi gratiâ, vt cauſas, effecta, coordinata &c. Vt ſicut color & denſitas & ſapor in corporibus, non ſunt aliud quam modi & determinationes quantitatis & partium eius; ſic in Angelo vel animâ ſeparatâ, cætera cognoſcibilia non ſint niſi concomitantia exiſtentiarum ipſorum.

Vnde ſicut euident eſt, cognitionem ſui eſſe quandam reflexionem exiſtentia ſua ſuper ſe, & accidenta-

lem quandam reduplicationem & exercitationem ipsius: sic non minùs euidens est, cæterorum cognitorum eandem esse rationem, & per consequens, cognitionem vt sic, non esse aliud quam exercitium eiusdem existentie supra se; ex quo fit, vt possit cognoscens quasi exprimere & effundere suum esse in alia; cum corpora non agant nisi essendo id quod sunt.

Ex quo accipitur ordo Angelorum in entibus. Cum enim Deus sit essentialiter exercitium ipsius existentie supra se: Angeli sunt diuisibilitèr & necessariò exercentes esse suum supra se: animæ separatae hoc idem habent, sed accidentalitèr, & non sine motu precedente. Corpora verò sunt purè entia sine vlla reflexione siue exercitio suæ existentie supra se: sed existentia ipsorum à mouente quasi exercetur supra alia, quæ mouentur per ipsa.

Ex quibus patet, in quo consistat actiuitas Angeli: in eo scilicet, quod præter conseruationem essentiae (in quâ includitur actualis eorum cognitio) non indigeant aliâ præmotione.

sed positis circumstantijs ex vi eorum
quæ habent, exeant in actum; quod
& anima separata faceret, si haberet
proprium instrumentum, puta, cor-
pus suum. Anima verò in corpore,
monitione indiget, vt sciat positas
esse circumstantias; & etiam tunc,
communi motione corporum præue-
niente ipsam secundùm corpus.

LECTIO II.

De Objecto Cognitionis angelicæ.

Clarum est ex dictis, quòd quo-
niam in artificio affabrè con-
cinnato, nihil vnum est, quod non ab
alio pendeat, & ad aliud sit neces-
sarium; mundus autem sit opificium
Dei: singula à singulis mediatè sic
pendere in mundo, vt quolibet mu-
tato imperfectus foret mundus. Con-
sequens itaque fit, angelicam cogni-
tionem, per hoc quòd sit omnium
connexorum cum existentia Angeli,
esse absolutè omnium existentium.

Rursus cùm nihil non existens pu-

re; seu pro nullo tempore, connectatur secundum existentiam ipsi Angelo; neque possit esse aliquis modus & terminatio ipsius: patet non minùs nihil non existentium ab Angelo cognosci. Enimvero si vel vnum quidpiam non existentium cognosceretur, necesse foret omnia connexa cum ipso cognosci. Cumque foret pars alterius mundi (in hoc enim existere non posset) ex necessitate Angelus alium mundum integrum cognosceret, neque vllus esset finis cognoscendi quælibet possibilia; atque adeò simpliciter esset infinita cognitionis.

Neque propterea cognitio humana est perfectior angelicâ; sed magis imperfectior. Primò quia cognitio non est perfecta nisi terminatur ad existentiam; quæ sicut entis est maxima perfectio, sic & cognitionis: vnde est quòd veritas quæ est perfectio cognitionis non reperitur nisi in iudiciis. Et patet absolutè loquendo, nihil cognosci ab homine dum purè possibile, cognoscitur. Quare neque homo propriè cognoscit purè possibile: neque huiusmodi imperfecta.

96 INSTITVT. SACRARVM.
cognitio ponenda est in Angelo.

Rursus pure possibile tantummodo cognoscitur per simplices apprehensiones, vel certè per iudicia quæ sint de ordine simplicium apprehensionum. Vnde copula, seu *ne esse*, in quo consistit vis propositionis, æquiuocè dicitur in similibus propositionibus, & in propositionibus de verè existentibus.

Quare cùm hic modus cognoscendi ex imperfectione procedat, non est ponendus in Angelo: Præterquam quòd neque utilis est scienti existentia. Neque homines particulare aliquid sic cognoscunt: sed vniuersalia, quorum aliquòd particulare existit in naturâ, & cognoscitur ab Angelo.

Sed neque sic intelligendum est Angelum non cognoscere purè possible, vt si vellet, non posset quilibet fabricare, vel mouere eorum, vel ea gubernare, si fierent, æquè atque existentia: scientia enim quam habent, est deriuabilis ad qualibet alia, supposito quòd existerent, & connexionem acciperent: non solum

sicut

sicut humana scientia propagatur per discursum; sed sicut quæ in habitu habet homo, potest cogitare cum voluerit, etsi non actu cogitet.

Cum enim Angelus omnia principia cognoscendorum habeat; neque ab extrinsecis agentibus natus sit pati; sed ex solâ creatione ad integram cognitionem perducatur; non deest Angelo nisi cognitio in actu secundo: quæ ut sine mutatione non potest introduci, sic talis immutatio ex vi creationis, positâ connexionione obiecti, absque nouâ actione nata est sequi. Vnde magis vicinus est Angelus illi cognitioni, quàm homo dormiens cogitationi; cum causa sit actu, & actu determinata ad hanc cognitionem faciendam, modo obiectum foret cognoscibile, id est, habens connexionem cum essentiâ Angeli.

Petes an de Deo similiter loquendum sit? Respondetur in rigore logico dicendum esse, Deum non cognoscere purè possibilis. Cum enim scientia includat relationem, quæ non potest à parte Dei esse realis; neque à parte creaturæ non existentis possit ef-

se reale fundamentum relationis *de dici* ponendæ in Deo; patet Deum in rigore non posse dici cognoscere purè possibilium. Sed cauendum est ne offendantur pusilli non intelligentes vim vocis.

Cum enim possibile esse quod habent, sit in Deo vel causis secundis quæ comprehenduntur à Deo; palam est ea cognosci quantum cognoscibilia sunt; & quantum ipsa existentia (quæ non cognoscuntur nisi quasi partes Dei) quantum est ex parte Dei. Vnde si ponerentur esse, nihil mutationis foret in Deo formaliter in scientiâ ut scientiâ; sed tantum materialiter, ex eo quod decretum esset in Deo quod iam non est; nihil autem ex vi obiecti; sed tantum ex mutatione entitatis diuinæ præcedentè ad obiectum. Vnde perfectior est cognitio Dei quam Angelorum respectu non existentium.

Ex dictis colligitur, inter diuisibilitates cognitionis angelicæ, siue inter cognitiones plures angelicas, esse connexionem seu deriuationem talem, qualis est inter plures demonstratio-

nes sese inuicem sequentes; in quibus prior includit posteriorem vel adæquatè , vel coniuncta alijs præcognitis.

Euidens est ex præfatis , sub angelicam cognitionem cadere singularia materialia , futura contingentia, & actus spirituales hominum , quæ solent dici secreta cordium. Cùm enim hæc omnia ex perpetuâ connexione causarum præcedentium pendeant; necesse est vel aliquam priorum esse ignotam; vel connexionem, quam habent inter se. Vnde euidens est, vel hæc cognosci, vel plura præter hæc esse ignorata ; neque posse esse naturalem aliquam rationem, cur hæc magis cognita sint Angelis quàm alia.

Deinde, quæ dicuntur secreta cordium , patet esse demonstrabilia tum à priori tum à posteriori; videlicet, & per motus corporeos phantasmatum; & per motus spirituum circa cor; quorum alter est necessariò præcedens, alter subsequens. Tantundem est de futuris contingentibus , si causarum integra series accipiatur. Immo cùm quolibet antecedente muta-

to, ingens series sequētium mutetur; fiet nihil ferè comprehensiuè posse cognosci, si quodlibet horum ignoretur. Quare fatendum est hæc cognosci ab Angelis.

Mirum autem est, quibus euasionebus eludere conentur vim argumentorum Moderni; interdum dicentes actus liberos esse superioris ordinis, quàm necessarios; cùm constet esse inferioris, & deriuatos ab ijs; vt qui sint circa media, cùm necessarij sint circa fines. Interdum esse quasi supernaturales, & improporcionados cognitioni naturali; & hoc per reuelationem solam sciri. Sed cùm Angelus sit quid naturale; & actus intellectus, siue voluntatis, actio naturalis eius; necesse est vtrumque esse proportionatum cognitioni. Vnde voluntaria est hæc responsio.

Neque minùs quæ in solam voluntatem Dei causam refert; quæ facit naturam imperfectam, & in necessarijs mancā; Deum inuidum, & impediētem vim causarum naturalium. Præterea cùm dicunt Deum negare concursus ad cognitiones has,

LIBER II. LECTIO II. 101

palam est eos supponere propositiones *aphilosophas* de modo agendi & concurrentiæ Dei.

Sed obijciunt, reuelatione certum esse, solius Dei proprium esse, secreta cordium & futura cognoscere. Vnde Christus arguitur Deus, ex cognitione cogitationum. Responderetur sacram antiquam Scripturam distinguere Deum contra homines, & non contra Angelos vel dæmonas; quia neutros agnoscit nisi tanquam ministros Dei. Vnde semper improperat idololatriis, quod idola sint ex auro & ligno, opera manuum hominum: &c.

Vnde cum constet ea quæ fiunt per Angelos, semper attribui Deo; magis ex similibus locutionibus, concludendum est Angelos & dæmonas nouisse cogitationes cordium, & futura, quàm è contrà: Cum certum sit Deum eorum ministerio uti in similibus; ut patet ex Daniele, visione Michææ, & alijs locis: & in nouo testamento, de Iuda, spiritibus scientibus Christum & Paulum, & Angelis reuelantibus secreta vbique. Sicut itaque

cùm dicitur Deus solus reuelare mysteria, & facere mirabilia magna, non excluduntur, sed includuntur Angeli, tam boni, quam mali: Sic & cum dicitur cognoscere secreta cordium, vel futura; quæ fortassis non significant aliud in phrasi Sacrarum literarum, quam eadem reuelare; non sunt excludendi sed includendi Angeli & Dæmones. Christus autem ex eo quòd cognitio secretorum cordis, sit operatio plusquam puri hominis, rectè concluditur esse Deus.

Si qui autem Sanctorum visi sunt duriùs locuti, non est mirandum: cùm etiam de substantijs Angelorum quasi materialibus non raro discurrant. Et sicut Ecclesiâ duce non timeamus circa substantiam ab iis diffidere; sic neque in hâc parte, quæ consequens est ad illam. Palam enim est, in nobis secretas cogitationes inde esse, quia sunt alienis oculis imperuia pectora, ratione materialitatis. Vnde ex negatione inferendum est spiritibus non esse imperuias vel secretas.

Hinc etiam est, quod Angelos po-

liticam vitam agere; & propterea eorum cogitationes inuicem esse absconditas arbitrantur : & dæmonas obiciunt omnia perturbaturos , si secreta cordium nostrorum peruiderent. Quibus reponendum est, nullas ciuitates vel plebem gubernandam inter Angelos auditas esse; neque bella & paces, neque communia bona, & necessitatem auxiliij mutui, quæ sunt fundamenta vitæ socialis; ac perinde ignorantèr eam vitam tribui Angelis, qui sunt in termino, & nihil vltrà quærendum sibi habeant. Neque timendum à Dæmonibus, quorum malitia à Deo frænòs & regulam patitur.

Eâdem operâ constat , esse nota Angelis mysteria , quæ requirunt inuersionem aliquam ordinis causarum positarum; & propterea supernaturalia dicuntur. Cùm enim patrata sint in entibus naturalibus; & necesse sit aliquas quidem causas naturales non operari, vt ipsa fiant; & ex ipsis factis contingat alios effectus in rerum ordine euenire , quàm ex solis naturalibus causis; & tales ef-

104 INSTITVT. SACRARVM.
fectus referant suas causas; palam est,
pleraque ignorari debere ab Angelis,
si ipsa myſteria non cognoscantur.

LECTIO III.

De modo ſciendi Angelorum.

EX dictis vltcrius conficitur, quo-
modo Angeli cætera extra ſeſe
cognoscant. Sicut enim qui videt
concauum, intelligit eo ipſo quale
ſit conuexum, quod impleat illud
concauum: & ſicut qui videt ſtatuum
ex ſeſe non conſiſtere, intelligit qua-
li baſi indigeat cui innitatur: Sic vi-
dens ſuas indigentias Angelus, ex ip-
ſis nouit quales cauſas & quæ circun-
ſtantia habere debeat, & ex ijs eorum
circunſtantia; & ſic vſque ad totius
vniuerſi per mutuam connexionem
explorationem.

Ex quo patet, Angelos nulla plura
vt plura cognoscere poſſe. Cum enim
ſecundarij obiecti cognitio ſemper
ſupponat & integret cognitionem
prioris, modo explicato; manet cui-

dens; ea cognosci vnum ratione alterius; & per consequens per modum vnius, & non quasi disparata, & nullo modo cohærentia. Quod in omni cognoscente est impossibile; cum cognoscere aliud, sit cognoscere illud tanquam aliquid sui, vel tanquam feriens semet, reflectendo suum esse supra se.

Habetur consequenter, cognitionem Angelicam non fieri per modum compositionis, quomodo nostra fit. Cum enim habeatur ex connexionem vnius entis cum alio; ens autem vnum non sit natum prædicari de alio, sed pars vel forma de subiecto; consequens est, compositionem non esse necessariam Angelis: sed eorum cognitionem esse eiusmodi, qualis est, cum ex fumo colligimus ignem qui eum causet: vel ex multiplicatione radiorum circa escam, colligimus futuram flammam; a causâ ad effectum procedentes.

Præterea compositio nostra palam procedit ex imperfectione sensitiuæ cognitionis, per quam cognoscimus rem imperfectè; & propterea ipsam.

met de seipsâ prædicamus. Sed & compositionem ex formâ & subiecto quasi actualement apprehendimus; quæ omnia cum non sint in rebus; neque imperfectio corporea in Angelo, unde cognitio ipsius quasi scissa & diuisa euadat; non omninò in eo ponenda est cognitio per modum compositionis; quæ non foret conformis naturæ in seipsâ non compositæ.

Patet ex dictis, neque discursum in Angelo esse propriè dictum, seu syllogisticum. Cùm euidens sit, illum requirere propositiones & terminos vniuersales; & per consequens compositionem prædicati & subiecti. Et prætereà palam sit discursum in nobis esse actum totius; phantasmatibus per ordinatam percussione[m] virtutis cognoscitiuæ, generantibus cognitionem: cuiusmodi operatio in re indiuisibili non potest intelligi, absque eo quòd idem sit agens & p[ar]tiens, actu & potentiâ.

Et ex his æquè constat, in intellectu Angelico non esse locum falsitatis; cùm in eo consequens non sequatur nisi ex vi antecedentis; in quo si non est,

non inferitur : si est , non est falsitas. Angelus enim neque voces æquiuecas habet, neque notiones communes, in quibus ambiguè latent particularia ; neque appetitum sensitivum præcipitantem assensum ; neque moram, quæ fastidium præbeat ; quæ sunt causæ fallacium discursuum in nobis ; & omnia ex corporeis imperfectionibus pendent.

Appetitus siquidem intellectivus, cum non sit nisi ipsæ intellectiones, non potest habere vim falsitatem causandi ; cum ex vero non sequatur falsum ; & posterior cognitio speciem sumat à priori ; maximè quoad existentiam consequentis quæ aperitissimè est in antecedente. Vnde cum non sit alia compositio in intellectu Angelico, clarum est falsitatem, quæ compositionem prærequirit, non posse esse in intellectu Angelico, qui rem sicut est videt ; id est , quod nos rem tali quâtitate, tali figura, tali dispositione rari & densi , &c , per partes enunciamus, ille (sicut res ipsa sese habet) semel tale esse pronuntiat.

Ex quibus patet , nihil ei posse esse incertum ; neque dubitare seu inqui-

rere de quoquam posse : quæ palam est esse actiones imperfecti, & cum tempore agentis.

Obijcies, Diabolum tentatorem Christi, dubitauisse an esset Deus; & si cognouisset eum esse verum Deum, nunquam vel tentationē immissurum fuisse, vel aliud contra ipsum fuisse acturum. Respondetur, ex opposito dæmonē tanto amplius contra Christum machinatum, quanto sperabat Deo se nociturum. Neque *non si Filius Dei es*, esse dubitantis; sed valere quantum, quoniam Filius Dei es; vel quandoquidem.

Sed neque abstractiuam Angelus habere cognitionem aliam quàm de Deo potest. Cùm enim omnem cognitionem sibi possibilem habeat citra visionem Dei; & omnia creata sint ab ipso comprehensibilia: patet ea comprehendere; & per consequens, habere notitiam quidditatiuam omnium. Sed neque potest abstrahere ab existentia, cùm ab existentia prioris progrediatur.

Patet quoque discursum propriè dictum, id est, transitum de actu in

actum non posse esse in Angelo. Cùm enim omnia natus sit simul cognoscere; non potest fingi ratio, cur non velit. Sed & cùm habeat ex vi suæ creationis & ex naturâ suæ entitatis, habere indiuisibiliter totam suam perfectionem; non est in potestate ipsius non simul cognoscere omnia, etsi maximè vellet.

Præterea, posito quod vellet ab vno actu in alium transire, quibus instrumentis hoc faceret? Cùm enim non habeat cerebrum diuisibile, & phantasmata, quorum ope homo hæc agit; neque actio eiusdem in seipsum intelligi possit in re indiuisibili; patet Angelum semel in potentiâ positum, non posse vnquam in actum reduci. Adde quòd cùm vsus vnius actus sit perfectus in instanti, vel continuatur sine vllò bono vel fine, vel instantaneè succedunt sibi noui actus, & exurget tempus ex instantibus.

Sed neque prior actus potest esse causa posterioris; cùm non sit dum indiuisibiliter sit posterior actus. Vnde neque potest causare dum est,

neque postquam desijt; vt notum est. Deinde sequens actus prærequirit volitionem; cùm fiat quia vult Angelus; & volitio cognitionem; cognitio autem vel ex sese est, vel ex priori volitione: quod si dicatur, nullus finis erit: si prius, cognitio particularis à naturâ fuit: & si vna, etiam reliquæ, id est, omnes; cùm omnes sint æquales quoad hoc. Neque satisfacit dicere esse quandam cognitionem confusam omnium. Hoc enim neque potest esse; vt pote quod sit contra naturam Angelicæ cognitionis; & ex confuso nihil determinatè sequitur.

Tandem cùm Angelus agat ex fine; cognoscet Beatitudinem suam, ex cuius intentione natus est agere. Vel itaque per rationem aliquam communem & confusam (quales diximus non posse esse in Angelis): vel secundùm quod est in sese, & per rationem propriam. Sic itaque, cùm Beatitudo consistat in collectione omnium bonorum; & bonum Angeli non sit nisi cognitio; necesse est affirmare Angelum simul & semel cognoscere omnem cognitionem sibi

possibilem; & per consequens, etiam omnia cognoscibilia.

Ad dicta sequitur, non esse species aliquas in Angelo, ad cognoscenda obiecta creata. Non enim esse necessarias, patet ex explicatione modi cognoscendi quem habent. Sed præterea, cum species angelicæ non destruant sese inuicem, sicut figuræ, vel colores; neque per accidens sibi succedant, sicut plura corpora in eodē vase vel loco; vel singulæ, sunt adæquatæ intellectui Angeli; vel tantum omnes: si singulæ, cæteræ non erunt ei proportionatæ; sed obiectum dūtaxat ipsius natus erit cognoscere: si omnes, ergo simul omnes cognoscet, & vnica debuit, non plures, poni; cum simul & æqualitèr concurrant.

Rursus, quid potest afferri, cur speciem inesse, non sit obiectum eius actu cognosci? cum collocentur in intellectu eius; neque sit alia pars quæ possit esse obiectorum thesaurus, alia cognitionis organum; sicut in cerebro humano; neque sit materialitas aliqua, ratione cuius species possint recipi mortuo quo-

dam modo. Sed & in sensibus non inueniatur differentia inter cognosci & speciem esse in potentiâ sensitivâ.

Quid, quòd Angelus, sicut & homo, natus est comparare res diuersissimas. Pluribus itaque speciebus simul vtetur. Ergo vnaquæque non est actus adæquatus ipsi etiam in vsu. Immò cum non possit cum fundamento poni limitatio, cur valeat tot simul comparare, & non plura, immò cur non omnia; vnica ponenda erit pro omnibus species. Neque vlla ratio potest fingi, cur tot sint, & non pauciores in singulis Angelis.

Adiice quod hæ species vel sunt infinitæ, id est, tot quot accidentia possunt occurrere vel mutari circa eandem substantiam; vel numeratæ. Si primum, cum accidentia quæ possunt accidere eidem supposito, includant omnes mutationes, quæ possunt in totâ rerum naturâ accidere, ex quibus aliqua mutatio aduenire potest huic enti, immò includendo Deum ipsum; necesse est incredibilem esse multiplicationem specierum

rum. Si posterius; species Petri nullam eius mutationem repræsentabit, & ad nihil seruiet.

Dices, eandem speciem repræsentare omnes mutationes eiusdem substantiæ. Verum quomodò potest intelligi quòd species quæ est in intellectu Angelico, possit esse conscia mutationum quæ fiunt in Vniuerso? Si enim ponatur obiectum agere aliquo modo in intellectum Angelicum, iam ponuntur corpora in puros Spiritus agere, & Angeli colligere scientiam ex obiectis. Dicere verò quod sit conditio, absque eo quod quicquam operetur, est nugari non Philosophari; & contra Principium per se notum, *Idem manens idem, esse & facere idem.*

Sed & si ponatur Petrus ambulare; vt Angelus videat illum motum; vel est successiua mutatio in specie Angelicâ; & per consequens, verus motus diuisibilis in infinitum successiuè (quod ipsum in subiecto indiuisibili repugnat); & actus angelicus mensurabitur vero tempore. Vel absque mutatione continuâ, in principio vel

sine repræsentabit species totum motum; quod non est intelligibile vnde possit prouenire.

Effectus quoque præteritus, vel ex necessitate fuit animaduersus dum præteriret: & sic Angelus ad totam naturam simul attendere posse dicitur; & per consequens omnia nouisse. Vel cùm nullam mutationem fecerit (dum existeret) in specie angelicâ, debet in æternum ignorari; vel debet fingi quod species ex vi voluntatis Angelicæ, possit quidlibet esse & repræsentare.

Tandem natura specierum est tota obscura: si enim sunt actiuæ, qualitas ponenda est agere in suum subiectum. Si formales; inesse, erit cognosci; non enim possunt aliter ad vsum adhiberi. Deinde quot res possunt esse obiectum vnius speciei? & si plures, num necesse est, vtentem specie, omnes cognoscere? Sed & quorum erunt species? an tantum aliquando existentium? an etiam purè possibile? num quæ erat abstractiua, possit deuenire intuitiua? &c. Vtrum sint in numero determinato ex naturâ

substantiarum, vel indeterminato? & se submittat Angelus voluntati diuinæ (vt habeat species, non secundum suam naturam , sed sicut Deo purè voluntariè libuerit) secundum appetitum elicitum vel etiam naturalem? Item vtrum sint accidentia , an proprietates naturales ? Item vtrum indantur Angelis , an fabricentur ab ijs ?

Vlteriùs ex dictis trahitur , non esse in Angelis habitus aliquos proprie dictos. Cùm enim vnicum & perpetuum actum habeant ; palam est eos non assuescere; quod non nisi per plures actus fit.

Quare virtutes quæ ponuntur in Angelis , non sunt nisi actuales. Sed quoniam sunt permanentes , & ipsæ & contraria vitia , secundum quæ Angelus dicitur bene & male sese habere; possunt non incommodè habituum nomine appellari.

Essentias quoque aliorum Angelorum euidentis est non effectiue causare sui cognitionem in alijs Angelis; cùm non possint in sese inuicem agere: etiamsi non ratione distantia; quæ est

116 INSTITVT. SACRARVM.
conditio corporum, & ad substantias spirituales non pertinet. Vnde superfluum est disputare num Angelus cognitus liberè an naturalitèr concurrat? efficienterue vel formalitèr audiatur?

Manifestum quoque est, superfluum esse siue intellectum agentem, siue aliud lumen intelligibile, quod efficienter agat in intellectiuam vim Angeli, & reducat eam de potentiâ in actum. Cùm essentia ipsa Angeli sit intimè vnita virtuti suæ intellectiuæ ex vi creationis; adeò vt intellectus Angeli non possit vllâ vi naturali esse in potentiâ ad cognoscendum sese esse; & cognitio, de se sit essentialitèr intuitiua, seu de esse suo.

LECTIO IV.

De Volitione, & distinctione Angelorum.

PRotinùs ex præfatis conuincitur; Angelum esse volitium. Cùm enim sit intellectiuus; & intelligere

LIBER II. LECTIO IV. 117

fit habere suum esse reflexum supra se; & hoc, tali modo, ut cætera omnia veniant ab essentiâ conuecta; palam est hanc reflexione fieri, ut existentia Angeli concipiat ordinem ad alia extra se; & per consequens, ex eo quod aliter & aliter sese habeat ad exteriora per hanc reflexionem; etiam ipsa aliter & aliter sese habeant; quod est mutationem in illis esse, quia Angelus est; hoc est Angelum esse actiuum in illa, seu esse volituum.

Patet consequenter bonum esse motuum voluntatis Angelicæ. Bonum enim vocamus conforme appetitui; id est, conforme appetenti (si appetitus sit rectus) hoc est, perfectionem appetentis; hoc est, aliquid eius; quale euidens est primariè & specialitèr pertinere ad reflexionem sui super se; & per consequens esse principium operationis & volitionis, quæ non est nisi dispositio secundum quam agens intellectuale, ut tale, est paratum ad operationem.

Vnde patet quod hæc reflexio est causa operandi Angelo; tanquam imbutio superior, quâ vegetatur essentia

eius ad operandum; & non tantùm vt directiua vel determinatiua operatricis virtutis: cùm adueniat existentia præexistenti, existentiam rursus ei ingerens; & per consequens ingeminans virtutem altiori modo, quem adhuc non habuit.

Propter eam causam finalis dicitur prima & nobilissima causarum; & mouere ad exercitium; id est, actum simpliciter; cum præcedentes causæ sint adhuc quasi potentiales. Similiter patet rationem procedere ex infinitis; cùm natura sit aliquid determinatum: vnde necesse est, modum operandi ipsius esse nobiliorem. Tandem corpora videmus non agere proprie in inuicem; sed quasi mixtione seu exhibitione sui dumtaxat operari; sicut rationabile est; postquam non sunt capacia respectus alicuius ad aliud extra se; cùm non sint comparatiua seu intellectiua.

Patet consequenter voluntatem angelicam esse determinatam ad volendum sese existere. Cùm enim bonum, id est, conueniens appetenti, sit vis actiua in voluntatem; ablatâ autem

LIBER II. LECTIO IV. 119

existentiâ, nihil possit esse conforme appetenti; euidens fit, nullam posse esse rationem boni, quæ moueat ad non existendum creaturam, quæ non concipiat non entia per modum entium. Vnde quod homines desiderent nunnumquam non esse, est ex imperfectâ ratione cognitionis quâ vtuntur; & quod non apprehendant non esse vltra omne malum.

Conspicua est consequentia, rationem Boni æquiucè dici respectu craturarum, & Dei. Et Deum omnia velle, quia sunt bona in se; creaturas verò, quia sunt bona respectu suarum essentialium. Cùm enim ratio sit essentialis Deo, etiam volitio & actio ipsius, puram rationem pro principio habent. Facit itaque Deus quod rebus factis est bonum, quia omne illud est bonum secundum puram rationem, secundum quàm ille agit: & ipse vult & amat creata purè propter ipsa; non quidem vt causam sui amoris. Sed vt effecta; quia sic esse, est bonum ipsis, sine vllo ordine ad Deum, vt cui sint bona. Sed in creaturis ratio est accidens; & sic non

actiua sine tincturâ subiecti; neque ipsa agit, sed est quâ subiectum agit. Vnde bonum creaturæ est, quod conuenit rebus in comparatione ad se, id est, ipsam creaturam; & sic (cùm non aliter res volenda eam contingit) vult alteri quod sibi vellet in pari casu; & hic est modus amoris ipsius. Vnde clarum est in purissimo amore creaturæ, semper amicabilia ad alios, esse ex amicabilibus ad se; saltem quatenus illud bonum alteri existimat quod sibi.

Ex his pariter clarescit, omnem voluntatem creatam habere in sese originem defectibilitatis. Cùm enim essentia creaturæ sit quidpiam in naturâ determinatum, & pars quædam naturæ; partes autem plures sunt, propter aliquam dissimilitudinem: necessum est, posse esse in naturâ rerum aliquid displicens cuilibet creaturæ; & cùm voluntas sit proportionata essentiæ; inde est occasio volendi illud non esse, quod tamen esse ratione aliorum conuenit. Est itaque radix dissentendi rationi in omni creaturâ.

Nihil.

Nihilominus omnis creatura rationalis incorporea naturalitèr amat Deum plusquam semetipsam. Cùm enim constet ipsi , vel constare natum sit, Deo non existente, sese non posse existere; sic amat Deum, sicut suum esse. Cùmque non minùs ei constet, Deum esse potiozem sese, non potest non eum talem æstimare & cognoscere; quare & eo titulo vellet ipsum esse, (quod est amare ipsum) plusquam se. Quamvis non velit magis se non existere, quàm Deum; quia naturæ proportionem non sese extendunt ad impossibilia, & nullum fundamentum est in naturâ ut velit sese non existere, unde talis æstimatione possit accipi.

Conficitur ex dictis, alias esse in Angelo volitiones necessarias, alias liberas: cùm ea sine quibus existentia ipsius non constat, sint necessariò volita ex determinatione ad esse. Cùmque possit aliquid ei displicere, palam est circa similia esse liberum: cum non ex suis rationibus, sed ex comparatione cum alijs, & per consequens, ex virtuali discursu, displici-

ceant. Consequēs est, quoniam quòd eligitur, ex consideratione omnium circumstantiarum eligitur, tales volitiones supponere adequatam cognitionem Angeli; vbi priores, cū vim suam secum ferant, supponantur ad cognitiones posteriores.

Cū verò obiecta amabilia Angelo, extra suam essentiam, alia sūt superiora, alia inferiora; tota volitio angelica tribus portionibus distinguitur. Et quoniam volitio non est aliud quā intellectio perfecta, (seu talis ex quā nata est sequi operatio) palam est volitionem esse actum principalem Angeli: & per consequens Angelos secundū eam accipere distinctionem essentialem; & communissimam eorum diuisionem debere esse secundum quòd diligunt superiora, sese, & inferiora.

Licet enim hi actus in omnibus & singulis reperiantur; tamen necesse est, magis relucere conuersionem ad aliquod horum obiectorum in vno quā in alio. Et hoc tum in multitudine, tum in particulari. Cūque ex obiectorum nobilitate actus & prin-

cipia actuum æstimari habeant ; sit supremam Angelorum Hierarchiam, notabiliter natam esse ad superiora conuerti; mediam, ad se ipsos; infimam, ad inferiora; maximè ad corporum administrationem.

Tantundem est distinctionem ex ratione intellectus sumere. Cum enim intelligere sit habere esse suum reflexum supra se ; patet quò magis essentia Angeli est capax huius reflexionis, eò magis conformem esse ipsi rationi ; & per consequens magis sectari quæ ratio suadet; id est, superiora à quibus perficitur. Quò verò minùs capax est, tantò vel ad sese, vel ad inferiora depressum affectum habere ; & sic etiam eadem erit diuisione angelicorum ordinum ex gradibus virtutis intellectiux.

Similiter etiam, quò intelligentiores sunt Angeli, eo paucioribus diuisionibus tota reflexio constabit ; & vniuersaliores erunt conceptiones quas de rebus habent: id est, vnâ conceptione plura obiecta amplectentur. Vnde patet quod quò vniuersaliores sunt conceptiones Angelorum, eò

sunt altiores; quare etiam ex vniuersalitate conceptionū, seu diuisibilitatum conceptionis, distinctio Angelorum desumi potest. Et quoniam naturæ idem est tenor; quæ qualitates distinguunt vniuersales rationes Angelorum, eadem differentiam introducent etiam in magis particulares, sub suis quæque generibus: sicut videmus corpora ex elementorum participatione primò distincta, etiam sub suis generibus & speciebus semper iisdem participationibus distinguui; vt mixta recedentia à bonitate temperamenti suæ speciei, per aliquod elementum redundans distinctionem sortiantur.

Sic itaque, si Hierarchiæ per tres conuersiones distinguantur, etiam chori sub singulis Hierarchijs eadem diuisione distinguuntur. Et si cognitio humana posset vltiâ penetrare, semper per triplicem hanc varietatem inueniret nouas subdiuisiones vsque ad singulorum Angelorum speciales rationes, quibus vltimò distinguuntur; semper singulis omnes tres conuersiones retinentibus, cum

diuerſa proportionē; & ſub choris alios ſubchoros, uſque ad ſingula indiuidua formaret.

LECTIO V.

*De nominibus & multitudine
Angelorum.*

EX his patet facile quomodo nomina angelicorum ordinum ſint intelligenda. Palam enim eſt *Seraphinos*, id eſt, ardentes, rectè pro primo choro poni: qui & deſcribuntur velare faciem ſuam; clamare ad inuicem, *Sanctus*; ignem tractare: &c. Quæ ſignificant eſſe ſuccenſos amore Dei; ſplendori ipſius valde propinquos, ut non ſuſtineant tantam claritatem; puriſſimos & maxime purificantes, & ad celſa totos aſpirantes; hæ enim ſunt proprietates ignis: & per clamorem patet quo ardore ſuccenſi ſint; & quòd ad inuicem clament, ſignificant cæteros illorum canticum non intelligere, ex eo quòd non ſint adeò eleuati.

Cherubim sonat quasi multos; & denotat multiplicitem quæ est in sciētiā, in quā omnia insunt congregata in mente scientis sine contrarietate; vt sciens sit vnus quasi multa. Describuntur ferre Deum super pennas; comitati esse rotis, & oculis, & flammis, & pluribus faciebus, & manu quasi scribentis, & sonitu; quæ omnia fere ad scientiam pertinent, & ad motum. Vt non sit in ijs ea quies & vniformitas, quæ in Seraphinis; sed plenitudo & vectatio Dei cum motu. Vnde proprietas eorum videtur esse meditatio seu labor ad scientias.

Cæterorum pura nomina habemus. *Throni* videntur esse sedes immobiles; & significare quod horum Angelorum proprium sit, Dei influentiam immobiliter recipere; non cum conatu Cherubinorum, neque cum ardore Seraphinorum; Sed tantum permittere sese Deo, & recipere quod ab ipso manat. Et sic patet huic vltimo choro primæ Hierarchiæ proprietatem sine additione aut qualificatione competere; vt solet fieri infimæ speciei aliquorum generum; &

proprietatem huius Hierarchiæ, esse conuersionem ad Deum.

Media Hierarchia *Kyriotetas*, *Exousias*, & *Dynames*, continet; quibus latinæ voces non videntur cum proprietate respondere, primi ἀπὸ τοῦ κυρίου, id est, esse, vel ex sese esse dicuntur; quod clarè est primum & principale nomen quod significat respectum entis ad se. *Exousia* quoque ab ἐξουσία quod significat *Licet*; quasi, quod ex me est facere; & videtur proprie per applicationem esse potestas quam habent Magistratus, qui non pendent ab alijs in eo quod agunt. Vnde patet etiam hoc nomen significare conuersionem ad semetipsos.

Tertij vocantur *Dynames*; cuius nominis vis videtur esse penetrare, vel posse, vt significet magna posse & admiranda. Sic enim miracula vocantur *Dynames*; & Angeli cælorum dicuntur *Dynames*. Et cum merè posse sit proprietas sui subiecti, neque nomen exprimat materiam circa quam operantur; etiam hic chorus sonat conuersionem ad semetipsum;

cum connotatione tamen aliquâ inferiorum, sicut infimo choro conuenit. Sicut & Throni per immobilitatem videntur aliquam ad sese conuersionem innuere, quasi non sese extra se moueant.

Tertia Hierarchia *Archas, Archangelos, & Angelos*, complectitur: ex quibus Angeli & Archangeli, cum sonent nuncios & missionem; per consequens includunt clarè ordinem ad externa, ad quæ destinantur: hæc distinctione, vt hi ad maiora, illi ad ordinaria, vtraque ad alia, id est, inferiora destinentur & conuertantur. *Archa* autem sonant quod principia, ex cuius nominis vi intelligitur actionem Angelorum & Archangelorum habere originem ab ijs, seu ipsos esse quasi concilium regium & publicum quod ordinet agenda; reliquos duos ordines qui mandata exequantur. Ex quo patet totam Hierarchiam esse conuersam ad inferiora.

Quia verò dictum est, omnium proprietates in singulis contineri; in celsioribus quidè proprietates inferiorum excellenter, in inferioribus au-

tem proprietates superiorum participatiuè, & imperfectiùs quàm in superioribus : Anima verò rationalis sit aliquo modo de genere eodem spiritali; consequens est, & in hominibus reperiri imitationem huius Hierarchiæ.

Tres itaque virtutes intellectuales, sapientia, scientia, & prudentia, clarè Hierarchicas proprietates suâ diuisione adæquant. Sapientia enim circa Deum, & altiores nobis causas negotiatur. Scientia circa res Physicas & Mathematicas; corpora scilicet congenita & socia; quæ partim nos integrant, partim sunt socia & eiusdem ordinis. Prudentia demùm tota practica est, ad subdita nobis, & actionem gubernandam conuerfa.

Primam quoque Hierarchiam diuident contemplatiui, qui scientiâ iam acquisitâ ad affectuum culturam vtuntur. Qui verò inquisitioni Sapientiæ sese impendunt, Cherubici & congregantes sunt. Tandem qui neque ad inuentionem sunt idonei, sed ab alijs audita intelligunt, id est, discipuli & auditores Sapientiæ.

130 INSTITVT. SACRARVM.
Thronos sese Sapientiæ præstant.

Kyriotetibus assimilantur, qui scientijs fruendis, in quibus scientia ipsa placet, sese dedunt; quasi subsistentibus ex sese. Qui verò moralibus, & ijs quæ gubernationem multitudinis docent, inuigilant, Exousiarum vim in sese habent. Tandem qui Thaumatorporicis disciplinis sese addicunt, quarum operatio est magnifica, hi Dynames inter nos existimantur.

Tertia Hierarchia artibus & prudentijs integratur. Artes enim, cum sint vniuersales regulæ agendorum vel faciendorum; sic sunt circa actionem, vt non nisi mediante prudentiâ actionem rectam efficiant: sunt itaque quasi principia & archæ. Prudentiæ verò aliæ sunt Architectonica, quæ summa & quasi totam fabricam disponunt; aliæ immediatæ operationi, quæ singula membra efficiunt. Hæ Angelorum, illæ Archangelorum munijs pariantur.

Ex præhabitis elici potest plures Angelos non esse immediatè inferiores alicui vni; sed singulos sese inuicem excedere, ita vt vnus vni sit imme-

diatè inferior, & ille alteri, & sic ab infimo vsque ad supremum. Cùm enim omnes singulorum proprietates in singulis superioribus eminenter, inferioribus, participatiuè reperiuntur; patet singulos inferiores singulis superioribus esse secundùm omnia subiectos. Quare nulla potest esse subiectio immediata plurium vni, sine præiudicio aliorum, & confusione ordinis.

Vnde sequitur faciliùs esse Angelo inferiori comprehendere cognitionem immediati sibi superioris, quàm cognitionem alteriùs longè magis eleuati. Quare cùm naturalis modus cognoscendi sit per faciliora gradum facere ad difficiliora; sequetur Angelum inferiorem cognoscere mediatè superiores, per eum qui immediatè superior est; & sic per gradus vsque ad supremum.

Colligitur quoque in quo consistat immediatio vnius Angeli ad alium. Cùm enim Angeli non habeant cognitionem diuisibilem nisi penes diuersas substantias; clarum est, eum qui vnâ substantiam vnâ diuisibili-

tate comprehendit, esse immediatum illi qui duas substantias vnâ diuisibilitate colligat; & hunc, ei qui tres; & sic vsque ad supremum. Et quod naturæ Angelorum sunt hoc modo, sicut species numerorum vel figurarum.

Quare numerus quoque Angelorum ex numero substantiarum videtur definiri posse. Cum enim substantiarum corporearum determinatus sit numerus ex fine; qui est, vt natura sit optima expressio primi entis : ratio multitudinis Angelorum, erit ex diuisibilitatum inde consurgentium numero. Cum enim quælibet substantia spiritalis sit comprehensiuæ totius naturæ corporeæ; neque possit comprehendi non cõprehensâ cognitione; Angelus qui vnâ diuisibilitate naturam corpoream & infimum Angelû comprehenderet, plusquam duplo excederet immediatè inferiorem. Neque tamen posset aliquis medius inter illos duos constitui. Cum itaque non possit esse saltus in naturâ; diuisibilitates quæ fundant distinctionem angelicam, non possunt excedere numerum corporum. Quæ si

rectè dicta sunt; numerus Angelorum erit numerus omnium substantiarum corporearum.

Patet etiam non posse creari à Deo aliquem Angelum medium inter aliquos duos. Cùm enim in spiritualibus & immutabilibus substantijs æqualia sint, posse esse, & esse; palàm est, Angelum aliquem horum non posse esse in alio mundo. Sed in hoc mundo non potest esse alia substantia corporea, quam quæ sunt. Itaque alius Angelus medius non posset habere ordinem intelligendi distinctum ab his; & per consequens, non posset creari nisi vel supra omnes, vel infra omnes.

LECTIO VI.

De primo peccato Angelorum.

CVM tanta sit multitudo Angelorum; & adeò differentibus naturis, quàm in continuâ elongatione à primo Angelo ad infimum necessum est contingere; palàm est, non

posse non reperiri omne genus accidentium; natorum aduenire angelicæ naturæ; atque proinde aliquos eorum à rectæ rationis regulâ deuiasse; cùm hoc possibile sit. Quod & Adæ ruina, quæ sine malo Spiritu impossibilis erat, conuincit. Fatendum itaque est aliquos cecidisse. Enimuerò, cùm natura singulorum, sit sibi propria, nec quicquam commune habeant: Sed quam quisque perfectionem habere potest, à Deo solo & sese habere potest: Sed neque falsum quidpiam opinari possint, neque habere affectiones supponentes falsum: clarum est, deuiationem à ratione, non posse esse ex appetitu alicuius secundum sese impossibilis; utpote cuius neque appetitum elicited habere possint, cùm supponat errorem in intellectu; neque natura eos ad tale quidpiam possit inclinare.

Non itaque culpa angelica fuit appetere veram Deitatem; seu esse similem ipsi in naturâ vel participatione æquali. Neque rursus esse unitum hypostaticè Verbo Diuino; quod similiter declaratum est esse im-

possibile. Neque voluisse habere visionem Dei sine congruis mediis; quod est voluisse effectum sine causis. Nihil enim horum in naturam omniscientem & ex sese rectam cadit.

Vniuersalitèr itaque nihil, siue in Deo secundum sese considerato, siue in ordine toto corporearum substantiarum, appetitui angelico displicere potuit. Cum hæc omnia, & in sese radicata sint per impossibilitatem contrarij; & ex eâ parte repugnent appeti; & prætereâ sunt quoad superiora conformia & quodammado principia naturæ ipsius: quoad inferiora verò, etiam superbiæ ipsius; cùm plenam potestatem in inferiora habeant.

Sed neque Angeli determinatam proportionem habent ad corpora: & corpora propter communitatem materiei, & quia sunt ex naturâ suâ instrumenta, disponi nata sint non secundum meritum suum, id est, naturæ dignitatem, sed secundum utilitatem & congruentiam ad vniuersum; fit in corporum dispositione, posse contingere aliquid, quod non

sit secundum inclinationem particularis Angeli ad tale corpus; & inde fieri ut appetitu innato dissentiente, etiam appetitus elicited sequatur & auerfetur dispositionem Dei.

Neque difficile est coniectare ubi prima fuerit labes Angelorum. Cum enim Angeli nati sint præsideri corporibus, & ea mouere; & hominem quoque palam sit inter corpora esse, & ad operationes suas per motum antecedentem perducere, sicut cætera corpora; sit etiam curam hominum ad angelicam præsidentiam pertinere. Et quoniam rationalis natura suprema est corporearum; eum Angelum cui suprema cura humanæ naturæ ex proportionem sui esse compete-
bat, etiam vniuersaliter omnibus corporibus præsideri debuisse. Cum itaque ex Incarnatione Homo ad hoc, & etiam Angelis præsidentum deputatus fuerit, pronum est credere, hoc illi Angelo displicuisse.

Cum enim omnium objectorum, in quibus occasio auersionis à Deo nasci potest, supremum & maxime considerabile fuerit præsideri huma-

no generi ; & ex parte naturæ angelicæ maxima inclinatio ad hoc obiectum fuerit ; & quasi maximè plausibilis & apparens occasio auersionis à Deo aliter res disponente ; patet concurrere omnes eas causas quæ persuadere possunt, in aliquo magis quam in alio hanc defectionem incepisse.

Obijcies, Luciferum principem Angelorum à pluribus Sanctorum æstimatum ; & ex excellentiâ suæ naturæ occasionem superbiæ ei datam. Respondetur, adhuc sub iudice litem esse inter Sanctos. Sed illam causam non rectè assignari. Cùm excellentia naturæ consistat in maiori inclinatione ad Bonum ; & in nostro casu , ad Deum , qui supremo Angelo immediatè superior est. Vnde ex excellentiâ naturæ, inferendum est eum esse remotissimum à lapsu. Quod enim in nobis excellentia naturæ sit occasio superbiæ, est ex eo , quod talis excellentia est partialis , id est , in vnâ aliquâ facultate animæ ; puta intellectu, vel alio, de quo superbimus : & quod reliquæ facultates, vel aliqua saltem, sunt impares illi excellenti : vnde sit

vt ultra meritum illam æstimemus. Quod in Angelis, præferim primo, non licet suspicari. Foret enim, maximum Dei opus habere in sese improprietatem, quæ in corporibus non nisi ex contingentia inest.

Verùm cum docente Dionysio acceperimus, citra reuelationem in his nihil temerè pronuntiandum; ex reuelatione verò tantum de quatuor choris, Exousiarum, Dynamium, Archarum, & Angelorum (nisi fortè sub hoc nomine etiam Archangeli veniant inclusi) cecidisse acceperimus; non facilè in superiores choros hac labes inuehenda est. Adde quòd Exousiæ & Archæ dicuntur Rectores tenebrarum. Vnde supremum ex ordine Exousiarum fuisse intelligitur.

Adde quòd Exousiæ videatur primus chorus, qui respectum ad inferiora dicat. Vnde principem superbix ex eo choro fuisse conuenit. Archarum quoque ex eo quòd administratio corporum ab iis quasi primariò fluat, videtur insignior & amplior fuisse ruina. Vnde horum duorum choro-

rum mentio illustrior est in malam partem.

Ex quibus potest intelligi, quòd Draco tertiam partem stellarum, id est, Angelorum, secum traxerit, etiam in naturâ ipsâ fundamentum habuisse. Cùm enim tres chori potissimè peccauerint, Exousiarum, Archorum & Angelorum; propterea potuit tertia pars Angelorum dici cecidisse. Vel quia Angelorum chorus videatur numerosissimus, ut qui sit ad speciales operationes destinatus; tot fortasse plures ex iis ceciderint (puta infirmis) ut verè proximè tertiam partem adæquauerint totius Angelorum multitudinis.

Et hoc quidem fuisse Angelorum peccatum, (præterquam quod in Apocalypsi clarè docetur Satanam voluisse deuorare filium Dei, antequam de cælo deiectus esset) ex communiter dictis colligi potest. Nam in hoc peccato clarum est eum voluisse occupare sedem Dei; & esse illi æqualem; & ab omnibus honorari ut Deus; & Vniuerso præesse. Quod superbia & ambitio fuerit pec-

140 INSTITVT. SACRARVM.
eatum ipsius, & consequentia peccati, inuidia in genus humanum.

Quod autem aliqui Luxuriam Spiritalem, seu nimium amorem sui putent primum peccatum Angeli, non est rationabile. Cùm tota cuiusque angeli perfectio seu potius fundamentum perfectionis, sit in amore sui; & amor sui qui culpatur, sit verè defectus amoris sui; puta, velle sibi met bona viliora potius quam maiora: verus autem amor sui non possit esse nimius.

LECTIO VII.

*De Viâ Angelorum, & Auxilijs
ijs datis.*

EX ipsâ naturâ angelicâ contemplatione, nō relinquitur vllus ambigendi locus, an tota & finalis eorum perfectio sit momento consummata necne. Cùm enim ex naturâ suâ non habeant in se nisi esse, siue pensentur ex substantiâ, siue ex cognitione: esse autem putè non dicat

LIBER II. LECTIO VII. 141

illam mutationem, quæ non sine commixtione π non esse cum esse perficitur: conficitur totam ipsorum œconomiam puro statu π esse; atque adeò momentanæ, esse peractam.

Idem apparet, si consideremus indiuisibiliter in iis fieri quicquid fit. Si itaque plura fiant, & cum successione in Angelo; ponatur primum factum; & quia indiuisibiliter actum est, vnico temporis instanti actum est. Addatur itaque posterius; & quoniam etiam ipsum instantanæ consummatur; instans autem seu indiuisibile temporis, additum indiuisibili, non facit nisi indiuisibile; vtrumque in indiuisibili consummatum est, quantum est ex vi actionum. Potuerant itaque quantolibet numero gerenda, in vno instanti esse gesta: quapropter, cum angelica natura non postulet aliud, & acta sunt.

Idem habetur, si consequentiam effectorum spectemus; saltem in bonis; in quibus actio sequens, est consequens ad priorem. Cum enim in momento nostri temporis posita sit

adæquate causa posterioris actus; puta ipsa natura Angeli, & actus prior; & non sit aliud ex quo nascatur actus secundus; & ipse actus secundus non requirat moram: vel actus actui instantanèe succedet, & tempus ex instantibus constabit; vel vterque actus in eodem instanti erit, & momento consummata erit angelica perfectio.

Ex opposito, si consideremus instantia angelica, hæret vbique aqua. Quid enim significat? Num esse instans est esse durationem in quâ contradictoriæ non possunt simul esse veræ? sed cum angelica natura sit velocior & penetrabilior nostrâ, breuior iis quam nobis assignanda foret ad hoc duratio. Deinde contradictio sequitur rationem π esse, quæ nobis cum illis communis est. Neque illi vim nostræ contradictionis ignorare possunt. Adde, vt non componatur tempus ex instantibus, æquanda sunt hæc instantia parti alicui temporis. Palam itaque est, eo ipso instans angelicum esse supra naturam successionis, cùm indiuisibiliter successio-

nem præhabeat. Sed eo ipso quod est superioris naturæ ad successionem, æternum est; & non subiectum interitui; non itaque vni parti temporis, sed toti futuro tempori correspondebit.

Sed fac determinatæ parti temporis æquari. Num actus omnium Angelorum erunt æquales? Et cum substantiæ eorum diuersimodè efferantur supra naturam corporis, actiones vniformes erunt? si verò vnus instans sit majus instanti alterius, non simul consummata foret via omnium Angelorum; & aliqui Beati fuissent, dum alij adhuc in viâ, alij miseri. Qui casus satis immutarent rationem œconomix angelicæ, si fuerunt cogniti; & si non fuerunt, ponenda est in Angelis præsentium obiectorum ignorantia.

Rursus, ad hoc ab authoribus ponuntur plura instantia, vt qui boni prius fuerunt, possent mutari in malos; quod est, contra Bonitatem Diuinam: si enim nihil lucrandum erat diuturnitate, prorsus absolum erat differri eis præmium; cum Deus

non creauerit illos nisi principalitèr propter bonum ipsorum. Deinde euidens est, esse contra naturam angelicam mutari secundum voluntatem; quare mali contra dispositionem suæ naturæ, hâc morâ deuenissent mali; & tota positio est contra naturam angelicam, in quâ non esse successionem actuum, latè supra disputatum est.

Dices, primum actum non fuisse plenè deliberatum. Cur enim? num tempus potuit deesse agentibus instantaneè operantibus? vel non omnia consideraauerant? Sed præterquam quod omnem scientiam ex ipsâ creatione acceperant, quid cogebat eos resolvere ante omnium inspectionem? & certè imprudens actio fuisset; cùm ponatur non solum bona, sed à Deo specialiter profecta. Tandem plenior deliberatio, affectui priùs bono addita, nata est meliorare & non corrumpere actionem.

Obiicies, primum actum, cùm sit completio creationis, specialiter attribui Deo; & perinde si foret malus,
Deus

Deus foret author peccati. Respondetur, quod quoties plures causæ concurrunt ad eundem effectum, effectus non totalitèr attribuitur vni, sed singulis respondet aliqua proprietas effectus. Cum itaque ad primum actum Angeli, etsi sit in instanti creationis, voluntas Angeli concurrat cum Deo, non est adequatè seu secundùm omnes qualitates tribuendus talis actus Deo. Vnde si qua malitia vel imperfectio in eo sit, hæc non in Deum, sed in voluntatem creatam refundenda est.

Rursus euidens est, actiones longè positas, referri ad causam substantiæ; cum pertinent ad perficiendam substantiam. Sic enim & motus grauium & leuium referuntur à Philosopho in generantem; & augmentatio Animalium, eodem modo nata est referri. Quare non ex eo quòd sit in primo instanti, seu in instanti creationis, ideo refertur in Deum; sed quia ad perfectionem operis pertinet. Quare vel primus actus deliberatus referetur in Deum, vel nullus omnino actus qui sit liber.

Præterea, quid est hoc referri? vel enim significat imputari, vel esse actum ipsius. Sed hoc posterius excluderet voluntatem Angeli, ab hoc ut esset causa principalis. Si verò tantum imputatur; Peto à quibus? ab Angelis vel ab hominibus? Sed Angelis non competit aliter res apprehendere quàm sunt. Ad homines autem, præter Philosophantes, non pertinet de instantibus angelicis quicquam scire; Philosophorum autem non est humano more res angelicas æstimare, neque ex apparentibus præcipitare sententiam.

Tandem consideretur, non morâ temporis, sed actionum mutatione & varietate, creaturam recedere & elongari à Deo. Si itaque angelus tot actiones in instanti peragat, quot homo viginti annis; postrema actio tam longè erit ab hoc ut imputetur Deo, quam quod homo in articulo mortis agit: palam autem est ex dictis, hominem neque mille annis posse illam actionum seriem perficere, quas Angelus vnico momento; clarum est itaque vitium actionis angelicæ non meritò imputari Deo.

Obijcies rursus, Sanctos & Concilia pronunciare Angelos de bonis factos esse malos. Quare necesse est plura instantia in ijs ponere, in quorum aliquo fuerint boni, in alio facti sint mali. Respondetur, definitiones Conciliorum factas esse contra errorem Manichæorum & Priscillianistarum, qui asseriebant Angelos malos non ex suâ electione liberâ, sed à naturâ, malitiam habere, & à Deo creatos sic esse, vt ex vi ipsius creationis fuerint mali, non vitio suo.

Vnde cum Sancti Patres de Angelis loquuntur, quasi prius bonis, postea malis; non accipiendum est secundum differentias temporis (nisi clare id exprimant) sed secundum consequentiam naturæ; vt significet ex Deo & primâ causâ bonos esse; ex semetipsis malos. Quod Augustinus docet ab errore omni liberum esse. Qui autem Patres clarè distinguunt tempora, ex ijs fere sunt, qui Angelos corporeos existimauerunt: & de ijs, vt talibus, discurrebant & pronunciabant.

Ex dictis patet, quid in Angelis lo-

cum habeat illustrationum & inspirationum sanctarum. Scilicet illa cognitio quâ totam naturæ & mysteriorum seriem comprehendebant; quæ quatenus motiua ostendebat, quibus Deo obsequi clarè melius erat, illud erat & agebat, quod in nobis sunt & faciunt illustrationes: & quatenus disponebat affectum angelicum ad idem, eatenus inspirationum officium & nomen promerebatur.

Quoniam autem hæ illustrationes & inspirationes, in sanctis Angelis operatæ sunt effectum ad quem datæ sunt, ex eo quòd ordinatio rerum creaturarum à Deo extrinseca ipsi Angelis, comparata ad affectus bonorum, fecit eos efficaces ad vitam æternam, quod non fecit respectu reproborum; patet gratiam quam vocant efficacem datam bonis, & non malis. Cùm enim non fuerit in aliquibus, manifestum est gratiæ rationem habere respectu, eorum in quibus est.

Cumque Deus nihil operetur frustra; & illustrationes inspirationesque

hæ non habuerint fructum in reprobis ; patet easdem bonorum non reprobis causâ esse datas ; & per consequens , comparatas ad hoc quod communiter operantur in reprobis & sanctis , habere rationem gratiæ, cum non ex meritis ipsorum, sed propter particulares electos omnibus sint indultæ. Quare clarum est etiam reprobos habuisse gratiam quâ poterant esse boni, etiamsi non fuerint.

Sed cum hæ illustrationes & inspirationes sint respectu Angelorum permanentes, & quasi pertinentes ad actum primum ; euidens quoque fit, hanc gratiam comparari ad eos, sicut sanitas ad hominem ; & non sicut adiutorium transiens & relinquens suppositum habitualiter imperfectum ; qualis est usus baculi ægroto ; & cuiusmodi est gratia auxiliaris in hominibus post lapsum Adæ.

Ex quibus intelligitur, quid sit natura Angelis: illæ videlicet dotes, quæ cum sint communiter in electis & reprobis, habent etiam effectus ad quos datæ sunt in utrisque ; saltem quoad

speciem. Patet enim Angelos per cæcitatem & obstinationem, etiam operationes communes imperfectè agere; & esse fauciatos, etiam in naturalibus, sicut homines; impossibile enim est ab ultimo fine esse auersum, absque eo quòd operationes contra rationem & naturam fiant.

Patet quoque gratias illas habituales Angelis datas esse secundum proportionem ad suas naturas. Cum enim consistant in cognitione; & cognitio angelica sit necessariò proportionata naturæ; palam est & illustrationes esse eidem naturæ proportionatas, & quia illustrationes secundum vim suam in affectum sunt inspirationes, proportionati sunt autem intellectus angelici affectibus, fit etiam inspirationes, atque adeò totam gratiam habituales, iuxta proportionem naturæ esse datam; & Angelos ex purâ gratiâ efficaci esse discretos.

LECTIO VIII.

De Actione Angelorum in inuicem

Continuato discursu elucescit, quòd quoniam angelica perfectio consistit in conuersione ad superiora ; natura autem perfectibilia dirigat ad suam perfectionem: ex impetu suæ naturæ & cognitionis sui, per prius dirigi quemlibet Angelum ad contemplationem superiorum: & saltem supremum ad contemplationem immediatam ipsius Dei; mediante quo obiecto, cætera omnia comprehendat.

Et quoniam natura quodcumque de potentiâ versus actum impellit, per statos gradus & media perducit ad terminum & finem, & per faciliora progreditur ad difficiliora: palam autem est, quòd cognitio immediatè superioris est facilior, quàm cognitio longè positi; necesse est primum Angeli obiectum, immediatè consequens essentiam ipsius Angeli, esse

Angelum immediatè superiorem. Et quia rursus, facillimum secundo obiectum est Angelus ipsi immediatè superior; etiam & Angelo inferiori, post cognitionem immediatè superioris, facillima erit cognitio proximè superioris; & sic vsque ad summum, & Deum, ordinatè processura est ipsius scientia,

Dices, Deum debere esse primò visum post essentiam Angeli; vt patet & ex connexionem effectus & causæ, & ex simili in Adamo. Respondetur hoc in Adamo rationabiliter contingere; tum quia non inconuenit cognitionem ipsius de Deo esse imperfectam; tum quia cognitio Dei erat futurum ei principium multarum actionum, per quos cæterorum cognitionem acquisiturus erat: tum quia non vno certo modo, sed per plures vias ad eandem cognitionem pertingere natus erat.

Angelus autem cùm in momento omnem cognitionem natus sit comprehendere; cognitio Dei (etsi post alia) erat ei principium primæ volitionis liberæ; & melius, cùm melius

ex omnium cæterorum cognitione cognoscatur. Vnde à perfecto cognoscente nisi per illa non debuit cognosci. Vt qui non nisi vnâ viâ ordinatissimâ ad vnum cognitum procedat.

Dices, cùm Deus possit immediatè cognosci ex essentiâ Angeli; Angelus autem omnem sibi possibilem cognitionem hebeat; eum ex necessitate cognosciturum Deum immediatè ex suâ essentiâ. Respondetur, Angelum in vniuersalitate suæ cognitionis, cognoscere omnia omnibus modis quibus ab ipso sunt cognoscibilia. Sed hoc accidit ex plenitudine scientiæ; dum verò apprehenditur scientia Angelorum incipiens & quasi in fieri, per faciliora procedit, id est, à magis conformibus & connaturalibus, cuiusmodi sunt proximæ illi naturæ, quæque ex prioribus comprehendî natæ sunt.

Et quia essentiæ Angelorum sunt sicut numeri vel figuræ; & euidentius est numerum vel figuram immediatè superiorem posse cognosci ex inferiori; palam quoque est essentiam superioris Angeli, ex essentiâ inferioris

ris posse cognosci. Cùmque Angelus quoad existentiam non pendeat nisi à solo deo, & à meritis suæ essentiæ; id est, ab eo quod sit digna esse pars mundi, seu per se spectabilis, & accommodata maximè ipsi cognoscenti: etiam clarè videt inferior magis esse necessarium vt superior existat, quàm vt ipsemet; ac proinde existere superiorem.

Vnde fit euidens, superiores Angelos esse à priori inferioribus, & quodammodo causas quasi Ideales; etsi non concurrant ad eorum existentiam actione efficienti. Quare necessum erit Angelo postquam cognoscendo peruenerit ad Deum, repetito itinere in se reuerti quasi à priori, cognitione comprehensiuâ: & sic per participationem causalitatis Diuinæ, quasi per modum artificis, cognitionem suam deriuare ad inferiora.

Obijcies, si hæc sic se habeant, non poterit Deus alium aliquem Angelum facere, quam quos fecit; neque aliquem horum non fecisse; cùm omnis Angelus immediatè superior sit necessarius per modum obiecti An-

gelo inferiori. Rursus, neque posse perfectiorem primo Angelo, cum non possit esse alius Angelus cui naturale sit immediatè subesse Deo, & omnia in eo videre; cum neuter neutrum possit excedere, & per consequens æquales, & consequenter iidem forent.

Respondetur, si quæstio sit de hoc mundo, palam est in eo consistere laudem artificis, vt nullum ipsius membrum deficere possit, vel accommodatius fieri, absque luxatione totius operis. Cum itaque Angeli sint præcipua membra ipsius, omnino credendum est, Deum neque alium inferere posse, neque aliquem horum prætermittere, absque deformitate mundi. Et quo maior est huius veritatis necessitas, tantò & mundum esse perfectionem, & artificium magis commendabile.

Sin de exorti Dei potentiâ, absque comparatione aliâ, quam inter Deum & creabile, sit quæstio; sic nihil concludi potest, quin Deus excelsiorem Angelum possit creare, qui alia aliqua nobiliora quàm quæ sunt in hoc

mundo in ipso posset videre, & esset perfectior supremo Angelo, sed non accommodatus ad optimum mundum. Non posse autem inter duos Angelos creari medium, non est maius inconueniens, quam inter duos numeros vel figuras immediatas, Deum non posse facere medium. Et si sicut corpus aliquod produci posset inter corpora ordinata in hoc mundo, quod tamen non produceretur quia hunc ordinem violaret; sic etiam medius Angelus producibilis etiam dici posset; qui tamen si foret, speciositatem connexionis Angelicæ diminueret.

Ex his vlteriùs dilucet, quòd quoniam Angelus immediatè superior, est medium in quo inferior videt superiora se; est respectu inferioris quasi lumen; & per consequens illuminat ipsum. Et quoniam eodem modo per singulos superiorum pertingit ad eos qui immediatè sunt ijs superiores; ab omnibus ijs mediatè illuminatur. Et quia descendit iterum à priori, rursus à Deo & illis omnibus illuminatur, & magis quàm priùs.

Quia verò sua ipsi essentia est æqualis & coniuncta, ad inferiora verò habet superioritatem, & propterea non indiget aliquo illorum ad ipsa cognoscenda; propterea non illuminatur ab ijs; sed quoniam ex cognitione superiorum descendit ad ipsa cum plenitudine causarum à priori, à superioribus etiam circa ipsa illuminatur, melius ea comprehendens ex iis. Et quanquam superiora melius per inferiora etiam cognoscat; quia tamen hoc est à posteriori, & ad abundantiam non ex necessitate; non dicitur ab iis illuminari: sicut habens demonstrationem, non dicitur melius scire ex eo quod habeat etiam apparentem aliquam rationem.

Quoniam verò omnis cognitio valet ad affectum in animo bene disposito; affectus autem Angeli est ad inferiora & superiora, & bene disponitur, quatenus non amat inferiora nisi propter superiora: palam est illuminationem superiorum, quatenus facit videre qualitatem obiectorum utrorumque, eatenus & purgare infe-

riores ab amore obsectorum creatorum; & reducere omnes affectus eorum vt subordinentur, & quasi coeant in vnum ad Deum; quod vnire appellat Dionysius.

Ex quo rursus patet Angelos reprobos non illuminare, neque purgare, vel vnire inferiores bonos; quantumuis habeant rationem obiecti respectu ipsorum, ex vi naturæ. Quia cum reprobi non sint in sese boni, non est ex vi ipsius obiecti quod Angelus inferior bonus maneat illuminatus. Sed quia non recipit impressionem ab ipso nisi quatenus conuenit cum superioribus bonis, & ab ipsis mediante lutulento canale deriuat ad semetipsum; idcirco à superioribus bonis tantummodò illuminatur.

Reprobi proinde excæcant, contaminant, & dissipant eos quibus propria sua imprimere possunt; id est, inferiores simul lapsos. Quia faciunt eos nimium æstimare inferiora, & amore ipsorum voluntatem eorum inquinant, & ad plura dispartiunt. Quorum contraria cum à bonis procedant, vides vtrosque

LIBER II. LECTIO VIII. 159

quasi persuadere sequaces suos, & facere eos facere quæ faciunt; & per consequens, esse causas omnium quæ inferiores eorum sectatores operantur.

Euidens iam est in quo consistat pugna inter Michaellem & Diabolum; & cur Michael primus inferiorum qui ei restitit, meruerit hoc nomen, *Quis sicut Deus*. Ille autem nomen *Sathana*, id est, scādali seu offendiculi; & Diaboli, id est, calumniatoris, quasi inducentis ad mala unde accusentur ea facientes; & serpentis antiqui: serpentis enim nomen insidiatorem & tentatorem, & ex vi derivationis, & ex metaphorâ nominat. Nomen autem *Beelzebub*, ex multitudine cruoris, vel muscarum circa altaria ipsius, accidentale nomen videtur esse & potest Dominum crudelitatis vel vanitatis significare.

Ex dictis etiam patet, quid sit angelica locutio: & quod solus superior loquatur, & inferior audiat. Cum enim locutio sit manifestatio incogniti; palam est inferiorem non posse loqui ad superiorem; non ma-

gis quàm eum illuminare. Neque refert, quòd in Sacris Scripturis memorentur Angeli promiscue loqui ad sese; tales enim locutiones sunt visionariæ, non ad aperiendas suas mentes inuicem, sed accommodatæ ad illuminandos prophetas spectantes, & auditores postmodum legentes, de Mysterijs quæ docent.

Lingux autem Angelorum, quarum meminit Apostolus, sunt lingux quibus Angeli describuntur locuti hominibus; quæ notæ erant fidelibus ex Sacrarum literarum vsu: de talibus enim linguis ipsi tunc erat sermo, quæ erant stupendæ infidelibus: vt patet ex dictis; & ipse Paulus & priùs, & in eo ipso textu testatur, subiiciens, quòd sine charitate faciant hominem æs sonans vel cymbalum tinniens; quod non conuenit nisi sonis & vocibus; quales non possunt existimari formari ab Angelis ad sua colloquia.

Non rectè itaque in hoc textu fundatur collocutio Angelorum; quæ supponere deberet Angelum ignorare plurima; non simul & vno actu cognoscere quæ cognoscit; & per
confe-

consequens, mutare actus; esse durationem propriam actuum angelicorum, & quidem loquentibus & audientibus communem; non cognoscere cogitationes cordium; ab extrinseco accipere cognitionem; & per consequens, non ex connexionem deriuari ipsius cognitionem ad plura: quæ ex supradictis repugnant nature angelicæ.

Præterea ea positio impeditur in explicatione signorum, num corporalia sint, an spiritualia? num necessaria, an ex placito? an singuli Angeli propria signa habent, quæ cæteri omnes intelligant; an sint eadem signa omnibus communia? cur cum vnus alteri loquitur, cæteri non audiant? Quid sit excitatio ad audiendum? an fiat etiam inuito audiente? an prærequiratur voluntas eius? Vtrum quoque sint qualitates in audiente vel loquente?

Præterea de modo agendi, an sit per sympathiam, seu per modum conditionis præcise; an per actionem Physicam vnus Angeli in alium? An vnus Angelus possit mentiri al-

teri? & plura similia; quæ manifestum est partim esse impossibilia in naturâ; partim tracta ex vsu humano, & suppositione politicæ cuiusdam & socialis conuersationis inter Angelos; quæ de se est inconueniens, vt supra declaratum est. Quare cum constet nullam esse Physicam actionem Angeli in Angelum, ratio actionis eorum in inuicem manet exposita.

LECTIO IX.

De Actione Angelorum in corpora, & specialiter in homines.

Acceptâ à Metaphysicâ Angelorum lege, ne quid præter rarefactionem immediatè agant; & in eorum potestate cuncta esse quæ per rarefactionem fieri possunt; & elementalem conuersionem (quæ naturalium omnium est fundamentalis) consistere in rarefactione: palam est, nihil in his quæ nos circumstant adedò admirandum esse, quod non possit angelicâ virtute perfici; & hoc, morâ oculos nostros fallente,

et si non in vero instanti.

Patet itaque omnia miracula quæ in Sacris libris commemorata sunt, & quæ fidelibus ultra exceptionem in Ecclesiâ historiis commendata sunt, non solum potuisse fieri ab Angelis, sed etiam ipsâ re patrata esse, quoties vox Diuina vel in Christo, vel aliter non est specialiter applicata. Tum enim Deus per vocem ea operatur: cæteroqui verò, cum Deus nihil præter ipsum *esse* immediate operetur, palam est angelico ministerio opus esse.

Rursus cum ea quæ in gratiam Ecclesiæ (ultra quæ ad naturalem mundi constitutionem requiruntur) peraguntur, alia sint quæ ad hoc deditâ operâ fiunt, ut ex eo proficiant, quod nota sint esse præter naturæ leges ordinarias; alia verò ipso dumtaxat esse suo Ecclesiam promoucant: palam est, non posse neque debere prioris naturæ effectibus causas assignari, quæ consueto tenore eos producant. Sic enim falsitate mediante veritas ageret; & cum aperiri nata esset fallacia, non solum inefficax,

sed persuasione contrariæ inducendæ idonea foret talis operatio.

Ex autem operationes, quæ solâ sui exhibitione promouent Ecclesiam, nisi ordinatis, in ipsâ constitutione Ecclesiæ, & accommodatione naturæ ad ipsam, causas proprias sortiantur, non poterit perfecti artificij (quale à Deo expectari fas est) integritas & decor saluari. Quare non est expectandum, vt ad illiusmodi operationes mundo quasi infirmo medicæ Angelorum manus adhibeantur.

Ex quibus conficitur, angelicam operam non requiri, neque misceri naturæ, nisi cùm necessitas per se vrget; id est, vt non effectus tantum, sed etiam modus effectus, scilicet vt præter naturæ leges fiat, requiritur. Ex quo rursus patet, fidem illorum, in quorum gratiam opus extraordinarium fit, esse causam miraculi facti; vel finalitèr, vt cùm fit vt ipsi credant: vel impulsuè, cùm vel qui facit, vel ille cui fit, petunt & expectant à Deo talem operationem.

Vndè rursus clarum est, cur toties

LIBER II. LECTIO IX. 165

in Sacris Scripturis audimus, *secundum fidem tuam tibi fiat: Fides te saluum fecit*: quod quidam habuit fidem sufficientem ad sanitatem: quòd fides velut granum sinapis, mitteret montem in mare: quòd propter infidelitatem Dominus non potuerit facere signa; non quòd potestas ei deesset; sed quòd in illis dispositio: & similia plura; quæ testantur hanc esse miraculorum seu mutati naturalis ordinis propriam & per se causam.

Patet quoque cur miracula seu angelicas operationes frequentius audimus certis locis & occasionibus patrari. Cùm enim fides in Deum, per confidentiam in precibus alicuius Sancti; & hæc, ex testimonio eorum qui opem ab illo Sancto meruerunt; & per apprehensionem sanctitatis loci alicuius, aut imaginis, aut hominis, augeatur; fit eam in similibus circumstantijs requirere Angelorum ministerium, sæpiùs quàm in aliis.

Et hoc etiam patet, miracula esse quidem plerumque signa fidei; & per consequens etiam alicuius gra-

dus sanctitatis; non tamen maioris; cum plerumque nascantur ex additione intellectus & voluntatis, circa particulare aliquod objectum; cum (nisi per specialem inspirationem à Deo hoc fiat) maioris sanctitatis opus foret, remittere diuinæ dispositioni totaliter quomodo ea res agi deberet. Ex aliquâ itaque sanctitate, sed non perfectissimâ, plerumque sunt miracula.

Patet etiam cur parentum, pauperum, & afflictorum & benedictiones desiderandæ, & imprecationes timendæ sint; quando videlicet ex iustâ causâ procedunt: quia scilicet ex magno plerumque affectu nascuntur: qui cum fidei coniunctus est, ipsam & auget; & per consequens, facit crescere in talem, vt à Deo exaudiat, & angelicas manus requirat.

Vtcrius, cum in angelicis naturis, nihil possit supponi aliter quàm secundum quod à naturâ propensionem acceperunt agi; neque Deus aliquid ad libertatem exercendam, seu animi gratiâ (quod fatuorum est) agere credi debeat, immò nihil nisi

LIBER II. LECTIO IX. 167

prout expedit creaturis & opificio suo; euidens fit, Angelos præsidere corporibus iuxta proportionem optimam ipsorummet ad corpora possibilem in hoc statu Vniuersi; atque adeò secundum quod est eis naturale.

Quare solos duos choros postremos immediatè agere circa corpora: Archas tamen, Dynames, & Exotifias, esse à quibus posteriores chori leges suas primariò trahant, secundum naturam singulorum operum: primos verò quatuor choros, nullam specialem operam corporibus impendere. Vnde ipsi (magis verò tres primi) sunt purè assistentes. Kyriotetes enim licet non ad corpora, ad sese tamen aliquam conuersionem habent. Tres sequentes medij sunt inter assistentes & missos. Duo postremi propriè missi & administratorij omnes, vt de ijs dicit Apostolus.

Quoniam autem propinquissima & proportionatissima Angelis corpora sunt humana seu homines; in quibus Angelorum qualitates vniuocè resplendent, saltem secundum ani-

nam : eademque, finalia naturæ ; & ex eo capite vniuersalitatem quandam respectu naturæ participantia : Palam est, Angelos singulos singulis hominibus specialitèr proportionatos reperiri. Cùm enim secundùm diuisionem factam virtutum humanarum, necesse sit, singulos homines aliquem singulorum gradum principalem in se habere ; idem quoque proportionalitèr sit principalis in aliquo Angelò : clarum est, hunc Angelum illi homini specialitèr esse proportionatum.

Ex quo habetur, cur talis Angelus huic homini præsideat ; & quòd hoc ex naturâ sit, ab ipsâque infusione animæ ; quia inde incipit proportio. Quia tamen ad finem supernaturalem est tota motio Angeli ; hoc donum naturæ in Adamo integræ datum & non perditum lapsu, ad nos deriuatum est. Neque obstat circa aliquos nunquam fortassis naturæ leges inuerti ; hoc enim non impedit quin Angeli ex naturæ proportionem præsideant & aduigilent.

Et hanc quidem curam tutelarem esse

esse propriamvltimi chori, suadet immediata proportio. Vnde fit Archangelorum munia esse ea, quæ ad vniuersam Ecclesiam, vel certè aliquam particularem Ecclesiam in ordine ad vniuersalem, seu vt effectus in eam redundet, spectant. Sic Michael pugnare contra Draconem; exurgere pro filiis Israel; esse principem Ecclesiæ; & adiuuare particulares Angelos legimus. Gabrielem mitti legatum de reparatione mûdi. Alium tubæ sonitu reparare vniuersum. Raphael exemplum curæ diuinæ in populi Israelitici adhortationem exhibere. Quæ omnia publicum ministerium testantur.

Consequenter ad Archangelorum chorum pertinebunt publica corpora, & eorum administratio, seu actio. Quare Angeli ignis, ventorum, & aquarum, qui commemorantur in Apocalypsi, ad illum chorum spectabunt. Hæc enim corpora, sunt vniuersalia naturæ instrumenta ad agendum. Vnde quoque est, quòd nullus terræ Angelus legitur deputatus; quia terra patientis, non agentis vicem, habet.

Specialitèr inter operationes Angelorum commemorantur, apparitiones in corporibus solidis ; & quòd preces piorum offerant Deo. Quorum hæc clarè Metaphorica est , & non significat aliud, quàm preces nostras facere dignas quæ audiantur; puta per curam & assistentiam suam. De prioribus aduertendum, non semper Angelum apparere quoties tale corpus mouet ; sed sæpe Deum. Ille enim apparet quem exhibet, seu cuius representatio est in tali corpore ; non verò qui facit talem representationem. Quoties itaque representatio est Dei, Deus apparet non Angelus ; etsi solus Angelus immediata sit causa representationis.

Tandem concluditur, omnia bona quæ hominum generi aliquo modo contingunt , à Deo per Angelorum ministerium ad homines deriuari. Cùm enim ex Philosophiâ constet, corpora prima per se lucentia, Angelorum ope moueri ; & mediante eorum motu, omnes operationes naturales fieri ; & ex diuinitùs traditâ doctrinâ didicerimus , & mundum &

Adamum formatum & instructum
eorundem ope ; & ex dictis omnes
operationes supernaturales vel certè
plerasque, & generales ex quibus om-
nia nostra opera bona ortum habent,
ab ijs oriri : clarum est, omnia bona
nobis ab ijs proficisci, & ijs accepta
referenda.

LECTIO X.

*De Actione malorum Angelorum, tum
in Homines, tum in Angelos bonos.*

VTque ab Angelis omnia nobis
bona proueniunt, sic omnia
mala à Diabolo. Cùm enim ex per-
suasione Diaboli pertracti sint primi
parentes ad peccatum ; & ex eo pec-
cato fluxerit inordinatio appetitus
sensitiui in toto genere humano ; &
ex eâ, omnia peccata & ignorantia ;
quin etiam mortalitas & morbi, &
mala quæcumque tum naturæ tum
violentia : Palàm est, à Diabolo om-
nia mala in humanum genus fluxisse.
Et hoc non solum tanquam à cau-

sâ quæ posuit effectum materialiter; sed tanquam à causâ actualiter concurrente. Quantum enim necesse est, vt causâ præmota moueat, tam necessarium est, vt à causâ deficiente effectus prodiens sit deficiens. Vnde patet (vbi Deus non supplet) defectum ex vi causæ positæ à Diabolo sequi, quantum positius effectus sequitur ab eo, qui & primam causam posuit, & actu præterea præmouet; cùm ad non esse, non sit alia præmotio.

Patet iterum, cùm omnes creaturæ sint ministri Dei; & Deus eis vtatur secundùm qualitates earum; quòd sicut bonis Angelis vtitur ad benefaciendum, sic malis ad malefaciendum: & nunquam è conuerso. Quare cùm aliquid mali inferendum est hominibus præter tenorem causarum consuetum; tunc patet esse articulum agendi Dæmonibus. Siue hoc malum sit propriè malum, siue tantùm dispositio ad maius bonum: sicut in sancto Iobo.

Dices, pluribus locis sacra scripturæ constare, Angelos bonos malefe-

cisse hominibus; vt qui pestem intulit Hierosolymis ; interfecit exercitum Sennacherib:&c. Respondetur, cùm Deus sit causa mali pœnæ quatenus bona est; nihil repugnat etiam Angelos bonos esse ministros ipsius; Sed quatenus bona est;& non immediate, sed mediatè; scilicet median- tibus Angelis malis. Et sic Angeli citati tantum imperio præfuerūt actioni vt à Deo proficiscenti, non autem executionem ipsam exercuerunt.

Consentaneum quoque est dictis, esse singulos Dæmonas appropriatos singulis hominibus, saltem vitiosis, secundum proprietatem vitiorum ipsis naturalium, id est, ex parentibus tractæ inordinationis. Cùm enim non ceciderint Angeli, nisi ex ijs choris qui conuersionem aliquam habent ad corpora; palàm est Dæmonas magis conuersos esse ad corpora, quàm bonos Angelos. Cùm itaque cætera corpora ab humano discedant per excessum vel defectum, ex quibus nascuntur vitia; etiam Demones cum similibus hominibus maiorem connexionem habent, quam Angeli ex vi

naturæ cum bonis.

Hinc videas, cur Dæmones quicquid possunt mali operantur; etiam si non lateat illos, plus boni hominibus postmodum exinde euenturum. Cùm enim appetitus nocendi præualeat in eis fulgori veritatis, etiam contra scientiam operantur (vt & Animæ separatæ reprobæ): & inde fit vt ministerium eorum nunquam desit Deo, ad iudicia sua exercenda; absque eo quòd impellat eos, vel aliquo modo præter naturam & inclinationem eorum imperet. Vnde leguntur & in Iobo, & in visione Michæ, sponte sese obtulisse.

Vnde apparet, non posse illos quicquam, præter eos articulos, quando iudicia Dei requirunt, mali à sese patrare. Si enim possent, totum vniuersum confunderent; cùm quicquid possibile illis foret mali, semper agerent. Neque etiam posse quicquam boni ab ijs prouenire, vt plus mali sequatur; quia non reguntur ratione; & pronitas ad malum faciendum superat in illis vim veritatis totaliter.

Quare suspectæ sunt familiares illæ

historiæ, quòd vnus Dæmon subleuet malâ quæ alius Dæmon infligit. Et multò magis damnanda sunt Iudicia eorum, qui quicquid videt fieri, quorum causas ignorant, ea statim magicis artibus tribuunt, & operationi Diaboli: cùm magis (si operationes sunt bonæ) Angelis & Deo attribuerent; qui sunt nobis omnium bonorum causæ & authores; & volunt omnia bona à sese expectari; exemplo Saluatorum & Psalmidicorum, & aliorum profitentium gratias gratis datas.

Sequitur Dæmonas non facile miscere sese rebus humanis, nisi quando malum aliquod sic oporteat à Deo proficisci, vt appareat hominibus, præter naturæ ordinem profectum: verbi causâ, cum imprecationes vehementes, præsertim parentum vel afflictorum hoc exigunt, vel fides petentium: vt cùm Paulus Elymam excæcauit: & in similibus. Non enim maior libertas Diaboli, quam Angelis tribuenda est.

Suspectæ proinde sunt tot historiæ priuatorum malorum & damnorum,

Dæmonum operâ illatorum; & quæ re ipsâ sunt Christianæ vitæ & actioni nociuæ: nam & faciunt infirmos quærere opem Diaboli; cùm ipse credatur facilius exaudire quàm Deus, & ipsum faciunt timendum. Vnde redduntur fideles obnoxij ad vitanda illa quæ possunt illum irritare, & ad eum placatum habendum.

Præterea si similes historiæ forent veræ, mundi gubernatio magis penderet à Dæmonibus, quàm à Deo, quoad particularia. Nam huiusmodi historiæ sunt quotidianæ, testibus & iudicijs comprobata: cùm historiæ de sanctorum auxilijs, & longè rariores, & rarissimè publicis testimonijs confirmata. Sed & historiæ de Dæmonibus multitudinibus communes, & integris monasterijs præsertim mulierum: Cùm sanctorum conuersatio difficulter vni alicui exortis sanctitatis communicetur.

Ex vtroque capite falsæ sunt historiæ de oraculis, augurijs, auspicijs, & extispicijs, & similibus Idololatriæ fulcimentis, quorum perpetuus erat vsus nullâ vtilitate, insigni malo; &

præterea plerumque bona erant quæ petebantur. Nullo itaque modo credendum aliquam fuisse in his veritatem. Nisi si quando Deus usus est communi errore ad aliquid prænunciandum : sicut in Balaamo & Sibyllis; & tunc rem gestam esse per bonos Angelos, non per malos; quia veritas à bonis nata est prodi, non à nequam spiritibus.

Obijcies tot loca sacræ scripturæ, in quibus fit mentio augurum, & responsum Dæmonum; & specialitèr de Pythonissâ, quæ excitauit Samuelem. Respondetur non negari augures, id est, profitentes auguria. Sed dici eos circulatores fuisse & planos, & præstigijs artificiosis, non ope Dæmonum præstitisse quæ faciebant. Nihil tamen minus merito suo fuisse grauissimè punitos; quia populum à cultu Dei auocabant, & ad idololatriam adigebant. Clarum enim est, exprobrari vbique à Deo idolis, quòd nescirent futura; neque possent adiuuare suos cultores : quod fuisset inconueniens, si quotidie ope Dæmonum vera prædicebant, & multa bona ijs præstabant.

Quoad historiam verò Samuëlis, respondetur, Pythonissas fuisse ventriloquas; quæ quia ex imperfecti-
one aliquâ & monstrositate naturæ,
vel etiam arte, habeant præter ordi-
nariam vocem, posse simulare aliam
quasi longinquam; fingeant sese
fiscitare mortuos, & eos ex sepulchris
hianter loqui: & pluribus cæremo-
niis dementatis, consulentibus res-
ponfa ex suo capite reddebant; ne-
minem spectandum, sed tantum vo-
cem audiendam exhibentes.

Deus autem miscuit sese & exhi-
buit Samuëlem improuisum mulie-
ri. Vnde & ipsa extimuit vt vidit
Prophetam ascendere de terrâ, quod
non erat ei consuetum. Licet enim
ista non possint conuinci ex literâ,
liberè tamen hanc explicationem pa-
titur textus. Et qui tunc exhibuit Sa-
muëlem erat Angelus, non nequam.
Sed dicitur Samuël prophetauisse,
quia verè ipse apparebat ministerio
Angeli, non Angelus qui eius appa-
ritionem faciebat.

Obiicies rursus fidem tot historia-
rum, maximè de Apollonio Tyanæo,

qui dum cæderetur Romæ Tyrannus, significauit illud longè positus: & confirmant Historici certissimè factum. Respondetur Historicos plerumque famam, magis quam oculos testes, in priuatis actionibus exponendis, sequi. Vnde etsi quantum fama est indefectibilis (vt in publicis effectis) eo vsque ijs fidi possit; vbi tamen ex relatione aliorum pender, ibi incerta admodum est historia.

Quod verò spectat Apollonium Tyranum, palam est vanissimum & mendacissimum hominem fuisse. Quoad hoc autem particulare factum (quoniam ab historicis refertur tanquam certissimum) si factum fuit, secretâ, vel mihi certè incompertâ humanæ Animæ vi, gestum crediderim; quæ per somnium prope mortem, & in furiosis, aut penetrat aut certè multorum testimonio perhibetur penetrare, aliqua absentia vel futura de quibus sollicitæ est. Aduertendum tamen Dionem (qui hoc confidentissimè narrat) perpetuum esse in similibus nugis, & Superstitiosum, & proindè deceptu facilem.

Obijcies tertio consensum omnium Doctorum Infidelium, immò & Sanctorum plurium Patrum. Respondetur, eos doctos qui in libris alienis legendis summam doctrinam posuerunt, multitudine authorum ferè regi; & hos quidem plerumque his fabulis assensos fuisse; ex quibus specialitèr fuit Plutarchus, qui libellum de cessatione Oraculorum scripsit. Verè enim vulgus, id est, plures (etiam eorum qui paululum caput supra cæteros eleuauerunt) his nugis obnoxij fuerunt.

Quoad Philosophos verò, semper plures erant qui hæc irriderent. Sic Diodorus Philosophos Alexandrum comitantes docet Chaldaeos irrississe, Sic Epicurei & alij. Sic viri prudentes plures contemnebant auspicia. Cato mirabatur Aruspice[m] posse sine risu alium Aruspice[m] intueri. Tullius in libris de Diuinatione, Lucianus in Incredulo, deridet similia. Insignis verò est historia apud illum Pseudomantis; ubi artes & imposturæ Oraculorum nudantur.

Sancti verò Patres, cùm contra in-

fideles & apud infideles locuturi essent; si grauem testium nubem aperte repudiarent, periculum incurrebant opinionem proteruiæ & pertinaciæ de Christianis in Infidelibus generandi : atque proinde magis quærebant quomodo hæc fieri possent declarare, quàm an vera forent inuestigare. Quod in plerisque etiam non poterant, vel quia antiqua erant, vel quia absentia. Sed neque aliquos tantâ authoritate dicentium motos esse inconuenit.

Consequens est, non esse aliquam artem Dæmonas eliciendi in conspectum hominum : cogendi eos ad mirabilia operanda ; imperandi inferiori per superiorem ; immò neque lædendi per carmina fruges vel personas ; vel incantandi, vt vocant, siue homines siue Animalia, siue in bonum siue in malum : & hæc profitentes esse vel nequissimos circulatores ; vel certè læsi cerebri , qui sibi persuadeant se facere quæ nunquam agunt.

Omnia enim hæc includunt promiscuam potestatem Diaboli ad ma-

lesaciendum, absque articulo notorio diuini Iudicij. Rursus multa bona ab his dicuntur hominibus euenire; vt inuentio thesaurorum; sanitates aliquæ, &c. Item miranda in naturæ opera, vel scientia futurorum, quibus irretiuntur homines, vt quærant à Diabolo, quæ solius Dei est promittere & dare. Vnde præiudicium est doctrinæ & actionis Christianæ vel credere hæc posse fieri & solere.

• Obijcies ex sacris literis Incantatores Ægyptios, qui restiterunt Mosi, & similia illi miracula perpetraverunt. Et quòd sæpe mentio habeatur de ijs qui incantant serpentes: & quod huiusmodi effectuum professores stipendiabantur à Regibus Ægyptiorum & Chaldeorum. Adde etiam innumeras historias antiquas & modernas.

Respondetur, ex Hebræo textu manifestè elici, incantatores Ægyptios fuisse Physicos; id est, qui naturalia experimenta fecerunt: & non carminibus, sed secretis, id est, artibus vulgò incognitis fecisse quæ fece-

tunt. Cùm enim Ægyptus terra sit ex omnibus olim notis calore & humore redundantissima, & feracissima serpentum & Animalium subito nascentium; & populus ingeniosus: habebant Ægyptij artes maturandi generationem imperfectorum Animalium.

Et fuisse operationes eorum leues, & non comparabiles Mosaicis; etiam ex ipso textu constare potest. Ex eo quòd serpens Mosis deuorabat serpentes eorum: & Moses per totam Ægyptum plagas inducebat; Magi verò tantummodò aliquid simile operabantur; vt ostenderent speciem operationis non fuisse vltra artem. Vnde serpentes & ranas poterant facere, quæ humida sunt: Cyniphes autem non potuerunt; quia difficilis est transmutatio siccorum; & non nisi per mixtionem humidi potest subito perfici generatio.

De incantatoribus verò serpentum, etiam hodie ars quædam dicitur esse in aliquibus Africæ regionibus, sibilo euocandi serpentes: sicut perdices & coturnices similibus arti-

bus decipiuntur. Contrectare etiam innocuè serpentes à naturâ aliquibus datum est; vt de Marfis & Psyllis memorant historiæ. Et medici aliqui memorant, quomodo homo cibis vel vnctionibus agere possit, ne serpentes eum velint siue morfu, siue aculeo vulnerare. De historiis eadem est responsio quæ superius.

Obijcies rursus & publicam Christiani populi famam, & Iudicia publica, & , quod vtrisque maius est, Sanctorum plurium miracula, quibus incantamina dissoluta memorantur. Respondetur quod fama partim niti-
tur relationibus priuatorum ; quæ quàm non difficilè inquinantur, omnibus notum est ; partim vetò iudiciorum autoritate ; quæ plurimæ fuisse, & à viris tum probis, tum prudentibus exercita, nullus est ambi-
gendi locus.

Attamen hæc Iudicia inter Christianos non nisi à paucis sæculis adeò celebria fuisse constat. Et præterea, sapissimè in ijs, de rebus quæ à Phantasia pendent, actum fuisse ; de quibus difficillima est inquisitio ; ex eo quod,

quod, non solum habitualiter læsi cerebro, sed etiam actualiter, & vnâ vice tantum, parati sunt deierare, se vidisse & audiuisse, quæ numquam viderint vel audiuerint, sed ex vi Phantasiæ illis objectum fuerit. Et hoc etiam cadit in Personas & pias, & cæteroqui à communi hominum prudentiâ non alienas. Vnde Iudices, nisi specialiter acuti & perspicaces fuerint, ex allegatis & probatis manent conuicti, & ad sententiam dicendam obligati.

Quantum autem Sanctorum miracula spectat, non est mirum, si Diabolus sese misceat, vbi est articulus miraculi faciendi. Similes itaque historiæ, quantum sunt authenticæ, tantum credibile est Diabolum actu aliquid vltra corporearum causarum vices egisse; quantumuis miraculum nonnunquam potest constare, cum quod morbo vel alio impedimento naturali verabatur, remotâ per miraculum tali causâ, excutioni mandatur, absque eo quod Diaboli opera necessaria fuerit interuenisse.

Ex his consequenter intelligitur,

Q

in quo consistat pugna Angelorum; puta, bonorum contra malos. In eo scilicet, quod Angeli sancti destruant opera Diaboli; & Diabolus conetur impedire progressum sanctorum Angelorum. Cum enim constet, Angelos siue bonos siue malos pendere à solo Deo quoad esse, & operari, & qualitates eis intrinsecas; patet non posse esse aliter inter eos pugnam, quam oppositionem operum circa idem subiectum.

Sic in caelo pugnatum est inter Michaëlem & Diabolum circa alios Angelos: in terris circa corpus Mo-
sis: apud Danielelem circa liberationem populi; & tandem pronuntiatum est in fine mundi futuram pugnam inter Draconem & Michaëlem exurgentem pro filiis Israël; in quâ potentissimè expressum est, pugnam hanc futuram in magnâ oppressione, & tandem liberatione fidelium.

Non itaque credendum est Principem Persarum & Græciæ siue Ioniam bonos Angelos fuisse, sed nequam Spiritus: & ut nomina sonant, Spi-

ritus dissensionis & luxuriæ. Non enim apparet quid Princeps Græciæ habuerit, ibi agendum; sed neque Ionia bene pro Græcia sumitur, cum pars fuerit Asiæ & imperij Persarum, etsi habitata Græcis: Sed cum à luto deriuatum sit nomen, congruè pro luxuriâ accipitur; vt significantur vitia dissensionis, & commixtionis cum fœminis alienigenis, impediuisse liberationem populi.

Sic etiam intelligitur quomodo Ecclesia & Sancti pugnent contra Diabolum. Ad quod pertinet, quod Paulus tertio ad Ephesios ait, multiformem Sapientiam Dei mediante suâ prædicatione per Ecclesiam esse manifestatum Principatibus & potestatibus; id est, Diabolis manifesta facta; non quasi per instructionem, sed per destructionem operum ipsorum; excitatâ contra eos Ecclesiâ in gentilitate, id est, in ipso illorum regno tamdiu occupato & oppresso.

LECTIO XL.

*Quomodo Angeli sint in loco : &
Dæmones in Energumenis.*

EX dictis quoque patet, quomodo Angeli dicantur esse in loco. Cum enim notum sit sapiētibus, incorporea non esse in loco per applicationem virtutis suæ ad extrema loci formaliter, sed metaphoricè; & virtus agentis dicatur quāritas eius, erunt Angeli in loco per applicationem virtutis suæ ad extrema loci; Metaphorā non inusitatā, postquā sic dicimus solem esse in fenestrā, Planetam vel signum in capite, aut pedibus, &c.

Quoniam itaque, cum Angelus mouet corpus quod est in loco, applicat virtutem suam extremis corporis moti, quæ coniuncta sunt extremis loci; palam est, quod esse in loco Angelo, erit esse in corpore per virtutem suam; quod corpus est in tali loco. Constituitur itaque ex duplici notione *in* esse Angeli in loco;

LIBER II. LECTIO XI. 189

scilicet, actionis in determinatum corpus; & sitûs illius corporis in loco: per quarum vnâ est in corpore locato; & additâ reliquâ, est in loco.

Cùm autem applicatio virtutis sit per affectum & voluntatem; alitèr autem boni, alitèr mali sint affecti ad corpora; affectus enim reproborum sunt subiecti corporibus; vt qui amore inferiorum contemnunt superiora; affectus autem piorum sunt subiecti Superioribus, & indifferentes & liberi circa corpora; fit reprobos alligatos esse ad loca in quibus sunt, & ijs contentos & conclusos. Pios verò esse in locis & corporibus tanquam præsidentes & dominantes ijs, & ea continentes.

Præterea cùm constet Angelos esse proportionatos corporibus; euidens sit, nullum posse esse vbique; præsertim cùm superiores non immediatè actiui sint in corpora, & inferiores cum minoribus corporibus proportionem habeant. Rursus non esse plures Angelos in vno corpore & loco; cùm vnus sufficiat tali corpori

mouendo : non enim vanæ actiones ijs tribuendæ sunt, neque tale corpus reperiatur ; cui mouendo vnus aliquis Angelus non inueniatur proportionatus.

Similitèr patet eundem Angelum non esse in pluribus locis ; quia vnus corporis vnus est locus : neque posse esse in indiuisibili loci , cùm nullum tale sit. Non repugnare autem esse in loco longissimo & arctissimo , si corpus quod mouet tali figurâ moueri conueniat ; cùm ex parte ipsius nulla sit repugnantia ad quamlibet formam loci ; & proportio ad corpus sit secundùm substantiæ rationem , non secundum figuram.

Patet consequenter motum Angelorum esse conformem motui corporum. Vnde nihil speciale de eo occurrit dicere. Neque similiter de mutatione corporum : non enim transeunt de immediato corpore vno ad aliud immediatum ; sed semper idem corpus immediatè regunt quamuis aliâ & aliâ specie : Cùm enim non desint sufficientes Angeli , & nihil præter naturam in ijs putandum sit

LIBER II. LECTIO XI. 191

agi; & sit specialis proportio cuiuslibet corporis ad determinatum Angelum; & non qui mouet, sed cuius figura mouetur est qui apparet; quorsum vnus Angelus pluribus corporibus accommodari dicendus est?

Quid autem circa mutationem loci ex exorti Dei potestate, seu per contradictionis leges, possit conuenire, non multum laborandum est; tum quia nihil de naturâ Angelicâ dignum scitu explicat; cûm ij non ex casu & concursu fortuito regantur, sicut corpora; neque Deus præter naturæ tenorem quicquam in ijs operetur; & maximè quia esse in loco & mouere, ferè consistant in extrinsecâ denominatione; & tota quæstio magis in actionem quàm in localitatem refunditur.

Patet rursus ex dictis quid sit Angelos beatos esse in cœlo. Cûm enim in similibus Analogijs secundarijs, conceptus oriantur ex primarijs; ex eo quòd Deus specialitèr dicitur esse in cœlis; & Angeli videre faciem eius; siue esse præsentés ei; siue esse vbi ipse est; necessum quoque est,

Angelos dici esse in cœlo. Angelis itaque esse in cœlo, componitur ex his duobus; Deum esse in cœlo; & Angelos esse præsentes Deo, seu esse vbi Deus est.

Ex quo dilucet, quomodo non sit necesse, Angelis descendere de cœlo, vt agant aliquid circa commendatos sibi pupillos; quia alio sensu dicuntur esse in cœlis, alio verò in reliquis corporibus. Neque laborandum est inquirere, quam actionem habeant circa cœlum; vel quem ornatum ei conferant, vt in eo specialiter esse dicantur: Cùm totum hoc negotium ex deriuatione vocum ad plures significationes pendeat.

Euidens quoque est, quomodo Dæmones ponantur ab Apostolo in aere. Sicut enim Deus dicitur specialiter esse in cœlo, quia virtus ipsius in admirandis operibus magis elucet in cœlo: sic quoniam terribilissima opera Dei, & mala quæ infert, maxime in aere sunt visibilia, puta in peste, tonitruis, fulguribus, &c: dicuntur Dæmones specialiter esse potestates aeris, & habitare in aere.

Non

Non itaque rectè putantur aerei Dæmones ex ijs esse, qui leuiùs peccauerunt, & nugones inter nos agunt. Palam enim est, Apostolum ibi ponere summos, & tenebrarum rectores. Sed neque cum dictis stat, aliquos Diabolos familiaritè cum hominibus conuersari, & promiscuè humanis & minimis actionibus sese miscere. Neque satis intelligunt angelicam naturam (cuius infimus gradus adeò excellit grauissimorum hominum scientiam & prudentiam) qui sic de ijs philosophantur.

Ipsâ sequelâ ducimur ad intelligendum Dæmones non propterea ex inferno emigrare, vt hic aliquid mali moliantur. Sicut enim sanctis esse in cælo, est frui Deo; sic Dæmonibus esse in inferno, est esse remotissimos ab eo secundum affectum. Qui enim possunt intelligi rudentes inferni, nisi prauis eorum affectus? quæ caligo & tenebræ spiritibus, nisi cæcitas intellectus ex deprauato affectu? per hæc in infimo collocati sunt, vbicumque secundum operationem suam in corpora sese moueant vel teneant.

R

Vnde quod à Christo Domino factas tanquam fulgur cecidisse de cœlo dicitur ; propter impetum seu magnum voluntatis impetum, (non quia de loco ad locum transiuit, cùm necdum tellus foret aut infernus, saltem per distinctionem locorum) & propter remotionem à Deo & Angelis cum Deo in cœlo existentibus, secundùm mentalem differentiam intelligendum est.

Tandem constat, quomodo dicantur & esse, & habitare in hominibus. Sicut enim, quos Spiritus Sanctus mouet, in eis esse dicitur ; &, si constantè eos mouet, in ijs & manere, & ipsi templum ipsius esse : sic palam est, si quis à Diabolo mouetur, dici in eo Diabolus esse ; &, si constantè ab ipso moueatur, dici in eo habitare. Vnde patet cur Angeli non dicuntur similiter esse in hominibus : quia scilicet sunt tantùm Ministri Spiritus Sancti ; Diabolus autem est primus author malorum, vt Deus bonorum.

Ex quo rursus patescit, cur ij in quos Diabolus accepit potestatem,

vt secundum corpus faciat eos agere
 quæ omnino aliena sunt ab humanis
 actionibus, dicantur energumeni,
 siue possessi à Diabolo. Quia scilicet
 constanter agunt opera quorum Dia-
 bolus author est. Et quoniam secun-
 dum mentem aliud volunt, quàm
 quod secundum externa membra
 operantur: Ideò operatio non ijs,
 sed Diabolo in ijs operanti tribuitur;
 cum impiorum operationes, sic Dia-
 bolo, vt etiam ipsis agentibus tri-
 buantur.

Ex quibus sequitur, energumenis
 hoc solenne esse, vt læsum cerebrum
 habeant. Cum enim ex vitiatione
 cerebri procedant inordinatæ actio-
 nes, tam quæ vires, quàm quæ debi-
 litatem indicant; & homo ex tali læ-
 sione non sit iam dominus actionum
 suarum; meritò Diabolo similes de-
 fectus attribuuntur. Vnde etiam est,
 vt exorcismi & cæremoniæ quibus
 phantasia corrigitur, instituti sint ad
 ejectionem horum spirituum, & cu-
 rationem similium oppressorum.

Sacrarum itaque Scripturarum lo-
 quendi modus, quo omnes infirmita-

tes Diabolo tribuuntur, secundum naturam est. Siue enim Diabolus immediatè, & præter naturæ ordinem, aliquid in passo operetur; siuè tatummodò mediantibus causis naturalibus; patiens oppressus est à Diabolo; & liberatur à seruitute ipsius, quoties ab aliquo morbo vtrouis modo inflicto liberatur. Vtro autem modo Diabolus agat, non nisi ex penitissimâ inspectione naturæ dignosci potest.

Non enim desunt qui Spiritum malum qui incessebat Saülem & Asmodeum, morbos fuisse conijciant; quòd alter cantu lenitus est; alter fumigatione eiectus: quæ non profutura fuissent, contra personalem conjunctionem maligni Spiritus. Quod autem Angelus dicatur eum in superiore parte Ægypti religauisse; esse prorsus metaphoricum; cum localitas in Angelis non sit propria; & significare Luxuriæ morbum in eâ regione abundare: de quo vitio notati sunt Ægyptij.

Sed neque parcunt Dæmonijs eiectis à Christo & Apostolis; Lycan,

thropiam interpretantes Dæmonas qui in porcos eiekti sunt; dictos multos propter complicatum morbum, & multipliciter actionum inde causatam: Phrenesim autem eorum, per vapores exhalatos, Christo iubente, in porcos transiisse: ut mali grauitas innotesceret populis; & appareret Dei benignitas conseruauisse homines, ne ipsi sese præcipitarent; quod eodem malo tacti, fecerunt porci. Et afferunt in confirmationem alibi dici virtutem exiisse de Christo, puta, in mulierem curatam.

Pythonissam quoque Pauli, morbo laborasse volunt. Et quod ipsa & aliqui Dæmones à Christo eiekti occlamarent eos sanctos, ex ipso morbo accidisse; qui non sine amentia est, & facit apprehensiuos, & eius quod apprehenderunt molestos inculcatores. Et sese adiuuant ex eo quod dicatur, quod Dæmonia sciebant eum esse Christum; quod interpretantur ex Hebræâ Phrasi, faciebant scire, seu publicabant. Nulla est enim consequentia ut non permitteret ea loqui, quia sciebant; quasi si mentiti fuissent,

198 INSTITVT. SACRARVM
permissurus fuisset ea loqui.

Eodem referunt quod aliqui Dæ-
mones disputabant cur venisset tor-
quere eos ante tempus: alij verò roga-
bant ne mitterentur extra regionem
vel in abyssum. Explicant enim ex
furiosorum apprehensionibus timuisse
eijci locis notis: & ex admixtione
aliquâ hydrophobiæ specialiter ti-
muisse proijci in mare, quò fortassis
alij conati fuerant, eos deducere.
Quod autem de porcis meminerunt,
fuisse diuinâ prouidentiâ factum;
quâ sic miraculo conueniebat. Ne-
que necesse est de dictis furiosorum
rationabiles causas reddere. Similiter
quod dixerint nondum esse tempus
eius, ex iis quæ audierant de aduen-
tus Christi tempore, celeberrimâ per
id temporis apud Iudæos quæstione,
prouenisse, ad suas partes accommo-
datâ solutione, & non ex scientiâ
aliquâ, vt euident est.

Neque potest negari, quin in sa-
cro textu sit aliquod fundamentum
sæpius interpretandi operationes
Diaboli, pro malis naturalibus: si-
cut cùm de Salomonis temporibus

dicatur, non fuisse Sathan. Et cum in Psalmis dicitur de Iusto, quod non timebit à Dæmonio meridiano. Tentationes quoque dicimus à Diabolo procedere; cum Iacobus dicat; *unumquemque tentari à concupiscentia sua*. Paulus vtrumque videtur coniungere cum ait, *ne tentet vos Satanas propter incontinentiam vestram*. Septem quoque Dæmonia Magdalena, septem fuisse vitia aliqui Patres dixerunt. Quid, quod Paulus afflictiones quas sustinebat vocat Angelum Sathanæ? Christus ipse mulierem incuruam, alligatam à Satanâ? Euangelista omne genus morborum vocat *omnes oppressos à Diabolo*.

A Lucâ dicitur Lunaticus, qui ab aliis, habere Spiritum surdum & mutum. Quæ ipsa morbi non Diabolî sunt signa. Quale Dæmonium dicitur non exire nisi in ieiunio & oratione; quia sua fides patientem non adiuuat; Vnde exigitur Parentis fides à Christo Domino, vt eum curaret. Difficile tamen est omnia per defectus naturales explicare.

Patet itaque non temerè præsu-

200 INSTITVT. SACRARVM.
mendum de Diaboli præsentia ; &
minùs dictis laborantis credendum,
nisi per operationes clarè supernatu-
rales constet de personali eius præ-
sentiâ. Non dico quantùm ad exor-
cismos, qui non solum non nocent,
verùm plerumque profunt , (etiamsi
dumtaxat morbus sit) sed quoad ca-
lumnias & condemnationes Perso-
narum innocentium , titulo Magiæ,
& similibus criminibus ; vt hodie
incipiunt cautiores esse Iudices.





INSTITVTIONVM SACRARVM

PERIPATETICIS
inædificatarum.

LIBER TERTIVS.

De Institutione, Progressu, &
Consummatione San-
ctæ Ecclesiæ.

LECTIO I.

*De causis Sanctæ Ecclesiæ Per-
petuitatis.*



Componenti quæ dicta
sunt, apparet Ecclesiam
à Christo Domino ædi-
ficatam, esse singulari-
bus admodum dotibus præditam;
& imprimis scientiâ eorum quæ ad

salutem pertinent certissimâ imbutam. Cùm enim sit doctrina à Christo Domiuo prædicata & tradita Apostolis; ipse autem sit ipsa prima veritas, firmior omni principio demonstrationis humanæ, indefectibilis à veritate, & potens ipso verbo suo facere vera quæ loquitur; palam est, nullam scientiam posse esse adeò certam, quàm est doctrina Christiana.

Clarissimum quoque est, eandem doctrinam superare omnem scientiam claritate & facilitate perueniendi ad illam; adeò vt nulla imbecillitas humana repellat quemquam ab eâ; & vt stultus in illâ errare non possit. Tradita enim est vocibus omni generi humano communibus Patris, Filij, Spiritus, Personæ, Naturæ. Et quæ deinde de Christo traduntur, familiarissima sunt: atque adeò tota hæc doctrina clarissima est, & captu facillima, & conueniens etiam Rusticis, Aniculis, Infantibus.

Modus quoque tradendi est conaturalissimus homini; videlicet per fidem; quæ humanæ naturæ, plerum-

que in ignorantia & tenebris existenti, est circa omnia naturalia & moralia consuetissima. Prudentibus quoque, ab ipsâ eorum prudentiâ, in materiâ sibi ignotâ, qualis est Mysteriorum fidei, commendata & imperata. Sic enim Medicis, Nauarchis, Iuriconsultis, & cuilibet alicuius scientiæ perito, si nos ipsi simus imperiti, ipsâ prudentiâ duce tradimur gubernandi, & ex eorum dictis regendi.

Ex parte quoque Voluntatis, factus est nobis vltimus finis, seu primò amandum, facillimè & apprehensibile, & amabile. Per hoc enim quòd Christus est simul Deus & homo; iam objectum amoris nostri, non est amplius inuisibile & inconceptibile, cuius nulla sit species vel similitudo, quâ illud quasi apprehendere & tenere possimus. Sed corporeum, familiare, & vnum ex illis, ad quæ amor noster primariò ex totâ naturæ constitutione natus est dirigi; puta, eiusdem nobiscum naturæ, & vnum è nobis.

Congesta sunt amoris argumenta

potentissima, ex fortissimis persuasione locis, focij, fratris, cohæredis, amici, amantis, patris, benefactoris, patientis pro nobis, redimentis nos, quærentis nos, corpore & sanguine suo nos pascentis, nihil a nobis petentis, nisi vt ametur, cum maximis promissionibus mercedis summæ & beatitudinis pro adeò innocuo labore, & interminatione maximarum penarum iis qui aliud quam ipsum amant; & vno verbo omnium bonorum spe, & omnium malorum timore.

Adde his, quòd quoniam vna veritas non potest esse contraria alteri; sed magis testimonium ab illâ accipit; necesse est doctrinam Christianam ex ipsâ sese amicam esse scientiarum; præsertim verò illarum quæ nobilissimæ sunt, & coniunctas doctrinæ ipsius veritates inquirunt: qualis est Metaphysica, & Physica quæ de cæli & terræ naturis veritates ratione comprehensibiles inuestigat. Cum huiusmodi veritates ex necessitate ipsam doctrinam Christianam confirmant.

Vnde fit vt sicut est apertissima hæc doctrina simplicibus & sine inquisi-

tionem credentibus ; ita sit celsissima & difficillima cum ratione in absconditis ipsius veritates inquirentibus. Vtpote quæ altissimas naturæ veritates supponit , & ijs superædificetur. Vnde & scientiarum omnium necesse est esse & suavissimam comprehendentibus : Quo enim altiora sunt principia & proximiora radici omnis firmitatis , eò etiam necessum est , sint & delectabiliora & maiori firmitate radicata , & inter se connexa ; & per consequens demonstrabiliora tum ex causis tum ex effectis.

Et quoniam beatitudo est maximè conformis naturæ , & per consequens etiam via ad ipsam ; necessum est , particularitèr scientiam moralem quæ virtutes & vitia tractat , esse maximè conformem doctrinæ Christianæ. Et quod sequitur , cùm virtutes sint secundùm naturam , vitia contra ipsam , doctrinam Christianam habere excellens testimonium ab ipsâ naturâ spiritali hominis , tanquam maximè laudabilem & conformem naturæ , quia virtutibus naturalibus consonet ,

vitiis penitus repugnet.

Rursus quoniam quò magis ciues sunt in pace, iusti, benefici, modesti, non ambitiosi, non raptores, non luxui dediti; in bello vero magis inedia & laborum patientes, & contemptores vitæ; utroque publica priuatis præferentes: eò Reipublicæ facilior est administratio, & commodior securitatis & abundantia procuration: Palam est, doctrinam Christianam ex eo quod Ethicæ conformis est, & eam eleuat ad altiora, commodissimam quoque & conformissimam esse Politicæ, seu Rerum publicarum administrationi.

Ad hæc, quoniam scientiæ sunt fundamenta Artium, utpote quæ causas tradant, & altissimas rationes eorum effectuum quorum regulæ artibus continentur; clarum est, doctrinam Christianam etiam Artium matrem & nutritiam esse. Cùm itaque Artes ad commodum vitæ humanæ, & eiusdem ornatum ordinentur; clarum est commoda omnia humanæ vitæ, ex doctrinâ Christianâ nata esse redundare: & ex na-

turâ rei longè commodiorem esse
 Christianorum , quàm infidelium
 vitam.

Neque minùs cùm vita corporalis
 ad beatitatem obtinendam facta sit ;
 & voluptates corporeæ sint confor-
 mes vitæ corporeæ; & proinde neces-
 se sit , illam vitam corpoream esse
 in suo genere optimam, quæ plurimas
 & maximas habeat ; vt alibi fufius de-
 duximus; & vitam corpoream opti-
 mam optimè beatitati acquirendæ
 inferuire : necesse etiam est, Christia-
 nam disciplinam (quæ Magistra est
 beatitudinis) & vitam nostram etiam
 corporis voluptatibus replere ; & pie
 viuentes centuplum earum habere
 præ malè viuentibus.

Ex quibus omnibus rursus confi-
 citur, quòd, quoniam doctrina Chri-
 stiana & vita secundùm illam acta ,
 ex omni parte est naturæ conformis
 & ab eâ confirmata & suffulta ; ne-
 cesse sit ex naturâ rei eam esse magis
 durabilem & constantem , quâlibet
 aliâ doctrinâ quomodocumque in-
 troducâ ; quales cùm falsæ sint , &
 falsitatis conuincibiles , cùm ex ne-

cessitate aliquâ in parte repugnant naturæ, & sibi metipsis contradicant, in semetipsis habent radicem interitus & ruinæ; & per consequens, non nisi vi & ignorantia sustineri possunt.

Accedit, Christianam fidem omnibus ijs modis esse confirmatam, quibus disciplina aliqua firma reddi potest. Introducta enim primò est per voluntariam acceptationem; ex persuasionem, partim miraculis, partim exemplis optimæ vitæ, & partim veritatis vi factâ: postmodum antiquitate, consuetudine, lege, moribus, præmijs & poenis non futuri tantum sæculi, sed & præsentis roborata. Et non extrinsecus tantum, sed in penitissimâ conscientia, ubi homo non videt, radicata & plantata.

Adiuuat Ministrorum sanctitas. Ex eo enim quòd tam ingentia Mysteria ijs commissa sunt, & non solum docenda, verum etiam tractanda; necessum est, vt (si paulò cordatiores sunt) in ipsis ingentem animi puritatem, & in populo ritè instructo, immensam de ijs æstimationem, & verus

sus eos credulitatē procreent. Quibus si addas, sacerdotalem functionem non esse nisi perpetuum sanctimonix exercitium, (si dignè ministretur) & assiduam in populum beneficentiam ; habebis tantam populi in eos reuerentiam, vt omni illorum dicto obedire sacrificium putent: modo ipsi vitâ suâ, dignitati Ordinis non detrahant, & eam eleuent.

Tota præterea mundi machina & series causarum naturalium, ad hoc tanquam vltimum finem aecommodata, vt hominem reddat idoneum & subiectum huic vitæ: immò & angelica ministeria & miraculorum ostenta per violationem Legum ordinariorum ad idem directâ; quantam vim habeant ad conseruationem Christianæ fidei in cordibus humanis, vix æstimari potest. Certè nulloatenus dubitari, quin eam longe stabiliorē & firmiter quâlibet aliâ doctrinâ faciant.

Sed cū constet mundum hunc visibilem rationalium causâ creaturarum; has verò ad beatitatem adæquatè creatas esse : Beatitudinis autem

210 INSTITVT. SACRARVM.
adipiscendæ (saltem publicitùs) in
propatulo sit non esse aliam viam re-
giam , præter Christianam doctri-
nam : manet euidens , extinctâ do-
ctrinâ Christianâ , non superesse cur
mundus conseruetur ; atque aded ex
proportionibus mediorum & finis
perfectè colligi , eam æquæuam esse
mundo ; & ipsum interiturum , cum
illius conseruationi deficient causæ.

LECTIO II.

De Inceptione & progressu sanctæ Ecclesiæ.

CVM verò ex dictis constans sit,
doctrinam Christianam fidem
audientium requirere ; & fidem su-
per autoritate loquentis stabiliri ; &
authoritas loquentis consistat in opi-
nionem quòd sciat, quæ nunciat, & no-
lit falsum dicere ; & dicenda sint eius-
modi, vt solus Deus debeat esse pri-
mus eorum author ; neque nuntij pos-
sint esse veraces nisi à Deo audierint ;
neque credi facile possit à Deo ho-

LIBER III. LECTIO II. 211

mines aliquid audiuisse, nisi signa supra naturam, & quæ credi debeant à Deo proficisci, ostendant; & talia signa dicamus miracula: palam est, primòs nuncios Christianæ fidei, auctoritatem per operationem miraculorum acquirere debuisse.

Quia autem miracula hæc non vno solo in loco, neque vni soli homini, neque vno solo tempore necessaria erant; sed in omnibus locis ad quæ dicti prædicatores mittendi erant; & omnibus primis prædicatoribus in totum orbem mittendis; & tandiu donec consuetudine & generali in singulis terris receptione iam doctrina Christiana inualuisset: palam est, hanc potestatem in Ecclesiæ principijs ordinariam debuisse esse & ordinarijs medijs collatam & conferibilem.

Vtteriùs, cùm externa in humanis actionibus ab interioribus nasci habeant; causa autem interior quæ prædicatores moueri debeant, sit charitas; & charitatis pars materialis sit amor; & amor motus quidam spirituum nobiliorum circa cor; & per

consequens , causa amoris multitudo
 talium spirituum; charitas autem non
 quilibet amor sit, sed sanctus : con-
 sequens est, virtutem hanc Thaumatur-
 gicam à Spiritu Sancto seu pleni-
 tudine charitatis , connaturalitèr
 suam radicem trahere ; & ex ipsius
 redundantia in corpus exoriri.

Oportuit itaque plenitudinem Spi-
 ritus Sancti aliquibus immediatè à
 Deo dari ; & ab ijs alijs communi-
 cari. Et quia homines inter sese agūt
 per signa visibilia; sed & Deus cum
 hominibus humano more : vtrum-
 que horum visibili aliquā cæremoniā
 gerendum erat. Et quoniam ni-
 hil amorem formalius repræsentare
 natum est, quàm spiritus , qui cum
 propter virtutis abundantiam est vè-
 hemens , sit cum sonitu, & replet &
 superimplet eos in quibus est ; & ex
 qualitate suā est facile accensibilis,
 quales sunt Spiritus vitales & specia-
 litèr spiritus amoris:

Idcirco, *Cum complerentur dies, de-
 stinati, factus est repente de cælo (vt à
 Deo profectum esse pateret) sonus
 tanquam aduenientis Spiritus vehem-*

mentis, & repleuit totam domum ubi erant sedentes (futuri prædicatores.) Et quoniam corda ipsorum erant calida; accensus est hic Spiritus, & ascendit sursum ut ignis; emicuitque supra verticem eorum: Et apparuerunt illis quasi dispersa lingue tanquam ignis. Et quoniam fons interiùs in corde erat, sedit super singulos eorum, & repleti sunt omnes Spiritu Sancto.

Et quia sic repleti erant, ut etiam vires suas in corpus exerceret, & ex abundantia cordis os loquitur; ceperunt linguis testari quod in corde solidatum erat; & ceperunt loqui magnalia Dei. Et hoc unusquisque prout Spiritus Sanctus daba te loqui illis; qui secundum naturalem conformitatem singulorum ad singulas nationes & terras (ex quarum habitudine nascitur linguarum diuersitas) singularum nationum linguas singulos docebat, & impellebat ad eius nationis linguam proferendam, cui erudienda singuli maximè idonei erant.

Hæ autem virtutes, quia non ad personæ bonum, sed ad vtilitatem Ecclesiæ donantur, gratia gratis data.

quasi purè gratiæ solent dici; numerò nouem, Angelicis & Ecclesiæ ordinibus correspondentes. Primæ sequidem Hierarchiæ appropriantur Sapientia, gubernationi Ecclesiæ necessaria; Scientia (quæ etiam aliquando Prophetia dicitur) & habet duas partes intelligentiam scilicet mysteriorum omnibus notorum eleuationem quàm sit in vulgo fidelium , & penetrationem aliorum vulgo incognitorum. Tandem Fides quæ tradita prout traduntur fidelitur capit & retinet.

Mediæ Hierarchiæ sanitatum gratia (in qua concluditur Dæmoniorum eiectio , & sublatio serpentium) quæ omnia subsistentiæ fidelium sunt necessaria; Operatio virtutum , id est , omnis alterius generis miraculorum , quæ tantum ex occasione requiruntur; & Prophetia specialitè dicta, cui correspondet reuelatio , & est donum quoddam prædicationis quo mira & mirè efficacia dicta inopinè à Deo infunduntur: res quæ multum commendat prædicatores, & per quam magnam gratiam ad

regendum populum nanciscuntur.

Infimę Hierarchiæ Discretio spirituum, id est, auditorum ab alijs, rectane sint necne : vt omnia probantes, quod bonum est teneant; Linguae deinde & linguarum Interpretatio; non enim omnes qui linguis loquebantur, eas poterant interpretari : & alij intelligebant quidem linguas, sed non poterant loqui ; vtrumque autem horum Archangelis & Angelis recte quadrant; sicut & discretio spirituum Principijs ; vtpote eligentibus ex quibus sit ad operationem procedendum.

Sed & ordinibus à Christo in Ecclesiâ institutis, quos ministeria vocat apostolus, aptè comparantur hæc dona. Apostolis, sapientia; Prophetis, scientia; Doctoribus, fides; deinde operationibus sanitatum & miraculorum, sua dona : susceptionibus & gubernationibus, specialis Prophetia & discretio spirituum; unde & spirituales videntur dicti. Tandem genera linguarum & interpretes, vltimi ordinum fuerunt. Qui & primi ex Ecclesiâ euauerunt, subla-

tâ per multiplicationem Ecclesiæ linguarum necessitate.

Quoniam autem omnium rerum naturalium, in sese principium natiuitatis habentium, commune est, vt quò longius à principio absunt, eo dilutior in ijs sit natura principij & minus de eâ habeant : consequens est, Ecclesiam his donis in principio redundantem, violentâ quasi charitate & ardore sanctimonix efferbuisset. Quò autem ab Apostolorum ætate longius dilabitur, eò minus & parcius hunc feruorem sentire : sed alienis & mundanis cogitationibus magis inquinari.

Quia tamen animal sic à teneritudine infantis & geniali calore discedit, vt vice ipsius fortitudo neruorum & robur ad actiones ipsius proprium succedat : sic etiam euenire natum est Ecclesiæ, vt etsi spoliata primo feruore, non propterea statim deficiat, sed aliud genus constantix acquirat. Quare cum fides infantix, scientia virilitati in potiori hominis parte correspondeat & comes sit; hic etiam progressus in Ecclesiam cadet, vt
feruori

feruori fidei succedat scientiæ immobilitas, quæ charitatem sustentet.

Et sic experimento ex historiâ haurimus, successisse primorum Prædicatorum & Martyrum zelo magnam Episcoporum & Doctorum fidem, explicantium & contra hæreses defendentium scientiam; donec infestantibus Ecclesiam maiori varietate & subtilitate Hæreticis, successit rhetorico decertandi stylo dialectici acuminis subtilitas; eousque cribata, ut iam schola ipso suo acumine labascet, dialecticâ incertitudine omnia æquante, & falsis verâ confundente, & pænè præferente.

Patet autem secundum naturæ cursum, succedere inquisitioni logicæ censuram & sententiam demonstratiuam. Et quoniam patet naturæ ita implantatam esse gratiam, ut sese consertis quasi annulis & membris connexis trahant; non est dubium quin pleraque fidei mysteria, demonstratiuè cognosci possint, atque adedò procedente in meridiem Ecclesiæ lumine, aliquando demonstranda sint. Qui status cum altissimus sit intellec-

tus nostri, erit quasi virilitatis Ecclesie, post iuuentutem, adolescentiam, & infantiam.

I Hic status, cum sit supremus naturæ humanæ, morū quoque meliorationē secum feret; & imperia faciet mitiora, & bella rariora inter Christianos; commoda vitæ maiora, & artes cultissimas. Cumque gubernatores bella forinseca securitati domesticæ necessaria compererint, turbulentam Reipublicæ sobolem in barbaras nationes exonerabunt. Quibus cum artium præsidio excellant, eas & armis facile superabunt, & imperiæ aequitate in officio continebunt, & ad fidem Christianam perducent: & sic Christus toto terræ globo regnabit.

Neque dubium quin hic status Ecclesie sit diutissime perseueraturus; ut in quo sit naturæ humanæ flos & vigor. Sed ipso mundo paulatim senescente, & homines secum ad temperamentum bilis atræ deuehente; succedet paulatim generatio crudelis, carnalis, obstinata, difficulter audiens rationem, sed vi desideria sua prosequens, & scientiæ artium

que contemptrix; & cum semel ratione utentem portionem numero & potentiâ superauerint, totum orbem facile ad nequitiam auertent, & impetu ad omnia mala perducent.

Tunc quantò dispositio ignea corrupta est violentior & deterior aqueâ, tantò etiam humana natura corruptior erit, quàm tempore diluuij, & acrioribus malis castigabitur: donec ille articulus venerit, quo visum erit Deo per vltimum ignem omnia destruere, & restaurare in illum statum, qui vltra motum sit: status enim motus totuserit præteritus, postquam natura humana ab extremis aquæ, ad extremû ignis, quasi per omnes naturæ gradus erit translatus, & Ecclesia omne genus boni & mali experta.

LECTIO III.

*De Fine mundi : & quod futura sit
Resurrectio corporum.*

Appropinquante igitur mundi fine, quoniam reprobi magnâ
T ij

pertinaciâ propter humoris naturam in quâ fundata est eorum nequitia; fideles verò magnâ constantiâ, propter securitatem scientiæ, quâ freti propugnant veritatem, sibi inuicem aduersabuntur; necessum est vincentibus temporaliter reprobis, excitari contra Ecclesiam persecutionem, qualis numquam ante illa tempora capax fuit humana natura.

Et quoniam reprobis non deerit artium peritia, & per consequens poterunt multa ignorantibus miracula patrare; non deerunt principibus Magi, qui per efficacissimas præstigia populum pellecturi sint ad sequendos tales principes; adeò vt absque magnâ Dei providentiâ & oppositione verorum miraculorum, tota plebs fidelium, atque adeò ipsi electi seducerentur, partim terrore Principum & persecutione, partim ambiguitate veritatis inter vera & falsa miracula vacillantibus.

Rursus quia dispositio quæ hos mores inducit, est bilis atræ, quæ facit superbos, ambitiosos, & immiseriordes; ex quibus rursus sequitur desi-

derium dominandi alijs, & non par-
cendi humano sanguini; clarum est
futura bella & frequentiora & ma-
iora, & maioribus odijs & crudeli-
tate, quàm vllâ priùs ætate. Totus
itaque orbis personabit bellis & fa-
mâ bellorum; genus autem huma-
num rarefcet, & paulatim ad extin-
ctionem præparabitur.

Deinde cum ex ardenti calore so-
lis super terram generentur vapores
in cauernis terræ; circa illa tempora
neceffe est huiusmodi vapores pluri-
mum multiplicari; &, quod fequi-
tur, tellurem immanibus concuffio-
nibus vexari; & cum fimiles
concuffiones acciderint infra ma-
re (præfertim fi vapor eruperit)
fieri ingentes motus, & sonitus ma-
ris ad littora cum horrendis minis
euoluti, & modò ea superantis, modò
solo terrore homines enecantis.

Partim quoque ex vaporibus è ca-
uis telluris erumpentibus, partim
ex ipsâ intemperie aëris ex nimio ca-
lore redundante fumis & vaporibus
noxijs, pestem hominibus & anima-
libus incidere; & partim ex defectu

culturæ, partim ex sterilitate terræ, partim ex intemperie stationum anni, fruges malignè humano generi suppeditari. Vnde tertium Dei flagellum, famis videlicet illis infligitur.

Sicut autem infra tellurem, sic etiam necesse est supra aërem (eoque regionis mediæ locum appellant) meteora calida multiplicari. Vnde frequentia necesse est esse fulgura & tonutrua ; specialitèr vero stellas, quas vocant cadentes, ex crasso humore eleuato natas, copiosissimas esse & decidere, quasi grossos è ficu vento iactatâ. Sed neque deesse possunt Cometæ & aliæ terrificæ faces, quæ humanas mentes solent perturbare.

Et quoniam Meteora quæ apparent circa solem & lunam, ex illis positis vaporibus solent conflare, non poterunt non esse huiusmodi apparitiones frequentissimæ, omnesque fermè terribiles vt illæ quæ precedunt terræmotus, & quæ præcedunt horrendos illos ventos, de quibus ex torridâ sunt frequentes historia; &

tandem aliæ insolitæ & grauiôres
quæ ex intemperie illâ (inuisâ prius)
ex necessitate sunt orituræ.

Congestâ tandem & oneratâ ni-
mium regione mediâ vaporibus cras-
sis & pinguibus , quales per vehe-
mentem calorem exudantur à com-
posito ; propiùs semper terras acce-
det ipsius spacium & potestas ; neque
poterit natura sese exonerare , neque
vento dispellere lentas illas caligi-
nes : quod videtur exprimere Sacer
textus ijs vocibus , quod potestates
quæ sunt in cælis fluctuabunt , vel
quod *virtutes calorum mouebuntur* ;
id est, remouebuntur vel vacillabunt ;
neque idoneæ erunt ea paragere quæ
solebant. Scilicet si cælorum nomi-
ne aëris regiones significantur , sin
verò æther ; tum sensus erit , cursus
lunæ & solis & planetarum & stel-
larum incertos futuros ; & à tenore
consueto defecturos : vel ex eo quòd
vento magni maris partim cessante
partim perturbato , Terra motum
suum etiam fluctuantem & instabi-
lem habebit : Vnde fiet , vt sidera ap-
pareant nobis concuti & vacillare.

Vel certè significat reliquum Mundi; eodem tempore quo nostrum terrarum orbem similia symptomata passurum, & finem simul accepturum. Vnde apparebunt nobis per incertos Astrorum discursus, futura vniuersalis ruinae certa omina & monstra.

Consequenter patet quòd *Sol obscurabitur*, seu sanguineo colore trans tot vapores apparebit: neque *Luna nostra illuminabitur*, sed nigra apparebit quasi faccus cilicinus; cùm debiliorem sole lucem & actionem habeat: & per consequens si solis lumen non aliter possit hanc massam vaporum quàm sanguineo rubore tinctum ei aculans lumen penetrare; luna magis fusco, & per consequens nigro aspectu demonstrabitur.

Atqui hæc cum semper augeantur, necesse est tandem in flammam erumpere, & ex ipsâ extremi caloris vi purgari aërem. Tum primò *Elementa calore soluentur*, id est, vaporosus aër & aqua, quæ circa terram sunt, in purissimum aërem resoluentur. Et quoniam necesse est horum principia circa zonam torridâ existere, co-

getur aër crassior circumstans magnâ rarefactione aëris & fugâ ab igne non sine ingenti sonitu & impetu, ad polos sese recipere.

Hoc est autem *calos transire magno impetu* (vt docet Petrus) & cum sonitu, vt sonat Græca phrasis. Et ex eo sequitur quòd hiante & claro medio calo, condensabitur aër vtrimque versus polos tantùm, vt etiam conspici possit stans quasi vndæ maris rubri vel Iordanis: & hoc est *calum recedere velut librum innolutum*, id est, quasi in cylindricam speciem, talis enim erat libri inuoluti species apud antiquos; qualis si manus chartæ reuoluatur in sese spiralitèr.

Cum vero natura ignis sit, ita materiei suæ inuiscari, vt paulatim euolet, & semper minus & minus restet in escâ; necesse est superante tandè escâ quæ grauis est, & effugiente igne putiore, reliquum cùm ardentissimus & impurissimus sit, futurum in terram magno impetu decidere, & illic commixtum cum igne alio qui ex subterraneis cauernis sese exerit, totam telluris superficiem in cineres conuertere, & consumere.

Et quia semper ignes & vapores combustibiliaque corpora non detunt, quovsq; trans regionem metalliferam terræ peruentum sit; palam est, quicquid vsibus humanis seruiit, in cineres conuertendum. Quod est exuri opera hominum. An autem etiam ulteriùs ad telluris centrum penetraturus, sit ignis inuentâ semper nouâ escâ, neque scriptum reperio: neque suppetunt ex ignotâ telluris substantiâ quid cum ratione suspicari liceat.

Sic itaque concidet hæc tam pulchra mundi machina, generationum seriei dedicata. Sed quia Animæ rationales in corpore genitæ, & ex corporibus natæ, & ad eas aliquando substantialitèr vnitæ, non possunt non esse aliquatenus imperfectæ, dū corpore viduæ sunt, necesse est non sic remanere totâ substantiam telluris quæ fuit materia corporū ipsorum, sed vel adæquatè, vel ex parte restitui & reduniri animabus quæ ab ipsâ resolutæ sunt.

Accedit quod cū modus sciendi omnium substantiarum cognosciti-

narum, sit ex cognitione sui ferri ad cognitionem cæterarum substantiarum; & humanæ animæ acceperunt scientiam per reflectionem super totum hominem, qui erat suppositum illarum cum acquirerent scientiam; consequens est scientiam illarum esse imperfectam, donec rursus fundetur in eodem supposito.

Consequens est & appetitum naturalem animæ humanæ, qui est fundamentum omnium electionum ipsius, ferri ad bonum suppositi seu hominis cuius erat; & per consequens, habere corpus perfectum, pertinere ad ipsam quasi partem beatitudinis ipsius; neque perfectè esse beatos, qui adhuc consortio corporis non fruuntur. Palam est itaque de perfectione mundi esse, ut fiat animabus corporum suorum restitutio.

Quid, quòd anima abstracta ex vi scientiæ vniuersalis acquisitæ, habet esse principium actiuum; & tamen non potest agere nisi mediante suo corpore in quodlibet aliud. Non itaque est perfectum ens in rerum naturâ, sine suo corpore. Quod inde

aggrauatur, quòd tota vita secundùm rationem consistat in continuâ quâdam praxi subiectionis corporis ad animam ; poscit itaque natura vt quò anima est perfectior in hâc virtute, eò magis habeat corpus quòd sibi subijciatur. Mutandus itaque est mundus non abiiciendus.

LECTIO IV.

De substantia Resurrectionis.

CUm itaque mens humana non sit ex semetipsâ in semetipsam actiua, propter simplicitatem suam ; neque in corpus alienum sine proprio ; palàm fit, resurrectionem non posse ab ipsis animabus perfici effectiuè ; maximè quoad motum, & dispositiones prærequisitas in corporibus transmutandis, ante vnitatem materiei cum ipsis animabus : Superest itaque sicut in origine Mundi, sic in reparatione, formationem corporum angelico ministerio esse perpetrandam.

Cùmque ex naturæ ordine & pro-

portione, singulis hominibus singulos constet esse coordinatos Angelos; nullatenus dubitari potest quin singulorum operæ singulis corporibus effingendis sint applicandæ. Et quoniam particularium proprietates prærequirunt vniuersales quasdam dispositiones, præsertim in generali hâc instauratione; rerum vniuersalium verò ordinatio pertineat ad Archangelos; palam est etiam Archangelorum ministeria ad præparationem in vniuersum esse adhibendam.

Quare, cùm ignis in materiam humidam & crassam incidens, tonitrua & ingentes sonitus excitet; sed & vehemens ignis non sine concitatissimo aëris motu seu vento, neque ille sine sonitu contingat; non potest cogitari Archangelos conflagrationem telluris, per quam sit vniuersalis adaptatio materiei ad particularia singulorum ministeria, perficere posse, absque ingenti sonitu, qui à polo ad polum vsque, non tam audiatur, quàm extendatur; cùm humidissima telluris ad polos sint concremanda.

Habetur itaque Archangelica tuba

resurrectionem principians. Cogitare enim tubam æneam vel ex aliâ materiâ, & buccas Archangeli inflantes, est mysteria augustissima detrudere ad sordes; maximè cum neque mortuis, neque Angelis suscitandis significatione aliquâ opus sit; his non colligentibus scientiam ex objectis; illis verò nondum aures habentibus quibus audiant. Sed motus ad miscendum aërem cum cæteris elementis, & quasi spiritum mortuis reddendum, necessarius est. Vt ex visione simili Ezechielis patere potest.

Ab singulis verò, quorum artificio nihil deesse potest, non potest expectari nisi summa perfectio elaboratorum corporum in suo cuiusque gradu. Gradus autem est singularitas, & singularitas à dispositionibus primæ conceptionis limitatur. Qui itaque status corporis perfectissimus ex illis dispositionibus consequi potest, ille ab Angelo processurus est, utpotè ipsi Angelo maximè conformis, æquè atque ipsi animæ insinuandæ, quæ est talis corporis finis.

Vnde patet si qui sunt defectus ex ipsis seminariis rationibus corpori inextituri in hac vitâ, id est, in optimo statu huius vitæ; huiusmodi imperfectiones etiam in futurâ vitâ non defecturas; vt quæ, licet respectu nature communis sint defectus, tamen respectu huius singularis, sint proprietates; neque monstrositates, sed veritates sint reputandæ. Si qui vero defectus post conceptionem ex accidenti inuaserant indiuiduum, illos non secum in æternitatem reseruabit.

Petes: si quis ex seminariis rationibus haberet defectum, qui impediret peruentionem ad vsum rationis, siue defectu ætatis, siue fatuitatis vel amentix; an etiam eundem defectum retineret? Responderetur positâ suppositione hoc secuturum; neque officere necessariæ perfectioni animæ; cui sufficit, vt impressio talis fiat in corpore, qualis in primâ conceptione nata est fieri; quæque in animâ faciet talem, qualis anima capax est secundum statum animæ.

Positis dispositionibus requisitis ad

animam, ex vi communis influentiæ
 esse à Deo, sequi vnitatem, atque
 adeo totum hominem, sine vltiori
 actione constat; eodem modo quo in
 generatione naturali sequitur sub-
 stantia alterationem, & in diuisione
 pluralitas sequitur mutationem figu-
 ræ. Et resurgit propter identitatem
 animæ (respectu cuius signatur &
 idem est corpus) idem prorsus & ani-
 mal & homo, licet immutatus, &
 alio cum modo.

Cùm enim anima in sese præexti-
 terit, & habuerit esse, per commu-
 nicationem sui esse ad corpus, non
 perdit quod esse sit primò etiam in
 viâ executionis ipsius animæ; neque
 subit necessitatem habendi corpus, vt
 habeat esse sicut in primâ generatio-
 ne. Sed talitèr existit quoad substan-
 tiam & intrinsecum modum existen-
 di, quomodo de Christo Domino
 suprâ explicatum est; exceptis, quæ
 ex ratione personalitatis & existen-
 tiæ diuinæ, necessum est esse in ipso
 specialia.

Dices, quòd cùm anima per sepa-
tionem habeat operationem suam
 indepen-

Independentem à corpore, etiam post restitutionem impossibile est vt prima operatio sit communis corpori. Cùm itaque ratio animalis specificetur à primâ operatione, Homo resurgens non poterit esse essentialitèr animal. Adde quòd cùm nulla sit ei necessitas corporis ad existendum, (quæ tamen est adæquata ratio cur materia requiritur ad formam) neque essentialitèr erit corpus, sed dumtaxat accidentalitèr; quasi si corporis ratio adueniat spiritui iam constituto.

Respondetur, quod cùm prima operatio hominis post resurrectionem sit cognoscere & diligere semetipsum; & de ratione sui met non solum in homine, sed etiam in animâ separatâ sit corpus; palàm est primam operationem obiectiuè pendere à corpore; & per consequens, hominem esse essentialitèr animal. Vnde patet quoque, cur resurrectio fuerit necessaria Christo; non dumtaxat propter nos; sed etiam propter semetipsum; videlicet vt amor sui foret perfectus; qui erat prima operatio ipsius.

Cùm autem animal sit ens naturale & metaphysicum, homo qui in hoc mundo, id est, durante motuum successionem, est ens naturale, id est, ab alio mobile seu applicabile, vt pars mundi; post resurrectionem cessante motu, perdit hanc rationem accidentem sibi ex statu successionis, & manet ens seu animal metaphysicum; id est, ens de cuius ratione sit habere tales partes, non autem iam mobile ab alio, sed tantùm à seipso, tanquam iam perfectum & ad perfectionem perductum, & finis mundi præteriti.

Ex quo patet quomodò materia sit necessaria animæ rationali. Durante siquidem successionem, necessaria erat ad accipiendum esse, & bene esse, quoniam separata anima non amplius perficitur. Positâ autem perfectione, non potest esse necessaria nisi ad integrè esse. Cùm enim prima operatio imperfecta sit sine corpore, ipsa substantia imperfecta quoque est; & esse animæ excedens subiectum, nisi corpus sit; & proinde corpus necessarium ad hanc existentiam

habendam. Si autem corpus aduenit tempore enti actu, non propterea ordine causalitatis posterius est; sed in genere causæ materialis præcedit, sicut in primâ productione hominis.

Ex hâc eminentiâ animæ supra corpus, fit animam quoad cognitionem non præueniri à corpore; tum quia opus non habet; utpote plena omni cognitione; tum quia hoc non fit sine motu corporum exteriorum mouentium internas partes corporis humani; qui cum dependeat à motu solis, cum illo cessaturus est. Cùm itaque iam corpus ad animæ impassibilis naturam sit perductum, ab extrinseco non erit natum pati. Sed si pateretur, anima non foret immunis, propter identitatem quam cum eo habet.

Non tamen eadem lex est de passione ab intrinseco, hoc est, quæ exordium habeat ab ipsâ animâ: quæ si non posset esse, iam corpus non foret subditum animæ, neque per illud anima posset agere; cum corpus non moueat nisi quatenus prius mouetur

& patitur: & sic post resurrectionem Christi Domini, non meminit Sacra historia alicuius sensationis, vt quod aliquid visu, auditu, tactuue cognouerit; sed plurium actionum ab animâ procedentium; vtpote quod sit locutus, insufflauerit, ambulauerit, visus, contrectatusque sit, comederit, &c.

Rursus, consideranti eminentiam naturæ spiritalis supra corpoream, & perfectionem scientiæ & affectus quæ ex necessitate in animâ coniungendâ reperitur; & quod non sit necessarium corpus nisi ad integritatem; patescit corpus omnimodis animæ subiectum esse; adeò vt quicquid per corpus natum est fieri, ex voluntate huius animæ secuturum sit; & per consequens anima quantitatem, raritatem, & figuram possit pro libito immutare, vltra resistantiam naturæ, sed non sine limite, vel vltra potentiam fortioris etiam hominis.

Cùm enim homo ex naturâ suâ sit finis & dominus naturæ; palam est perfectionem ipsius debere esse vltra vim naturæ, quatenus ea personam

ipſius contingit ; & per conſequens, non poſſe naturam actiones ipſius circa ſeſe impedire, poſtquam ad terminum peruenerit. Sed quoniam in ipſo termino gradus ſunt, & vnus alio potentior; palam eſt etiam actionem vnius eſſe validiorem actione alterius, & inferiorem non ſuis viribus, ſed ordine futuri mundi tutum à violentiâ eſſe.

Conſequens eſt, reſurgentes poſſe lucere ſi velint, rarefactis in ignem ſpiritibus, & ex aëre circumſtante nutritis & reſectis, vt iugis ſplendor emittatur. Sed cum neque oculi ſint qui talem ſplendorem videant, ex eo quod reſurgentes non patiantur ſecundùm ſenſus; neque ad integritatem naturæ pertineat; neque congruus ſit ſtatui futuro (cùm ex perpetuâ motione & emiſſione partium conſiſtat) non eſt credendus inexiſtere reſurgentibus.

Non minus euidentis eſt poſſe eos per modum cryſtalli admittere lumen & nullam vmbra facere; & per conſequens eſſe inuiſibiles: poſſe ſi velint vmbra facere, ſed lumen.

non reflectere, pereunte lumine infra
cavitates; quomodo perceptibiles
erunt sed non visibiles: posse quoque
qualibet figurâ lumen remittere,
quod est in alienâ figurâ spectari: pos-
se denique subitò apparere & dispa-
rere. Quoniam hæc omnia ex muta-
tione raritatis & figuræ euidenti-
mè consequuntur.

Neque magis difficile est ijs rare-
facto aliquo spiritu vel parte corpo-
ris, illud aëre vel igne leuius efficere,
vel æqualis grauitatis; & per conse-
quens ascendere, descendere, pro-
gressiue moueri, celerrimè item per
modum luminis vel olei infundere
sefe per porosa corpora sine eorum
vel sui læsione: non tamen per ima-
ginariam & aporosam firmitatem
sphærarum Peripateticarum, quæ
cum Theologiâ non bene componi-
tur: & hæc omnia sine penetratione
seu potius confusione partium quan-
titatis, quam comminiscuntur mo-
dèrni.

Magis ergo claret esse immortales;
cùm nihil illis adhærere citra ipso-
rum voluntatem, & per eandem

quidlibet adhærens reijci possit; nihil item eos diuidere valeat, sine quibus nulla est ad corruptionem via. Paret itaque omnes proprietates quæ in Christi corpore experimento compertæ sunt post resurrectionem, quasque dotes appellare consueverunt Theologi, fundari in his duobus, quòd corpus resurgentis necessarium sit tantummodo ad integritatem animalis, & sit adæquatè subditum regiminì animæ.

Neque necessum est inculcari identitatem corporis resurgentis. Cùm enim materia ex sese neque partes neque indiuidualitatem habeat, vt quæ ex sese non sit ens, sed entis potestas; materie esse hanc, est esse sub hâc formâ. Vnde vbi constans est forma, corpus semper idem est, sub quibuslibet quantitatibus & qualitatibus, sicut in animalibus perfectis censerì & dici videmus, non obstantibus mutationibus naturalibus & violentis. Cùm itaque anima rationalis eadem sit ante & post resurrectionem, etiam corpus idem erit.

Vnde superuacue texuntur dispu-

rationes de partibus seminarijs substantialibus, nutrimentitijs, excrementitijs, &c: quomodo inueniendæ sunt partes, quas homo in vitâ habuit? quomodo distribuendæ inter eos qui easdem partes habuerint? quæ omnes supponunt partes actu & entitates indiuiduales plurium materiei partium ex sese. Vnde non mirum si ex falsâ suppositione implicentur tenentes. Sed Auicennæ difficilius condonandum, qui cùm alioqui sententiam Aristotelis tueatur, similia Christianis improbissimè obijcit.

LECTIO V.

De Modo Resurrectionis.

VLterius cùm Christum ex summitate montis Oliueti ascendisse in cælum, id est, eousque vt nubes inter ipsum & spectantium oculos interuenirent, legamus; neque ampliùs de ascensu ipsius constet. (Quod enim suprâ omnes cælus vsque in spatium imaginarium transuerit,

uerit, repugnat demonstrationi philosophicæ; sicut & concameratio cælorum pagana. Transgressio autem Angelorum, & sessio in solio Dei clarè sunt metaphoricè pronunciata de eminentiâ virtutis & dignitatis, & non translatione locali.) Sed & corpori glorioso quoad sese nullus locus sit incongruus, cùm nihil ei nocere possit: neque indecorus, cùm indecentia ab humanis pendeat moribus: ac perinde Christus ibi manserit vbi gubernationi mundi magis conueniebat: nostrum autem telluris globum, principalem esse Vniuersi portionem, ipsa Christi apud nos incarnatio demonstret: sit Christum illic constituisse, vnde in iudicio appariturus erat; cùm ad cætera inutilis foret loci determinatio.

Cumque Christi mandato vltimus exarsurus sit ignis, Archangelica opera à Christi ipsius præsentia exordium sumet. Quare ab illo primum loco fugabitur fumidus aër, & in cylindricam formam consistentiæ inuoluetur. Et quoniam forma ignis est pyramidalis; latior erit vacuitas cir-

ca ipsum Christum, maximè ante faciem ipsius, & longior : ad dexteram & sinistram moderatior : pone breuissima. & per consequens, circa Christum purus aër in crucis figuram deformabitur; cuius antrorsum sit truncus, brachia versus polos, retro capitellum.

Cùm verò lux candidissima circumdet Christum, & reflectatur à corpore ipsius: erit species ipsius tanquam lucidissimæ stellæ in humana figura. Et propter atros ignes vstularum nubiũ & meteororum vndique circumstantes, apparebit vt vlttricibus flammis armatus ad excidium orbis terrarum properare. Quod incendium, consequenter primò in terrâ sancta & regionibus ad Occidentem sitis, id est, ante faciem Christi incipiet.

Si itaque radij Solis radentes horizontem vtrimque reflectantur ad nos à vaporibus crepusculinis, spectabilis quoque erit Christus in eadem altitudine per totam terræ latitudinẽ, seu ab Austro in Septentrionem. Neque obstat corporis exiguitas, lucida

enim quò lucidiora eò majora apparent. Et testatur non ignobilis Mathematicus ad septimum Angliæ milliarium, reflexionis dispositorum speculorum vi, lectam esse inscriptionem solidi Anglicani. Vnde fit Christum etiam augustiori specie spectandam fore.

Fiet itaque succedente in locum subsolani in pacifico mari dominantis Archangelicâ tubâ, quam diximus vehementem ventum esse; & tantum qui aptus sit resurgentium exercitus in vicem molis terrenæ circa centrum collocatos, eâdem velocitate quæ telluri prius competeat, conuertere, omnes resurgentes octodecim præter propter horarum spacio Christo Domino præsentari, Angelicâ curâ eos sic disponente, vt singulorum facies ad Christi faciem sine medio opaco sint conuersæ.

Vnde patet quòd cùm corpus humanum aquâ marinâ paulo grauius sit (cum in eâ demergatur;) quòd si tota telluris & aquæ massa in corpora humana conuertatur; massa hominum occupatura sit locum longè vni-

merso telluris corpore amplio-
rum propter varietatis gradum, tum
propter collocationem idoneam vt
à singulis se mutuo non impedi-
bus valeat spectari Christus; ad quod
necessum est plurimas vacuitates aëre
solo refertas ijs misceri.

Cùm autem (quantum est ex par-
te operationis diuinæ) homo secun-
dum primum actum ordinetur ad
Deum, vt ab vltimo fine incipiat
eius operatio; sicut in creatione Ada-
mi factum est, & sicut in initio vsus
rationis; necessum est primum actum
circa vltimum finem exerceri; etiam
in resurrectione, vltima dispositio ad
animam, adæquatè consummatur
cum illo motu, quo lumen à Christi
corpore reflexum notitiam causat ta-
lem; & vnusquisque resurgens in eo-
dem instanti sit primò viuens & vi-
dens Christum.

Ex eo autem quòd visio corporalis
Christi quoad materialem ipsius par-
tem, sit dispositio ad vnionem animæ
cum corpore; sit animæ in hâc vnio-
ne illum indi habitum, qui ex hâc vi-
sione & præcedenti dispositione con-

furgit: & per consequens sanctis seu ijs quibus Deus vltimi finis rationem habebat, in immensum ex hâc visione affectum crescere. Eos contrâ quibus vltimus finis in alio collocatus fuerat, extremâ mæstitiâ & pœnâ ex hâc ipsâ visione affici & consternari.

Et ut ab igne grauium & leuium separatio secundùm locum contingit, sic ex hoc Christi lumine, sanctorum & reproborum localem separationem fieri consequens est; sanctis, ex affectus vehementia ad Christum in aëra raptis: reprobis tanquam ab adueniente & circumeunte terram Christo fugientibus, & ad centrum versus compressis. Sanctis à dextera, id est, dignitate, actiuitate, & principio motus; reprobis in neglectu, passibilitate, & sequelâ quasi sinistrâ collocatis.

Quoniam autem excidium Mundi per fatalem ignem, Mundum quidem deterioratum, sed non destructum supponat: Neque enim aër vapores adeo grossos sustinere potest, quàm ex terra eleuari possunt; & si

posset; ipsi occurſu & contiguitatē ſeſe mutuo inflammare, & aërem præcipitatione ſua purgare nati ſunt. Adde quod cū mores humani facilius corrumpantur, quā natura; prius dignus erit perire mūdus, quā pereat, & ſit ex natura inhabitabilis; ſit ultimum incendium aliquos homines viuos inuenturum.

Cū itaque Deus & natura (cū in apprehenſionem humanam non operantur) breuiſſimā & faciliſſimā viā ad effectum ferantur; facere autem ex viuis quales poſt reſurrectionem futuri ſunt, facilius ſit quā ex cineribus; palam eſt non morituros qui tunc viuunt; ſed per gubernationem Angelicam mediante igne expurgatum iri aggrauantem partem corporis, & perfectè ſubjectum iri animæ. Ex quo ſequatur exiſtentiam euadere primò animæ, & conſequenter corporis, id eſt, illum ſtatum quem reſurgentes habent.

Ex hoc ſit, cognitionem eorum eſſe eleuatam quantū cognitionem animarum ſeparatarum. Et quoniam hoc ijs accidet cū per motum tel-

luris offeruntur Christo ; visionem Christi in his sicut in cæteris futurum principium cognitionis alterius vitæ. Quare par erit ratio viuentium & resurgentium ; & pariter boni ad Christum rapiuntur in aëra , pariter mali relinquentur , & suâ auersione ad centrum comprimuntur ; etsi diuersimodè ad hæc disponantur pro subiectorum varietate.

Quoniam autè hæc mutatio cognitionis, & exaltat præmia , & aggrauat pœnas pro qualitate meritorum ; & est principium æterni & finalis singulorum status ; oritur quoque ex visione Christi : euidentem est Christum & tribuere præmia, & infligere pœnas, & discernere merita, & assignare loca æternæ mansionis, & uiuis & defunctis. Quæ cum sint illa quæ Iudices in hoc mundo per cognitionem & pronuntiationem sententiæ faciunt ; patet Christum (sine ijs quæ materialitèr sese habent) esse Iudicem uiuorum & mortuorum.

Beata autem Virgo & cæteri sanctorum, qui corpora sua receperunt ante mundi exitium ; cum huiusmodi iudicium in receptione corporis ac-

ceperint, non in hoc sensu in extremo iudicio iudicabuntur. Sed illis iudicari, erit recipere sedes & ordinem inter Beatos; siue per translationem localem (si opus sit,) siue dumtaxat per denominationem ab accessu aliorum ad ipsos; & rursus per manifestationem iudicij ipsorum; & viuus quoad substantiam, & resurgentibus quoad modum. Omnibus enim necesse est iustitiam Dei esse manifestam.

Similiter Angeli tam boni quam mali iudicandi erunt, per manifestationem iudicij ipsorum & proportionis præmiorum ad merita. Et præterea per hoc quod requiem accepturi sunt ab operibus suis; sicut pronuntiatur de Deo post creationem Mundi. Quod respectu malorum est incarcerationi in inferno, seu in lacum iræ Dei proiici: respectu verò bonorum, cælo quasi restitui; secundum modum cogitationum nostrarum, & phrasim sacrae Scripturae sese ad eas accommodantis.

Pari locutione accipimus creaturam, id est, mundum liberandum

esse à seruitute corruptionis : & eam
 abhuc ingemiscere & parturire & ex-
 pectare adoptionem filiorum. Quod
 non est aliud , quàm successionem
 mutationum & generationum trans-
 mutandam esse in constantem habi-
 tum & qualitatem; non amplius exi-
 stente aliquâ causâ motus ; cùm filij
 hæreditatem acceperint , id est, ea ad
 quæ nati sunt, propter quos videlicet
 mutationes institutæ sunt. Sed & cum
 formarum quæ materie natae sunt in-
 esse, nobilissimæ sint animæ rationa-
 les, quibus post resurrectionem quasi
 totaliter suberit materia ; etiam ipsa
 quodammodo parturit cùm ad hoc
 peruenerit : & interea dum ad hoc la-
 boratur , ingemiscit & quasi par-
 turit.

Rursus quia reprobi tum Angeli
 tum homines , in bonis & Angelis &
 hominibus , etiam infantibus recens
 baptizatis, videbunt iniquitates & de-
 merita sua , & quàm facile & iucun-
 dum fuerat recte viuere : ab omnibus
 obiectiuè redarguuntur paria factis
 accepisse ; & per consequens omnes
 Sancti , specialiter verò Apostoli &

propiores Christo, dicuntur reprobos iudicare. Sed in sensu minùs proprio quam Christus ; & ij qui à reprobis spectantur in comitatu Christi ; qui alio speciali modo sunt iudices. Porro cùm in singulorum conscientijs, & per memoriam præteritorum, & per habitum animæ relictum ex toto decursu vitæ, scriptæ sint omnes actiones totius ipsorum vitæ ; patet eas esse libros, qui in iudicio proferruntur, quæ, quatenus cuncta cunctorum cunctis arcana patefcunt, dicuntur aperiri. Quatenus autem hæc scriptura est malarum actionum, eatenus à Diabolo; quatenus autem bonarum, ab Angelis. Et proinde quasi in scriptis Diaboli accusare, Angeli defendere dicuntur.

Liber verò vitæ, Dei prouidentia seu prædestinatio est, & proinde dicitur esse in cœlis. Vnde pertinet ad iudicium quasi cognitio Dei vel Christi Domini ; & significat indefectibilitatem in iudicando. Propterea enim scripto cogitata signamus, vt non elabantur è memoriâ ; & vt sint accuratiora. Liber verò mortis nul-

LIBER III. LECTIO VI. 251

lus commemoratur; quia scribimus
quæ curamus. Reproborum autem
status, præsertim respectu prædesti-
nationis, est neglectus & contemp-
tus.

LECTIO VI.

*De Visione beatificâ quoad sub-
stantiam ipsius.*

PROtinus ex dictis expeditum est,
eos qui vivi reseruati sunt ad iudi-
cium, vi iudicij accepturos plena-
riam omnium rerum cognitionem;
quanta ex statu separationis compe-
tit animabus; & præterea additamen-
tum illud quod resurgentibus com-
petit ex coniunctione animæ ad cor-
pus. Et, quod sequitur, fieri per-
fectissimam creaturam, quæ ex tali
materiâ qualis ipsi sunt in articulo
transmutationis, nata est fieri.

Nihilominus cum Deus sit vnica
formalitas, quæ adeò eleuata est su-
pra omnium & existentium & possi-
bilium rationes, vt sit ipso genere su-

perior, & nullam rationem communem habeat: palam est non posse intellectum ex vi intellectiois omnium possibilium, nedum existentium, per consequentiam & quasi virtuali discursu erigi ad cognoscendam talem formalitatem, quæ est (vt ita loquamur) quasi definitio Dei; atque proinde non posse intuitiue Deum videre.

Rursus euidens est, eos qui sanctè vixerunt, id est, exercuerunt sese ad habendum Deum pro vltimo fine & solo bono; acceptâ hâc plenitudine scientiæ, ex eo quòd magis fortiter & euidenter cognoscant hanc veritatem, infinitè crescere in affectu videntis Deum. Et cum voluntas sit reflexio existentiae supra essentiam, quæ exercetur & applicatur virtus entitatis ad effectum desideratum; non esse aliud talem sanctum, quàm hominem secundum totam virtutem seu entitatem, exercitum respectu visionis Dei.

Cum itaque sicut cognoscere se, est, esse sese esse; sic cognoscere Deum, sit esse Deum; id est, *to esse esse*; vir-

tus autem entis ad esse, non sit nisi potentialitas, maximè respectu esse subsistētis, quod est & essentia & esse: conficitur talem Sanctum per omne quod in illo est, non esse aliud quàm actualem & exercitam potentialitatem essendi Deum.

Cùm itaque ex parte Dei, ex eo quòd sit ipsum esse (vel specialius loquendo, sit ipsum actu intelligi, seu esse actu intellectum, quod est esse suum intelligere passiuè, ita vt intelligi non sit in ipso denominatio, sed realis qualitas (ipsa scilicet quæ constituit Patrem,) & hæc qualitas seu proprietas sit subsistens, & per consequens nulli potentiæ propria, sed cuilibet accommodata;) non possit quicquam deesse quod pertinet ad rationem actus & actualitatis; conclusum est sanctos & Deum esse vnum ex potentiâ & actu; id est, sanctos clarè videre Deum.

Petes, an mensura visionis sit præcisè secundum gradum charitatis, an etiam secundum cooperationem intellectus humani; sic vt melior intellectus cum æquali charitate habitu-

tus sit plus visionis , quàm inferior cum eodem gradu charitatis ? Respondetur, quòd cum charitas sit materialiter actus intellectus ; maior charitas non potest intelligi quasi abstractiuè , sed consistit in toto , id est , in intellectu cum dispositione adiunctâ. Quare hæc petitio supponit charitatem esse ens distinctum ab intellectu ; & sublato illo fundamento , nulla est.

Dices, quòd cùm quicquid vnitur Deo, non possit vniri secundum naturam, erit secundum personam : & hæc vnitas beatorum erit Hypostatica. Præterea cùm sit realis & accidentalis, vel faciet hominem accidens Dei, vel Deum accidens hominis. Hoc videtur absurdissimum : prius verò non consistit cum naturâ visionis, quæ est in vidente. Tandem accidentia rerum sunt determinationes earum ; sed impossibile est ipsum esse seu Deum esse determinationem particularis & humani esse. Non itaque Deus hoc modo videtur.

✠ Respondetur, objectionem rectè procedere de vnione substantiali in

quâ altera pars est imperfectè ens; sicut accidit in illâ in quâ Deus fit homo: hæc autem unio est accidentalis, quâ homo manēs homo fit Deus, accidētali modo & non simpliciter. Unde dicendum, quòd quia non humanitas Deo, sed Diuinitas copulatur homini; fit quidē unio in personâ, quatenus accidentia pertinent ad personam; non ut persona Dei fiat persona hominis, sed de personâ hominis, & accidens ipsius.

Neque inconuenit substantiam aliquam esse accidens alterius, ut paret fere in sex posterioribus Prædicamentis. Neque Deum esse magis hoc modo accidens hominis, quàm per modum causæ, quatenus est creator. Quod autem accidentia dicantur esse determinationes subiectorum, pertinet intrinsecè ad priora quatuor Prædicamenta. Esse autem extrinsecam determinationem, verbi gratiâ, finem vel objectum creaturæ, non repugnat Deo, sed maximè illi conforme est; ut à quo omnia pondus & mensuram habeant.

Replicabis plures substantias non

posse realiter & propriè (etsi accidentalitèr) fieri vnum, nisi. fortè quantitatiuè, quod hic non habet locum. Respondetur, quod est inferri vel quantitatiuè fieri vnum in corporibus, hoc est in spiritualibus intelligi : cuius ratio, cùm sit esse in alio vt aliud, non potest dubitari, quin sit vnio plurium. In quo aduertenda est eminentia visionis beatificæ, quæ definitionem cognitionis magis propriè, quàm cæteræ verificat; cum cæteræ intellectiones sint, cognitiones ipsius esse cognoscentis, & substantiæ alienæ non propriè cognoscentibus insint, vt in hâc contingit.

Obijcies, secundùm hanc explanationem, visionem Dei non esse vitam æternam; quod tamen Christiani omnes profitentur : cùm non sit motio aliqua animæ à seipsa. Respondetur, vitam secundum Philosophum dici ipsum esse viuientis, id est, principium motus ab intrinseco : & sic palam est cognitionem & amorem vltimi finis esse perfectissimè vitam : cum omnes operationes ab ijs habeant procedere; ipsum autè mouere sese propriè, tantum

cū reperitur in corporibus, & est materiale quidpiam respectu vitæ.

Ex explicatis patet non esse necessariam aliquam similitudinem creaturæ in visione beatificâ; neque aliquid conferre ad ipsam, sed magis eam impedire. Cū visio consistat in unitate cum ipso Deo. Adde quod talis modus explicandi visionem sit contra Philosophiam; quatenus substantias supponit pro accidentibus; quatenus inducit actionem eiusdem indivisibilis in semetipsum; rationem similitudinum non intelligibilem; neque explicat rationem cognitionis.

Sed prætereà omnis similitudo creata Dei est impossibilis. Cū enim Deus sit vnica formalitas, vel illa formalitas est formaliter in entitate quam dicis similitudinem, vel non est: si est, eo ipso est Deus, & increata: vel si amplius habet & distinguitur à Deo, plus Deo est. Sin ea formalitas sit infinitè distans, nullam prorsus similitudinem habet cum formalitate Dei; & per consequens, non est similitudo eius.

Idem conficitur ex eo quod si formalitas Dei inest formalitèr in similitudine; eo ipso est similitudo adæquata Deo, & per quam natus est Deus comprehendi; & per consequens, creatura nata eum comprehendere, postquam similitudo est proportionata intellectui creaturæ cuius alioquin actus esse non posset. Tandem cum omnis creatura, maxime verò accidens, sit limitatæ existentia & naturæ, quomodo potest fingi unitas in naturâ, seu similitudo eius cum Deo?

Longè minus potest dari species aliqua impressa Dei creata. Cum enim ponatur ad efficiendam similitudinem expressam & formalem; neque possit in hac virtute adiuuariâ potentiâ: necesse est quoad hanc vim præcontineat expressam; & per consequens sit eminentèr similitudo Dei; quod est magis impossibile, quàm esse formalem similitudinem. Et cum propter eandem viam sit inuenta hæc species, omnes easdem difficultates patitur, quas habet similitudo expressa.

Ex dictis facile colligitur in quo consistat videre Deum ; videlicet in accidentali illo composito Hominis & Dei, illi secundum intellectum coniuncti. In quo , quia subiectum est principale (vt in compositis accidentalibus,) totum existit existentia subiecti, loquendo de eo formaliter. Et quod sequitur, habet esse creatum & ex tempore incipiens. Vnde etsi sit aliquid materialiter æternum & increatum in ipso ; tamen absolutè dicendum est esse creatum & temporaneum.

Est autem actio grammaticalis seu de dici, vel rationis ; id est, esse quoddam expressum per modum actionis ; quales sunt, ardere, lucere, splendescere, feruere, &c. quæ significant esse actu calidum, lucidum, &c. Quia enim inter Prædicamenta, sola actio & passio per verba, id est, cum tempore exprimuntur ; consignificatio autem temporis exprimit actualiter esse ; quotiescumque volumus exprimere actu esse, verbo utimur. Non tamen huiusmodi sunt actiones rationis ; quia non transfertur ad ea pro-

260 INSTITVT. SACRARVM
pria ratio actionis, sed dumtaxat con-
ditio, id est, esse cum tempore, seu
esse actu.

LECTIO VII.

*De obiecto Visionis beatifica, &
incomprehensibilitate Dei.*

VLteriùs, ex eo quod Deus est
vnica formalitas; præcisa est
radix plurium quæstionum, de ijs quæ
videntur in Deo. Cùm enim euident
fit, nihil esse in Deo, præter hanc vnã
formalitatẽ; æque patet visã ipsã;
videri omnia prædicata, quæ non sunt
aliud quàm ipsa; non alitèr quàm
qui concipit aliquem habere omnem
perfectionem intellectus & volunta-
tis, eo ipso nouit illum habere om-
nes virtutes intellectuales & mo-
rales.

Obijcitur, Deum abstrahendo à
cogitatione nostrã, esse iustum & mi-
sericordem; patrem, & filium; pa-
trem generare, essentiam non genera-
re, &c: & hæc omnia formalitèr:

atque adeò correspondere actibus nostris formalitates quasdam in Deo, siue actu distinctas, siue formalitèr quidem existentes, sed virtualitèr tantum distinctas: absque quo à multis creditur non posse veras esse enunciationes, quas de Deo efferimus.

Respondetur, distinguendum esse quid sit hæc esse formalitèr in Deo. Si enim sensus sit, aliquid esse formalitèr in Deo, quod eminentèr verificat has propositiones, id est, quod cum ipsum non sit objectum formale & specificans apprehensiones ex quibus conflatur propositio, repræsentatur tamen à propositione, sicut leo ab ungue, homo à vestigio, corpus ab umbrâ, quadratum & circulus ab ellipsi vel rhombo pictis: sic verissimum est huiusmodi esse formalitèr in Deo.

Sin sensus sit; esse in Deo singulas formalitates singulis apprehensionibus attributorum correspondentes, & earum specificatiuas, & formalitèr ex æquo eas verificantes: siue ponantur actualitèr formalitèr, sed non realitèr, siue tantum virtualitèr esse

distinctæ: sic est falsissima propositio, & contra sensum Sacræ Scripturæ, Sanctorum Patrum, & magnorum Doctorum, præsertim Sancti Dionisij & Sancti Thomæ; atque adeò contra sensum illustrioris Ecclesiæ portionis, id est, in hâc materiâ, ipsius Ecclesiæ.

Sacræ siquidem literæ dum docent nos per speculum & in ænigmate videre: & dum promittunt facialem & per speciem (quæ voces significant formalem & definitionalem cognitionem) & sicuti est, cognitionem, pro beatitudine nostrâ; clare docent nostros conceptus esse metaphoricos & improprios. Tantundem Sancti Patres cum docent Deum esse omnibus creaturis inuisibilem; nos non cognoscere substantiam Dei, sed circumstantia & creaturas; id est, creaturarum & circumstantium similitudines ad eum transferre.

Verè enim, si conceptus nostri haberent objecta formalia in Deo, essent proprij & non alieni, speciem suorum obiectorum in Deo formalitèr existentium exprimentes, & faciem

eius, non posteriora ; substantiam eius, non circumstantia vel creaturas, repræsentantes ; & eum, per ea quæ vere est, id est, sicuti est, depingentes. Neque posset Dionysius verè pronuntiare quod esset non bonus, non Ens, non Pater, non Filius : & hoc magis propriè quàm opposita.

Neque potest responderi hæc dici propter inadæquationem nostrorum conceptuum, quos paucos habemus, cùm in Deo sint infinitæ formalitates repræsentabiles. Namque etiam respectu creatorum, hoc idem contingit ; cùm nulla sit omninò substantia quæ adæquatè cognoscamus vel cognoscere possimus. Quis enim omnes vel Trianguli in abstracto proprietates & prædicata de eo demonstrabilia vel nouit, vel vnquam sese cogniturum præsumit ; nedum substantiæ alicuius ?

Accedit quòd vtræque positio manifestâ implicatione in ipsis terminis laborat. Si enim formalitatem formaliter actualiter esse ante intellectum, est formalitatem realiter esse ; etiam distinctionem formaliter

actualiter ante intellectum esse, est distinctionem realiter esse. Prior itaque positio ponens distinctionem esse actualiter formaliter ante intellectum, & non realiter; sibi contradicit. Et rursus si rem esse, est rem esse quod est, id est, non diuisam à se, sed diuisam ab alijs, id est, vnā; duas formalitates esse, est duas vnas esse; & singulas esse formaliter, est singulas esse singulas, & vtramque duas; id est, formaliter non solum virtualiter plures. Si enim tantum virtualiter sunt duæ formalitates, sunt itaque formaliter tantum vnā; & per consequens neutra harum, cum neutra harum sit virtualiter vtrique.

Respondendo itaque ad argumentum dicitur, propriè loquendo, Deum esse formaliter iustum, non esse in Deo, sed in creaturâ: ut *70* formaliter sit modus prædicati non copulæ. Et ex additione modificationis *formaliter*, significare Deum verificare hanc propositionem, *Deus est iustus*. Cum itaque Deum verificare, & propositionem verificari sint idem; & propositionem verificari sit

in creaturâ, & non in Deo ; etiam Deum esse formaliter iustum, est in creatura. Sed Deum esse iustum, non addendo modificationem *formaliter*, tantum significat Deum esse principium faciendi iustè ; quod est in Deo.

Obijcitur rursus, quòd per realem actionem, quæ nostris apprehensionibus prior est, communicatur humanitati Christi realitèr diuinitas & essentia, non communicatâ Paternitate : atque proinde necessarium esse intercedere tantam distinctionem inter essentiam & paternitatem, ut vna per realem actionem & vnionem possit fieri vna, seu vnita humanitati, absque eo quod alia sit similiter vnita.

Responderetur primò, obijcientes non aduertere quòd non abstrahant neque abstrahere possint à nostris apprehensionibus. Etsi enim res facta abstrahat, tamen si res facta declaranda sit per voces nostras, & voces nostræ non referantur ad rem nisi mediantibus apprehensionibus ; non potest res ut dicta abstrahere à nostris apprehensionibus. Sensus itaque est

quòd Incarnatio sit talis actio vel vnio Dei cum homine, quæ nata sit explicari dicendo Filium non Patrem esse hominem.

Decipitur & in alio objectio : verè enim communicatur Paternitas humanitati. Etsi enim falsum sit, homo est Pater, verum tamen est, homo est vnum cum Patre : & non solum homo, sed etiam humanitas ; sicut & quod Pater est in humanitate, & magis quàm in sacrâ hostiâ. Si itaque quod non erat vnum & factum est vnum, communicatum est ; dicendum est Paternitatem communicatam esse humanitati. Neque tantum Pater, sed etiam Paternitas est vnum cum humanitate. Et hoc absque eo quod humanitas vel Homo sit Pater.

Sed abstrahendo ab hac veritate Respondetur ad argumentum, omit- tendo quòd Paternitas non commu- nicetur ; & negando inferri inde quantumlibet minimam distinctio- nem extra intellectû nostrum. Sicut enim sol vel lux sine minimâ distin- ctione quæ ad rem nostram spectat,

aliter sese communicat ceræ, aliter ligno, propter varietatem subiecti; sic Deus pro diuersitate subiectorum, si pluribus vniretur, vni vnā, alteram alteri denominationem communicare posset. Et hic quidem Filius, & non Pater; ille Pater, non Filius dici, ex varietate formæ per occasionem subiecti: neque refert quòd communicatio lucis sit effectiua; quòd enim forma non communicate formaliter & vniuocè, a subiectorum varietate trahitur.

His non obstantibus, cùm attributa sint nomina quibus respondent conceptus quoquo modo expriment Deum, & indiuisibilem illam formalitatem; palam est illam formalitatem magis explicari per vnum attributum, quàm per aliud: & per consequens, vt correspondentem vni attributo, esse magis intelligibilem; vt alteri, minùs; atque adeò non repugnare vt ab vno vidente magis, ab alio minùs intelligatur. Cùm eadem forma comparata diuersis subiectis, secundùm eorum capacitatem faciat vnum complexum perfectius, aliud imperfectius.

Dices, quòd cùm formalitas indiuisibilis deitatis, per ipsum esse quòd est, verificet omnes conceptus attributorum; non esse intelligibile quomodo non omnia simul intelligantur; cùm non sit aliud intelligi omnia, quàm intelligi hoc vnum. Neque recurri potest ad variam habitudinem subiecti; quia vel quælibet habitudo subiecti sufficit vt videatur hæc formalitas secundùm propriam suam rationem, & omnia attributa videbuntur; vel non; & tunc neque Deus videbitur, neque erit clara Dei visio.

Respondetur π' videri attributa, posse tripliciter intelligi: primò vt verè insint Deo & ipsa & radix distinctionis in intellectu nostro: & hæc est sententia reiecta. Secundò, vt videantur prout attributa formaliter; id est, vt videatur Deus verificare intellectum creatum apprehendentem ipsum sub tali nomine; & hoc est videre Deum & creaturam à qua denominatur. Tertio modo videtur Deus sic, vt qui videt hanc visionem & intellectum apprehendentem Deum

sub nomine alicuius attributi, possit videre visionem Dei non tantum secundum obiectum in sese, sed etiam secundum complexum, id est, obiectum ut in visione, præcontinere & esse resolubilem in apprehensionem attributorum: & hoc modo procedit præsens quaestio.

Ad argumentum itaque dicitur, quod formalitas Dei accepta obiectiue, seu præscindendo à complexione cum intellectu, sic est vnica; prout verò est in complexione, sic est vna quidem sed variata in singulis; & prout reperitur in infimo vidente Deum, sic est in omnibus: prout autem in Christo Domino, sic in nullo præterea; qualiter autem in seipsâ, sic in solâ comprehensione quâ Deus semetipsum comprehendit. Sed hæc non obstant quin in resolutione, id est, extra complexum, sit eadem formalitas; & varietas pertineat ad visionem non ad obiectum.

Neque hæc impediunt: quin minima visio Dei sit modo explicato resolubilis in infinita attributa: & si creatura videns Deum, in æternum

loqueretur alteri non videnti Deum, & singulis horis magis intelligentem redderet, tamen nunquam posset peruenire ad hoc, vt explicaret Deum, quomodo ab ipso vidente intelligitur; immò neque aliquid simile aut suppar: sed semper non videns infinitè minùs sapiens vidente foret. Quomodo solent explicare Philosophi quòd nullus linearum numerus potest accedere ad quantitatem superficiei.

Consideratis enim dumtaxat quòd Deus habeat existentiam pro naturâ suâ, vel quòd sit plenitudo entis; statim apparet eminentiam prioris & extensionem posterioris infinitè excedere quamlibet substantiam creatam; quæ tamen est mensura sui intellectus; & per consequens singula hæc attributa esse prorsus inexplicabilia pro dignitate ipsorum: etsi omnes creaturæ linguas suas in æternum impenderent: & tamen non potest dubitari quin minima visio hæc cognoscat.

Et attributa quidem proposita sunt versùs creaturas, sicut omnia at-

tributa fere quæ nos contemplamur. Sed quoniam in rebus creatis manifestum est esse prædicata conuertibilia cum ratione communi, præter differentias in quas communis ratio resolubilis est; clarum est similiter in Deo præter notiones inferiores, quæ ex creaturis transferibiles sunt, esse quasi quasdam conuertibiles, & quasi natas ex sese inuicem sequi; distinctio verò diuersarum visionum penes eas desumenda est, quæ quales sint longè à suspitione nostrâ abest; sed sunt propriæ obiecto; & per consequens tales, vt propriæ cognitiones per eas diuersificari sint natæ.

Sed neque superior videns potest explicare inferiori excellentiam illam quam habet; neque inferior vllatenus suspicari in quo consistat; quia huiusmodi notitiæ non diuersificantur penes participationem quæ cerni potest in alio extra Deum; sed in purâ illâ formalitate quæ iuxta capacitatem videntis implet singulos intellectus indiuisibiliter & irresolubiliter; quia secundum hoc quod Deus est in se, non autem secundum

quod est participabilis à pluribus, & diuisibilis in limitata.

Ex dictis rursus fit euidens, Deum esse incomprehensibilem à quolibet intellectu creato. Cùm enim varietas visionum sit ex complexione intellectuum cum formalitate deitatis; & illa sit proportionata intellectui diuino; manifestum est visionem cuiuslibet intellectus creati, esse tantò inferiorem obiecto cognoscibili, quantum intellectus est inferior intellectu diuino; atque adeò infinite distare ab adæquatione obiecti cognoscendi, seu à comprehensione ipsius.

Rursus cùm differentia visionum sit penes notiones conuertibiles cùm Deitate; & tales notiones neque sint formalitèr vel originalitèr in obiecto, neque accipiantur per ordinem ad creata; palam est non variari nisi per ordinem ad ipsas visiones seu complexionem cum ipsis subiectis: tot itaque erunt quot subiecta. Cùm itaque quodlibet subiectum per infinita possibilia media distet ab intellectu diuino; etiam quolibet visio quotli-

bet similitum notionum, per infinitas distabit à visione quâ ipse Deus sibi correspondentem notionem in sua amplitudine videt.

Obijcies supra dictum esse visionem beatificam Christi Domini fuisse maximam quæ sit possibilis. Respondetur visionis Christi eminentiam supra cæteras non esse sitam in ordine huius gradationis naturarum, ex quo hîc arguimus; sed ex priuilegio accidentis mutantis eam & transferentis in aliam. Vnde nihil nocet præfenti argumento.

Patet vlteriùs visionem Dei minimam esse ex naturâ rei comprehensiuam omnium creaturarum actualium & possibilium. Cùm enim minimum attributum Dei infinitè excedat & præcontineat omnes creaturas actuales & posibles; euidens est, Deum, secundùm quod à minimo videtur, resolubilem esse in notiones omnium illarum; & per consequens eam visionem esse eminentè visionem omnium creaturarum adæquatè & à priori; hoc est, comprehensiuam earum.

Cùmque singulæ animæ separatæ cæteroqui cognoscant omnes creaturas existentes, sed non perfectè à priori, cùm existentia illarum à Deo non viso pendeant: & vis causæ primæ est maior in quolibet effectu omnibus virtutibus causarum secundarum; fit videntes Deum fieri eo ipso comprehensores omnium existentium seu totius entis: non videntes autem Deum, dici comprehensores in sensu longè inferiori & potentiali respectu huius.

Adde quòd cùm principium influat suam naturam in conclusiones & effectus; & visio beatifica sit principium & cognitionibus & actionibus beatorum; manent eadem infinitè eleuatæ supra hoc quod ex naturâ suâ erant futuræ ex influxu talis principij. Et si reflexeris, principium hoc in ipsa animâ esse ipsum Dei esse, accidentaliter quidem sed vere vnitum; vides actiones omnes creatorum inferiori modo, sed etiam vere esse Theurgicas; sicut de Christi Domini actionibus prius declaratum est.

Non tamen per ipsam visionem

Dei spectantur creata. Cum enim visio Dei non sit aliud quam complexio formalitatis Dei & intellectus; sicut formalitas Dei non est nisi Deus, sic palam est non facere formaliter intellectum aliud quam videntem Deum. Et si intellectus quidpiam aliud videat ex vi huius, futuram diuisibilitatem inter duas visiones; & visionem creaturæ fore consequentiam ex visione Dei; & posse consistere, ut Deus quoad intrinsicam sic videretur non visâ creaturâ, & per consequens, duos esse actus, & creaturam non eodem actu formaliter videri quo Deum.

Petes: cur formalitas Dei non possit beato præstare visionem creaturarum, cum ipsi Deo hoc præstet. Respondetur, quod scientia quâ Deus novit creaturas est ad eum eminens supra rationem scientiæ quâ beatus cogniturus foret creaturas, quam formalitas Dei, supra formalitatem creaturæ. Vnde etsi formalitas Dei possit esse formaliter illa scientia, non sequitur posse esse talem qualis in beatis nata est inueniri.

Rursus cùm affectus à quo pendet quod videatur Deus, sit totus versùs Deum; Deus quoque superet vim intellectus & superimpleat eum per propria Dei: palam est, ex vi visionis Dei non posse intellectum quasi reuerti & exire a Deo versùs creaturam. Si enim plus posset, amplius Deum videret. Præterea cum visio creaturæ non sit entitas distincta, sed habitudo intellectus ad creaturam; non possint autem simul in subiecto esse duæ habitudines ad eundem terminum; visio creaturæ potest esse fortior ex visione Dei, sed nullo modo alia seu deplex.

Dices, supra dictum esse quod beatus videat Deum facere creaturas, saltem in communi: potest itaque vi visionis beatificæ conuerti ad creaturas: quo semel dato, poterit quilibet videre. Respondetur eam cognitionem resultare quidem ex visione beatificâ, quæ primitatem & solitatem à se existentis bonitatis, & eiusdem vim in Deo videt; sed non esse formaliter ipsammet.

Ex quo intelligitur, quid sit creatura videri in verbo. Puta, visionem

Verbi esse modo explicato principium illa videndi seu comprehendendi: necessum enim est plures habitudines inter sese connexas eiusdem animæ sese inuicem roborare. Videntes itaque Deum ex suâ ratione esse principium essendi creatis rebus, inde in scientiâ creaturarum rerum sunt confirmatiores: sicut & cognitio creaturarum, vt dictum est, dispositiue reddit cognitionem Dei eminentiorem.

Dices, quòd cùm nulla sit relatio vel coordinatio inter Deum & creaturam, non potest intellectus deduci à cognitione Dei ad cognitionem creaturarum. Respondetur, quòd cùm creaturæ sint eminenter in Deo nil repugnat ex vi objecti illic videri, siue Deus habeat relationem, siue non: sicut si sciatur quâ fulmen feratur, & quod musca occurrat, intelligetur muscam occidi, licet fulmen non ad hoc missum sit: non itaque ad hoc opus est aliâ connexionem quàm in intellectu cognoscente.

Accipitur tandem, nihil horum videri visione beatificâ formalitèr, quæ

Theologi Attributa appellant, vt esse iustum, misericordem, &c. Verè enim hæc omnia formalitèr videre, est videre creatura non Deum. Significant enim intrinsecè nostros conceptus; cùm non habeant esse distincta & esse formaliter quod sunt, nisi ab iis: quod autem videtur in Deo & verificat hæc & conceptus nostros, re ipsâ sit tam dissimile his, quàm Deus est creaturis.

LECTIO VIII.

De proprietatibus & causis Visionis beatificæ.

Vix commemoratione dignum est, hanc Dei cognitionem esse de nobilissimo obiecto quod in intellectum cadere natum est; & quòd cùm sit incomprehensibile, etiam exuperat intellectum nostrum. Quare cùm anima nostra separata non sit capax alterius boni quàm intellectua-
lis, hanc visionem esse satiatuam animæ secundùm se. Cumque om-

nisi iucunditas sequatur cognitionem; & cognitio totius compositi ab animâ sit; sequitur totum hominem hâc visione satiari.

Dices, non esse satiatam animam quamdiu potest aliud appetere vel amare: sed anima videns Deum, potest habere scientiam rerum creaturarum, & illam etiam amare vel appetere: quare non satiatur pura visione Dei. Accedit plura esse corporis bona per sese appetibilia ab ipso toto homine, quæ non repugnat haberi cum visione Deitatis: & per consequens, etiam appeti & desiderari possunt ab homine vidente Deum. Nec anima itaque neque homo satiatur visione beatificâ.

Respondetur, quòd sicut homo qui animum circa aliquam actionem vel voluptatem ita occupatum habet, ut non possit pro eodem tempore de alio cogitare, vel aliud desiderare; pro illo tempore actu satiatum est: Ita si anima vel homo quamdiu habet visionem Deitatis, non potest aestimare vel desiderare aliud; palam est eâ satiatam esse. Et si obiectum tantum sit,

vt occupet totaliter affectum, palam est nihil aliud habitum vel non habitum in pretio posse esse; atque adeò visione Dei saturari eam.

Et hoc non eo dumtaxat, quod de facto occupet animum; neque eo solo, quòd non sit aliud melius quod possit merito suo excludere hoc bonum ex appetitu: sed ex ipsâ proportionem obiecti & appetitus, tum secundum se, quia bonum sit magis appetibile quàm appetitus natus sit appetere, cum sit proportionatum appetitui infinito: tum quia mediante visione in ipsâ complexione superimpleat appetitum, trahendo ipsum quantum trahibilis est; quod est simpliciter satiare.

Rursus ex eo quod charitas est principium & dispositio propria ad visionem, habetur videntem Deum non posse desiderare videre Deum plusquam de facto videat; posito enim quòd magis desideraret, plus haberet charitatis; & per consequens etiam plus visionis. Quare euidentem esse omnino saturatum, & desiderium seu voluntatem eius non posse

se excedere bonum quod habet.

Ex quo patet, quòd quantamlibet vim reliqua objecta habeant secundum sese, eam totam perdant in compositione cum Deitate, & videntem Deum nullo modo trahant. Sed affectus derivatur à Deo ad illa omnia quatenus de Deo participant, id est, secundum merita singulorum. Ex quo fit omnia à vidente Deum amari secundum ordinem charitatis; & per consequens, impossibile esse videnti Deum discedere ab hoc ordine, quod est peccare.

Evidens quoque est, ex parte hominis, non posse desisti ab hâc visione Dei, & per consequens, hominem necessario esse potentiam ad Deum ut intellectum. Cùm itaque positâ potentiâ actualitèr, eo ipso fit totum; fit non posse tolli visionem semel existentem: maximè cum bonitas Dei (etsi tantum efficienter concurreret) non possit deficere. Quare cum hoc non possit latere videntem Deum, palam est ipsum esse securum de bono satiante, atque adeò beatum.

Et cum ex naturâ ipsius visionis sit, ut objectum visum faciat se amari; & amor faciat objectum videri; fit ex ipsâ naturâ complexi, esse necessitatem quandam non deficiendi, quæ non sit in alia quâcumque creaturâ, quæ cum clarè videatur per ipsammet visionem, necesse est visionem esse fruitionem Dei in æternum ex ipsâ essentiâ suâ; & per consequens, esse æternitatem participatam; & quandam gradum medium occupare inter puras creaturas & Deum, ex ipso modo existendi.

Ex his patet visionem claram Dei ex naturâ rei esse immutabilem; cum per se causæ ipsius Deus & amor ex propriis suis sint immutabiles. Sed quia subiectum amoris est mutabile; & necesse est mutatis causis effectum mutari; dictum autem est tum in Christo in hac vitâ, tum in resurrectione mutari subiectum visionis; palam fit, in his duobus casibus, visionis mutationem fieri; sed in melius, ut auctior & perfectior fit visio. Vnde rursus patet necessitas resurgendi.

Cum enim anima sit forma corpo-

ris; manifestum est etiam post resurrectionem sic vniri corpori, vt ad primò mobilem partem corporis seu cerebri non comparatur effectiurè, sed formalitèr; taliter vt motus talis partis procedat immediatè à semetipsà: hoc autem non potest intelligi absque eo quòd anima vt actualis cognitio & scientia, sit forma talis partis: siue quòd ipsa determinatio scientiæ sit modus animæ quatenus est forma talis partis; ex quo fit, scientiam esse in perfectiori modo existendi ex eo quod sit in corpore: quare etiam visio beatifica, ad quam disponit; erit perfectior, ex modo existendi in corpore quem habet anima.

Ex hoc sequitur, quod si resurgens acturus sit aliquid corporalitèr in totâ æternitate (sicut accidit Christo Domino, & illis qui resurrexerunt cum ipso) motus cerebri sine vllâ mutatione in animâ secuturus est præcisè ex eo quòd sit tale compositum; habet enim ex qualitate animæ informantis esse aliud & aliud, sicut ipsa scientia ex ratione obiectorum est disposita. Vnde non mirum si aliud &

aliud absque mutatione extrinsecâ ex eo sequatur. Vnde mutatio à sensibus erit supertuacanea.

Clarum ex consequenti est, quòd quoniam purus viator habet talem existendi modum, vt existentia sit priùs totius quàm animæ; etiam scientia ipsius non potest esse, nisi quæ sit priùs totius; id est, tanta & talis, qualis ex percussione sensuum & animæ naturâ creatur in ipsâ mente: cum itaque nulla Dei similitudo ex purâ animæ vi, nedum ex vi corporis percutientis possit existere in animâ; clarum est visionem Dei claram, non posse puro viatori, non excedenti statum essendi ordinarium, competere.

Cui si addatur, quòd etsi crescere possit visio clara Dei, non tamen deficere ullâ vi possit; sit clarè consequens, nulli purè viatori factam hanc gratiam, vt Deum clarè videret: & raptum Pauli tantùm fuisse ad corporalem præsentiam Christi per intellectualem visionem, à quo instructus sit, vt ipse docet, de ijs quæ postea traderet Ecclesiæ, non autem de ipsa di-

uinitate: vt solet colligi ex ipsâ ipsius phrasi dicentis, sese audiuisse arcana verba, cum deitas vnus sit tantum verbi.

Quod exinde confirmatur, quod pateat extasim vel raptum non conferre visioni viatoris; vt quæ non alienat à sensu interiori, vt patet ex retractione spirituum ad cerebrum, & debilitatione corporis ex eâ.

De oculo aut sensu corporeo ad visionem Dei claram eleuando, & per consequens animalia beatificando, nulla potest esse quæstio; postquam agnitum est hæc omnia non excedere motus locales; qui quàm longè sint à cognitione Dei, nemo ignorare potest. Vnde tota illa quæstio fundata est in eo, quod hærentes in notionibus potentia & obiecti, & nihil vltra explicantes, rationes proprias corporis & spiritus neque distinxerunt, neque satis agnouerunt.

Constat item animam vel aliam creaturam quæ amat aliud bonum præter Deum propter se, siue aliter quàm propter Deum, non esse capa-

cem visionis claræ Dei. Cùm enim visio consistat in coniunctione Dei ad animam per modum actus & potentia; quod autem amatur propter se, coniungitur amanti tanquam actus; patet creaturam amantem aliud quàm Deum propter sese, eo ipso esse actuatam secundum voluntatem, & non puram potentiam; & per consequens non cogere actum ad unitatem; & per consequens, cùm in ijs quæ formalitèr se habent, quod non est, non possit esse; fit talem creaturam manente tali dispositione, non posse esse vnā cum Deo.

Ex hoc rursus infertur ita sese habere creaturam quamlibet ad visionem Dei ex naturæ viribus consequendam, sicut sese habet ad perfectionem charitatis. Cùm itaque nulla creatura eam habeat absque gratiæ adiutorio; palam quoque est, nulli creaturæ ex puris naturæ viribus competere visionem claram deitatis. Ex quo rursus habetur, quòd sicut charitas est lumen quo spiritalis homo omnia diiudicat; sic maximè quomundatur cor vt sit capax visionis

Dei; quale ponitur à Theologis lumen gloriæ.

Verùm hæc non impediunt quò minus in sensu quo moderni vocant naturale, non sit possibilis aliqua creatura, cui non sit naturale videre Deum; puta, accipiendo naturale pro eo quod est naturam habere respectum & ordinem ad Deum clarè visum. Cùm enim Deus hoc modo sit finis ipsius creationis & naturæ, & solum bonum in quo quiescat natura intellectiua; non potest dubitari quin respectus maximus quem habet creatura ad Deum, sit ad eum clarè videndum. Finis enim est prima causarum.

Accedit, quòd cùm scientia propriè non sit nisi de existentibus; neque perfectè cognoscatur aliquid existere nisi cognoscatur per causam; neque cognoscatur per causam existere, nisi existentia rursus causæ perfectè cognoscatur; & sic semper procedatur usque ad primam causam; sit clarum nihil omnino perfecte cognosci, nisi videatur Deus, & in Deo quòd creaturæ ab ipso existant; vnde per cog-

nitiones subordinatas possit deueniri vsque ad quodlibet Indiuiduum cognitum.

Sed & prima & perfectissima species cognoscendi deerit creaturæ intellectuæ. Cùm enim supra demonstrationem sit intelligentia principiorum; & supra ipsam, simplex apprehensio; simplex autem apprehensio, si non sit de existentia, non sit perfecta cognitio, & abstrahat à veritate; non possit autem esse perfecta nisi de obiecto sit cuius essentia sit sua existentia: clarum est sublatâ visione clarâ Dei, tolli vnâ nobilissimam cognitionis speciem, ad quam natus est omnis intellectus. Cùm itaque creatura intellectuâ feratur primò & principaliter ad cognitionem; & eò magis quò nobilior est cognitio, sit euidens naturalissimè ad visionem beatificam ferri.

Adde quòd quæstio in terminis in quibus solet proponi, implicat contradictionem. Quærunt enim an sit creabilis aliqua substantia; cui quòd est simpliciter supernaturale, id est, supra omnem naturam, sit naturale.

Cùm

Cum enim eo ipso quod foret substantia creata, foret natura; quomodo potest aliquod poni esse simpliciter supernaturale, & tamen respectu ipsius esse naturale: Profectò enim si ipsi est naturale, non erit supra omnem naturam.

Quare ad rem quæstionis dicitur: Quod cum Deus non clarè visus non sit Deus vt. Deus; non etiam habet vim necessitatiuam mentis creatæ. Possibiles proinde sunt circumstantiæ in quibus data mens creata non traheretur ab ipso. Positis itaque talibus circumstantijs, data natura non perueniret ad visionem Dei. Cum itaque circumstantiæ in quibus naturalis existit, non ab ipsâ sint, sed à create; palam est nullam creaturam ex vi priorum ad visionem Dei posse peruenire; & per consequens esse à gratiâ non à naturâ quod eam habeat.

Dices, posse cogitari creaturam cui competat ex vi creationis visio beatifica, quasi primus & principiatiuus actus cæterorum; quæ proinde non posset deficere ab habendo talem ac-

tum. Respondetur : Quòd cum visione beatificâ nihil sit melius, talis creatura eo ipso foret in termino ; & consequenter non haberet alias actiones sequentes, sed hæc foret sola actio ipsius : quæ cum sit propria actio Dei, natura talis creaturæ foret eadem quæ Dei ; & hanc ipsius qualitatem cæteræ quæ sunt Dei propriæ, ex necessitate sequerentur.

Adde quòd si aliqua creatura esset ex suâ substantiâ charitas, vel in charitate, ex solâ creatione hoc haberet : à solo itaque Deo penderet beatitudo eius. Cum itaque ex parte Dei non possit deesse bonitas, ex necessitate talis creatura erit ; & per consequens omnium creaturarum maximè naturalis & necessariò existens erit.

LECTIO IX.

De Damnatione reproborum.

EX opposito, eorum qui viui reseruari sunt ad iudicium; qui omne studium & amorem suum circa

bona temporalia & quodlibet bonum extra Deum collocauerunt; ex eo quòd animam occupatam & immundam habeant, incapaces sunt claræ Dei visionis; & per immutationem hanc recepturi sunt ingens augmentum illorum affectuum quibus bona temporalia propter semetipsa complexi sunt; quorum compotes cum esse non possint, clarum est infinitæ miseriæ hæredes euadere.

Dices, eos qui purè concupiuerunt scientiam, eadem potituros; & per consequens, non futuros miseros. Respondetur eos qui aliquo vitio non laborauerunt procul dubio etiam pœnâ sequente vitium carituros; atque proinde qui purè scientiam propter semetipsam sectati sunt, omnium minimè miseros futuros. Verùm quoniâ etiam scientia sine visione Dei imperfecta est, etiam illos non potituros sine sibi proposito; & per consequens, etiam ipsos ex hoc capite æternâ miseriâ inuolutum iri.

Rursus ex eo quòd ex visione Christi Domini, & cognitione omnium rerum simul acceptâ, non possint

ignorare bonum visionis Dei esse ingens & incomparabile, & solam felicitatem: necessum est rursus eos ex amissione tanti boni summâ pœnitentia affici; & per consequens, indicibili miseriâ circumplecti. Et si quidem ex merito spectetur, hunc dolorem esse omnium pœnarum illis grauissimam. Et hæc est quæ communiter *pœna Damni* appellatur, & eam patientes, *Damnati*.

Dices, impossibile videri eos qui tantam æstimationem visionis claræ habituri sunt, non ex eâ apprehensione deferere amorem cæterorum omnium, & hoc solum amare, & per consequens Beatos fieri. Neque obstat exemplum morientium. In ijs enim exit anima qualis est; in his autem per actionem in corpus fit noua immutatio; quare & locus est pœnitentiæ: & ex hac sententiâ sequetur in die iudicij omnes homines futuros saluos, quod misericordiæ diuinæ videtur valde congruere.

Respondetur, quod vi puræ rationis non potest tolli amor boni alicuius per se, nisi ostendendo non esse

bonum per se : & vt ostendatur non esse bonum per se, est ostendendum quod non sit conforme appetitui concupiscentis. Conforme vero appetitui aliud est, quia est conforme appetitui qualis est ; aliud verò quia est conforme appetitui non qualis est ; sed qualis foret si esset perfectus. Et quod hoc posteriori modo est bonum, est bonum respectu naturæ in communi ; quod verò priori modo est bonum, est bonum simpliciter, huic hîc & nunc. Ponatur itaque appetitus in tali statu, vt possit velle se non esse qualis de facto est ; & huic demonstrari poterit bonum hîc & nunc, non esse bonum simpliciter ; & sic reformari poterit appetitus. Sed si fixus est appetitus, quod est bonum ei vt tali, necessariò apparebit simpliciter bonum. Cum itaque viui in iudicio immutandi anima qualis est in corpore præsupponatur visioni Christi, quasi ex vi actionis transferentis modum existendi eius : visio superueniens non potest docere per se volita non esse ei vt tali bona ; neque per consequens, amorem illorum tollere.

Adhuc euidentius est, si homo in vitâ plura bona propter sese appetijt, maxime si impossibilia, quod plerisque accidit; eos amores post iudicium remanere: & esse damnatum quasi monstrum ex difformibus & inter sese pugnantibus membris vel animalibus, vel magis feris rabiosis compositum: viribus ad mensuram animæ separata exaltatis, obstinatissimoque furore sese inuicem & ipsum hominem vexantibus; qualem scyllam emblematicè depinxere Poëtæ.

Ex his patet vnde sit obstinatio in damnatis; puta, partim ex naturâ existentia ipsorum, & plenitudine scientiæ, & ex eo quod nulla amplius superest mutabilitatis occasio; vt ex Philosophia patet. Vnde sequitur nihil mirum esse pœnas Damnatorum esse æternas, postquam obstinatio in voluntate peccandi est æterna: non enim prolixior est pœna quàm peccatum. Adde quod ipsa Damnatorum peccata sunt ipsæ pœnæ in quas per illa inciderunt.

Ex quo rursus colligitur quàm irrationabiliter philosophantur, qui

obstinationem Damnatorum referunt in Deum, siuè per infusionem habitus vitiosi, siuè per denegationem gratiæ seu habitualis seu auxiliaris, siuè generalis concursus: tum quia hunc effectum procedere immediatè & principalitè à Deo, non potest conciliari cum debito sensu bonitatis ipsius; tum quia non potest euadi quin Deus sit causa peccatorum ipsorum, etsi iustè: hoc enim non tollit quin eorum sit causa.

Infertur quoque, omnes actiones Damnatorum esse mortalia peccata. Cum enim omnes actus sint vel circa finè vel circa media; & quæ circa media, sint propter aliquè finem: Ex eo autem quod Deus non sit finis eorum, quilibet amor finis sit mortale peccatò; & consequenter quælibet actio ex tali amore procedès: clarissimum fit omnem actionem & cogitationem Damnatorum liberam, esse peccatum mortale.

Neque obstat quod leguntur Dam-nati pœnitere & agnoscere culpam suam; pro fratribus orare; & Dæ-mones etiam credere, & prædicare

Christum. Non enim omnis pœnitentia est virtuosa, etsi sit de malo; vt patet in Saule, Esau, Simone mago, &c. Oratio Epulonis (præterquam quod parabolica est, & idcirco non literalis authoritatis) potuit esse ex vitioso amore fratrum; qualis in multis reperitur. Neque Dæmonū fides piā affectionem supponit, & prædicatio ex inuidentiā potuit oriri.

Concluditur præterea etiam in damnatis esse aliquam lætitiā secundum quid, sed non simpliciter. Cū enim lætitiā simpliciter, sit cū animus ita occupatur bonis, vt obliuiscatur mala; & per consequens, nullam tristitiā mixtam habeat; hoc autem non possit contingere in damnatis: palam est eos non posse habere lætitiā aliquā simpliciter. Siquidem eo ipso propter immutabilitatem status ipsorum, essent semper læti, neque tristitiā vllam haberent.

Quia tamen sunt super omnia affecti ad semetipsos; neque possunt ignorare aut obliuisci bona & perfectiones quas verè habent: clarum

est quod de ijs lætantur; & non tantum secundum mensuram dictorum bonorum, sed secundum mensuram, secundum quam illa æstimant. Delectantur quoque de voluptatibus quas in sæculo habuerunt. Cum quibus consistit quod de ijsdem affliguntur & tristantur : cum status ipsorum ex contrarijs affectibus sit compositus.

Palam itaque est, damnatos non desiderare non esse ; cum semet ipsos, & per consequens, suum esse super omnia diligant. Immò, quod maius est, suas ipsorum pœnas diligunt, & iis carere nolunt. Cum enim manifestum sit huiusmodi pœnas esse actus voluntatis, necessariò etiam voluntarij sunt; & cum non extrinsecus cogantur, procedunt ab intrinsicâ dispositione substantiæ: & si eas absolutè nollent, non essent : evidens proinde est, quòd simpliciter ijs carere nolint.

Neque obstat, quod in hoc mundo qui prudentes videantur, cupiunt mortem ut eximant sese pœnis. Imprimis enim hoc est ex imbecillitate

animi; cùm clarum sit, animum quò fortior est & magis recolligit sese, eo minus sentire dolorem; & in extasi prorsus ab eo esse immunem. Imbecillitas ergo est quæ facit nos sentire dolorem; & multò magis per grauius malum velle illum fugere. Præterea aliud est mors, quæ statum debitum aliquando nobis affert, aliud non esse; quod omnia mala superat. Et ex parte comparatorum, aliud homo carne oppressus, aliud spiritus cuncta liberè videns, & verum ab apparenti discernens.

Ex dictis quoque claret, quomodo singulis peccatis proportionatæ sunt & speciales pœnæ. Cùm enim ipse affectus peccati sit pœna ipsius, palam est singulas pœnas, singulis peccatis respondere. Peccata quoque remissa, id est, quorum affectus totaliter est extirpatus ex animâ, non puniuntur ob eandem rationem. Sed quorum affectus absolutus deletus est, sed habituales aliquæ inclinationes manserunt, in æternum puniuntur; tali habitu per statum sequentis vitæ in actum emicante, si ex alio affectu manent damnati.

LIBER III. LECTIO X. 299

Quoniam autem impij resurgentes, non magis animum mutant quoad finis vltimi affectum, quàm reseruati; patet eorum damnationem augeri, tum ex statu resurrectionis, propter coniunctionem corporis & perfectionem actuum inde accrescentium; tum ex visione Christi in iudicio & corporali agnitione gloriæ. Vt constare potest ex paritate quam cum reseruatis habent, in his duabus conditionibus; vt. comparantifacillimè patebit.

LECTIO X.

*De purgatione peccatorum in
mortuis.*

VLteriùs ex eo quòd plerique piorum, qui culturæ animorum non omnino sunt negligentes; etsi Deum pro fine vltimo sibi proponant, nihilominus corporea bona non purè propter ipsum, sed quadantenùs propter semetipsa amplectuntur; necesse est eos ex vi mortis seu immuta-

tionis, parem affectum in futuro sæculo sortiri, neque visione Dei dignari: & per consequens, cum illum pro ultimo fine habeant, ex desiderio eius & pœnitentiâ negligentia suæ grauissimas pœnas sustinere.

Attamen cum causa cur impij non sint mutati secundum affectum in melius, sit quia propter vitiosum affectum circa ultimum finem, non manet in illis principium correctionis: in his autem rectus est affectus circa finem, sed adeo debilis, vt non possit omninò tollere affectus circa aliud: per visionem autem Christi confirmatur voluntas circa finem: palam est in ijs meliorandum esse affectum; atque adeò eos idoneos euasuros, ad visionem beatificam ex vi iudicij.

Et quod de his dictum est, à fortiori valet de illis qui in hoc sæculo correxerunt iudicium de bonis temporalibus, sed nondum fæces malorum habituum emundauerunt. Quare hi à fortiori visionis beatificæ compotes erunt. Neque interest quòd dicatur habitu vno actu non tolli: hoc enim

ut verum est plerumque, sic aliquando etiam in nostro usu instantiam patitur; quantò magis ubi tam eminens causa agit in subiectum iam indiuisibiliter passuum.

Ex quibus intelligitur, quomodo illa dies probat opera quæ homines superædificamus super fundamentum Christi; id est, super fide viuâ, seu charitate quâ amatur Deus super omnia. Quomodo aliquorum opera non ardent, aliorum ardent; & hi detrimentum patiuntur seu mulctantur affectibus ad creaturas quos habebant; salui tamen sunt propter fundamentum charitatis. Sed quasi qui exierunt de fornace ignis ardentis, ambusti scilicet & purificati.

Dicuntur autem præuij dolores & desideria purgare hos, non quia imutationem aliquam actualem in ijs causent ante diem iudicij, quæ spiritibus puris non competit: sed quia preces eorum, quæ gratiores sunt quàm in hâc vitâ, accelerant diem iudicij, & sunt dispositiones quæ faciunt iudicium habere adeò eminentem effectum circa illos. Et tantum

dem pronuntiandum est de precibus Ecclesiæ, & particularium, quæ funduntur pro ijs.

An autem ex coniunctione affectuum nostrorum cum ijs, aliqui ante vniuersale iudicium eximantur ab his pænis, non potest nobis constare citra reuelationem publicam & Apostolicam. Priuatæ enim historiæ, etsi à Sanctis conscriptæ, & rationes citra demonstrationem compositæ, non habent vim veritatis in tali materiâ confirmandæ; quæ non à pietate & prudentiâ, de quibus in viris sanctis non est dubitandum, sed à reuelatione diuinâ pender. Præsertim cum constet publicam esse sententiam antiquiorum Patrû tam Græcorû, quam Latinorû, purgationem mortuorum ab igne iudicij extremi perfici.

Ex his deducimur ad hoc, vt quoniam Sanctorum antiqui testamenti & legis naturæ, cultura animorum multum hærebat in bonorum temporalium expectatione à Deo; vniuersaliter credamus, neminem ipsorum ante Christi passionem, participem fuisse visionis claræ Dei: cum in-

ter Christianos, quorum eruditio immediate fertur circa bona spiritalia à Deo obtinenda, & bona temporalia contemnenda, adeò pauci sine purgatorio ad eundem deueniant.

Obijcias licet Iuditham totâ vitâ ieiunantem, Simeonem Iustum, & Annam, & si qui alij post Christum visum Sancti ex corpore obierunt, specialiter nutritium Christi sanctum Iosephum; quos speciali Christi institutione ad sanctitatem noui testamenti spectare credatur: sed super omnes Sanctum Ioannem Baptistam, cuius vita non aliud quàm contemptus mundi, & contemplatio spiritalium fuit. Quomodo ergo hi à clarâ visione Dei, vsque ad passionem Dominicam suspendendi erant?

Respondetur non ex puro ieiunio argui posse nullum fuisse in Iudithâ temporalium amorem; cum constet eam & diuitem, & gloriosam fuisse. Similiter vtrùm Simeon & Anna & quilibet alius defunctus ante prædicationem Christi, fuerit idonee & scientiâ & affectu comparatus, ad immediate adeundam visionem

Dei, nihil testati est. Quòd sanctus Iosephus mortuus sit ante Christum, non constat. Sancti Baptistæ mediam fuisse inter veteris & noui testamenti sanctitatem, videtur, nos docuisse Christus. Vnde quid dicendum sit de statu animæ ipsius in interuallo ante passionem Domini, non satis liquet.

Dices certum esse, sanctos veteris Testamenti fuisse in quiete; vt patet ex descriptione sinus Abrahæ. Non itaque fuisse in Purgatorio; qui locus est pœnarum. Responderetur, certum eos fuisse in magno desiderio, & quidè dilato; quòd non sine pœna contingit. Talis tamen pœna, tum respectu damnatorum, tum etiam respectu huius mundi, quietis rationem habet: cùm lætitia tum de præsentibus bonis, tum de certitudine futuri, exuperet pœnalitatem. Vix autem dubitari potest, quin omnes sancti defuncti ante passionem Christi resurrexerint cum Christo, cùm omnium æqua fuerit ratio; cùm diuturnitas nihil conferat ijs, quæ æuiternitate mensurantur; neque Christus quidquam, nisi

LIBER III. LECTIO X. 305

si ex reali & Physicâ rerum dispositione, (citra doctrinæ tradendæ necessitatem) operetur. Fuisse quoque immutationem ex vi visionis Christi, innuit textus, dum docet non exiisse sepulchris, id est, non resurrexisse, (neque enim viuentes par est adhuc delituisse inter mortuos) nisi post resurrectionem Christi.

Pater consequenter, quòd infantes in peccato Originali morientes, sint inter damnatos computandi. Cum enim peccatum Originale sit quædam detorsio animæ ad objecta temporalia, à naturâ & generatione facta; talis autem inclinatio non potest esse nisi circa amabile per se : Si discedat è vitâ infans cum hoc vitio, patam est, quòd cum exit in actum, infans euadit actu circa finem vltimum vitiatus ; & per consequens, gloriæ quidem incapax ; pœnæ autem quæ desiderium talis boni sequitur, obnoxius, id est, damnatus.

Vnde patet nascentem in peccato Originali, dici peccatorem & filium iræ, non propter peccatum actuale quod actualitèr habet; sed quia ha-

bet in sese principium per quod destinatus est ad peccatum, & iram consequentem peccatum; quasi dicatur hæres iræ. Ipsum autem peccatum Originale non est aliter peccatum, quàm quomodo habitus vitiosus relictus ex peccato dicitur peccatum; vel principium aliquod læsum, ut concupiscentia; licet in aliquo distinguatur; ex eo quod ista consistant cum charitate, à quâ originale extinguitur.

Dilucet protinùs quomodo Baptismus & Circumcisio habeant vim tollendi peccatum Originale. Cùm enim infans adhuc infans est, sicut per generationem accepit impressiones à parentibus, & postmodum etiam per affectum, præsertim matris sic etiam post natiuitatem per actiones à parentibus in eum profectas, accipit inclinationem ad ea ad quæ ipsi eum volunt dirigere. Sic itaque cum Baptismus vel Circumcisio ex voluntate parentum conferuntur, ad affectum in Deum ordinandum, corrigitur vitium nascituræ: Et si moriatur infans ante proprios actus, ani-

ma Deum pro fine ultimo habet, & inter fideles computatur, ut ad fidem destinata seu renata.

Hinc est quod martyrium celebramus sanctorum Innocentium, qui (et si non potuerunt adhuc in corpore existentes habere actum perfectum charitatis, qualis (in adultis martyribus) cum sit derelictio omnium per se amabilem amore Dei, facit eos absolute capaces visionis Dei) tamen id passi sunt, unde anima in actum exiliens post mortem, magnam apprehensionem de aduentu Christi, & salute per ipsum consequenda, nancisceretur; & per consequens, affectum versus ipsum.

Hinc etiam apparet, cur perfecta conuersio adultorum ab omnibus rebus temporalibus ad culturam animæ, qualis in ingressu status pœnitentiæ (qui fuit antiquorum Monachorum) præsumebatur esse, Baptismi vim ad extinguenda peccata credatur habere. Quia scilicet est abiectio omnium temporalium bonorum amore Christi; quæ est dispositio propria ad visionem Dei. Sed & in his,

308 INSTITVT. SACRARVM.
& in martyribus debet talis intrin-
secè esse in animâ, alioquin externus
actus nihil proficit.

LECTIO XI.

De statu & loco finali Corporum.

QVamuis autem omnes resur-
gentes & immutati, ex vi ange-
licæ operationis, & status cum eâ
compositi, accipiant corpora dispo-
sita ad perfectam subiectionem rel-
pectu animæ: necesse tamen est; ex
varietate affectuum animarum cor-
poribus coniunctarum, diuersas habi-
tudines in corpora redundare. Et
quoniam affectus animarum sunt ve-
hementes, dispositionem corporum
necesse est esse quasi in proximâ dis-
positione ad eas actiones, quæ natæ
sunt ex similibus affectibus oriri; qua-
les vultus imitantur pictores, vt mo-
res hominum exprimant.

Sanctorum itaque vultus pro affe-
ctu amoris & fruitionis, erunt lati, de-
cori, vniformitèr compositi, facie

ad Christum conuersâ, in quo situ finito motu substiterunt; nullius actionis exterioris voluntatem aut speciem præferentes; ut quorum affectus in-
trorsum sunt versi. Color non lucens sed nitens, qui sequitur subtilissimos & dilatatos spiritus; situs, statio; hæc enim homini ex naturâ est; cætero-
qui conformatus in admirantium vel adorantium figuram, corpore referente & exprimente conditionem internam animæ.

Nullæ quoque erunt sensuum delectationes, quarum cùm sensus sint purè canales & organa, anima verò subiectum, quæ in hoc statu erit delectationis plenissima: non modò quia præstantiores habet, sed quia harum ipsarum dulcedinem ex plenitudine scientiæ perpetuam habet. Et præterea, cum operationes sensuum sint in motu positæ, per admissionem sensitivæ voluptatis, relabimur in æternitatem motus, quam esse impossibilem demonstrat Philosophia. Sed & repugnant statui; quia secundum statum non à corpore in animam, sed ab Animâ ad corpora procedit actio.

Neque itaque obiecta sensibus mouendis destinata supererunt; vt musica, spectacula quælibet, & quæcumque ornamenta vocantur, quia inuentium illiciunt oculos. Aureolæ proinde Martyrum, Doctorum, & Virginū, non in exteriori aliquo signo vel cultu consistunt; sed in interioris gaudij eminēte qualitate; propter exteriorum actuum inter omnes humanos actus dignam excellentiam: quæ omnibus absque externi signi monitione erit notissima.

Neque vulnera Martyrum itaque reseruabuntur; non solū quia non sunt necessaria: sed quia, vt palam est, etiam in quibusdam totam corporis figuram deformant. Quod itaque Christus vulnera sua Resurrectionis tempore monstrauit, Apostolis & Ecclesiæ præstitit; quorum fidei sanandæ & confirmandæ erant necessaria. Præterquam quòd animæ gloriøsæ potestatem in corpus ad illud quomodolibet regendum, hoc pacto nobis demonstratam reliquit.

Pari ratione impiorum vultus tristes & mæsti, & ex commixtione plu-

LIBER III. LECTIO XI. 381

rium passionum compositi erunt. Situs, statio cum positurâ corporis. quæ mansit in eâ quasi fugâ ad centrum à facie Christi, à quo facies auersas, id est, ad centrum conuersas retinebunt. Cæteroqui figura corporis quasi auentium principalem actum finis, quem pro vltimato sibi statuerunt; sed desperatione, timore, & dolore stupentium & impeditorum, ne intentionem prosequantur. Ex quo sequitur, etsi anima potestatem in corpus habeat, eâ vti suo ipsius defectu non valere: vnde hæc ipsa potestas in sanctis dotum rationem habet, in damnatis non habet.

Rursus prosequendo paritatem, neque sensitiuæ pœnæ in iis erunt ob easdem rationes. Neque ergo instrumenta talium pœnarum, vel obiecta conseruabuntur. Non vermes, non sulphur, non ignis, non caligo, vel tenebræ: longè minùs blasphemix vel luctus vocales, neque planctus pectorum, non stridor dētium, & si qui alii motus commemorari solent. Sed hæc omnia metaphoricè explicanda sunt, de dolore mentis, qui omnia verificat.

Quoad ignem specialitèr confiderandum est, cur is potius quàm nives & infrigidantia, quæ causant stridorem dentium? cur non ex opposito, mensæ & vina delicata Sanctis apponentur? Adde quòd applicatur Dæmonibus quoque & animabus separatis, in quos actio ignis, quæ est per emissionem partium, est prorsus impossibilis; & sine propriâ actione, eleuata actio; vt alibi patet. Tandem etiam morti & inferno applicatur; de quibus nemo aliud quàm metaphoram somniauit.

Quibus non obstantibus, Damna-ri extrinsecus cruciantur ab omnibus circumstantibus Angelis & Sanctis obiectiuè; propter inuidiam & doloris augmentum, ex facilitate effectus, & neglectu adiutorij, & exempli. A Deo tanquam causâ omnium quatenus pœnæ sunt. Sed specialissimè à Dæmonibus tanquam causis peccatorum, & quæ viui commiserunt, & obstinationis in prauis affectibus, quibus in æternum addicti puniuntur.

Ex dictis planè elicitur, quòd
quoniam

quoniam terminus aliquis futurus est, & status essendi sine motu: & quòd operationes sensuum nullæ postmodum futuræ sint: quòd etiam non requireretur post iudicium alia ratio loci, quam mathematici, id est, purè continentis, absque eo quòd vel conferat vel noceat inexistentibus, velut locus naturalis: vel placeat aut displiceat contentis vel reiectis, quod moralis loci speciem variare videtur. Dico ex vi loci; ex vi enim societatis, unus placebit, alter torquebit.

Quare superflua erunt corpora qualibet mixta: multo magis immortalia, quales cælos posuit Aristoteles; æquè Theologiæ incongruos, quàm Philosophiæ impossibiles, & morū per Astromaniam corruptiuos. Magis quoquè supernaturale quoddam, siue solidum, siue liquidum quale cælum Empyreum quidam ponunt, ex humanis conceptibus mentientes diuina. Neque contrarius aliquis aut medius locus damnatis infestus, vt de sese patet, assignandus est.

Sed quoniam per ignem mixta re-

ducenda sunt in materiam aptam corporibus humanis, quæ inter elementorum extrema situm quendam medium videntur obtinere; ignis autem corporum tenuissimus, & capacissimus corporum in minimâ substantiâ, neque actius in summâ expansione, & absque motu; facile creditu est residuum mundi futurum ignem, seu subtilissimum ætherem, corporibus resurgentium commodo ordine collocatis refertum & distinctum.

LECTIO XII.

*Quòd Christus perfecit ea, ad quæ
exequenda missus est.*

EX ijs quæ de Christo commemorata sunt, euidentè constat, operâ ipsius factum esse, vt mutatis motiuis charitatis, facile sit humano generi viam salutis apertè prosequi: adeò vt rudes etiam eam faciliter & constanter ingredi valeant: factum prætereà per ædificationem Ecclesiæ,

institutionem Sacrificij & Sacramen-
torum, propagationemque & con-
seruationem per pastores & Angelos;
ut de facto totus mundus aliquando
hanc viam arripiat, & vsque ad finem
temporis prosequatur.

Quare cum lapsus Adæ difficilem
fecerit cælorum aditum, & vltimi
finis consecutionem humano generi:
& natura humana subiecta sit motui
& mutationi; & per consequens, tem-
pora determinata incrementi statio-
nis & decrementi nata sit habere; cla-
rum manet Christum connaturali
quodam modo reparauisse & resti-
tuisse naturam lapsu Adæ corruptam,
& ad perfectionem statui mutabili-
tatis conformem eleuauisse & per-
duxisse.

Rursus cum Deus dicatur hostis
& inimicus propter voluntatem in-
ferendi mala; amicus verò propter
voluntatem faciendi bona: Cumque
ex eo quòd natura ante Christum
ferebatur vniuersaliter ad vitia, & de
malo ad peius prolabebatur, seque-
bantur eam mala & temporalia &
æterna: per Christi autem operatio-

nem paulatim ex malis emergat, & quotidie maiora & maiora bona accipiat à Deo; palam est Christum reconciliauiffe Deum mundo, & pacem à Deo naturæ humanæ attuliffe.

Ad hæc, cum natura humana per peccatum Adami tot miserijs inuoluta fuerit, vt non foret ei possibilis ad finem beatitudinis, neque vniuersim neque in particulari peruenire, sed omnes indiuiduorum ipsius actiones (extra paucos quos Deus specialiter per fidem Christi præuenit) erant ex necessitate communi, non particulari, & logicâ, non physica, peccata mortalia; palam est, eam fuisse seruam peccati, & per consequens Diaboli qui peccati author & promotor erat. Quare cum liberare à seruitute sit redimere; palam est, Christum naturam humanam redemisse. Cumque hæc seruitus foret cum periculo æternæ damnationis coniuncta; qui autem ex periculis eximit dicitur saluare, Christus Dominus naturæ humanæ saluator est.

Adde, quod cum principium om-

nium malorum nostri generis fuerit peccatum Originale, quo fiebat vt, ex distorsione quâdam à naturâ indi-
râ, homines vniuersaliter arriperent mala pro bonis; & qui moriebantur in eo damnarentur: clarum est Chri-
tum, posito remedio ipsi peccato in sese, & in effectis ipsius, peccatum hoc, & quatenus Originale, & qua-
tenus opprimebat mundum & erat vniuersale peccatum Mundi, sustu-
lisse; & quasi chirographum Adæ, quo sese addixerat morti, cruci af-
fixisse.

Insuper Diabolum, qui peccati author & propagator erat, illudque per totam naturam peruulgauerat, & per illud dominium in omnes homi-
nes exercebat, & princeps erat mun-
di; sanando naturam nostram, eiecit de principatu suo; & eum ligauit, restringendo potestatem ipsius; & tum specialiter dicitur eum ligare in
Abyssu, id est, extra mundum vel humanam habitationem, cum totus orbis fidem Christi & perfectionem Christianæ vitæ amplexurus est, ex operatione Christi, quæ iam opera-

tur & vsque ad perfectionem profectura est. Et quia in Passione quasi completa est missio Christi Domini saltem quoad pœnalia, idcirco dicitur exspoliauisse Principatus & Potestates, & palam triumphauisse illos in semetipso, id est, in corpore suo.

Rursus quia in cælo spiritus esse dicuntur, ex eo quòd sint præsentes, id est, videant Deum, qui est in cælis; corpora autem esse in eodem propter localem eleuationem in aëra supra terram: primus autem Christus & Dei claram visionem adiit, & in cælum commoraturus ascendit: sed & factus est causa cæteris omnibus huius boni: rectè dicitur aperuisse cælum generi humano. Etsi etiam ex eo quòd animas nostras à desiderijs temporalibus & vmbreis figurisque ad claram prosecutionem spiritualium transtulit, etiam sic cælum aperuisse non malè sit interpretandus.

Quia etiam resurrectione suâ & aliorum, mortis potentiam temporariam tantum esse; neque inuictam, & exemplo & imitatione demonstra-uit: & quatenus est causa vniuersalis

resurrectionis, eandem omnino superavit: Sed & interea terrorem ipsius abstulit ab ijs qui recte eam considerant; merito dicitur eam morte & resurrectione suâ superavisse. Quatenus verò in generali resurrectione omnis motus finietur, & nulla supererit mortalitatis occasio; dicitur eandem destructurus, & in lacum iræ Dei coniecturus.

Tandem cum infernus sit carcer Spirituum visione diuinâ extorrium; ipse autem Sanctos ante passionem suam defunctos visioni beatificæ asseruerit; sed & postmodum in charitate perfectâ defuncturis eandem potestatem fecerit: sed & terrorem eius vniuersaliter humano generi incumbentem magnâ ex parte diminuerit: dicitur eundem momordisse. Quatenus autem in fine mundi portæ inferni erunt clausæ; neque amplius homines vorabit; eatenus ipse etiam destructus & in lacum iræ à Christo missus dicetur.

Ex omnibus demùm considerandum vel concludendum venit, quòd cum mundus non sit nisi seminarium

spirituum quos in æternitatem par-
turit; & hi non nisi ex hominum ge-
nere emicent, vel simpliciter, vel
quantum nos contingit: sequitur
mundo male esse, quam diu cum
nostro genere male agitur, aut certè
nobis hoc videri. Porro mundi infir-
mitas & curatio, ad mundi condito-
rem spectat, & diuina est actio. Vidi-
mus autem sine aduentu Dei in carne,
non potuisse restitui genus humanum:
vidimus & à Christo restitutum.
Concludimus itaque Christum Deo
digna fecisse, & perfecisse illud cuius
causa mittendus erat, & missus fuit.

LECTIO XIII.

*Quibus modis Christus effecerit
quæ fecit.*

Dicitur autem Christus Dominus
hæc omnia fecisse, satisfagendo
vel patiendò Deo pro peccatis huma-
ni generis. Cùm enim iniuriâ affectus,
iratus sit, donec qui eum iniuriâ af-
fecit, vel reposuerit pretium dignum,

vel passus sit pœnam conformem crimini: Christus autem agendo & pati-
endo effecerit vt ex irato propter
offensas nostras Deus placatus deue-
nerit, consequens est, quòd satis Deo
fecerit pro peccatis nostris; siuè per
actiones suas hoc effecerit; siue per
passiones.

Clarum autem est iniuriam Deo
inferri non posse (propriè loquendo)
& sic satisfactionem Christi meta-
phoricè, non propriè intelligendam.
Imprimis enim ius in Deo intelligi
non potest. Ius enim est ordo quidam
ad agendum vel possidendum aliquid.
Vnde si in Deo propriè poneretur ius
respectu creaturæ, esset coordinatus
creaturis, & haberet relationem ad
eas. Peius autem ponitur ius Dei vio-
labile à creaturâ; quod faceret ipsum
subditum actioni creaturæ.

Rursus cùm Deus sit omnipotens,
nihil potest ei fieri præter volunta-
tem ipsius, atque adeò per iniuriam,
cùm volenti non fiat iniuria. Simili-
tèr cùm sit Dominus & independens
à quolibet tam quoad bona extrinse-
ca, quàm intrinseca; clarum est, nihil

posse sic auferri ab eo, vt obligatio restitutionis inde incurratur. Et cùm omnia quæ fiunt, ab ipso sint, & sic, vt omnibus consideratis, melius sit, ea esse quàm non esse; consequens est iniuriam fore Deo, si aliter quicquam fieret quàm quomodo fit.

Adde, quòd cùm Deus perfectè sit Dominus creaturæ, vt pro arbitrio suo illi mala infligat; nulla potestas ei potest accrescere ex peccato creaturæ; sed tantùm voluntas. Immò cùm ipse non possit esse læsus, indigna Deo foret voluntas puniendi creaturam propter semetipsum. Sed & pœnæ pleræquæ (maximè inferni) neque sunt bonum læsi, neque seruiunt alijs exemplo, qui eas non vident; neque sunt medicabiles punito; quæ sunt solæ rationes puniendi. Cùm pœna non sit nisi bonum vtilè, & non per sese appetendum.

Sed & in creaturâ debitum non potest esse satisfaciendi Deo. Cùm sit in Dei potestate sibi satisfacere si foret læsus. Neque potest quicquam donare Deo, cùm quicquid est, eo ipso sit Dei; neque creatura vel ha-

LIBER III. LECTIO XIII. 323

beat quicquam, vel vim aut exercitium habendi vel faciendi habeat, nisi à Deo. Et tandem pœnæ ordinariæ quas subeunt peccatores citra miraculum in hâc vitâ & in futurâ, non sunt, nisi quæ ex ordine causarum sequuntur ipsa malefacta, & infliguntur à Deo quasi institutore causarum ex quibus sequuntur.

Hæc tamen non obstant, quin prosequendo translationem, leges metaphoræ satis strictè obseruentur inter Patrem & Filium. Reperiuntur siquidem & Personæ distinctæ, & naturæ, quarum altera sit offendens altera offensa: Et Filius, vnus naturæ seu communitalis offendentis; quique per consequens sit idoneus qui nomen debitoris sustineat, & pro totâ communitate puniatur; secundum vsum iustitiæ humanæ, quo aliqui ex communitate seligi solent, vt pro totâ puniantur; ex quâ leges iustitiæ sunt trahendæ.

Rursus bona quæ offert sunt ipsius per identitatem in Personâ; & sic exemptæ à iurisdictione Patris: & ipsemet æqualis dignitati ipsi Patri,

& non subditus illi despoticè ; neque actiones ipsius secundùm naturam humanam. Quare facta est satisfactio à Personâ distinctâ, æquali, debitore, ex naturæ communitate , ex bonis quæ non sint creditoris, neque alio titulo debita, neque accepta à creditore : præter quæ non requiritur aliud ad rigorem Iustitiæ commutatiuæ.

Quomodo de Christo intelligitur quod pro alijs satisfecerit ; sic & de alijs Sanctis, ijs præsertim quorum operæ specialitèr ad ædificationem Ecclesiæ diriguntur, clarum est quod pro aliorum peccatis satisfaciunt, & adimplent in corpore suo (cùm patiuntur pro Ecclesiâ) quæ desunt passionibus Christi ; quatenus opera & passionibus eorum, fructificant ad penitentiam de peccatis, & purgationem animarum a desiderijs peccatorum, & à reliquiis peccatorum præcedentium.

Facilè quoque ex dictis colligitur, quomodo Christus merendo acquisierit alijs gratiam. Merito enim secundum commutatiuam iustitiam ref-

ponderet merces; secundum distribu-
tionem, præmium: estque actio digna
his, id est, quæ talis sit, ut nata sit
ab intelligente Personâ obtinere ex
dignitate & qualitate suâ mercedem
vel præmium. Vnde quatenus ex
Christi actionibus aliquis effectus a
Deo provenit ipsi conueniens ex vi
actionis Christi; eatenus dicitur Chri-
stus tale bonum esse meritis.

Cum verò impetrare dicatur, qui
vi precum efficit ut exoratus aliquid
faciat: qui autem secundum ratio-
nem operatur, intuitu precum non
mouetur, nisi quatenus preces vel fa-
ciunt orantem digniorem (quod est
per accidens) vel cæteroqui dignum
æquali bono, ad hoc determinant;
sequitur Christum per orationes im-
petrauisse omnia quæ absolutè petiit.
Cum enim ex vnâ parte quolibet bo-
no dignus foret; ex aliâ parte propter
plenitudinem scientiæ, nihil peteret
incongruè; clarum est omnia impe-
trasse quæ petijt, utpote semper dig-
nus hoc particulari bono quod pe-
tebat.

Ex quibus obiter claret, Sanctos

in cælo neque mereri aliquid pro se vel alijs, neque pro peccatis alienis satisfacere; cùm non ponantur quicquam operari. Impetrare tamen dicuntur, & quidem omnia pro quibus orant. Cùm enim omnia quæ sunt congrua velint, id est, à Deo petant, & magis quæ sunt eis magis conjuncta; palam fit eos, quæ ab eis petuntur (si sunt factu congrua) specialiter petere; & quoniam Deus omnia congrua facit, etiam semper impetrare; & per consequens exaudiri pro his pro quibus rogant.

Clarum quoque est, Christum neque meritum esse neque impetrauisse aliquid prius existens ipso Christo; neque satisfacisse pro peccatis quatenus erant prius remissa. Cùm enim euidenter sit hæc omnia nomina significare causalitatem efficientem; & esse de causæ efficientis ratione (quæ est esse à quo aliud est quia ipsum est) esse priorem effectui in existendo; consequens est, quæ priora fuerunt Christo, non processisse ab ipso in aliquo horum trium generum, neque dici ab eo vel promerita vel impetrata.

Dices , nos interdum anticipatò pecunias operario dare , quas ipse postea meretur : sic itaque & Christus intelligi potuit meruisse quæ priùs data erant. Respondetur , antecedens falsum esse : nam similes pecuniarum non dantur , sed mutuo commodantur : neque ipse eas meretur operarius ; sed soluit. Vnde voces æquiuocæ sunt ; neque applicari potest hic modus ad Christum ; tum quia hic modus agendi indignus est Deo ; neque ex voluntate humanâ Christi ; & tandem tantum inter homines ut homines. Cum Christi operationes per modum naturæ exercentur.

Quare gratuitorum donorum Angelis , primis parentibus , & Sanctis antiqui Testamenti , causa fuit Christus tantummodò finalis vel objectiua ; quatenus similia dona præparabant Mundum ad aduentum ipsius ; vel quatenus erant fides vel amor ipsius , vel ex ijs procedebant. Cum autem habuerit quæcumque est meritus , & exauditus sit in omni oratione , & satisfactio ipsius nunquam indigna fuerit acceptatione , clarum

est cum neque meruisse quæ non sunt data, neque pro ijs orauisse, neque satisfecisse pro peccatis non remissis.

Cùmque mors Christi his ipsis modis operata sit, & non nisi mediante oratione ipsius; neque mortuus est pro re vel personâ non concessâ seu saluatâ: Sed vel oratio non fuit absolutè oratio, sed conditionalis; vel non fuit absolutè pro re vel Personâ, sed secundum quid, id est, pro aliquibus effectis illi personæ conferendis, vel re aliquatenus perficiendâ: & per consequens, in secundario tantum & analogico sensu Christus mortem suam obtulit vel orauit pro tali re & personâ, & similiter meritus est & gloriam, vel satisfecit pro peccatis ipsius.

Vnde apparet quæstionem hanc, utrùm Christus mortuus fuerit pro Damnatis, esse merè captiosam vel factiosam; cùm constet inter ipsas partes eum non voluisse absolutè saluationem illorum, neque obtulisse mortem suam absolutè pro eâ; & reliquos sensus huius propositionis esse
secunda

LIBER III. LECTIO XIII. 329

secundarios & improprios, & proinde non esse veros sine termino minuente vel alienante : neque vrgeri posse nisi apud ignorantes , quæquiuocatione externæ vocis impediti & implicati maneant.

Tandem intelligitur quomodo Christus in fine mundi traditurus sit regnum Deo Patri. Cùm enim motus sit corporeorum, & non sit sine partibus & quantitate; & ordinatio pertineat ad ea quæ sunt plura; ordinare autem sit actus sapientis, patet regere res in motu positas pertinere ad Dei sapientiam, id est, ad Filium. Quoniam itaque in fine mundi desinit motus, & æternitas constituta sit in constantia essendi, quæ pertinet ad Patrem : clarum est regnum rerum à Filio cedi Patri

LECTIO XIV.

*Quomodo creata omnia processerint
à Deo.*

Licet ex inspectione eorum quæ gesta sunt, usque à creatione Adami ad resolutionem rerum in finem ijs præstitutum, Dei œconomiam aliquo modo æstimare. Is cùm solus æternus sit, vt omnium rerum author fuit, sic neque ab alio occasionem vel conditionem opera sua principiandi habuit. Sed ex eo solo, quòd ex semetipso sit hoc quod est, fluxerunt ab eo quacumque fluxerunt; siue quæ in æternum mansura sunt, siue quæ ijs procreandis inseruiunt.

Porrò cùm Deus non habeat aliud essendi principium, quàm formale, seu essendi quod est; non possumus succedentes vel tempore vel virtute cogitationes in Deo imaginari; vt sit alia prioritas in ijs, quàm abstractionis; qui ordo in nobis & nostro intellectu est, & non in illo. Quare

LIBER III. LECTIO. XIV. 331

ipsa particularissima voluntas creandi Adamum, in Deo æquè prima est in existendo, & necessitate in ipso existendi, quàm ipse sui amor, vel ipse conceptus existendi à se, vel si quis alius abstractione prior videatur.

Non itaque possibilitas aliqua vel futuritio creaturæ præsupponi potest ante existentiam volitionis vltimatæ in Deo. Et si præsupponeretur, magis necessaria foret possibilitas talis creaturæ, quàm possibilitas Dei; quæ non est distinguibilis ab ipsius existentia; quæ, vt dictum est, æquè comprehendit vltimum conceptum Dei, quàm primum. Sed Deus potius essentiam suam à creaturis corrogaret, quàm creaturæ possibilitatem suam à participabilitate ipsius.

Scientia vero quàm aliqui necessariam putant futurorum conditionatorum, onerosior adhuc est: cum manifestè pertineat ad essentiam Dei. Neque ipsi Patroni conentur eam quasi extrinsecè adhærentem excusare: & tamen etiam futuritionem aliqualem creaturæ præsupponit Deo. Præterea euidentissimè declarat vo-

luntatis humanæ vel etiam diuinæ (si conformiter loquantur ipsius Patroni) temeritatem & indignam vilissimo puluisculo motionem : cum supponat voluntatem aliud facturam si coruus volet, vel in aliâ impertinentissimâ conditione, quam in opposito. Adde quod Homo, qui dicitur agere liberè, nullam habeat harum conditionum notitiam. Insuper huius futuritionis determinatio neque est purè possibilis, neque tamen actualis. Tandem ipsa propositio si accipiatur pro iudicio (sicut necesse est vt sit capax veritatis & falsitatis) non sit possibilis nisi amenti vel furiose. Vide vbi hi diuinitatis Consiliarij quarunt Deo principia, quibus administret hominum fata & Angelorum, in mente captorum somniis, quorum objecta neque mere possible sunt, neque vnquam futura.

Palam itaque est comprehensionem essentia Dei, esse consequenter scientiam creaturarum etiam existentium; & vt existentium : quandoquidem vltimæ & singulares determinationes ad creaturas, sunt æquè primò

LIBER III. LECTIO XIV. 333

in Deo, atque qualibet ratio essentialis. A fortiori itaque Deus ipsam suam cognitionem directè, tanquam partem objecti sui directi cognoscit: & non datur in Deo propriè reflexio; sicut neque in creaturâ aliquâ purè spirituali vidente semetipsam: cum enim visio quâ sese videt, sit affectio objecti visi, necessario directè videtur, ut quidpiam objecti directi.

Evidens consequenter est, non esse intrinsecè in Deo ponendas aliquas volitiones circa creaturas, quæ nihil in ijs operentur, siue dicantur vel leitates, siue volitiones conditionatæ; aut quovis alio nomine; cum huiusmodi volitiones sint imperfectæ, & etiam in hominibus ex imprudentiâ vel leuitate ortum habeant; & supponant vel non omnino, vel non firmiter resolutionem factam; cum necessario includant prioritatem ad alias, & vel ignorantiam quid agendum sit, vel etiam aliquam contrarietatem ad resolutionem faciendam; id est, ad rectam rationem. Adde dependentiam quandam à determinatione creaturarum: quæ omnia absurdè

in Deo collocantur, & non nisi in effectis quærenda sunt.

Non itaque aliam naturam habent creaturæ, quàm eam quam accipiendo à Deo hauserunt. Neque aliqua circumstantiæ vel accidentia sunt particulari creaturæ debita, nisi quæ data sunt: & quòd secundùm has circumstantias potest agere, est illi actio naturalis. Verum hoc non obstat, quin inter substantiam & accidentia creaturæ conuenientia sit: & possit concipi secundùm accidentia posse esse melius quàm de facto sit, saltem abstractiuè eam cōsiderando & præscindendo à serie causarum positâ.

Rursus cùm Deus perfectè Beatus sit, ex eo quod est; non potest intelligi quòd Deus operetur propter finem, sic vt aliquod bonum assequendum, habeat respectu ipsius aut volitionis eius rationem Boni; sed tantummodo respectu operationis externæ, seu alterius effectus priùs positi. Quare bonum quod respicit Deus, est conuenientia vnius creaturæ ad aliam. Vnde, cùm dicitur Deus facere quod est optimum,

LIBER III. LECTIO XIV. 335

intelligendum est quòd faciat quod est optimum, id est, conuenientissimum creaturis.

Neque hoc inde, quia quòdcumque ipse vult de creaturâ, hoc est ei optimum: sed quia verè contemplando solam creaturam, est optimum. Non tamen ex aduerso, quòd ipse ex contemplatione creaturæ eligat facere quod ei optimum est: sed quòd sicut regula iuxta quam ducitur linea, facit eam rectam, quia ipsa priùs in se est recta; sic ex eo quòd Deus est essentialiter ratio & bonitas, necesse est quòdcumque in creaturam ab ipso procedit, esse similiter in sese bonum, & membrorum conuenientiam habere.

Ex hoc item fit euidens, nihil posse immediatè a Deo procedere, quod non sit perfectum secundum optimam accidentia quæ possunt ei intrinseca esse: & si quis sit defectus in effectu aliquo Dei, cum necessariò procedere ex determinatione aliquâ mediâ inter Deum & effectum à creato aliquo factâ. Cùm enim Deus sit plenariè bonus & ipsa bonitas, clarum

est à parte principij non posse deesse bonitatem; postquam igitur creatura ponitur capax optimorum accidentium, illa habebit à Deo, si Deus solus & non vt ab aliâ causa determinatus operetur.

Vlteriùs cùm creaturæ vel sint purè corporeæ, vel purè spiritales, vel ex vtrâque naturâ compositæ: & corpora quidem pura sint purè instrumenta motus, motus autem non possit esse æternus: quare neque huiusmodi corpora propter sese nata sunt fieri, sicut quæ æterna sunt: sed neque creaturis purè spiritualibus purorum corporum opus est; planè concluditur, Mundum hunc non nisi creaturarum mixtarum in gratiam esse, & esse conditum.

LECTIO XV.

*Cur homines non sint creati in statu
Beatitudinis.*

PORRò hoc creaturarum genus,
Homines seu Animalia rationalia
solemus appellare. Concluditur ita-
que tunc Mundum hunc optimè con-
stitutum esse & gubernatum, si sic
ordinatus est, vt humano generi (si-
ue vnâ telluris nostræ sphæram in-
sideat, siue plures vasto sparsos vni-
uerso orbes impleat) ita sit prouisum,
vt optimè sit illi in æternitate con-
stantiæ, post excidium Mundi om-
nibus æternitatis capacibus incep-
turâ.

Hominum verò generi optimè esse
conuenit, vel quia singulis generis
optimè est; vel quia sic vni melius,
alteri minùs bene, vt vniuersis col-
lectiuè sumptis melius esse non po-
tuerit. Porro singulis optimè esse,
vel ex creatione contingere intelli-
gendum est, vt singuli in statu Bea-

titudinis creati sint : vel vt in inferiori gradu producti, per motum & gradus eò deducti sint, vt eam Beatitudinem adepti sint, quæ secundum habitudinem essentia singulorum potuit eis maxima inesse.

Quoniam verò status Beatitudinis, idoneitatem Animæ ad esse, præuiam capacitati totius ad esse supponit : eam autem vnico Christo inesse constiterit ; æquè certum est, impossibilem esse per creationem singulis humani generis indiuiduis ad optimum iessendi statum ingressum. Per motum itaque hic progressus faciendus est. Qui cum sit via de potentiâ ad actum, ex intrinsecis suis subiectus est contingentia, & non potest non aliquoties deficere.

Dices, cum essentia Dei sit æqualiter ratio seu bonitas, & potentia : posito quòd melius sit singulis hominibus beatos esse, non esse dubitandum, quin Deus potentiam ad hoc efficiendum habeat. Quare neque in naturam animarum, neque in indolem motus reiicienda est causa, cur non singuli vniuersim sint beati;

sed vel concedendum Deum non facere quod humano generi simpliciter optimum est; vel melius esse aliquos damnari, quàm omnes saluari; & hoc ipsi generi humano.

Respondetur objectionem rite formatam esse; atque proinde considerandum, si iidem homines qui nunc in saluos & damnatos distribuuntur, omnes forent beatitudinis compotes, maiorem fore generis humani excellentiam in vno genere, seu in supremo gradu; sed amplitudinem eam (quæ nunc per adeò dissipatos gradus hoc genus in infinitas varietates trahit) illo vnico gradu comprehensum iri; atque adeò genus humanum intensiue quidem perfectius futurum, non extensiue.

Vel potius vnum quidem gradum generis humani, multitudine membrorum suorum, quasi materiali perfectione æquaturum & superaturum actu futurum statum. Sed quod propriè dicitur genus humanum, non omnino futurum. Sicut si tot forent homines, quot nunc sunt animalia illorum loco, genus animalis non esset;

quantumuis quod foret, perfectius foret quàm genus animalis. Sic quoque cùm varietas hæc statuum nulla foret (quæ tamen ad generis humani rationem spectat) neque genus humanum foret.

Cùm itaque genus humanum consistat in participabilitate Dei, quæ reperiri potest in composito ex corpore & animâ spiritali; tunc melius est generi humano, si quamplurimæ & optimæ differentiæ participabilitatis huius existant. Et hoc in genere entis melius est: & hoc proinde à Deo faciendum, vt optimè faciat. Non enim quod particulari alicui melius est, sed quod omnibus consideratis melius est, hoc tandem à Deo, vt entis & naturæ parente, expectandum est.

Petes, quid interesset, si homines Beati forent, vtrum aliquid in ratione entis minus perfectum foret? certè cunctis melius foret. Respondetur quòd cùm omnis ratio Bonitatis & entis à Deo sit, à Deo autem vt entis quasi vtero procedat ens vt ens, id est, vniuersalitas entis; eam esse

optimam, Dei interest, vt actio ipsius sit conformis principio suo, in quo consistit esse ipsum opus perfectum. Perfectioni autem totius operis cedit perfectio cuiuslibet membri; qualis est, vt his singulis benè & beatè sit.

Euidens præterea est, cum singulari homini puta Petro, diuersi gradus Beatitudinis possint competere; neque vllus supremus sit; neque possit aliquid procedere à Deo nisi ex ratione determinato; & si Deus immediatè omnes cum Beatitudine crearet, non foret aliqua ratio extra Deum cur hic determinatus gradus Beatitudinis conferretur Petro; neque à Deo solo minor quam summus gradus dari posset, neque tantus vllus esset; clarè Petrum sic creari non potuisse: & simile est de reliquis hominibus & Angelis. Quare Mundus qui potuit optimus fieri, faciendus erat, vt optimè foret hominibus & Angelis, vt dictum est.

Replicabis, bonitatem Dei esse maiorem potentiâ, si quidè vellet omnes homines esse beatos, neque

possit efficere : immò vnumquemlibet eorum quos fecit velle melius sese habere, neque possit efficere. Respondetur, potentiam Dei quatenus est in Deo, & quasi à Deo ; id est, in radice, esse absolutè infinitam ; prout autem à nobis comparatur objectis, sic limitari per ipsos effectus : sicut æternitas ex sese infinita, tamen vt præhabens formaliter vnum instans, non excedit illud. Et si potentia diuina comparetur objecto implicanti esse & non esse, limitatur quodammodo extrinsecè, vt sit aliquid, vel videatur esse, quod Deus non possit facere : quod reipsa non sic sese habet ; sed effectus non est verè effectus, neque ens ; & impotètia est in nobis formare ipsius imaginem ; & longè magis impotentia foret, quæ ad reale esse talis Chimæ ordinaretur. Sicut autem in ente aliquo rationis, impossibilitas intrinseca prædicatorum, facit impossibilitatem & non entitatem ; sic impossibilitas plurium entium immediata vel mediata, facit impossibile ea simul existere. Et simile est, si entia non quidem se-

cundum se, sed secundum conditiones aliquas sint impossibilia. Sic itaque non ex impotentiâ Dei, sed ex non entitate compositionis entium est, quòd aliquod ens non possit fieri melius : quia non consistit & hoc esse melius, & aliud esse quale est, cuius tamen esse tale, magis interest vniuersi. Ad argumentum itaque dicitur, quòd cum volitio Dei supponat intellectionem quid sit ens & quid non ; non potest poni Deum velle aliquid, quod in sese habet rationem non entis. Quare nihil Deus veller quod est impossibile (loquendo de actu aliquo ipsius) & per consequens, voluntas non est latior potentiâ, neque hæc minor illâ.

Replicabis iterum, quod sicut vnus aliquis Mundus est optimus, sic vnus aliquis status vel gradus Beatitudinis est optimus & conuenientissimus Petro : & sic de singulis hominibus possibilibus. Potuit itaque Deus in illo gradu singulos creauisse ; & sic melius fuisset omnibus hominibus. Respondetur, quòd cum gradus Beatitudinis, respondeat cha-

ritati, & charitas ab actibus, & actus à circumstantijs pendeant; & circumstantiæ in quibus poni possit Petrus, sint infinitæ; non videtur vnus aliquis certus Beatitudinis gradus posse illi esse proportionatissimus. Sed quodcumque sit de hoc; clarum est, cùm diuisibilitas continui sit infinita, etiam possibile hominum indiuiduationes absque numero esse; & cùm infinitudo cum actu repugnet, certum dumtaxat eorum numerum creari posse; & cùm non sit aliud ante creationem præter solum Deum, cui omnes sunt indifferentes, si crearetur immediate certus numerus, numerum creandum sine ratione præferri aliis; quod est clarè indecens Deo & impossibile.

Petes, cur sicut certus numerus hominum habet constituere perfectissimam repræsentationem & participabilitatem diuinæ essentiæ, ideoque præfertur majori possibili; sic etiam certus beatorum numerus non possit repræsentare perfectissimè participabilitatem Dei in eo gradu, &

LIBER III. LECTIO XVI. 345

propterea praeligi? Respondetur quòd si Dei causâ praeligerentur vni alijs, hoc possit in suspicionem cadere. Verum etiam sic alij non Beati creandi forent ob eandem rationem. Nunc autem cùm hominum gratiâ, id est, sui ipsorum, crearentur beati, qui singuli sunt quoddam perse & finale bonum independens à cæteris, nulla prorsus suppetit electionis ratio; electio enim circa media est, & non circa fines.

LECTIO XVI.

Dei gubernationem in communi esse conformem naturæ hominum.

Cùm itaque defectus singularium à Deo immediatè procedere non potuerit, creandus erat homo in materiâ, & motu, & serie causarum secundarum, per omnes naturæ gradus, ad finem suum per plures defectus, in singulis gradibus trahendus; vt vniuersa tandem hominum natura, procedendo à proximâ materiæ

& infimâ ratione vsque ad supremam, compleatur, nullâ exclusâ à Beatitudne : & pluribus singularibus in vnâquâque deficientibus.

Cûmque Angelicæ operæ non adhibeâtur nisi ex requisitione humanæ naturæ ; euidens fit , gubernari res mundanas , & specialiter humanas, eodem prorsus modo, atque si solæ causæ secundæ forent ; nisi sicubi ipsa naturæ humanæ conditio aliud flagitat, Quare cum libertas sit secundum naturam specialem hominum, & contingentia secundum naturam communem naturæ corporeæ ; palam est , quoad hæc gubernari res, quasi nulla in Deo præscientia vel prædefinitio foret.

Quod verò conturbat speculantes prædefinitionem est, quòd imaginantur Deum quasi priùs naturâ velle effectum, & deinde quasi cogitando media inuenire : quod indignum est Deo, & impossibile ei cuius essentia est actu esse quidquid potest esse. Simul itaque & semel & media propter finem , & finem per media exiturum definiuit Deus. Vnde ex

LIBER III. LECTIO XVI. 347

vi ipsius definitionis, effectus non erit nisi causæ sint, neque aliter quàm ex vi earum: & media non erunt nisi ut finis consequatur ex ijs. Eodem itaque modo se habent, ac si sola essent, & nulla foret prædefinitio; quæ de facto non operatur, nisi ut illa sint.

De præscientiâ quoque clarum est, ex vi vocis abstrahere ab eâ quæ pendet ab objecto, & quæ non pendet ab eo; eam verò quæ pendet ab objecto (cùm supponat objectum) nihil immutare vel efficere in objecto: quare, non obstante præscientiâ, res humanæ gubernantur eodem prorsus modo; atque si nulla præscientia foret; & per consequens nihil potest inferri ex præscientiâ, quod ex ipsâ naturâ rerum à priori non sequatur.

Dices, præscientiam, etsi nihil immutet in rebus, tamen ex eo quòd ipsa certa sit, arguere etiam esse certitudinem in rebus: quare ex præscientiâ sequitur, esse, ab ipsâ usque Dei ex se existentiâ, determinationem in causis, ex quâ certissimè se,

quetur suo tempore hic effectus. Quid autem necessitas dicat præter certissimam & inuiolabilem determinationem, non liquet, neque videtur posse explicari.

Respondetur, præscientiam (de quâ potest esse sermo) esse triplicem; diuinam, quæ est causa rerum; Prophetica quæ ab eâ dependet; & Angelicam quæ neque dependet à Diuinâ tanquam principio obiectiuo, neque effectus pendent ab eâ. Imprimis itaque diuina non est aliud quàm prædefinitio, si explicetur modo posito; atque proinde iam de illâ responsum est.

Si verò vrgeatur habere existentiam ante res, etiam hoc in rigore falsum est: *ante* enim & *post*, ordinem successionis dicunt. Cùm itaque in æternitate nulla sit successio, non solum in seipsâ, sed etiam quoad res, quibus & præteritis & futuris (indivisibili suo esse quod est) præsens est, non potest dici esse ante illa quæ videt. Sed præsentia videre, id est, sibi præsentia, quantumvis in semetipulis aut futura sint aut præterita.

LIBER III. LECTIO XVI. 349

Angelica modo præscientia, etsi deficiat à diuinâ in modo existendi per æternitatem, congruit tamen in simultaneâ comprehensione omnium causarum. Vnde certitudo quæ est in illâ, non est in rebus nisi per omnes causas: ex vi itaque illius, non potest argui certitudo in rebus, dum solæ communes causæ sunt: quia communium causarum ex coniunctione specialium variatur operatio: è contra itaque ex eo quòd certitudo quæ est in mente Angelicâ, sit ex eo quòd omnes causæ sint in eâ, fit non esse certitudinem in rebus.

Replicabis, clarum esse, tum in mente diuinâ, tum in angelicâ, certitudinem esse; & ex eo sequi, effectum iam inde esse determinatum. Respondetur admissio antecedente, negandam esse consequentiam. Esse enim determinatum in solo intellectu, non est esse determinatum; non magis quàm esse hominem pictum, sit esse hominem: determinatio autem in re non est posita, sed per actiones hominis ponenda: & sic patet quomodo homo electionem suam suis operibus certam faciat.

Prophetica modò præscientia, quâ pendet ex diuinâ secundùm vtramque harum conditionum, clarum est quòd saltem solutio hæc quæ data est oppositioni de præscientiâ angelicâ; ei communis sit, neque sit vlla specialis difficultas de eâ.

Factus est itaque Adamus & progenies eius, corpore vasto & durabili; mente pronâ ad corporea obiecta, maximè ad generationem & fœminæ amorem procliuis; qualem necesse fuit ex tellure vehementi calore & humore quasi elixâ ipsum oriri; & conueniens facto, specialiter ad propagationem generis humani. Clarum autem est, animum plerumque tali corporis habitu obtusum esse & grauatum. Quare motiua charitatis talia ei proponi debuisse, quæ faciliter apprehenderentur.

Et sic videmus immortalitatem & vitæ delicias ei propositas fuisse; mortem intentatam peccanti. Præterea continuam Dei custodiam adfuisse: qui personaliter se adorandum offerebat: personalitèr Cainum reprehendebat: Enochum instruebat:

LIBER III. LECTIO XVI. 35^f

Noachum consolabatur. Neque cum hac curâ satis fuit pluribus ad finem perducendis, maximâ parte pereunte, & ipso Adamo in grauem offensam temerè incidente.

Ex quibus patet, cur Adæ lapsus humano generi fuerit necessarius, atque à Deo permissus. Conseruandus enim alioqui erat idem naturæ status; & homines longo tempore pauci ad mediocrem gradum Beatitudinis ascendissent; cum toti ad temporalia magis fruenda, quàm quærenda æterna forent intenti; & modicè de futuris solliciti.

Patet vero ex lapsu Adæ factum, ut ex mutatione stationum anni, & ex necessitate, hominum ingenia acuerentur; & sicut impij in artibus inueniendis sollertes euaderent, sic pij, in ijs quæ pietatem spectant, & persecutione malorum & suis operis euaderent peritiores, & ampliorum gradum Beatitudinis acquirerent. Considerato itaque augmento & multitudinis & sollertiz, planè videtur meliùs actum cum genere humano (considerato solo interstitio

inter creationem & diluuium) vt
Adam lapsus fuerit ; quàm vt status
Paradisi fuisset continuatus.

Sed inundanda fuit tellus & delendi habitatores ipsius , vt succederet generatio capacior rationis. Exsiccata siquidem tellus , & magis montosa ex diluuiio , acutiores Solis radios sensit , & incaluit magis sanguis humanus , vnde celerius & ad rationem accommodatius hominibus cerebrum factum est : & cùm vix vna familia priùs diuinæ seruituti mancipata hæreret , nunc integra gens eiusdem mysterijs initianda selecta est.

His itaque (etsi nondum rationis puræ capacibus) sublimiora tamen ministranda fuerunt præcepta & monita. Vmbris itaque & figuris materialibus tecta spiritalia eis proposita sunt. Et vt carnalibus , bona temporalia quidem promissa sunt : pax , longitudo vitæ , securitas , diuitiæ , abundantia alimentorum & filiorum , & similia. Sed iussi quoque sunt meliora sperare à Redemptore venturo ; qui omnibus ferè sacrificijs
&

& cætemonijs significabatur magna præstiturus.

Horum ætas tribus distincta est incrementis. Primò enim sub iudicibus quasi semet ipsi fruebantur. Mox sub Regibus bella gerebant, & honori dominationique studebant. Tandem sub Sacerdotibus ad pietatis culturam propiùs sese applicabant. Duces plerumque Prophetæ erant, vel de Prophetiâ participabant. Sub Regibus nunquam ferè deerant Prophetæ. Sub Sacerdotibus subtractâ paulatim prouidentiâ illâ extraordinariâ, per disciplinam & prudentiam regebantur.

Interea reliquus Orbis pacis & belli artibus florebat; & scientiæ intentus magnos progressus fecerat: paratusque erat vt disciplinam pietatis reciperet, & igniculos sub cineribus Hebraicis latentes, subiectâ escâ caperet, & in claram lucem daret. Venerat itaque plenitudo temporis, vt genus humanum bona spiritalia in sese speraret & concupisceret; & ipsâ rationis vi ad Beatitudinem conniteretur; sublatis iam vmbreis & allegorijs.

Ex his itaque patet, cur tantopere dilatus est aduentus Christi. Et cur in tam parua multitudine saluati sint ante aduentum ipsius; puta propter ineptitudinem naturæ vniuersalis ad rationem, & illa motiua quibus Beatitudo & vita rationalis in propria suâ pulchritudine monstrari & persuaderi poterat; motiuorum autem & sacramentorum vmbatiliū quæ applicari poterant imbecillitatem; & quod continuis miraculis ad gubernationem opus erat. Quod signum est imbecillis adhuc, & parum constantis, & frequentiore reparatione egentis naturæ.

Quoniam verò proprium est naturæ humanæ primò credere, mox inquirere, demum ad scientiam peruenire: Christianæ Reipublicæ quatuor ætates fore necessum est. Vsq̃ue Constantinum enim purâ fide miraculis nutritâ, & exemplis, creuit disciplina. Ab illo tempore Hæreticis succrescentibus, per rhetoricam & logicam quandam inquisitionem confirmata est. Mox in scientiæ certitudinem emicaturam expectamus: quâ

quia non est perfectio rationalis vltior, superest dumtaxat senectâ & interitus.

Ex quibus constat Naturam humanam, ab ipsa primâ fabricatione, per gradus connaturales eleuatam esse & iri vsque ad naturâ vniuersalis periodum: & per consequens, proportionatè ad ipsius indolem, ad finem suum esse perductam.

Sequitur æternitatis status, Beatis animæ corporisque bonis refertissimus; Damnatæ ex suâ ipsorum peruersitate, infœlix. Summa enim bona temporaria non possunt comparari minimis bonis cuiusvis Damnatæ à Deo in ipsos pæne inuitos, ipsâ causarum à Deo institutarum seriè collatis: illi puta eminentiæ animæ, & plenitudini scientiæ, & immortalitati corporis, & immutabilitati: quibus si frui ijs ab ipsâ illorum peruersitate copia daretur; etsi non statui Beatorum comparandus, tamen respectu huius mundi fœlicissimus foret eorum gradus.

Cùm itaque nihil absurdius dici possit, quàm nihil, esse melius ente;

fed & omnia mala non fint, nisi viā ad non ens; clarum est (simpliciter loquendo) melius ijs esse vt sunt, quā omnino non esse; præsertim cū non possint ignari esse huius veritatis; & ex eo quod sese effusissimè diligant, non possint non aliquem sensum sui boni habere: Sed & pœnæ non extrinsecus inflictæ, sed voluntariæ & purè volitiones sint; & quod maiora sunt tormenta, tantò nobilior quoque sit natura ex quā oriuntur.

Nunc cum ex dictis constet disciplinam Beatitudinis humanæ, esse eonnaturalissimam, dulcissimam, securissimam, facillimamque; genus quoque humanum in eā fuisse eruditum, per eos gradus, qui secundum causarum ipsius naturæ seriem, erant comparatè ad ipsum genus humanum, optimi: rursus quod status tum Beatorum tum infœlicium non sit alius, quā qui ex ipsorum operibus quasi effectus & fructus sequuntur: Quid opponi potest, cur non optimè, & secundum perfectam Sapientiæ & Bonitatis legem, à Deo

cum humano genere sit actum?

His si adijciamus, damnatos ipsos ex nihilo ad nobilissimum entis gradum euectos : miseriam ipsorum ex præsentì eorum peruersitate pendere : posse etiamnum si vellent esse Beatos : ex vi & serie naturæ, cuius partes sunt, non potuisse ijs melius contingere, neque omnibus, neque singulis : sed & naturam & Deum futuros fuisse deteriores, si aliter cum ijs actum foret : Nonne evidens statim apparet, non solum benè, sed & optimè, & ex maximâ bonitate cum ijs esse actum ; & *iustificatam esse Sapientiam aduersus filios suos?*

FINIS.

A P P E N D I X
AD INSTITVTIONES
THEOLOGICAS.

SIVE

BREVIS EXEGESIS

In aliquot diuinæ Apocalyp-
seos capita; quâ, Sanctæ Ec-
clesiæ Catholicæ progressus
& consummatio, magis par-
ticulariter enarrantur, quàm
in sacris Institutionibus; in
earundem Supplementum.

AVTHORE EODEM.

*Sapiens animaduertet Parabolam, &
interpretationem; verba Sapientum, &
Enigmata eorum. Prou. i.*

APPENDIX

AD THEOLOGICAM

THEOLOGICAM

THEOLOGICAM

THEOLOGICAM

In adiutorio Domini

locus caput & de

classe Catholice

& confirmationis

richardus emmanuel

in domo dei

condidit & p[ro]p[ri]um

AVTHORE FORTIS

2. deus amicus

inquit & deus

2. deus amicus



AD LECTOREM.

CUm ad eam partem Sacrarum Institutionum, quæ Ecclesiæ progressus & mundi exitus delineantur, animum adiecissem: Visum est non absurdum factum, si sicut earum aditum aliquot Geneleos capitulorum breui explicatione muniuissem; sic earundem finem, Apocalypseos, quæ Ecclesiæ consummationem potissimè spectare videretur, breui elucidatione clauderem.

2
Non quòd vtriusue libri
commentarium cogitaré;
quod liberiores horas exi-
geret : Sed quod si obscu-
rissimis scriptis lucem eam
inferrem , quæ in eorum
oculos , qui otio literario
abundant, vibraret, fælici-
ter mecum actum crederé.
Addidi itaque oculos in eas
partes, quæ scopum institu-
tionum attinerent:& quan-
quam non tum primò sen-
sa latentia rimarer, visus est
tamen desperationis ple-
nus labor. Cùm tamen ipsa
rei difficultas hortamento
foret, improbo desiderio
cessisse visus est, & ausus

sum sperare, & parturiui,
& natus est homo. Quam
appellationem mereatur,
tu vide. Ego prima capitula
non tetigi, ne commen-
tarius vocitaretur, & ex-
pectaretur Allegoriarum
iusta applicatio. Mihi enim
satis est, si institutionum
doctrina sublustri quâdam
coruscatione à libri huius
authoritate affletur. Eluci-
dationem operis aut ipse, si
tibi vires superant, conare,
aut à non defuturis opperi-
re. Intereà fruiere ijs quæ
hoc libello proposita sunt
fidei tuæ circa finem mun-
di, quæ ex præfixa nobis in

⁴
institutionibus, ex solâ ra-
tione agendi lege, illic ex-
ponere erat vetitum, & ad
plenariam tamen notitiam
reuelatorum necessaria.





BREVIS EXEGESIS

IN ALIQVOT DIVINÆ

Apocalypſeos capita, quā
Sanctæ Eccleſiæ Catholicæ
progreſſus & conſummatio,
magis particulariter enar-
rantur, quā in ſacris inſti-
tutionibus, in earundem
ſupplementum.

INTRODVCTIO

*Naturam facultatum ad locutionem
ſpectantium, maxime Poëtices,
explanans.*



Vocem emittere, effectuum
ſuorum proditricem, nata
ſunt pleraq; Animalia. Ho-
mini, cui citra paſſionem
agere propoſitum eſt, præter gemitum & cæteras voces motuum infe-

6 APPEN. DE CONSUM. ECCLES.

rioris animæ indices & effectus, quas interiectionum indiculo colligunt Grammatici, indultum est articulationum vocum genus, quarum compositione animi sui sensa sui similibus patefaciat. Hanc humanæ actionis partem, locutionem appellamus. Circa quam excolendam, plures seu virtutes, seu facultates (quæ etiam liberales & ingenue vocitantur) suas operas impendunt. Ad ceteras aditum munit Grammatica. Hæc aperit & breviter cogitata explicare docet, superflua ressecans, & quæ aptissima rebus sunt vocabula feligens. Eadem suauitatem curat, mitigatis consonarum asperitatibus, & continuato vocalium per interpositas consonarum consitiones hiatu. Ornatu quoque blanditur, tum distributione vocum (quantum claritas permittit) inexpectatâ; tum latiora quædam interspergens troporum & figurarum lumina, quæ auditorem & arrigant & delectant.

Hæc sunt potissima Grammaticæ officia. A quâ lampadem suscipit Prosodia, Musices princeps portio.

INTRODVCTIO. 7

Hæc orationem sonoram reddit, metricam quoque & tinnulam. Sonorilex alia est in quotidiano sermone, alia in publicâ & elatâ elocutione. Metri quoque alia ratio in recitatione & colloquij imitatione, quæ ab Epicis & Dramaticis scriptoribus exercentur; alia compositior & modulatio, quam concitatoribus æstantis animi impetibus adhiberi experimur. Tertius Prosodia labor, quo repetitâ ad certos numeros eâdem syllabæ qualitate, aurem ferit, & irritat animum, vt experimento cogente dulcedinis confessionem ab inuitis exprimit; sic quia alienâ quâdam suauitate intentionem rationis ad dictorum mentem applicatæ quodammodo abrumpit, & ad sequiora reuocat, à cultioribus nationibus studio vitatus est: & in colloquiorum potissimè imitationibus nescio quid leuitatis & dissonantiæ præ se fert. Ferunt nihilominus Hebrææ Poëseos sapientes, aliquatenus à sacris esse scriptoribus non contemptum.

At enim quoniam locutio non solis congestis sonis fabricatur, sed ani-

● APPEN. DE CONSV. ECCLES.
mi præcipuè sensus & cogitatis ani-
matur; Proxima est Dialecticæ sedes,
quæ per definitiones & diuisiones &
sequelarum directiones, dicendorum
longam seriem ex vnius propositæ
veritatis ostendendæ intento appen-
dit: scrutinioque naturæ per thesau-
ros notionum, quos locos vocant,
opulentat. Inter hæc secernere quæ
pro auditorum proportionem promen-
da sunt vel tacenda, alterius pruden-
tiæ est, quæ humanæ actionis calles
pernouerit. Huius consultum ora-
torem dicimus. Hic quid ætatibus
& moribus, quid officijs & animi
motibus, quid præsentibus concio-
nis apud quam loquitur commodis &
cogitatis profit, obscurè, & distinguit,
& per subjectas sibi artes exequitur.
Et hic locutionis quatenus civili ac-
tioni & vsui seruit, magister est, &
audit.

Attamen quoniam humana natu-
ræ ea compositio est, vt animam &
rationem in carnis & sanguinis quasi
fluctibus nata bundam ferat, eorum-
que subjectam æstuationibus; deerat
vltior pars, quæ rationem per ho-

INTRODUCTIO.

sum motuum adminiculum excitaret & promoueret : Et per simulacra quædam & quasi spectra, quæ in animales motus magnam potentiam haberent, & egregiis quoque intus cogitatis foeta essent, tardam mentem subleuarent, & ad ingentia vota attollerent. Hanc Poëticam dixerunt Græci, ut quæ per factitia seu fictitia schemata viam sibi ad animum sterueret ; & quò pura ratio imbecilla erat, agnatione ad carnem & molliorem hominis partem penetraret. Et de cæteris quidem satis ad rem nostram sic breuiter prestrictum esto.

Poëtices ingenium adhuc paucis illustrandum est. Et cunas quidem ipsius inter profanos scriptores occupasse videntur Vanitas & Adulario. Dum enim eminentiores hominum actiones in cælum eleuare conarentur audacia admiratorum ingenia, hanc artem inuenerunt. Hinc inter Græcos Pindarū habemus & Homerum : Illum certaminum Græcorum Præconem ; hunc Maiorum Græciæ splendide gesta, qui ultra posterorum gloriosa mendacia extolleret, imitatio-

IO APPEN. DE CONSV. ECCLES.
ni commendaret. Adeò felici fabu-
larum commentatione, & adeò in-
genuâ actionum expressione, vt non
immeritò à prudente Historico eam
sit laudem affecutus, vt solus Poëta
nomine dignus censeretur, & admi-
rationi proponatur, quod neque ante
illum quem ille imitaretur, neque
post illum, qui eum imitari posset
inuentus est. Rectè; qui enim hoc
tentarunt, quò laboriosius id egerunt,
eò latius defecerunt.

Verùm vt ipsam rem declaremus;
Ex eo quòd in animam sensitivam im-
pressio à Poëtâ molienda sit, neque à
consuetis insignis fiat passio, & per
admirationem ad veritatis desiderium
paratissimus sit aditus; palam est in-
solita & admiranda esse Poëtis se-
ctanda. Hæc partim vocibus, par-
tim rebus, comprehenduntur. Inde
frequentes sunt apud illos audaces
Metaphoræ, & Tropi, præsertim
Hyperbolæ. Hinc Epitheta, & com-
parationes vastæ, & ecstasticæ quædam
figuræ, quasi ab inhabitante numi-
ne rotatæ; Apostrophæ ad inanimata
vel absentia; Prosopopæiæ, Hypothe-

INTRODUCTIO. II

Ies, Exclamationes & Interrogationes
enthusiasticæ; & quæcumquæ aliæ
loquendi formulæ, quæ ad plebem
rapiendam, & in furorem præcipi-
tandam solent applicari. Rebus tan-
tundem egerunt Semiramis, Numa,
Sertorius, Machometes, & si qui alij
ad suspendendum populum diuini-
tatem sibi & inuentis suis alligare
tentauerunt. Homerus vbique He-
roum actis diuina admiscuit. Fœlicis-
simè quoque fabulas illas allegoricas
de Cyclope, Sirenibus, Circe, Scyllâ,
& Charibde, & similibus, interse-
ruit. Et huiusmodi quidem commen-
tatiuius auribus committuntur quàm
oculis. Propterea Dramatici, ple-
rumque thaumasticam partem inter-
euenta paradoxæ continent: qualia
sunt agnitiones Comicorum, & Tra-
gicorum, siue horrenda scelera, siue
inexpectatæ vindictæ.

Verùm quoniam admiranda non
facile fidem reperiunt; ratio quoque
eadem proponendi noua quæ sita est;
vt in somnis; cùm libera terrenis cu-
ris anima diuinis afflatibus paratior
creditur, similia offerantur, interdum

suâ propriâ specie ; nonnunquam velaminibus & inuolucris allegoricis cooperta. At somni fides quantum ad apparitionis effectum potens, tandem ad visorum veritatem persuadendam infirma est. Inde quasi et necessitate creuit audacia, vt in grauissimis rebus adhiberentur videntibus & sui compotibus manifestâ in luce quædam apparitiones superiorum naturarum, quas Ecclesiastico vocabulo visiones appellamus. Inter quas nulla in profano authore occurrat diuinior, illâ Veneris apud Maronem, quâ tollens caliginem mortalibus oculis ingenitam, manifesta Filio suo fecit inimica Troiæ numina eam subruentia funditus, quo ei persuaderet sat Patriæ Priamoque datum, & tandem de suâ salute, & posterorum gloriâ esse cogitandum.

Er quoniam hæc visionaria Poëtices species apertissimè à diuinis pendet ; clarum est eam nusquam esse perfectiùs expectandam, quàm in sacris Scriptoribus ; quorum totus labor est vt mentem nostram ad diuinæ virtutis & operationis in creatura

rum actione contemplationem, eue-
here & promouere valeant. Totum
itaq; corpus disciplinæ cælestis (quo-
modo antiquis tradita est) purum est
Poëma: cùm ipsa verè gesta, sint ty-
pi & allegoriæ, siue futurorum in
Ecclesiâ & requie Beatorum, siue in
animabus Sanctorum. Vnde triplex
ille mysticorum sensuum nodus ne-
ditur, qui ex litterali eruuntur. Sed
& singularibus somnijs & visionibus
perspersi sunt illi libri: qualia sunt
Pharaonis, Iosephi, Gedeonis, Na-
buchodonosoris, & aliorum. Et vi-
siones Abraham, Iacobi, Patris Sam-
sonis, Samuëlis, Davidis, & alio-
rum. Sed neque nouo Testamento
hæc gratia deest; vt videre est in vi-
sione Zachariæ, Cornelij, Petri, &c.
Maximè in rapto Pauli, cùm de to-
tâ fidei disciplinâ instructus est paruo
tempore, quantum cæteri Apostoli
multorum annorum prædicatione.
Sed nulla illustrior aut æquiparanda
visio est siue in priori, siue in nouo
Codice salutis, huic quæ in libello
dicto Apocalypsi (cuius aliquam
partem aperire speramus) describi-

14 APPEN. DE CONSUM. ECCLES.
tur. Nulla quoque obscurior, par-
tim rerum ostensarum, partim ipsius
futurae tenebris oppressâ & ca-
liginosâ.

SECTIO I.

Argumentum & diuisio operis.

EX dictis constare potest, non ex-
spectandum esse in hoc libello
Historicum sed Poëticum rerum or-
dinem; cuius decor est, ut postponen-
da præponat, dicenda interpellet, &
non pauca ornatûs gratiâ misceat: sic
tamen ut totius operis unitas tandem
splendeat.

Ut autem propiùs manus operi ad-
moueamus, aduertendum est, quòd
cùm scopus disciplinæ Christianæ sit,
humanos animos à lethargo volup-
tatum terrestrium excitare; nullus au-
tem sit potentior dolus ad enervan-
das persuasiones cælestes, quàm spes
futuræ fœlicitatis temporariæ: præ-
sertim tempore persecutionis; qualis
illâ ætate Christi discipulos percelle-

bat: Propterea expediebat Ecclesiæ accipere de futuris mundi malis notitiam; quæ quia de futuris erat, non nisi per prophetiam poterat intimari, ut assensum mereretur. Et quia ad terrorem scribebatur, ijs erat speciebus & velaminibus inducenda, quæ horrendum efficerent futurorum aspectum.

Uterius cum præcipua mundi mala, in, vel paulo ante mundi excidium euentura sint, æquum est, multo maximam partem libri circa ea consumi. Reliquam itaque, quia minora mala explicat, contractionem esse, & præuiam Ecclesiæ Historiam maximè quoad mala futura breuiter exponere. Nihil itaque credendum est in hac imagine proponi, quod ipsum (licet non cum tot circumstantijs) in alijs sacræ scripturæ libris non sit expressum: atque adeo vniuersaliter materiam huius scripti, tribus contineri: malis temporalibus, pseudo-prophetijs, & ijs quæ specialiter ad finem Mundi spectant; quæ omnia Christus prædocuit.

Ex quibus iterum existimare licet,

duas esse per totum hoc opus quasi
 scriptionis lineas vel colores sese mu-
 tuo interfecantes & illustrantes.
 Aliam quæ sit rerum enarrandarum
 substantia & veritas; aliam quæ sit ad
 animos attentos & attonitos reddendos
 præparatio. Et hæc tripliciter di-
 uiditur: Alia siquidem est quasi sce-
 nicus apparatus, in quo maiestuosum
 aliquid & terrificum describitur; alia
 verò in locutione perficitur, quæ vel
 est præuia operi, vel eam sequitur.
 Et utraque quidem Choris Tragædo-
 rum correspondet. Sicut enim Cho-
 rus est actor qui non habeat specia-
 lem affectum in actione tragicâ, &
 propterea sine perturbatione de fu-
 turis vel præteritis iudicat, & præit
 spectatori quid notandum, & in mo-
 res illi conuertendum sit ex actione
 exhibitâ: sic in hoc libro, ante vel
 post ingentes catastrophas; aliquis
 monitor producit, qui præat legen-
 tibus quos affectus habere debeant
 & exercere. Verum hæ partes non ni-
 si in decursu operis rectè distingui
 possunt.

Esto itaque prima operis diuisio in
 cam

eam partem, quæ Historiam Ecclesiæ
exequitur, & illam quæ depingit no-
bis ea quæ ad excidium mundi spe-
cialiter attinent. Historiam Ecclesiæ
delineant quatuor illæ septenariæ
Sigillorum, Tubarum, Tonitruorum,
& Phialarum: sicut prævia septena-
ria Angelorum siue Episcoporum
presentem tum temporis Ecclesiam
exprimebat: quam, etsi egregia con-
tineat, quia tamen non est ad cætero-
rum, præsertim Finis mundi, expli-
cationem necessaria, exponere nobis
non incumbit. Consequum est, re-
liquum librum in consummationis
rerum defiguratione impendi.

Quare modò quatuor septenarijs
futurus Ecclesiæ status designetur,
non incongruè accipitur, ex naturali
animalis profectu & augmentatione.
Post infantiam enim, in quâ nondum
quodammodo est animal (cùm non
nisi alienâ ope viuat) succedit Pue-
ritia; in quâ adhuc alienâ ope indi-
get; Iuuentus, in qua ex sese, sed in-
certè & defectuosè agitur; Et tan-
dem Virilitas, in quâ constanter ea
quæ naturæ sunt perficit. Post hæc

suam habet deficiendi periodum; quæ plerumque breuior est, & quasi præceptum cum semel inualuerit. Analogiam ad has ætates in Ecclesiâ si queramus; fuerit Apostolorum ætas, Ecclesiæ infantia; perpetuis miraculis fouenda & nutrienda: cui successit Pueritia, usque ad Constantinum à quo redditâ pace, Ecclesiæ iam ex se agere, & quasi contra passionem, sic contra Hæreses usque ad nos huiusmodi. Deuictis Hæresibus succedat virilitas, & quasi meridies Ecclesiæ: à quo cum deficiet, ad ruinam quasi ex alto, subitò sit præcipitanda.

SECTION II.

Declaratio Capitis quarti.

ERgo & ipsum opus inuadamus: Omissis tribus Capitulis premissis; quartum & quintum impenditur in expressione quâdam mysticæ & augustæ Majestatis Dei, apparentis, & principium dantis visionibus futuris. Exprimitur itaque *sedens*, hoc est quiescens; colore, *Infans*.

S E C T I O II. 19

pidem & sardinum referens, & *Iride smaragaina* circumdatus & quasi obumbratus. Iaspidem non possumus accipere pro eo qui smaragdizat, propter eundem in *Iride* colorem. Egre-
giè itaque pro cæruleo (qui vulgò Turcicus dicitur) substituitur : cuius cum cœlestis sit color, perfectissi-
mam habes summæ Trinitatis ex-
pressionem : Patris in *Iaspide*, Filij in *sardo* (qui hodie carneolus, propter carnis colorem dicitur) Et Spiritus Sancti in *Iride smaragaina*, id est, in vinculo pacis & amoris ; colore ver-
no, qui amoris & fecunditatis pro-
prius est.

Subijciuntur quæ sedem circum-
ambiebant, *Viginti quatuor seniores*,
Legis Naturæ per duodecim Patriar-
chas, & scriptæ per duodecim Pro-
phetas ; vel Legis & Prophetarum vi-
cem gerentes. Hi *sedente* & *Coronati*
videntur, quoniam stabilitatem &
coronam gloriæ acceperunt : Sed
quatuor *animalia*, quæ quatuor E-
uangelistarum symbola præ se fe-
runt, stantia apparent, etsi coniun-
ctura throno, immò in medio sedis

20. APPEN. DE CONSUM. ECCLES.

& in circuitu sedis : hoc est, duo ante ipsam sedem, *Ioannes* & *Matthæus*, & reliqua duo, ex lateribus; *Marcus* ex dextero latere; ex sinistro *Lucas*. Videntur autem Euangelistarum symbola ex quatuor humanæ animæ partibus desumpta : vt in *boue* signetur concupiscibilis; in *leone* irascibilis inferioris animæ portio; In *homine* seu *Angelo* rationalis facultas; In *Aquila*, suprema mens & contemplatio : vt intelligantur Euangelistæ hanc diuisionem in enarratione gestorum Christi Domini secuti : *Ioannes* nempe ad Diuinitatis opera fuisse intentus, *Matthæus* ad discussus rationales, vt patet in multiplici sermone Domini in monte : *Marcus* ad doctrinam quasi magistralem & imperia; *Lucas* tandem ad naturalia, vt infantiam & curationem infirmorum : etsi, in omnibus, sit omnia reperire. *Plena sunt oculis intus & extra* : quia iam reuelata sunt mysteria quæ prius latebant, neque poterant videri ab ijs qui oculos non habebant, nisi forinsecus. *Neque habent requiem* : quia Ecclesia adhuc h-

SECTIO II. 21

borat, & sollicita est; sed sinagoga concinit ijs.

Ante thronum est *mare vitreum*, vel crystallinum; hoc est omnia creata per lucida, sub aspectu & gubernatione ipsius. *Et septem lampades ardentes*, id est, splendentes & actiuæ: quas facit ipse textus explicat esse *septem spiritus* in terram missos; hoc est, dona Dei, seu operationes ipsius septiformes, videlicet proportionales septem donis Spiritus Sancti. Unde etiam accipitur, quare opera quæ in hoc libro explicantur, per septenarium numerum, distribuuntur in singulis Ecclesiæ ætatibus. Procedunt ex throno *fulgura, voces, & tonitrua*. Inter voces & tonitrua hoc videtur differre, quod tonitrua sint illi ingentes soni qui concutiunt ea quæ nos circumstant; voces verò illi qui tantum audiuntur. Fulgurat itaque Deus, cum facit nos videre mysteria: voces dat, quando imperat: sed tonat, cum per efficaciam gratiæ facit nos facere, quæ fieri imperat.

S E C T I O III.

Declaratio Capitis quinti.

IN quinto Capite declaratur per Christum & ipsius passionem effici ea quæ in hoc libro reuelanda sunt hoc est totam Ecclesiæ Christianæ administrationem. Explicatur autem sic; quod apparuit in dexterâ sedentis super thronum *Liber scriptus intus & foris, signatus sigillis septem.* Et quamuis etiam foris scriptus foret, nemo tamen eam legere poterat neque aperire. Liber est prouidentia diuina, cuius pars ante Christum erat scriptio deforis, vt quæ iam in oculis hominum erat, & externas ceremonias docebat: Sed quia tota tendebat in Christum, non poterat legi vel intelligi, donec ipse mysteria exhibendo, veritatem quam figura significabant, eam doceret. Scriptio interior continebat gerenda in Ecclesiâ vsque ad finem mundi; quæ seculura erant ex vi passionis & gubernati-

Sectio III. 23

tionis Christi. Cur sigilla fuerint septem, ex dictis patet. Cum enim opera Spiritus Sancti, id est, solutiones debeant esse septem, etiam ipsa sigilla debent esse septem.

Cum itaque nemo dignus foret aperire librum, apparuit *agnus appropinquans Deo, & accipiens ab eo librum*, id est, potestatem eum aperiendi: hoc est, mysteria ipsius in effectum producendi. Erat autem *occisus*, quod significat per passionem suam Christum in hanc gloriam intrauisse. Docetur autem Ioannes ab *vno seniorum*, fortassis primo Patriarcharum, ex usu Hebrææ locutionis, id est, Iuda. Quod etiam insinuat eâ phrasi, quâ vocat Christum *leonem Iuda, & radicem David*.

Vilus est autem agnus habere *Septem oculos, & septem cornua*; quibus significantur septem spiritus Dei, qui sunt oculi propter lucem, & cornua per ardorem, suauitatem & fortitudinem conjungente sancto spiritu. Notandum est Sanctos tum veteris tum noui Testamenti, habere *phia-las odoramentorum plenas*; hoc est of-

24 APPEN. DE CONSUM. ECCLES.
ferre preces Sanctorum, qui sunt in
hoc mundo, Deo; & per consequens,
& audire preces nostras, & pro nobis
orare. Reliqua in hoc Capite perti-
nent ad partes chori benedictionem
dantis Deo.

SECTIO IV.

Declaratio Capitis sexti.

AD sextum Caput incipit sigillo-
rum solutio, & ipsa Historia.
Pro quâ notandum est, quod cum
Ecclesiæ profectus consistat in pro-
mulgatione Euangelij; tres primæ
ætates conuenientissimè tribus pro-
mulgationibus simulantur. Prima
est apertionis libri clausi, per quam
fit potestas volentibus legendi: se-
cunda euulgationis per tubas, per
quam omnes tenentur nouisse quæ sic
præcipiuntur: tertia est tonitruo-
rum succussio, per quam etiam auer-
santibus & recusantibus non permit-
titur ignorantia.

Vnde apparet cur tres similes emis-
siones

siones ex throno progressæ fuisse describuntur. Non est autem expectandum vt in primâ ætate & pueritiâ aliud appareat , quàm quod ex essentialibus & communibus naturæ conuenit. Proptereâ hæc sigillorum apertio non continet aliud quàm ea mala, quæ prædixit Christus sic futura , vt subiunxerit ; *Sed non statim finis*. Et si etiâ finalia mala, prout præcisè finalia sunt, hoc est, quatenus sūt materialis consummatio mundi, addantur, vt significant quò tendant præcedentia, & per hoc magis timenda reddantur.

In primis itaque quatuor Animalia Ioanni denunciant quatuor *Equites* immisos orbi. Primus *Leo*, seu Marcus, seu sacerdotalis tuba, Christum armatum *arch*, ad ea quæ procul distita sunt ferienda : hoc est, quem nulla creatura effugere valeat : *Coronatumque*, id est, indefectibiliter vincentem producit. *Bos* animal macello destinatum secundum *equitem* vel cædes & bellum ostendit. *Homo* timendam famem , sed quæ sustineri possit ex beneuolentiâ Creatoris. Homini enim *Chanix tritici*, & Bruto *triplum*

bordei, denario, id est, pro mercede operis diuini, voce ex medio animalium, hoc est ex throno delatâ, relinquitur. Significat itaque famem restringendam, ne homines ex eâ perirent: Sed etiam nihil superflui haberent. Mandatur item equiti, vt *oleum & vinum non ledat*: quæ cum sint fructus serotini, ostendunt potestatem equitis etiam tempore limitatam; vt non ad internecionem sauiat, neque omnem lætitiâ auferat; cum hi fructus interiori & exteriori lætitiæ seruiant. Sed non sequenti equiti, quem introducit *Aquila* ijdem positi sunt termini; Sed concessum ipsi omni genere plagæ consumere genus humanum; & hoc irreparabiliter. Quod significatur per hoc quod *infernus* pingitur eum sequens; qui ex Græcâ etymologiâ, à non videri nomen trahit: quasi, quod semel inferno receptum sit, non amplius sit videndum. Vnde, hoc ostendendum aquilinæ perspicacitati conceditur; quæ possit etiam non existentia, seu non præsentia & inuisibilia monstrare.

Verum quod nondum futurus esset.

finis, declaratur apertione Quinti sigilli: Ex quâ apparent *Anima Martyrum* huius sæculi, petentes *vindictam*, id est, resurrectionem; sed dilata & iussa esse contentæ gloriâ Animæ, donec reliqui ad salutem congregentur. Quæ visio ad hoc pertinet, vt finis mundi qui in sexto sigillo describitur, sciatur longo post tempore peragenda. Inducitur autem parabolicè hic *clamor*, & ostendit & Animas quæ sunt in Cælo, desiderare vnionem ad corpus, & tamen esse beatas. Quod & per coniunctionem cum Christo seu altari, & per *stolas* acceptas, id est, perfectionem charitatis, quæ infert visionem beatificam, satis manifestum fit. Manifestum quoque fit, quæ fiunt in mundo, hoc est accelerationem finis mundi, à precibus sanctorum causari.

Sexti sigilli opus, est consummatio mundi; quæ duabus partibus consistere describitur; materiali destructione mundi, & completionem numeri fidelium, seu impletionem regni cælestis, Quantum ad ruinam mundi, satis dictum est in institutio-

28 APPEN. DE CONSUM. ECCLES.
nibus Theologicis. Numeratio fidelium septimo capite fit.

SECTIO QUINTA.

Declaratio Capitis septimi.

Dicuntur itaque apparuisse *quatuor Angeli*, impediētes ventos refrigerare tellurem. Quod indicat excidium mundi, sæuissimis calori-
bus, quos mitigare solent venti, esse inducendum. Hoc nocumentum iubetur differri ab *Angelo* signante electos. Vnde patet hanc visionem, sicut & priorem de animabus, pertinere ad apparatus seu narrationem causarum, cur excidium mundi dilatum sit : & ostendere vniuersaliter quid reliquis ætatibus agendum sit; videlicet electos tum ex Gentilibus, tum ex Iudæis congregari. Et narratur primò electio Iudæorum; quæ describitur *duodecim millium* in singulis tribubus. Cùmque tum numerus duodenarius ad perfectionem pertineat; & millenarius ad copiam;

ostenditur Iudæos, & magno numero, & quâdam Vniuersalitate esse saluandos : præsertim ex eo, quòd in integrâ summâ numerus duodenarius ducatur in semetipsum.

Notandum verò quòd Tribus *Dan* omittitur, in cuius locum subrogatur tribus *Manasses*. Quo videtur indicari, quòd in fine mundi tribus *Dan* sit pertinaciter inhæsurus Antichristo. Sed ne promissio & intentio Dei euacuetur, sicut Iudæ Matthias, sic Manasses Danis locum suppleturus sit : altero fratre sub Iosephi nomine contento. Gentium vocatio sine numero est ; id est ; comparatur ad Iudæos, vt infinitum ad finitum ; vt Ecclesiæ vniuersalitas ad modium Synagogæ. Reliqua septimi Capitis ad Chori rationem spectant.

S E C T I O VI.

Declaratio Octauæ Capitis.

A Capite octauo incipit secunda Ecclesiæ ætas ; continuata prior
c iij

ri per hoc , quòd ad septimi sigilli apertionem , *tuba* narrantur Angelis data. Qui & dicuntur sese præparauisse ad tubâ canendum ; videlicet per *mediam horam* in quâ *silentium factum est in Cælo* ; per quod significatur cessatio persecutionis ; quæ fuit dispositio ad publicationem fidei Christianæ , & ipsum initium publicationis : quorum duratio , quia breuis & interrupta fuit , etiam particulæ & fractioni temporis attribuitur.

Ad apparatus pertinet quod sequitur , Angelum sacrificauisse *orationes Sanctorum* in *thuribulo* , non *phialâ*. Quod refertur ad distinctionem Angelorum ab animabus sanctis : quòd hæ non sint actiuæ circa gubernationem mundi defectu corporum ; & ideo solummodo per orationem , & quasi ostendendo desideria nostra Deo , nobis profunt : Angeli verò etiam ad executionem contribuunt. Vnde etiam sequitur quòd *ex prunis altaris* impleuit *thuribulum* , & projecit in terram. Prunæ verò quia sunt quarum vi thus cælum versùs eleuatur , significant charita-

tem, quæ orationes Sanctorum exaudi-
diri facit; & effecta earum in terram
Angelicis operis expediri. Effecta
verò quæ narrantur, quia sunt eadem
quæ prius exposita sunt ex throno
Dei procedere; significant efficaciam
Spiritus Sancti. Et quod specialiter
additur, *Terra motus magnus esse*
consecutus sine aliquo præiudicio;
significat efficaciam fuisse usque ad
conuersionem terræ, id est, impe-
rij Romani, quod nomine vniuersæ
terræ, non infrequenter explicatur.

Ad Historiam deinde pergitur; &
dicitur ad signum à primâ tubâ da-
tum iactata *grando mixta igne & san-*
guine in terram. Cùm itaque grando
sit aqua congelata, id est, maximè
opposita igni, significabit hæc plaga
dissensiones magnas & usque ad per-
secutionem & cædes sanctorum per-
ductas; vt Historia sacra ab omnibus
Hæreticis factum testatur. Effectus
huius plagæ indicatur, quòd *omne*
fanum viride combustum sit, id est,
decor & viror ab Ecclesiâ sublatus sit:
quòd *tertia pars arborum interierit;*
seu exaruerit, id est, eorum qui for-

tes in fide & benè radicati videbantur : & tandem *tertia pars terra fit combusta*, hoc est, tertia pars Ecclesie fecunditatem germinandi perdidit, neque ulterius sese propagare perstiterit. Quæ autem hîc in communi docuit, in tribus sequentibus plagis, per partes explicat. Et imprimis quid circa Christianam plebem actum sit : videlicet, quod *mons igneus iactatus in mare* acturus foret. Mare enim propter falsedinem, & fluctus, significat homines terrenis affectibus & passionibus plenos : In cuiusmodi si incidat dissensio, fit quasi mons igneus, id est, crassitudine materiali vehemens & durabilis. Vnde *tertia pars eorum narratur conuersa in sanguinem*, id est, in substantiam crassam & exustam ; insalubremque piscibus, & imperuiam nauibus. Vnde paruorum & eorum qui magnates erant tertia pars emortua est per defectum à fide & opiniones mortiferas.

Tertia plaga est à *stella*, quæ in fontibus, & fluuios, & aquas dulces cadens, eas amaras reddidit & absynthiacas.

His verò aquis quia neque fluctus, neque falsedo insunt, & ab ipsis nutritur mare, & refrigerantur potantes, clarum est, viros spirituales & doctos significari : inter quos cum dissensio incidit, ardet tanquam *facula*, hoc est, non adeò crasse, sed penetrabiliùs & nocentiùs quàm inter sæculares. Ex eo autem quod dicitur stella cecidisse, notatur, quòd dissentiones eorum sint circa fidem, & spiritualia : Sed damnum peruenit etiam ad populum, præsertim ad homines, id est, magis eleuatos & attentos ad disciplinas.

Quartæ tubæ clancus, quo enarratur percussus *sol & luna & stella*, pertinet ad Prælatos & Doctores, quorum est eminere & lucere in Ecclesiâ Dei. Et dicitur *dies & noctes* ex tertiâ parte minùs lucidas fuisse, id est, Ecclesiam siue in prosperis siue in aduersis ; vel siue in speculatione, siue in actione, minùs illustrem ex tertiâ parte euasisse. Cum enim tribus eminere debeant Prælati, sanctitate, scientiâ, & potentiâ ; Relaxatione morum & disciplinæ,

34 APPEN. DE CONSUM. ECCLES.
prima dos & ipsis & Ecclesiæ substrac-
ta est; duæ posteriores manserunt.
Sequitur brevis, sed vehemens de-
nunciatio futurorum malorum, osten-
sâ Aquilâ *Va* habitantibus in terrâ
tertiûm minitante. Videtur autem
adhibita Aquila vt significetur obs-
curam esse harum plagarum inter-
pretationem, quia Aquilæ est altè
volare, & acutè de longe minima
conspicari.

SECTIO VII.

Declaratio locustarum Apocalyp- ticarum.

PROsequitur Caput nonum, mala
secundæ ætatis Ecclesiæ. Et do-
cet ad sonum quintæ tubæ stellæ de
cælo cadenti datam esse *clauem putei
abyssi*; quo aperto, *fumus*, & ex fu-
mo *locustæ* exiuerunt in terram. No-
tandum verò est, paulò post Constan-
tini tempora, scissum esse Imperium
Romanum, in Orientale, & Occi-
dentale; & vtrumque regnum variis

SECTIO VII.

35

afflictionibus subiectum fuisse, quas in presenti capite præfigurat. Et in primis Occidentale, per Ducum Romanorum perfidiam; qui barbaras gentes eidem infuderunt. Et hoc explicans, ait causam proximæ plagæ fuisse casum *stella* de cælo, id est, defectionem illustrium virorum ab imperio, ut Stiliconis, Narsetis, &c. Qui potestatem acceperunt aperiendi *puteum abyssi*, id est, fundum Oceani, siue vltimum septentrionem; ex quo gentes hæ vocatæ sunt.

Et dicitur primò ascendisse *fumus* quo *sol* & *aër* obscuratus est; hoc est, famâ & terrore tantarum multitudinum occæcatos esse principes & populos ne ijs possent resistere. Secutæ sunt famam ipsæmet gentes. Dicit quoque præceptum ijs ne *laderent faciem terra, neque omne viride, neque omnem arborem*. Hoc est nihil quod fructificaret & innocenter viueret; sed tantum homines, qui non haberent *signum Dei* in frontibus eorum. Quod ex eo effectui mandatum videtur, quòd hæ gentes extinxerunt omnino paganismum, & tandem etiam Aria-

nismum ex Occidente eiecerunt, & fidem Catholicam in pristinum splendorem restituerunt. Verum neque hos ipsos interfecerunt; hoc est aperta persecutione sustulerunt, sed *quinque mensibus*, hoc est centum quinquaginta diebus, id est, annis, quibus vexauerunt imperium Occidentale antequam cum populis quieti coalescerent, per ipsam continuationem malorum eradicauerunt. Vnde & de ijs dicitur, quod *quarebant mortem, & mors fugiebat ab eis*, quæ est conditio eorum quibus inter longa mala patientia deficit. Quod etiam exprimitur ab authore eâ phrasi, quod *cruciatu eorum erat sicut cruciatu scorpionum*. Narrant enim Physici, venenum scorpionum esse lentum & plenum cruciatu. Et idem significatur per hoc quod dicuntur *aculei esse in caudis eorum*. Cauda enim posterior est animali, quare cruciatum esse in caudis, significat in permanfione magis quàm in inuafione. Describuntur autem locustæ similes *equis paratis in pralium*; hoc est, esse populi ferociores gentibus ad quas venerunt, & pa-

res equitatu eorum : & gestare quasi
coronas in capitibus similes auro :
Quod significat libertatem , vel po-
tius barbaram speciē libertatis quam
præferebant , quasi singuli Reges fo-
rent , & alium Dominum non agnos-
cerent. Sed neque veræ coronæ erant ;
& longè minùs ex vero auro : quia
hæc libertas non erat secundùm ra-
tionem , neque iustitiæ legibus coër-
cita. Additur quòd facies eorum es-
sent *facies hominum & capilli mulie-*
rum. Notum est enim septentriona-
les populos plerumque esse candidos
& rubicundulos , pulchro aspectu , &
comam alerè consuetos. Verùm den-
tes eorum erant *dentes leonum* : Et ha-
bebant *loricas sicut loricas ferreas* : qui-
bus explicatur ferocia , & rapacitas ,
& cor ad pericula impavidum. *Vox*
alarum significat terrorem quem in-
ferrebant regioni quam inuaderent ,
quantum non faceret bellicorum
curruum pugnam auspantium
ingens multitudo. Rex autem quem
dicuntur habere supra se , & est
angelus abyssi , declarat causam quæ
excitauit eos ex sedibus suis ; quæ fuit

58 APPEN. DE CONSUM. ECCLES.
inundatio Oceani, vt historia declar-
rat: & propterea nomen habet *Abad-*
don, vel *Apallyon*, vel *exterminator*.

SECTION VIII.

Declaratio Equestris exercitus Apocalyplici.

IN eodem Capite, describitur rui-
na Imperij Orientalis, ad sonum
tubæ sextæ: & quia hæc plaga specia-
liter Christianos respicit, dicitur *vox*
ex quatuor cornibus altaris aurei pro-
diisse quæ illam imperaret. Hoc est,
ortum accepisse hanc plagam à preci-
bus Sanctorum, quorum animæ erant
sub altari, & preces super altari ado-
lebantur. Vnde patet propter per-
secutiones Hæreticorum Imperato-
rum, desolatam esse Ecclesiam O-
rientalem. Quod exprimitur illâ phra-
si quòd *altare esset ante oculos Dei*, hoc
est quòd Deus respiciebat ad sacrifici-
cia ipsius. Erat autem hæc vox decla-
ratiua efficacix sonitus tubæ; vnde
ad Angelum tubæ fit. Iubetur autem

SECTIO VIII. 39

Solvere quatuor Angelos qui alligati sunt in flumine magno Euphrate; hoc est, præsides populorum, vel quatuor populos quos Euphrates prohibebat seu distinebat ab imperio Romano. Dicuntur autem parati in horam, & diem, & mensem, & annum: hoc est in diuersa tempora breuiora & longiora. Erant autem equites, & numero dua myriades myriadam. Cùm itaque centenarius sit numerus perfectus, & ducatur in centenarium, vt faciat myriadem, ipsa myrias ducta in myriadem excessiuum prorsus numerum facit. Quem neque ipsum sufficere docet duplicatio eiusdem numeri.

Notandum autem, quòd cùm dicantur quatuor Angeli, tamen tres tantummodò ponuntur species loricarum, & trec plagæ ab ijs progredi: eo scilicet quòd quarta natio, quæ in horam reseruata erat, nihil specialis nocumenti fecit. Videntur autem hæ nationes fuisse primò Persæ, deinde Arabes, tertiò Tartari, & vltimò Turcæ. Sed quia Tartarorum, & breuissimum imperium, & malum quod

intulerunt Turcis magis quam Christianis nocuit; propterea tantum nominantur. Dicuntur quoque loricae similes fuisse *ignitis hyacinthinis*, & *sulphureis*; Et plagas quas intulerunt fuisse per *ignem*, *fumum*, & *sulphur*. Ignis Persis proprius est; tum quia ignem adorant, tum quia persecutionem acutam & breuem quidem, sed saeuissimam excitauerunt. Fumus Arabum, tum propter terram aromatibus foecundam, tum propter doctrinam & dialecticam, qua oculis Christianorum tenebras & poenam inferebant. Sulphur Turcarum, quia imperium eorum perseverantius est caeteris, tum propter carnalem spurcitiam & feditatem: sulphur enim odore nares infestat, oculos fumus, tactum & substantiam ignis. Sed fumus Arabum non sine mixtione ignis fuit; ut patet ex hyacinthino colore, qui certa nigri cum luce mixtione conficitur.

Quod autem dicuntur habuisse equi eorum *serpentes* pro setis caudarum; & hos serpentes habuisse *capita in quibus nocebant*: significat potissimum

SECTIO VIII.

41

num damnum ab ijs factum, postquam Domini facti sunt, & quietum imperium haberent. Eo scilicet, quod tunc oppresserint Christianos, cum in ipsis bellis nihil specialiter contra fidem aut proponerent, aut agerent, ad abducendos Christianos ab eâ.

Et notandum est, neque hîc serpentes in caudis equinis, neque supra caudas scorpionum datas locustis, omnino præter naturæ normam: Nam memorant locustas quæ habeant caudas scorpionum, & ex fetis equinis nascuntur serpentes. *Capita Leonum* in equis, victoriam & potentiam præmonstrant. Quod autem cômementur cum idololatria plura peccatorum genera adhuc mansisse in hominibus post has plagas; indicat vindictam fuisse hanc plagam, & non curationem mali, sicut prior fuit.

S E C T I O IX.

Declaratio Capitis decimi.

CApite decimo incipit & perficitur narratio de tertiâ ætate Ecclesiæ; quæ quia prospera & benedicta futura est, & subiecta paucis malis, propterea in communi duntaxat describitur: vt in quâ neque magna varietas, neque insignes plagæ (quæ specialiter sunt huius libri materia) comprehendantur. Ratio autem huius est, quia cùm gratiæ sit perficere naturam, & in naturâ rationali tres species & gradus cognitionis, sint per quos successiue augetur anima: Videlicet fides quæ regit pueros; opinio, quæ iuuenes, hoc est, inexpertos & imperitos; & tandem scientia, quæ viros, hoc est perfectos dirigit: necesse est in Ecclesiâ per eosdem gradus naturam ascendere. Vsque itaque Constantinum, fides sola valuit. A Constantini tempore vsque ad nostram ætatem, oratorijs & logicis dis-

sertationibus contra Hæreticos actum est. Quæ quoniam paulatim ad euidentiā hominem nata est perducere, expectanda est proxima ætas Ecclesiæ, in qua succedente euidentiâ, nullus futurus sit locus Hæresibus, & per consequens in summâ pace & prosperitate victura sit Ecclesia.

Vt docet hoc Capite D. Ioannes, *Angelum* nobis exhibens *fortem*, vt virili ætati conuenit; *descendentem de cælo*, vnde nobis omnia bona; *amictum nube*, id est, habitu cælesti, vt qui cælestia ad nos deferat; non longè sese à nobis tenens, sed propinquans: Et *Iris*, id est, pacis diuinæ symbolum, *capiti* ipsius imminebat: Et *facies ipsius velut sol*; vt qui veniebat perfectam lucem impertiturus generi humano: & *crura* eius firmitate *columna*, actiuitate *igneæ*: & *librum apertum* in manu habebat; hoc est, ab omnibus legendum & intelligendum, in quoque nulla foret inuolutio & obscuritas. Et *posuit pedem dextrum supra mare*, hoc est, turbulentos vi & potestate subiiciebat: & *sinistrum super terram*, placidos suadij

44 APPEN. DE CONSUM. ECCLES.
uiter firmans & roborans. Et *clama-
uit voce magna*, qualis est *rugitus
Leonis*, scilicet magnitudine: quod
pertinet ad amplitudinem Ecclesie,
quæ extendenda significatur, quan-
tum vox ipsius audiri poterat: & po-
terat audiri secundum fortitudi-
nem ipsius: secundum enim eam to-
tam clamauisse, indicat appellatio
Rugitus. Effectus autem vocis ipsius
fuit ut *septem tonitrua loquerentur vo-
ces suas*: hoc est, haberent effectus
suos. Quos prohibitus est Apostolus
scribere, propter rationes supra tradi-
tas. *Signare* tamen iubetur, scilicet
memoriâ suâ, fortassis priuatim di-
cenda viris pijs, non publicè toti Ec-
clesiæ promulganda.

Et quòd hic sit sensus Angeli &
Tonitruorum, confirmatur, ex eo
quòd statim subiiciatur *Iuramentum*
ipsius Angeli, quòd *tempus non am-
plius erit*: hoc est, quòd hætenus de-
derit Deus humano generi spatium
salutis suæ curandæ. Sed quòd deinceps
incipiet ruina mundi, & defe-
ctus, & consummatio omnium. Et
propterea fit in iuramento specialis

SECTIO. IX.

43

Enumeratio omnium quæ Deus creavit. Iuramentum itaque Angeli, ad apparatus spectat; sicut & *denoratio* libri à Ioanne facta, & *missio* ipsius rursus ad prophetandum. Per hæc enim præparatur auditor ad sequentem partem libri; & monetur quòd immediata prophetia quam aggreditur, pertineat ad tempora longè post futura. Vnde ex textu Græco videtur posse intelligi, quòd prophetaturus sit de multis gentibus & Regibus &c. *Amaricatur* autem in ventre deuoratus liber, id est, coëgit se eructari. Dulcis itaque erat auditui, sed non poterat contineri quin se faceret alijs prædicari.

SECTIO X.

Declaratio Capitis undecimi.

CApite undecimo incipit prophetare Apostolus, per figuratam dimensionem *altaris & Templi*, & *adorantium* in eo: per quam significatur Deus rursus curam habiturus
d iij

Iudæorum, videlicet quartâ ætate Ecclesie : Et aliquos quidem ad salutem perducturus, alios reiecturus. Cætera capituli videntur ad litteram esse intelligenda. Videlicet materiam Hierusalem ab Antichristo Gentibus & Iudæis perfidis comitato, esse occupandam : & quod *Enoch* & *Elias* in sacris prædicaturi sint, & maioribus signis confutaturi falsa miracula Antichristi : Et reipsâ esse occidendos & resuscitandos, & terræ motu concutiendam esse Civitatem.

Et hæc est prima pars Prophetiæ de fine mundi, elegantissimè more poetico per modum prædictionis induta ante inceptionem quartæ ætatis; in cuius fine peragenda sunt quæ hic prænunciantur. Immediatè verò sequitur inceptio quartæ ætatis, per *septimam tubam* flatum, & chorum agentium *Deo gratias*. Et quoniam hæc ætas specialiter ad Iudæorum conversionem spectat, fit apparatus per ostensionem *Templi* & *Arce* in calo. Et loco Tonitruorum, *terra motus*, & *grando* magna inducuntur, quæ sunt

SECTIO XI.

47

terribiliora & magis propria propin-
quanti fini mundi. Et quoniam ex
caloris excessu fiunt, mundum ab
igne consummandū indicant. Quod
ipsum obseruari potest in omnibus
plagis; vt calefieri plus æquo tellu-
rem, & paulatim exarescere non sit
dubitandum, quantumuis nondum
adeò sit euidens declinatio, vt æsti-
mari valeat.

SECTIO XI.

Enarratio Capitis duodecimi.

VT finem mundi ex dignitate ex-
plicet, & Poëtico more; causas
excidij præmittit ab ipso principio:
Et docet inuidiâ Diaboli hoc actum
esse. Apparet itaque in cælo *mulier*
amicta sole, lunam pedibus premeus,
& duodecim coronata stellis, clamare
tanquam parui proxima. Sensus est;
propositum fuisse Angelis in eorum
creatione, Deum Ecclesiam ex ho-
minibus conditurum, æqualis cum
ipsismet gloriæ: postquam non po-

48 APPEN. DE CONSUM. ECCLES.

test amplior cogitari, quàm sole ipso
lucis fonte vestiri. Et quòd hæc Ec-
clesia, etsi fundata in mutabilitate
carnis, & corporum, eam tamen cal-
caret, neque ei subderetur. Corona
stellarum duodecim propter Patriar-
charum, Tribuum, Prophetarum, &
Apostolorum numerum, signum est
eiusdem Ecclesiæ manifestissimum &
conuictiuum. Sed, quod caput est,
ea parturiebat, & cruciabatur, quia
ingens & insolitus ei nascebatur Fi-
lius, qui rectorus erat omnes gentes
in *virga ferrea*: hoc est, futurum
erat ut genus humanum, ab vno Fi-
liorum Adæ administrandum & re-
gendum foret; & non ab Angelis,
nisi ut subditis ei.

Subdit autem Euangelista, appa-
ruisse *ingentem in calo draconem; &
illum rufum, habentem capita septem,
& cornua decem; & in capitibus dia-*
demata septem. Draco ab acutè vi-
dendo dictus, serpentium maximus
est. Significat itaque ex Angelis vnum
excellenter intellectu, id est, cuius
voluntas vel bonitas non erat æqua-
lis intellectui; ex aspectu mulieris,
deuenisse

deuenisse draconem ; hoc est , malitiam & venenum concepisse , & ex candido deuenisse rufum ; vel (vt Græcus textus habet) igneum : vt videas excanduisse in iras , ex eo quòd tanta mulieris gloria foret , & Filij ipsius. Additur quòd *cauda suaterram partem stellarum traxerit in terram* ; hoc est , eadem pollutos inuidiâ à superioribus , quæ eos meliores reddebant cogitandis , ad inferiora & terrena & malefaciendum hominibus (quod in Genesi explicatur per *comestionem terra*) auerterit. Et hoc est quod inferius explicatur per *praliunt quod factum est à Michael & Angelis ipsius* , id est , ijs qui obedientiam diuinam præferebant commodis priuatis , id est , Deo adhærentibus ; & eos qui per superbiam & inuidiam ab eo defecerunt. Hi cælo , illi terris per affectus incubuerunt. Vnde rectè dicitur quòd *locus eorum non est amplius inuentus in calo* ; hoc est , nihil illis amplius in cælo agendum mansisse. Angelos enim docent Theologi in loco esse per operationem.

Et hæc quidem in principio acta sunt, in ipsâ creatione. Sed effectus, & quasi actio, durauit vsque ad finem mundi. Vnde subditur, quòd *steteris ante mulierem, donec peperisset, & fructus ventris ipsius raptus foret ad thronum Dei.* Quâ allegoriâ exprimitur, quòd constanter dominatus sit mundo, & auxerit semper impietatem, vsque ad Natiuitatem, immò ad Ascensionem Christi Domini. Tunc itaque conuertit sese Draco ad persequendam mulierem; & tunc datæ sunt Ecclesiæ *duæ alæ aquilæ magnæ*: hoc est, in primâ & secundâ Ecclesiæ ætate fides, in tertiâ scientia, quibus volaret *in desertum locum*: hoc est, conseruaret sese vsque ad tempora Antichristi. Dicuntur autem alæ Aquilæ, quia sunt dona pertinentia ad intellectum, cuius hieroglyphicum est Aquila.

Videns itaque Draco, quòd neque persecutionibus, neque hæresibus extinxisset Ecclesiam, in tertiâ ætate aliud molitus est. *Eiecit* scilicet *ex ore suo ingentem aquarum multitudinem*, sperans madefactis alis mulieris,

SECTIO XI.

51

eam non futuram potentem ad volandum, sed aquarum fluxum secuturam. Significat hoc ex multitudine Gentium & diuitijs earum quibus redundatura est in tertiâ ætate, mollem euasuram Ecclesiam, & cessuram blanditijs, quæ vicerat minas. Dicitur autem Draco ea euomuisse, quia prius fuerant Diaboli dum tenerentur ab infidelibus. Sed nequè hoc ei successit. *Terra enim absorbit flumen ipsius*; hoc est, mortalitas & vicissitudo rerum, quæ contemplantibus semper ante oculos erat, & deuorabat homines cum fælicitate mundanâ, fecit vt Ecclesia non addiceret cor suum tali fælicitati.

Tunc *iratus est Draco*, & animum suum ad sæuissima consilia applicuit. Et mulier in desertum peruenit, id est, furente persecutione ablata est exterior facies Ecclesiæ. Et Diabolus etiam contra latentes exercere cœpit crudelitatem: & tum fuit tempus cantici illius, quod per modum chori, in cœlo personuit, cum comminatione eorum, quæ Diabolus facturus erat contra electos. *Quæ*, etsi

52 APPEN. DE CONSUM. ECCLES.
priùs narrata, ad hunc tamen locum
pertinere videntur, tùm ex ijs quæ in
canticò dicuntur, *quòd die ac nocte ac-*
cusauerat Fratres, hoc est, per tenta-
tiones in peccata pertraxerat; & quòd
à sanctis victus erat; quæ in duabus
primis ætatibus maximè acciderunt;
tum ex ijs quæ post canticum narran-
tur; & tamen ad materiam canticì
pertinere arguuntur, ex eo quod sub-
stantia eorum priùs narratur.

SECTIO. XII.

Declaratio Bestiæ marinæ Apocalyptrice.

IN Capite decimo tertio, recitatur
historia Antichristi, ex consequen-
tiâ ad historiam Diaboli. Et incipit
per hoc quòd Draco dicitur steterisse
ad littus maris. Ex quo sequitur, *Be-*
stiã ascendisse de mari. Cùm itaque
notum sit mare significare multitudi-
nem, passionibus & concupiscentijs
deditam; sensus est, excitauisse Dia-
bolum ex hâc, tyrannum quendam

qui repræsentatur per bestiam mirabilem; quam oportet describere, vel potius descriptionem à Prophetâ datam elucidare. Et quidem de alio quàm de Antichristo bestiam hanc interpretari, nefas foret; cùm ab ipso Ioanne hoc acceperimus, dicente, quòd *Bestia quæ erat & non est, & ipsa nunc est, & de septem est*. Septem autem de quibus loquitur, erant Reges; ergo & hæc Bestia Rex seu Tyrannus est. Dicitur autem habere *Capita septem, & cornua decem; & super cornua eius decem diademata*. Vnde apparet quòd hoc ei commune foret & cum Diabolo, & cum Bestiâ meretricis. Quæ itaque sint propria consideremus.

Dicitur itaque ipsamet *similis Pardo* cætera, sed *pedes*, hoc est, crura *ursi*, & rictum *Leonis* habere: Pardus animal est speciosum varietate pellis, acre & pernix in venatione aliorum animalium. Significat itaque Tyrannum magno splendore florere, & maximâ diligentiam & velocitate vsurum in deuincendis gentibus: habiturum quoque ferociam Leonis,

34 APPEN. DE CONSUM. ECCLES.
seu ingluuiem ad deuorandum, &
robur ad comminuendum: & tan-
dem, brachiorum vrsi ad constrin-
gendum, & retinendum propieta-
tem & violentiam. Quod pertinet
ad capita & cornua bestię, infra de-
clarandum est, cū de meretrice erit
sermo; quia est commune pluribus,
& illic ab ipso Euangelistā pręitur
nobis interpretatio.

Satis hic nobis sit considerare, quod
quoniam Draco dedit illi omnem
virtutem suam; hæc gesta intelligi
debere post solutionem Diaboli, de
quā infra. Neque aliquid magnę
obscuritatis vltteriùs de Bestiā dicitur,
nisi quod indicatur persecutio quam
facturus est in Ecclesiam, esse horren-
dam, per illa verba, *si quis habet au-
rem audiat. Qui in captiuitatem du-
xerit, in captiuitatem vadet; & qui
gladio occiderit, oportet eum gladio oc-
cidi.* Quę sunt consolatoria persecu-
tionem patientibus; videlicet breui-
tatem & finem mali, & vindictam
secururam indicantia. Et hanc per-
secutionem non futuram dumtaxat
contra Christianos ex Gentibus, sed

SECTIO. XIII.

55

etiam contra Iudæos conuersos vel ante, vel per prædicationem Enoch & Eliæ, significatur per hoc quòd dicuntur *Blasphemia futura contra Deum, & tabernaculum eius.*

SECTIO. XIII.

Declaratio Bestia terrestris Apocalyptica.

Sequitur Historia *Bestia* cuiusdam terrestris; de quâ, sicut de priori, non est permillum aliam interpretationem proponere post Euangelistam qui Capite 19. explicat eum esse pseudopphetam: & per hoc quòd *ascenderit de terra*, significatur non fuisse ex sæcularibus; sed ex ijs qui profitentur seueriorem disciplinam. Et quòd simulauerit sanctitatẽ & scientiam, significatur per hoc quod dicitur *habere duo cornua similia agni*; hoc est, illum duo Spiritus Sancti dona simulauisse. *Locuta est autem sicut Draco.* Cor itaque, ex cuius abundantia os loquitur, erat cum Draco-

e iiij

56 APPEN. DE CONSUM. ECCLES:
ne: & potestatem prioris bestia omnem
faciebat coram eo. Hæc significant
priorem bestiam non habuisse po-
testatem miraculorum nisi per hanc.
Duo autem specialiter commemo-
rantur ab eo facta, tanquam maxi-
ma: quòd fecerit ignem descendere de
cælo; & quòd dederit spiritum seu
vitam & locutionem statua seu imagi-
ni Antichristi.

Primum miraculum potest intel-
ligi tripliciter. Primò, vt ignis de-
scendat in sacrificia, sicut tempore
Eliæ & Nehemiæ: cuius aliquid simi-
le comminisci non est difficile. Se-
cundo, vt appareat ignis in aëre pen-
dens: sicut 7. Paralipomenon in dedi-
catione Templi dicitur quòd omnes
*Fily Israël videbant descendentem
ignem & gloriam Domini super do-
mum.* Et hoc difficilius est imitatu:
sed excitato priùs vapore pingui, &
postea accenso per modum meteori,
quod stipulas vocant, fortassis simu-
lari potest. Tertio, vt solidus &
vrens ignis longè diffusa ab operante
comburat; quomodo Elias igne è
cælo descendente consumpsit duos

Quinquagenarios : Et hoc non videtur imitabile : Vnde inter vera miracula Eliæ & Enoch specialiter designatur. Alterum miraculum de inspiratione vitæ in statuam, & maximè locutionem , hoc est redditionem Oraculorum, posse varijs modis imitationi subijci, docent automata à pluribus facta , ab vsque Columbâ *Archyta*, ad muscam *Deei* nostratis Mathematici , & aliorum hodie viventium. De locutione quoque non multò difficilior est, formationem certarum vocum spontaneam statuæ dare ; quàm quod Cornelius Drebellius Organorum cantum exhibuit; Memnonis statua ad afflatum solis reddidit oracula ; & huiusmodi plura in Historijs memorata : quæque inter cæteros sublime illud Cartesij ingenium possibilia esse declarauit. Quoniam itaque & Christus & Paulus apertissimè testati sint, Antichristū ingentia prodigia exhibiturum, & per ea seducturum populum : & Paulus specialiter videatur docuisse eum sese adorandum præbiturum ; quod conuenientiùs fit in statuâ quàm in Per-

ionâ, si sapius & continuè faciendū sit; non est cur dubitemus etiam hoc signum literaliter esse intelligendum, & vtilitatem huius libri non minimè consistere in his notis Antichristi; vt neque fideles turbentur per falsos annunciatōes ipsius, sicut tempore Apostoli, & sapius postmodum; & cū venerit non irretiantur præstigijs ipsius, de quibus adeo specialiter præmoniti fuerunt.

Et ad eundem finem monuit nos de numero nominis bestię: hoc est, contractione seu abbreviatione nominis ipsius per literas quasdam numerales, quæ compositæ in Idioma-
te quo publicabit edicta sua, efficiunt numerum sexcentorum sexaginta sex. Huiusmodi autem Abbreviationes sunt frequentes; vt patet specialiter in nomine X P S, & I H S, & similibus. Et quia hoc signum est indiuiduale, propter ea monemur specialiter ad hoc attendere, per eas voces, *Qui habet intellectum computet numerum Bestię*, seu potiùs, vt Græca vox habet, *signet seu notet calculo numerum bestię*. Quid enim potest

SECTIO XIII.

59

significare vt iubeamur numerare numerum nobis indicatum ?

Supposito itaque quòd hæc intelligenda sint literaliter , fit euident, edicto sæuissimo decretum futurum, ne quis possit emere aut vendere necessaria ad victum , id est, viuere , nisi publicè in fronte vel manu præ se ferat Idololatriam Antichristi , per impressum (foco vel alio indelebili modo) vel vultum ipsius (qui specialiter dicitur character) vel nomen , vel abbreviationem nominis. Ex quibus constat persecutionem seu tribulationem fore maximam, qualis non fuerit à principio mundi vsque in illam diem , cuius sæuitia nascetur ex coniunctione potestatis quam habebit Bestia marina , cum arte & ingenio quæ afferet pseudopropheta.

SECTIO XIV.

Declaratio Capituli decimi quarti.

PRæmissis causis destructionis mundi, à Diabolo & Antichristo positis; iam, quasi legitimè, ad eam acceditur. Quæ quoniam omnium malorum in hoc libro descriptorum grauiissimum est, nihil mirum, si copiosioris apparatus ostentatione præuenitur. Duo itaque proximè sequentia Capita decimum quartum & decimum quintum in eo consumuntur. Et primo quidem prioris ætatis excellentia, producto choro animarum excellentiū super omnes cæteras, exprimitur. Dicitur siquidem Christus apparuisse in *monte Sion*, idest, Arce David; idest, supremâ & speciosissimâ parte sanctæ Ecclesiæ. Et cum eo *numerus signatus*, hoc est specialiter electorum; & numerus erat *duodenarii in duodenarium reducti, & applicati ad mille*. Quod significat perfectionem perfectam in maximâ multitudine. Et *habebant no-*

men Christi & aeterni Patris scriptum in frontibus. Erumpente videlicet in exteriora charitate quam ex contemplatione Humanitatis & Diuinitatis Christi in pectore conceperāt. Propterea etiam *citharisant in citharis suis*; hoc est, corpora consonabant animabus; & cantus eorum erat valde grandis, velut *aquarum multarum vel tonitru*. Sed insolitus, & quem alii non poterant dicere, propter sublimitatem contemplationis. Et canebant hoc Canticum *coram throno animalibus & senioribus*; quod significat eos esse immediatos Deo, seu ex supremis.

Tria specialiter de iis narrantur. Quod neque *voluptatibus carnalibus*; neq; lucris & circumuentioni seumēdaci dediti erant; & *sequebantur Agnū quocumque iret*. Quod indicat eos in hāc vitā solis spiritualibus cogitationibus fuisse deditos. Et quanquam nihil de persecutione & martyrio horum proditum sit, dicuntur tamen specialiter *empti* tanquam *primitiae Deo & Agno*; id est, esse supremi Sanctorum. Patet itaque hunc Chorum

32 APPEN. DE CONSUM. ECCLES.
virilitatis Ecclesiæ, & altissimæ sanctitatis in progressu quasi naturali, citra violentiam persecutionis, id est, tertiæ ætatis fuisse.

Sequuntur duæ expressiones futuri excidij mundi. Prima per tres voces *trium Angelorum* denunciantium *E-uangelium aeternum*, id est, æternitatis: scilicet quòd tempus & motus iam finienda forent per Iudicium & condemnationem *Babylonis*, & specialem damnationem eorum qui adorauerunt bestiam. Posterior expressio est Emblematica, seu per allegoriam rerum. Videntur itaque duo Angeli, primus *similis Christo*: secundus in specie *Angeli*: Et mandatur priori vt bonos *colligat ex mundo*; Posteriori, vt *destruat impios*. Quod enim non ipse Christus Dominus, sed Angelus sit qui primam falcem habet, patet ex testimonio Domini dicentis, *Messores sunt Angeli*; etsi, quia nomine Christi fiat collectio Iustorum, propterea appareat *similis Filio Hominis*, cum corona aurea, seu Deitatis, seu charitatis; & *sedens* velut Iudex *super nubem can-*

SECTIO XIV. 63

didam, quam nulla iam inquinatio mortalitatis obumbraret.

Mandatum *mittendi falces in terram* ad vtrumque defertur *ex templo*: Quod significat hoc fieri, post restitutionem Iudæorum; cum iam Ecclesia ex Iudæis floreret. Sed posterius mandatum, etiam *ex ipso altari*, ab habente *potestatem in ignem*; vt significet esse pænarum & vindictæ opus. Vnde sequitur brevis descriptio inferni, seu *lacus Ira Dei*, in quem coniecta est vindemia. Porro dicitur esse *extra civitatem*; sicut alibi, tenebræ dicuntur *exteriores*; vt significet exultationem à confortio iustorum; vel vt significet neglectum, vt cuius muniendi & conseruandi nulla sit cura: vel tandem, vt significetur esse amplissimum & sine terminis. Quo etiam spectat quod dicitur *sanguis exinisse de lacu*, vt lacus non fuerit capax: Et hoc *vsque ad franos equorum*, id est, ora. Si Diaboli sunt tortores damnatorum, significatur pænas esse tam graues, vt ipsi Diaboli bibant & saturentur ijs. Redundat autem sanguis *per stadia mille & sex-*

64 APPEN. DE CONSUM. ECCLES.
centa, seu ducenta milliaria. Quare
circuitus erit circiter mille passuum
millies & ducenties, præter excessum
circuli supra tres diametros. Sic ut
ambitus habeat proximè mille passus
in singulos *dies* persecutionis, quam
Antichristus exercuit in Ecclesiam.

SECTIO XV.

Declaratio Capitis decimi quinti.

CApite decimo quinto propius
& specialius ad opus acceditur.
Et primò apparet Chorus Martyrum
quarti sæculi *cantantium canticum*
Mosis & Agni. Vnde apparet fuisse
ex Iudæis conuersis. *Mare vitreum*
igni mixtum, significat calcauisse fu-
rorem Antichristi, & deambulauisse
in flammis Babylonijs.

Et statim procedunt *Angeli parati*
ad nouissimas plagas ex templo Taber-
na culi testimonij; hoc est, mandato
accepto ex eâ parte prouidentia diui-
næ, quæ spectat curam de Iudæis.
Vestiti sunt lino puro & splendente;
quod

SECTIO XVI.

65

quod significare Iustificationes San-
ctorum, alibi declarat ipse noster
Apostolus; ut videas propter merita
Sanctorum infligi mala peccatori-
bus. Et *auro praeinguntur*, id est,
charitate: ut videas in ipsâ vindictâ
charitatem in pectore debere esse
causam & moderatricem. *Phialas*
porrigit primum animalium leo, ut-
pote iræ plenas. Deus ut ultimum
actû suâ præsentiâ & publicâ demon-
stratione comprobatur, *replens templum*
fumo & virtute, donec consumma-
rentur septem plage.

SECTIO XVI.

Declaratio Capitis decimi sexti.

CApite decimo sexto expeditur
Historia quarti sæculi; cuius
plagæ sunt analogæ plagis secundi
sæculi. Sicut æquum est accessum ad
optimum, & recessum ab optimo,
defectus habere aliquo modo propor-
tionatos. Sed grauiores & despera-
tiores sunt hæ plagæ. In primis ita-
f

que non vlteriùs explicantur qualitates ætatis per instrumenta manifestationis; quia in hoc sæculo magis recedebatur à manifestatione quàm ad eam accedebatur: Sed per *effusionem Phialarum*. Plaga itaque prima ex effusione *prima Phiala in terram* creat *ulcera seuissima in impijs*, quasi carbunculos vrentes, puta terrenorum amorem, & dissidia ex tali amore oriunda.

Secunda plaga *in mare*, hoc est, in plebem effusa, facit mare quasi *crurum crassum*, & perimit *omne vivens in mari*: Quod significat populos vniuersaliter corrumpendos. Vnde est dictum Christi Domini: *Cum venerit Filius Hominis, putasne inueniet fidem in terra?*

Tertia plaga *in aquas dulces*, hoc est, Magistros Doctoresque, vertit doctrinam eorum *in Sanguinem*; qui loco refrigerationis, suffocare natus sit. Significat itaque prædicationes & consilia eorum redditura affectus laicorum ad temporalia magis ardentes: vtpote suppalpando affectibus eorum qui dominantur. Et prop-

terea ab *Angelo aquarum* benedicitur Deus, qui tribuit eis vitiosos prædicatores qui non sustinuerunt bonos: Et approbatio ab *altari* sequitur; quod significat etiam in cælis hoc iustum videri.

Quartâ plagâ *feritur sol*, & concipit ardorem vrentem & torquentem populos. Significat autem Pontifices & Prælatos potissimè summos magnâ oppressionem vexaturos sibi subditos. Vnde fiet eos *blasphemare Deum* & magis a *pœnitentia* elongari. Sicut autem in secundâ ætate, sic in hac, quinta & sexta plaga ad temporalia bella pertinent. Quinta scilicet ad seditiones & rebelliones intra ipsum regnum vel imperium *bestia*; puta *magna civitatis*, quæ erat *sedes* ipsius. Et sexta ad extrinseca irrupentium decem regum, quos Tyrannus per legatos suos ad auxilium suum trans *Euphratem* degentes euocat. Dicitur autem Phiala *siccare Euphratem*, quia nullo negotio cum *Reges* transibunt; utpote vocati à Tyranno tanquam Amici. Et congregabuntur in locum qui Hebraicè dicitur *Armageddon*: vel ab eorum in sessione (sonare enim

dicatur quod mons Turmarum seu militum) vel ab illâ mageddon ubi occisus est Iosias. Siue quod reuerâ in eundem locum congregabuntur, utpote prælio proprium, siue à magnâ ruinâ & prælio futuro, quasi per antonomasiam translato nomine.

Sicut autem septimum sigillum transtulit primam ætatem in secundam; & septima tuba Ecclesiam in ætatem quartam: Sic septima Phiala motum & totam Ecclesiam quasi in terminum. Quæ supersunt enim, magis significât res actas quàm agendas. Qualia sunt, Iudicium de Babylone, & captura Diaboli, & Antichristi, &c. Specialiter verò ex vi huius Phialæ factam esse innouationem cæli & terræ, videtur indicari, per hoc quod dicuntur *fulgura*, & *voces* & *tonitrua*, & *terra motus tales facti*, *quales nunquam prius fuerunt super terram*. Et apertius ex eo quod dicuntur *Insula fugisse*, & *montes non esse inuentos*; & *grando sicut talentum cecidisse in terram*. Sicut enim (quod ex Theologicis Institutionibus patet) aliqua horû necesse est esse principia con-

SECTIO XVI.

69

uersionis mundi ad Resurrectionem & Iudicium : sic alia clarè docent complanari terram : & in vnâ massam rotundam concrefcere , arefcen- te mari , & confuso liquore cum foli- ditate telluris. Grandinis miraculum vt clarè docet ardorem maximum, sic etiam grauiſſima corpora ſublata eſ- ſe , & quaſi conflata in aëre , ſeu me- teororum exceſſum talem , vt terra non fuerit vlteriùs habitabilis.

SECTIO XVII.

*Declaratio eorum quæ euentura ſunt
circa finem mundi , prædictorum.
Capite decimo ſepimo.*

ET ſic peruentum eſt ad caput ſep- timum ſupra decimum ; in quo ipſo Apoſtolo & Prophetâ clauim porrigente reſeranda eſt tota Apoca- lypſeos œconomia , quoad poſterio- rem partem , quæ finem mundi no- bis delineat. Et in primis fit huius viſionis exhibitio à *primo Angelorum* qui Phialas fuderunt : vt appareat eſſe præcipuum quodammodo opus

consummationis mundi, quod ipsum conuincitur, tum ex preparationibus insolitis; tum ex *ingenti planctu* mundanorum, & *gaudio* Sanctorum.

Est autem visio *mulieris meretricis in deserto insidentis bestia*, quæ cum Dracone & Bestiâ marinâ multum conuenit. Ex fronte autem licet scire quænam fuerit mulier. Scriptum enim habebat *mysterium*. Quod clarissimè significat *mysterium iniquitatis*. Dicitur etiam *mater fornicationum, & abominationum terra, & Babylon magna*. Quæ si sola ponerentur, nemo posset dubitare, quin significaret ciuitatem mundi quam sanctus Augustinus ab initio conditam in oppositum ciuitatis Dei luculentè demonstrat. Notat hoc ipsum nomen *Babelis*, primæ quam audiuius ciuitatis, post reparam à diluio humanam naturam, & quidem aduerso Deo conditam. Nihil opus est huic accommodare siue luxum siue crudelitatem in sanctos, in textu expressam. Neque minùs clarum est, sedem huius ciuitatis seu populi malignantium, tum temporis cum Apostolus scribe-

ret, fuisse Romam. Neque per consequens dubium esse potest, cur dictum sit, *septem capita septem montes sunt*. Et infra, *mulier quam vidisti est*, id est, nunc dum hæc scribis, *ciuitas magna quæ habet regnum super Reges terra*. Quod verò additur : *Et Reges septem sunt*, clarum facit non Romam solam, vel vt Romam, sed quatenus caput erat ciuitatis mundi, esse designatam. Patet enim Romanum imperium fuisse quintum, ab imperio Chaldeorum in Nabuchodonosore ; ad quem facta est prima reuelatio monarchiarum à Daniele. Cum itaque ante Babylonios fuerit monarchia Assyriorum per mille trecentos circiter annos, Romanum imperium per sextum Regem significatur; ante quem ceciderat Assyrius, Babylonius, Medus, Persa, & Græcus. Intelligitur quoque quòd septimus Rex non nisi post quartam ætatem finitam, surrecturus sit, quando incipient denuò pullulare ambitionum & scelerum cupiditates, quæ monarchiarum & subiectionis plurium nationum ad vnā, causæ sunt. Quod

72 APPEN. DE CONSUM. ECCLES.
regnum dicitur futurum breue: magnitudo enim scelerum non poterit diù stare. Desinet autem in Antichristum, qui & ipse bestia est, puta specialiter & antonomasticè, quasi vltimum & ferocissimum membrum totius ciuitatis mundi.

Clarum verò est tempore huius septimi Regni, ædificandam esse Hierosolimam, & restitutum iri impietatem Iudaicam, & futuram in caput Monarchiæ. Scribitur siquidem de eâ, quòd *ex terra motu* post cædem Enoch & Eliæ occisa sint *nominum septem millia*, per subuersionem *decima partis Ciuitatis*. Quod cum non possit intelligi de singulis hominibus (non enim comparatione totius orbis terrarum diceretur magna Ciuitas, quæ tantummodo septuaginta mille animas contineret) oportet vt nomina hominum pro illustrioribus accipiantur, vt significet præfectos virorum; & significet in decimâ parte Ciuitatis fuisse septem viculorum millia. Et si singulis vicis attribuantur circiter centum familiæ, tota Ciuitas conflata fuerit septem circiter

ter focorum seu familiarum millionibus. Quæ magnitudo non est incredibilis cogitantibus Religionis Iudaicæ legem fuisse, vt non alibi quàm Hierosolymis fierent sacrificia : Et quòd textas sacer testetur *admiratam esse vniuersam terram post bestiam, quia vnum de capitibus ipsius occisum erat ad mortem, & curata est plaga mortis eius* : hoc est totum mundum cucurrisse post Iudaismum : quem viderant post tot sæcula, quibus fuerat exterminatus, iterum esse in maiorem splendorem restitutum. Et secundum hoc, verum est quod dictum est de bestia: *bestia quam vidisti fuit, & non est, & ascensura est de abyssu & in interitum vadit* : & rursus, *bestia quæ erat & non est, & ipsa octaua est, & de septem est, & in interitum vadit*. Palam enim est perfidiam Iudaicam in cæde Christi & Apostolorum, & persecutione Christianorum, non leue membrum fuisse Ciuitatis mundi. Sed tamen quia monarchiam particularem non regebat, idcirco fuisse de septem : & eandem in Antichristo fuisse octauam.

Porro hanc Ciuitatem potentissi-
 mam rebellauisse contra Antichri-
 stum, clarè significat sacer textus,
 dum dicit per phialam quinti Ange-
 li effusam super *sedem bestie*, 'id est,
 ipsam, *factum esse regnum bestie te-*
nebrosum: & sectatores bestie, visis
 adeò grauibus malis, dolore *comman-*
dauisse linguas suas: hoc est, acerbatis-
 simos contra inuicem factos esse. Vn-
 de etiam factum est vt Antichristus
 euocauerit decem Reges ad excin-
 dendam Hierosolymam. Quod &
 fecerunt: Et ex eo quòd seruiuerint
 Antichristo, facti sunt ipsi *decem cor-*
nua bestie, & quidem *coronata*: quia
 socij erant, non serui bestie, id est,
 Antichristi. Et *vicerunt*, & debel-
 lauerunt *Meretricem qua sedebat be-*
stiam: quæ propterea coronas neque
 in capitibus, neque in cornibus ha-
 bet; quia apparet infessa & domina-
 ta ab ipsâ: Vnde coronas non pote-
 rat habere, tanquam subdita. Sed
 in Dracone videntur *capita coronata*.
 Quia Draco non constituebat Mo-
 narchias; quod pertinet ad solum
 Deum; sed impellebat eas ad malum,

SECTIO XVII. 75

gubernans eas per suam perfidiam, & malitiam; quæ significantur per *mulierem dominantem*. Vnde in Dracone sunt coronata capita.

Dubium est quomodo per terræ motum qui factus est ex effusione septimæ phialæ, ex quâ finis mundi etiam materialiter incepit, dicatur *Civitas magna facta esse in tres partes*. Cum ante hoc tempus, fuerit igni concremata à decem Regibus. Respondetur, cum vastantur Ciuitates magnificè ædificatæ, ignem non habere potestatem nisi in viliora quæ ligno ædificata sunt; maiora quæ lateribus vel labidibus substructa sunt, superesse igni. Et sic accidisse in præfenti inde patet, quod cum Ciuitates Gentium totæ conciderint, huius tantum duæ partes, quæ minùs firmiter fuerant ædificatæ, & separabant tres reliquas ab inuicem, dirutæ sunt. Et si locus est coniecturis, cum Iudæi habeant prophetias de excidio mundi per ignem, imitati Patres suos qui turrim Babylonis usque ad nubium altitudinem metu alterius diluuii eleuare cogitauerunt;

76 APPEN. DE CONSUM. ECCLES.
ipsi Ciuitatem suam ex lateribus &
lapidibus contra vim ignis munire
conabuntur.

SECTION XVIII.

*Enarratio historiae Capitum decimi
noni & vicesimi.*

EXcisâ Hierosolymâ, Bestia cum
suis Regibus ad extinguendos
Christi sectatores conuertetur: & su-
perueniente die Iudicij per flammâs
cælo præcipitatas in aduentu Iudicij
impedietur. Hæc decimo nono &
vicesimo capite describuntur. Eadem
enim est historia, etsi bis repetita, ut
Antichristo & Draconi singulæ Ca-
tastrophæ redderentur. Pater enim
in utroque Capite procedere Chri-
stum ad iudicium; etsi primò tan-
quam *exercitus ducem*; posteriùs tan-
quam *iudicem*; id est, primò ad ex-
cidium, secundò ad iudicium; quæ
simul futura sunt. Diabolus quo-
que, cum nihil nisi per homines fa-
ciat, eadem intelligenda est Congre-

ratio *Gog & Magog*, quæ prius decem Regum per spiritus missos in orbem. *Castra* autem *Sanctorum*, & *Ciuitas dilecta*, sicut & nomina *Gog & Magog*; translata sunt ex persecutione Antiochi factâ contra Machabæos; quæ fuit figura huius, & in quâ Prophetæ etiam hanc prælocuti sunt. Vnde etiam habes inuitationem eandem *animam*, quam in Ezechiele, quæ ad apparatus spectat.

Et cætera quidem nihil specialis difficultatis continere videntur. Quæ autem narrantur de *Diabolo catenato*, & regno Sanctorum *per mille annos*; monendum est gesta quidem esse tertiâ ætate; Sed hic narrari, quia Capite duodecimo omissa fuerant: vbi propter narrationis decorem perpetuata est historia malitiæ Diaboli vsque ad Antichristum, vt melius videretur causarum inter se connexio. Hic itaque, vbi resumitur specialis historia actorum ipsius, etiam hoc commemoratur. Et quæ adduntur de *resurrectione mortuorum*, ad pacem illius ætatis spectant. Quod ex ipsis verbis manifestum est. Explica-

tur enim quòd solummodo *anima* *Martyrum* vixerint. Quæ clarè significant, non fuisse aliquam corporum resurrectionem, Rursus quod *datis* *sint illis sedes & iudicium, & regnum cum Christo.* Quare patet hæc significare non aliquam Beatitudinem quâ ipsi Beati sint, sed quid fecerit respectu aliorum: scilicet quod fuerint quasi regula & norma actionum alijs. Tertio cum dicitur quòd *cum Christo regnent;* non potest aliud significare quàm sicut ipse. Qui itaque hæc trahunt ad materialia, debent consequenter existimare quòd Christus etiam nunc in cælo epuletur, & perfruatur voluptatibus corporeis.

. Neque refert quòd inter martyres computentur etiam illi *qui non adoraverunt bestiam, neque acceperunt characterem ipsius,* qui vixerunt post tertiam ætatem. Per hoc enim significatur, hoc regnum non esse aliquod particulate præmium; sed quiddam omnibus martyribus, id est, perfectis in charitate, cum exeunt ex hoc corpore (quod maximè notum & insignis est in ijs qui Christi causâ mor-

tem voluntariam obeunt) commune
& congruens : scilicet vt honorentur
& imitationi habeantur ab ijs qui su-
perstites sunt ; quod est regnare super
terram.

SECTIO XIX.

*Conclusio per omissionem Capitis
vicesimi primi & Secundi.*

ET sic completa est historia Apo-
calypseos. Quæ enim sequuntur,
tantummodo sunt descriptio fœlici-
tatis sanctorum ; quæ finis est Eccle-
siæ ; & propterea ampliorem & ma-
gis propriam explicationem posce-
bat quam infernus ; qui tamen plu-
ries fuit commemoratus. Sed nihil
difficile continet præter Allegoria-
rum appropriationem ; quam non est
nostri operis explanare. Quod au-
tem Angelus reuelator non acceperit
adorationem ; significat officium
ipsius hæc in reuelatione non fuisse
majus officio ipsius Ioannis , qui ea-
dem reuelaturus erat Ecclesiæ ; sed

30 APPEN. DE CONSUM. ECCLES.
fortassis minus ; & propterea ex hoc
capite præferri se neque patiebatur,
neque merebatur.

CONCLUSIO

*Continens breuem totius operis
periocham.*

Substantia itaque Historiæ Apoca-
lypticæ continetur quatuor vel
quinque septenarijs (si etiam Proë-
mialis hebdomas computetur) &
historiâ consummationis mundi; quæ
continet historias Ecclesiæ, seu Ci-
uitatis Dei, & Ciuitatis mundi in
duabus mulieribus; Diaboli & Anti-
christi; & Enochi & Eliæ; & tandem
iudicij & cælestis Beatitudinis. Et
hoc quidem quasi per se & vltimò
narratur: cætera propter varietatem
& connexionem permiscentur, &
quædam quasi extra sua loca narran-
tur. Vt fuga Ecclesiæ capite duodeci-
mo; quæ tamen facta est Antichristi
tempore; sicut & cædes duorum Pro-
phetarum; Historia Ciuitatis mundi

C O N C L U S I O. 81

Capite decimo septimo, & sequentibus, quæ in excisione Hierosolymitanæ vrbs facta est; etsi sub Antichristo & Diabolo in eorum ruinis perfecta & consummata est. Tandem Capite decimo nono reducitur ad consummanda omnia Eques in equo albo, qui emissus erat ad vincendum vincens & consummans. Et sic vides historiam ad sua principia feliciter rediuisse.

Quæ inter hæc toto libro miscentur, Apparatus & chororum claram speciem habent; & Poëmati visionario (quale hoc est) mirè congruunt. Stylus libri propriissimus est, & naturalissimus, qualis necessarius est, vbi animus totus ad mysteria intelligenda debet esse intentus; Et quæ Poëtices omnino proprius est; vt in Homero apparet, in quo licet incultissimus, summè tamen delectabilis est propter ingenuitatem.

Non itaque prorsus inintelligibilis est hic liber, sed indiget acri & penetrabili ingenio, & solido iudicio (etiam cùm explicatissimus fuerit) ad connexionem & ænigmatum so-

lutionem approbandam. Interea per
ingentem ipsius exterioris cortici
ostentationem, nunquam caruit vel
carebit illo fructu qui ex terrore de
futuris malis impresso hominum ani
mis expectatur, & Ecclesie est neces
sarius: Et propter quem pronuncia
tur, *Beatus qui servat verba Prophe
cie Libri huius.* Amen.

FINIS.

EMENDA SIC EMENDATA
IN TOMO SECVNDO.

PAge 1. lin. 5. **LIBER PRIMVS, LIBER QVINTVS**, & sic per totum librum, pag. 27. lin. 6. regatur regantur, pag. 85. lin. 3. remi rem, pag. 87. lin. 5. **LIBER II. LIBER VI.** & sic per totum librum. pag. 122. lin. 1. quod quod, pag. 159. lin. 21. esse &.: potest esse: & potest, pag. 187. lin. 18. manifestatum manifestatam, pag. 201. lin. 5. **LIBER III. LIBER VII.** & sic per totum librum, pag. 213. lin. 17. *daba telo- quidabat eloqui*, pag. 214. lin. 3. sequidem liquidem, pag. 216. lin. 25. cum cum pag. 295. lin. 20. peccato paccatum, pag. 338. lin. 14. iessendi essendi, pag. 338. lin. 19. n aliquotis in aliquotis pag. 340 lin. 11 si homines si omnes homines pag. 342. lin. 1. velle vellet pag. 343. lin. 2. impossibilia incompossibilia, pag. 346. lin. 20. imagi- nantur imaginentur pag. 351. lin. 23. am- pliorum ampliorem.